


sc. sup. 23. pl. 3.







D. LUDOVICI HABERT,
Sacræ Facultatis Parisiensis Doctoris, Theologi,
& Socii Sorbonici,

THEOLOGIA
DOGMATICA ET MORALIS,
Ad usum
SEMINARII CATALAUNENSIS.
Planissima, Critica, & solidissima Methodo
conscripta,

Nunc verò
Ad usum totius Orbis litterarii

Post Editiones Parisiensem & Venetam
in Germania denuò recusa,
in VIII. TOMOS divisa

plurimis Mendis sollicitè purgata.

TOMUS II.

Continens Tractatus
DE INCARNATIONE, ET
DE GRATIA CHRISTI.

Editio prima in Germania.

Superiorum Permissu.

AUGUSTÆ VINDELICORUM,
Sumptibus MATTHÆI RIEGER, Bibliopolæ,
M DCC LI.







I N D E X C A P I T U M.

Tractatus DE INCARNATIONE.

Caput I. *Definitur Mysterium Incarnationis, explicaturque definitio, & ex accurata illius explicatione consecutaria directe & certo eruuntur, i. in Christo duas esse naturas,*

INDEX CAPITUM.

ras, & unicam personam, pag. 3. seqq. singularem esse humanæ naturæ dignitatem, sanctitatem, & impeccantiam, p. 16. seqq. 3. Christum unico, eoque supremo cultu esse adorandum, p. 22. seqq. 4. Admittendam esse in Christo communicationem idiomatum, pro qua certæ figuntur regulæ, p. 18. 5. Christum non debere dici creaturam, aut servum, p. 21. sed esse naturalem Dei Filium, ut homo est; etiam ab instanti conceptionis, p. 23. ac proinde Beatam Virginem verè & propriè esse Deiparam, p. 27. Additur Corollarium in gratiam Catechistarum. 29

Cap. II. *Ostenditur notitiam Mysterii Incarnationis esse necessariam necessitate medii.* 31

Cap. III. *Possibilitas Mysterii Incarnationis demonstrari non potest, nisi negativè.* 43

Cap. IV. *Efficaciter probatur contra Gentiles, Mysterium Incarnationis in Christo esse impletum, Christianamque Religionem esse Divinam.* 51

Cap. V. *Eadem veritas contra Judæos asseritur.* 75

§. I. *Exponuntur Prophetiæ, quæ venturi Messiae tempus præfigunt.* 76

§. II.





INDEX CAPITUM.

§. II. *Ostenditur consensus Evangelii cum Libris Prophetarum.* Pag. 100

Cap. VI. *Refelluntur Hæretici, qui negaverunt in Christo, 1. veram carnem, pag. 104. seq. 2. passibilem, p. 107. 3. desumptam ex Maria Virgine ante partum, in partu, & post partum, p. 113. 4. animam rationalem, p. 118. 5. unionem factam in persona, p. 120. 6. duas in Christo naturas. 132. seq.*

Cap. VII. *De multiplici Christi scientia, virtutibus, & aliarum gratiarum donis.* 146

Cap. VIII. *De Christi merito.* 157

Cap. IX. *Utrum Christus sibi meruerit, & quæ?* 164

Cap. X. *Utrum aliis meruerit, quibus, & quæ?* 173

Cap. XI. *Utrum Christus propriè satisfecerit pro omnibus peccatis?* 178

Cap. XII. *An, & quomodo satisfactio Christi fuerit necessaria?* 188

INDEX CAPITUM.

Cap. XIII. *Utrum satisfactio Christi fuerit offensa æquivalens?* Pag. 197

Cap. XIV. *Utrum satisfactio Christi fuerit ex iustitia propriè dicta?* 203

Cap. XV. *Utrum Christus pro omnibus & singulis hominibus sit mortuus?* 209

§. I. *Refelluntur errores.* 211

§. II. *Statuitur Doctrina Catholica.* 223

Cap. XVI. *De Titulis Christo competentibus.* 232

§. I. *Christus est Caput hominum, & Angelorum.* 233

§. II. *Christus est Sacerdos.* 238

§. III. *Christus est Rex.* 242

§. IV. *Christus est Legislatus.* 247

§. V. *Christus est Judex.* 249

§. VI.

§. VI. *Christus est perfectus Dei, & hominum Mediator.* Pag. 252

Appendix.

DE

CULTU, ET INVOCATIONE SANCTORUM, AC DE VENERATIONE RELIQUIARUM, ET SANCTARUM IMAGINUM.

Caput I. *Texitur Catalogus Hæreticorum, qui in hac parte à vero recesserunt.* 256

Cap. II. *Exponitur Ecclesiæ doctrina circa cultum Sanctorum.* 266

Cap. III. *An, & quomodo Sancti sint invocandi?* 282

INDEX CAPITUM.

Cap. IV. *An, & quomodo Sanctorum reliquiae
sint venerandae?* Pag. 290

Cap. V. *Utrum crux Christi Domini, sive vera,
sive picta, & sculpta, sit honoranda?* 295

Cap. VI. *Utrum Imagines pingere, & honorare
liceat, & quomodo?* 299

Tractatus

DE

GRATIA CHRISTI.

Caput I. *De varia Gratiae Acceptione.*
321

Cap. II. *De Divisione Gratiae Christi.* 327

§. Prior. *De Gratia gratis data.* *ibid.*

§. Poste-

INDEX CAPITUM.

§. Posterior. *De Nomine & Divisione Gratiae
gratum facientis.* Pag. 332

Cap. III. *Referuntur præcipui errores contra gra-
tiam Christi.* 340

§. I. *De antiquioribus gratiae Christi hosti-
bus.* ibid.

§. II. *De Pelagianis.* 341

§. III. *De Semipelagianis.* 342

§. IV. *De Prædestinarianis.* 344

§. V. *De Lutheranis & Calvinianis.* 346

§. VI. *De Bajo . ac de possibilitate naturæ
puræ.* 351

§. VII. *De Jansenio.* 360

INDEX CAPITUM.

Cap. IV. *De Gratia habituali.*

Pag. 380

§. I. *De Nomine, Existentia, & Essentia Gratiae sanctificantis*, pag. 381. *an sit quid intrinsecè inbærens*, p. 382. *an permanenter*, p. 385. *an distinguatur à charitate*, p. 389. *an formaliter reddat hominem justum, & quomodo possit illum sic immutare?* 391

§. II. *De Virtutibus infusis, quid & quotuplicis sint generis*, pag. 402. & 403. *Et utrum omnes in justificatione infundantur?* 411

§. III. *De Donis Spiritus Sancti, an & quomodo à virtutibus infusis, à fructibus Spiritus Sancti, & ab octo Beatitudinibus distinguantur? Quot sint, & an omnia semper virtutes infusas comitentur?* 417

§. IV. *De Dispositionibus ad justificationem.* 430

§. V. *Utrum sola Fides justificet?* 434

§. VI.

INDEX CAPITUM.

§. VI. *Quæ tandem dispositio adultis necessaria est ad justificationem?* Pag. 438

§. VII. *Utrum peccator solis liberi arbitrii viribus possit se disponere ad justificationem?*
442

§. VIII. *Utrum quis possit certò scire se remissionem peccatorum, & gratiam justificantem esse consecutum?*
449

§. IX. *Utrum justus gratiam sanctificantem amittere possit?* 463

§. X. *Utrum gratia sanctificans sit æqualis in omnibus justis?*
468

§. XI. *Utrum gratia sanctificans sit necessaria?* 471

Cap. V. *De Gratia actuali.* 478

§. I. *De Necessitate Gratiae actualis.* 479

§. II.

INDEX CAPITUM.

§. II. *Utrum infideles absque gratia possint vel-
le, & facere aliquod opus naturaliter bo-
num, tum ex objecto, tum ex fine, & cir-
cumstantiis?* Pag. 499

§. III. *Utrum justus, gratiae auxilio, vi-
tare possit omnia & singula peccata venia-
lia?* 509

§. IV. *De Gratiae actualis Divisione.* 515

Cap. VI. *De Gratia efficaci.* 528

§. I. *Utrum detur in hoc statu?* ibid.

§. II. *In quo consistat efficacia gratiae effica-
cis?* 529

§. III. *Utrum Gratia efficax necessitet?* 534

§. IV. *Utrum efficacia gratiae repetatur à con-
sensu, sive ab eventu?* 543

§. V. *Utrum efficacia gratiae reponenda sit in
circumstantiis magis congruis?* 552

§. VI.

INDEX CAPITUM.

§. VI. *Utrum efficacia gratiæ sita sit in præ-
motione physica?* Pag. 557

§. VII. *Utrum efficacia gratiæ consistat in de-
lectatione victrici?* 560

Resolvitur quæstio. 574

Solvuntur Objectiones. 597

Cap. VII. *De Gratia sufficienti.* 627

§. I. *Utrum in statu naturæ lapsæ detur gra-
tia sufficiens?* ibid.

§. II. *Utrum Gratia sufficiens aliquando ha-
beat effectum?* 643

Solvuntur Objectiones. 662

§. III. *Utrum Gratia sufficiens detur omnibus
iustis?* 680

§. IV. *Utrum detur gratia sufficiens omnibus
omnino hominibus, sive prædestinatis, sive
reprobis?* 687

§. V. *De variis interpretationibus verborum
Apostoli, 1. Tim. 2.* 688

§. VI.

INDEX CAPITUM.

§. VI. <i>Deus ex Apostolo, 1. Tim. 2. vult antecedente voluntate beneplaciti omnes & singulos homines salvos fieri.</i>	Pag. 697
§. VII. <i>Utrum Deus ex antecedente voluntate salvandi omnes homines, non solum præparaverit, sed etiam actu conferat gratiam sufficientem infidelibus negativis, & fidelibus induratis?</i>	704
§. VIII. <i>De induratis.</i>	709
§. IX. <i>Utrum indurati in hypotthesi primæ sententiæ quod careant omni gratiæ auxilio, præcepta liberè violent, novumque reatum culpæ & poenæ contrahant?</i>	719
Cap. VIII. <i>De Effectibus Gratiæ.</i>	723
<i>Monitum.</i>	726



Tra-



Tractatus

D E

VERBI DIVINI INCARNATIONE.

P R Æ F A T I O.

Jam ab ipso hujusce Tractatus initio, operæ pretium fuerit, sacræ doctrinæ studiosos admonere, nemini fas esse ad illud longè maximum pietatis Sacramentum accedere, nisi qui terrenis affectibus solutus erit. Ideo enim *Apparuit . . . gratia Dei Salvatoris nostri, ut abnegantes impietatem & sæcularia desideria, sobriè & justè & piè vivamus in hoc sæculo, expectantes beatam spem, & adventum gloriæ magni Dei & Salvatoris nostri Jesu Christi: ad Tit. 2.* Hinc
D. Habert Theolog. Tom. II. A idem

idem testatur Apostolus, 2. Cor. 5. se nosse neminem *secundum carnem*: id est, interpretibus S. Chrysostomo, Theodoro, & aliis, nihili facere se quæcunque mortalem hanc vitam spectant, putà humanas amicitias, cognationes, famam, honores, voluptates. Quapropter, si alibi turpis est curiositas aut vanitas, juxta S. Bernardum, hoc est, velle scire tantum ut scias, vel ut sciaris, damnabilem hinc eam dicere liceat, cum ipsemet Apostolus in eos Anathema pronunciet, qui magnum illud pietatis Sacramentum frigidi recolunt, aut addiscunt. *Si quis non amat*, inquit 1 Cor. 16. *Dominum nostrum Jesum Christum, sit anathema, Maran-Atha*, id est, Dominus noster venit, sive veniet, ad puniendum eum. In hac igitur exercitatione id unum quisque intendat, mente ad Deum suspensa, quia scientiarum Dominus est, *ut . . . jam non sibi vivant, sed ei qui pro ipsis mortuus est* 2. Cor. 5.

Ordinem autem hætenus à nobis observatum hinc retinebimus, quæremusque, 1. Quid sit Mysterium Incarnationis. 2. An sit possibile. 3. An fuerit peractum & quomodo. 4. Quæ sint attributa Christi Domini. 5. Quæ sit Incarnationis causa, sive finalis. sive efficiens. 6. An Sanctos & eorum imagines, reliquiasque colere liceat.

CAPVT I.

Quid est Myſterium Incarnationis?

R. **I**NCARNATIO ſecundum vim nominis, idem eſt ac unio Verbi divini cum carne, juxta illud Joan. 1. *Verbum caro factum eſt*, ubi pars ſumitur pro toto, ut Genef. 6. *omnis quippe caro corruperat viam ſuam*. Iſa. 6. *Sciet omnis caro, quia ego Dominus*. Et Luc. 49. *Videbit omnis caro ſalutare Dei*. Cum autem Apollinariftæ ex laudato Joan. textu aſſerent, ſolam carnem ſine anima fuiſſe à Verbo aſſumptam, apud veteres Scriptores Græcos, pro Incarnatione legitur Inhumanatio, hoc eſt, unio Verbi cum natura humana.

Definiri poteſt Incarnatio, Primarium Religionis Chriſtianæ myſterium, quo Verbum divinum aſſumpſit naturam humanam veram & integram; in unitatem perſonæ, ad redimendum genus humanum.

Dicitur 1. *Primarium myſterium*; nam ex Apoſtolo 1. Cor. 3. *Fundamentum . . . aliud nemo poteſt ponere, præter id quod poſitum eſt quod eſt Chriſtus Jeſus*. Et Iſa. 28. v. 16. *Ecce ego mittam in fundamentis Sion lapidem; lapidem probatum, angularem, pretioſum*: maluit autem Evangeliſta ſcribere Verbum caro, quàm homo, factum eſt, tum quia caro, ut potè magis diſtans à Verbo, *minus aſſumptibilis videbatur*, ut loquitur S. Thomas qu. 5. art. 3. ad primum; tum quia magis commendatur humilitatis dilectio, qua Deus ſe uſque ad carnem demiſit, Ita S. Auguſtinus lib. 83. quæſt. 80.

Dicitur 2. *Verbum divinum*. contra Sabellianos & alios Hæreticos, qui cum Sanctiſſimæ Trinitatis perſonas non diſtinguerent, docuerunt Patrem fuiſſe

fuisse incarnatum, contra disertissima Scripturæ verba, Joan. 3. *Sic . . . Deus dilexit mundum, ut Filium suum unigenitum daret; & cap. 16. Exiivi à Patre.*

Potuit quidem incarnari Pater, sicut & Filius, & Spiritus Sanctus; quia omnipotentia illis est communis, & virtus terminandi alienam naturam æqualis. Nec deberet videri id absurdum, quòd prima Persona incarnata esset Pater & Filius, cùm idem homo plerumque sit subiectum duplicis hujusce relationis sub diverso respectu: David quippe est filius Isai, & pater Salomonis: sic prima persona esset pater ratione æternæ generationis, & filius hominis ratione humanæ natiuitatis.

Conveniebat autem Filium potius incarnari, quàm Patrem aut Spiritum Sanctum. 1. Quia sicut per Verbum omnia facta sunt, sic per illud reparanda videbantur; *nam & artifex*, inquit S. Thomas quæst. 3. art. 8. *per formam artis conceptam, qua artificiatum condidit, ipsum, si collapsum fuerit, restaurat.* 2. Quia sapientia, quæ est hominis perfectio, à Deo derivatur per verbum illius, sicut scientia discipuli per verbum magistri. Hinc dicitur Eccli. 1. *Fons Sapientiæ verbum Dei in excelsis.* Et Joan. 1. *Erat lux vera quæ illuminat omnem hominem venientem in hunc mundum.*

Dicitur 3. *Assumpsit*, hoc est, sibi univit, sibi sumpsit. Tres quidem Personæ concurrerunt ad uniendam naturam humanam cum Verbo; quia unio illa, cùm sit opus ad extra & effectus omnipotentiae divinæ, communis est & Patri, Psal. 39. *Corpus . . . aptasti mihi*, juxta Septuaginta Interpretes & Apostolum Heb. 10. & Filio, Philip. 2. *Semetipsum exinanivit formam servi accipiens: & Spi-*
ritu-

ritu Sancto Luc. 1. *Spiritus Sanctus superveniet in te.* Attamen unio ad solam Filii personam terminata est. Unde solus naturam humanam assumpsit, quemadmodum is qui vestem induit, solus dicitur illam assumere, quamvis alii cum ipso concurrant ad illam aptandam & circumponendam.

Dicitur 4. *Naturam humanam*, non verò hominem, quia homo est nomen concretum, compositum ex natura & substantia, seu personalitate, idemque significat ac habens naturam humanam: atque natura humana prius non fuit subsistens subsistentia humana, quàm à Verbo assumeretur; sed simul fuit producta & unita Verbo, ut constanter docent Sancti Patres contra Paulum Samosatenum, Photinum, & Nestorium definientes, Christum prius fuisse hominem perfectum, & deinceps promeruisse ut Deus fieret. S. Athanasius libello de Incarnatione, ait: *Carnis adinatio cum divinitate Verbi, ex utero facta est non quidem ut ante verbi adventum extiterit.* Sanctus Augustinus lib. 15. de Trinit. cap. 17. *Ex quo homo esse cœpit, ex illo est & Deus.* S. Leo epistol. 11. *Natura nostra, inquit, non sic assumpta est, ut prius creata, post assumeretur; sed ut ipsa assumptione crearetur.* Colligiturque ex capite 1. Lucæ, ubi sic Angelus Beatam Virginem affatur. *Spiritus Sanctus superveniet in te, & virtus Altissimi obumbrabit tibi; ideoque & quod nascetur ex te Sanctum; vocabitur Filius Dei:* ubi Christus dicitur Filius Dei non adoptivus, sed naturalis, ex eo quòd de Spiritu Sancto fuerit conceptus. Equidem nonnulli è veteribus scripserunt Verbum assumpsisse hominem; quia inquit S. Thomas q. 4. art. 3. ad primum, *assumptio ter-*

minata est ad hoc, ut Filius Dei sit homo; sed ille loquendi modus est omnino improprius, nec eo utilis licet propter Hæreticos, qui sic errorem suum exprimunt.

Dicitur 5. *Naturam humanam veram*, contra Hæreticos asserentes, Verbum specie tenus sumpsisse naturam humanam. Tales erant Marcionistæ, Manichæi, Priscillianistæ, & ante eos Simon Magus & ejus discipuli, quos perstringit S. Joannes 1. epist. c. 4. his verbis: *Multi Pseudoprophetæ exierunt in mundum, in hoc cognoscitur Spiritus Dei. Omnis spiritus, qui confitetur Iesum Christum in carne venisse, ex Deo est. Et omnis spiritus qui solvit Jesum* (Græcè qui non confitetur Iesum Christum in carne venisse) *ex Deo non est, hic Antichristus.*

Dicitur 6. *integram naturam*, contra Hæreticos, quorum alii negaverunt assumpsisse animam; ut Apollinaristæ; alii carnem anima retenta, ut Marcion. *Totus toti unitus est*, inquit S. Joannes Damascenus lib. 3. orthodoxæ fidei cap. 6. *ut toti mihi salutem largiretur, quod enim assumptum est, incurabile est.*

Dicitur 7. *in unitatem personæ*: quibus verbis duplex error proscribitur. 1. Eutychetis, qui docuit, naturam humanam assumptam fuisse in unitate naturæ, unionemque factam non in persona, sed in natura; ex quo errore manifestè sequeretur, tres Personas fuisse incarnatas, cum natura divina sit eis communis. Secundus error est Nestorii, qui asseruit in Christo duas esse personas sicut & naturas, divinam scilicet, & humanam, moraliter tantum unitas, nimirum per gratiam accidentalem & adoptionis.

Dices: Verbum ex dictis assumpsit naturam humanam integram, atqui natura humana non est integra

integra sine subsistentia seu personalitate: ergo Verbum assumpsit ipsam subsistentiam humanam: ergo in Christo sunt duæ subsistentiæ, seu personalitates, ac proinde duæ personæ.

Nego minorem, nam subsistentia non pertinet ad integritatem naturæ; sed supponit naturam integram & completam, cum naturæ incompletæ, sicut anima, non sint capaces subsistentiæ. Subsistentia itaque est modus substantialis, quo natura jam completa est incommunicabilis alteri, existitque in se & non in altero.

Q. 1. *In quo consistit substantialis ille modus?*

Quoniam hæc quæstio spectet Philosophorum scholas, quia tamen ejus solutio huic tractatui lumen affert,

Resp. Alii contendunt subsistentiam nihil aliud esse quam negationem unionis cum alio.

Refelluntur, quia subsistentia in omnium sententia est ultima substantiæ perfectio & complementum: atqui mera negatio, cum sit nihil; non potest dici perfectio aut complementum: Ergo.

Alii docent, non esse quidem substantiam, sed modum substantialem realiter à substantia completa distinctum, quo ipsa substantia est in se tota & incommunicabilis alteri.

Contra, ille modus inanis est & fictitius, cum sine illo natura possit in se existere tota & incommunicabilis alteri, ut patebit ex sententia mox explicanda.

Tertia itaque sententia affirmat, subsistentiam entitativè esse ipsammet naturam integram & completam, formaliter verò esse totalitatem, seu rationem totius & existentiam in se: quod explicatur exemplo guttæ aquæ, quæ separata habet propriam subsistentiam; quia est substantia com-

pleta in se tota, & non existens in alio: si verò uniatur aliis guttis, evadit pars alicujus totius, sicque amittit suam totalitatem & subsistentiam propriam, absque ullius entitatis deperditione. Unde sic conficitur argumentum. Subsistentia est id, per quod natura intelligitur ultimò completa & incommunicabilis alteri: atqui per illam totalitatem natura intelligitur ultimò completa (totum siquidem & completum sunt termini synonymi) & incommunicabilis alteri: si enim communicaretur, fieret pars & desineret esse tota: ergo subsistentia est ipsa totalitas substantiæ completæ & in se existentis.

Ergo, inquires, Verbum assumpsit personam humanam; assumpsit enim totam naturam humanam.

Nego sequelam, cujus confirmationem distinguo. Verbum assumpsit naturam totam; totam, inquam, in ratione naturæ, Concedo: totam in ratione personæ & subsistentis, Nego. Verbum quidem assumpsit quidquid pertinet ad essentiam & integritatem naturæ humanæ; sed illa integritas non est totalitas, quam diximus esse subsistentiam; ad hanc enim requiritur ut natura sit integra, existat in se & non in alio digniori, ut videre est in allato guttæ exemplo; illa siquidem est substantia completa & tota, atque ideo subsistens: si autem aliis uniatur, quamvis nihil de sua substantia deperdat, nihilominus non subsistit propria subsistentia; sed subsistentia totius, cujus facta est pars. Similiter natura humana in hypothese, falsa quidem, quòd extitisset ante unionem hypostaticam, fuisset sanè subsistens subsistentia propria & humana: quia extitisset in se tota

tota; amisisset verò suam subsistentiam & personalitatem, hoc ipso, quò substantialiter fuisset unita Verbo, non per deductionem alicujus entitatis, sed per adjectionem novæ perfectionis, ratione cujus non extitisset amplius in se tota, quemadmodum de facto non existit, nec unquam extitit, cum à primo instanti conceptionis fuerit unita Verbo, quod consumpsit ejus subsistentiam, ut loquuntur Sancti Patres, non detrahendo, sed communicando seipsum, Sancto Thoma interprete quæst. 4. artic. 2. ad 3.

Urgebis: ex illa responsione sequitur, per unionem hypostaticam Verbum æquè amisisse suam subsistentiam & personalitatem divinam; quemadmodum si uniantur duæ guttæ aquæ, neutra retinet suam subsistentiam, cum neutra habeat rationem totius, sed ambæ componant novum ali-quod totum; atqui falsum & impium illud antecedens; ergo & consequens.

Nego sequelam majoris, & paritatem, in illius confirmationem adductam. Ratio disparitatis est, quòd naturæ creatæ, cum sunt finitæ, non possint substantialiter uniri, quin efficiant compositum perfectius se ipsis separatis. Quocirca in illa compositione se habent ut partes, quibus subsistentia, quam diximus totalitatem, non competit; sed soli composito ex illis naturis conflato; cum habeat rationem totius, & totalitas ipsum spectet, nullatenus verò ejus partes. At Verbum infinitum in omni genere perfectionis per unionem hypostaticam cum natura humana non perficitur; sed illam miro & ineffabili modo perficit: ex quo sequitur Verbum stante unionem hypostatica, se habere ut totum, ac proinde reti-

nere suam subsistentiam; naturam verò humanam ut partem, ac consequenter non subsistere propria subsistentia, sed subsistentia Verbi. Hinc facile solvitur alia quæstio quæ movetur in scholis, utrum scilicet persona Christi possit dici composita. Nam si persona sumatur in abstracto pro ipsa personalitate, seu subsistentia, certum est non esse compositam; Verbum enim est quid longè purissimum & simplicissimum; si autem persona accipitur in concreto pro supposito, quod est Christus Dominus, constans ex duabus naturis, una personalitate divina subsistentibus, verè scripserunt nonnulli ex Veteribus esse compositam, sed compositione singulari, quia sine exemplo, quæ idcirco vocatur in schola compositio cum his, non verò compositio ex his. Cujus effati sensus est, Christum esse unum totum, non per accidens; quia in toto per accidens partes vel non uniuntur, ut in ærervo tritici aut arenæ; vel uniuntur solum accidentaliter, putà secundum quantitatem, quemadmodum furculus frugifer unitur trunco agresti. In Christo verò natura humana substantialiter unitur Verbo, & ab eo perficitur; atque eatenus censetur pars Christi propriè dicta, sed non vicissim Verbum; quia cum ex illa unione non perficiatur, retinet rationem totius, nec pars propriè dici potest. Unde cum Verbum & natura humana ex æquo non se habeant in Christo, Schola docet Christum compositum esse cum his, non verò ex his.

Urgebis iterum; subsistentia hoc modo explicata nihil aliud præcisè est, quàm negatio unionis: quia hoc ipso natura completa, est subsistens, quo non unitur alteri.

Nego,

Nego ; quemadmodum enim ratio constituti-
va quantitatis bipedalis non est negatio tertii pe-
dis, sed ipsa extensio ad duos pedes præcisè, quos
sequitur negatio tertii pedis ; sic aquæ gutta ha-
bet subsistentiam ; quia est in se tota : totalitas
autem illa est quid positivum, connotans equi-
dem negationem ulterioris perfectionis, sed tan-
quam aliquid consequens & naturæ subsistenti ex-
trinsecum.

Dicitur ultimò, *ad redimendum genus humanum*,
ut significetur, Incarnationis opus totum in usus
nostros fuisse peractum ; nam & *Filius hominis non
venit ut ministretur ei, sed ut ministraret, & daret ani-
mam suam redemptionem pro multis.* Marc. 10. v. 45.

Q. 2. *Verbum assumpsitne naturam communem, an
singularem & individuum ?*

R. Assumpsit singularem, tum quia natura
communis & à singularibus separata fictio est rei
impossibilis, ut advertit S. Joannes Damasce-
nus lib. 3. Orthodoxæ fidei c. 11. tum quia as-
sumpsit naturam existentem propria existentia :
existentia autem est rerum singularium.

Dices : natura humana potuit spoliari propria
subsistentia, quidni & existentia ?

R. Disparitatem esse maximam inter existen-
tiam & subsistentiam ; nam per existentiam res
est extra nihil ; unde si spoliatur sua existentia,
redit in nihilum ex quoeducta est : per subsisten-
tiam verò præcisè habet quòd sit tota in se : non
repugnat autem eandem rem, quæ fuit aut po-
tuit esse in se tota, existere in alio.

Inde colliges productionem humanæ Christi
naturæ, & unionem ejus cum Verbo esse duas
actiones, quæ simul concurrerunt ; namque pro-
ductio

ductio præcisè terminatur ad existentiam, qua naturaeducta est ex nihilo : unio verò ad unionem ejusdem naturæ cum Verbo.

Q. 3. *Quid est illa unio ?*

R. Alii volunt esse modum substantialem, ac veluti gluten ab extremis unitis realiter distinctum, quo natura humana cum Verbo conjungitur. Alii docent, & quidem melius, ut nobis videtur, esse realiter ipsamet extrema unita; nec ab iis distingui nisi per mentem, sicut enim in physicis anima rationalis sine entitate modali hoc ipso quo applicatur corpori organizato & disposito, illi unitur tanquam ejus forma; quia per se habet virtutem informandi, & corpus aptitudinem ut informetur : sic in hoc mysterio Verbum per se habet vim infinitam terminandi, natura verò humana potentiam obedientialem, qua subest omnipotentia divina ad recipiendum quemlibet motum.

Dices : unio est vera actio : ergo per eam aliquis terminus producitur. Atqui terminus ille productus neque est Verbum; cum sit æternum : neque humanitas, quia ex dictis non producitur per unionem, ergo est ipsa unio, ac proinde unio est entitas ab extremis distincta.

Distinguo antecedens, unio est vera actio unitiva, Concedo : productiva, Nego antecedens, ac proinde non respondet illi terminus productus, sed terminus unitus.

Q. 4. *Quis est terminus illius unitiois ?*

R. Terminus qui & totalis, est Christus Dominus, Deus & homo; quia est totum exurgens ex unione hypostatica : terminus verò quo & formalis, est humanitas, ut terminata & unita; quia

quia per unionem supernaturaliter elevata, actu & de facto personæ divinæ conjungitur; & in ea subsistit.

Q. 5. *Unio hypostatica estne omnium maxima?*

R. Est; Quia illa unio est omnium unionum maxima, per quam extrema infinitè distantia conveniunt in unum simplicissimum: atqui per unionem hypostaticam natura divina & natura humana, quæ infinitè distant à se invicem, conveniunt in unitatem personæ simplicissimæ; nam Verbum non est persona composita, sicut homo componitur ex anima rationali & corpore; sed est quid simplicissimum & maximè unum: ergo unio hypostatica est omnium maxima, ac proinde major unione animæ rationalis cum corpore.

Q. 6. *Estne indissolubilis illa unio?*

R. Est omnino, ex Concilio Chalcedonensi in professione fidei, in qua dicitur utraque Christi natura in unam eandemque personam convenisse indivisibiliter & inseparabiliter. Quibus verbis percelluntur varii errores: 1. Origenis, qui docuit interitura aliquando corpora, nec in cælo regnatura, propter illud Apostoli malè intellectum, *Caro & sanguis regnum Dei possidere non possunt*, 1. Cor. 15. ac proinde naturam humanam à Verbo dimittendam. Ita referunt Theophilus Alexandrinus epistola Paschali secunda; & S. Hieronymus epist. 69. ad Avitum. 2. Marcelli Ancyрани, qui ex Eusebio lib. 3. Ecclesiasticæ Historiæ, ita intellexit hæc Apostoli verba 1. Cor. 15. *deinde finis, cum tradiderit (Christus) regnum Deo & Patri*, ut post judicii diem expleto jam Christi officio, natura humana in nihilum sit reditura. 3. eorum qui existimarunt, Verbum à Corpore Christi

sti triduo mortis recessisse, ut sensisse videntur Tertullianus lib. contra Praxeam c. 30. S. Hilarius can. 33. in Matth. & S. Ambrosius lib. 10. in Lucam.

Probatur 1. Catholica sententia ex Scripturis, Rom. 6. *Christus resurgens ex mortuis jam non moritur, mors illi ultra non dominabitur.* Hebr. 7. *Hic autem, ed quod maneat in æternum, sempiternum habet sacerdotium.* Et c. 13. *Jesus Christus heri, & bodie, ipse & in sæcula.* Joan. 12. Judæorum turba sic loquitur. *Nos audivimus ex lege quia Christus manet in æternum: ex Lege, inquit, nempe Psal. 109. Tu es sacerdos in æternum.* Dan. 7. *Potestas ejus potestas æterna, quæ non auferetur, & regnum ejus, quod non corrumpetur.* Unde Angelus ad beatam Virginem, Luc. 1. *regni ejus non erit finis.*

Probatur 2. ex Traditione: in Symbolo Nicæno & Constantinopolitano sic confitemur,, *Cujus regni non erit finis.* Et in Symbolo Apostolorum, *mortuus & sepultus est, descendit ad inferos.* Porro si Verbum fuit separatum à corpore, aut ab anima, Christus nec sepultus est, sed corpus ejus, nec descendit ad inferos, sed anima ipsius: nam Christus est suppositum & persona. 2. Theophilus Alexandrinus & S. Hieronymus citatis locis ex professo Origenem confutant: Marcellum verò Ancyranum, Eusebius laudato lib. 3. Hist. S. Basilus epist. 52. & S. Cyrillus Jerosolymitanus catechesi 15. 3. S. Augustinus speciatim de triduo mortis hæc habet, c. 14. *Sic in sepulchro carnem suam commoriendo non deseruit, sicut in utero Virginis connascento formavit.* Et S. Leo ferm 17. de Passione, ait duplicem Christi naturam in tantam unitatem convenisse, *ut nec supplicio potuerit dirimi, nec morte sejungi.* Hinc commune Theologorum effatum

ex

ex S. Joanne Damasceno lib. 3. orthod. fidei, aut potius ex ejus Scholiaste, *quod semel Verbum assumpsit, nunquam dimisit.*

Dubium tamen est, utrùm illud axioma extendendum sit ad minimas particulas à Verbo assumptas, v. g. ad præputium in Circumcisione excisum, & ad singulas sanguinis guttas ante & post mortem effusas. Sunt enim Theologi, qui sentiunt Christi sanguinis nonnihil ab ipso in terris relictum, & eo ipso unione hypostatica exutum, sicut & præputium. Cumque hac de re gravis controversia Dominicanos inter & Franciscanos orta esset anno 1462. Pius II. anno 1464. silentium utrique parti imposuit, prohibuitque ne sese erroris nota configerent, donec aliter ab Apostolica Sede definitum foret. Ita Spondanus in hunc annum, testaturque Sylvester in Rosa aurea, se vidisse epistolam ejusdem Summi Pontificis ad Abbatem B. Mariæ Santonensis diœcesis, in qua pronuntiat ita fidei non repugnare, si Christus putetur aliquid è sanguine suo in terris reliquisse; quamvis in contrariam sententiam, quæ erat Dominicanorum, imprimis S. Thomæ q. 54. art. 2. & aliorum, utpotè probabilissimam propensus esset.

Dixi, *aliquid sanguinis*; nam Clemens VI. ante Pium II. definierat, Verbum cum sanguine in passione effuso mansisse unitum, ex Sylvestro in laudato opere, cui titulus est *Rosa aurea*.

Atque ex hac posteriori sententia sequitur, in instrumentis Passionis, quæ religiosè asservantur, ut in corona spinea, in clavis & sindone, non sanguinem, sed colorem sanguineum superesse. Circumferuntur quidem ampullæ tanquam Christi san-

sanguine plenæ; sed sanguis ille fluxit ex imagine à Judæo Berythi confixa. Vide Baronium in Annalibus ad annum 765. & in Martyrologio ad No-nam Novembris.

Ad auctoritatem Patrum, quos supra retuli-mus, videri favere illorum opinioni, qui asserunt, Verbum à corpore Christi demortuo fuisse sejun-ctum; respondendum eos benignè exponi de se-paratione, non quoad substantiam, sed quoad sin-gularem protectionem; *sic dereliquit Filium, dum hominem ejus tradidit in mortem*, inquit Tertullianus cit. cap. 30. contra Praxeam.

Q. 7. *Quo sensu plures è Patribus dixerunt unionem hypostaticam esse naturalem?*

R. Naturalis dicitur, 1. quia est physica, non verò moralis, ut fingeat Nestorius. 2. Quia est à Nativitate seu à conceptione; quo sensu dixit Apostolus Ephes. 2. *Eramus natura filii iræ; sic enim (Christus) conceptus est ex Spiritu sancto*, ait S. Thomas q. 2. art. 12. ad 3. *ut esset idem naturalis Filius Dei & hominis*. Sed naturalis non est, quasi fluat ex principiis naturæ humanæ, sitque perfe-ctio ei debita; certum est enim eam esse perfe-ctionem, quæ substantiarum creaturarum etiam pos-sibilem ordinem excedat.

Q. 8. *Quid perfectionis unio hypostatica confert natura humanæ?*

R. Nullam quidem confert perfectionem essen-tialem, quia ambæ naturæ, divina scilicet & hu-mana, cum suis attributis & proprietatibus ma-nent inconfusæ & impermixtæ. Substantialem tamen tribuit, quatenus per illam unionem Ver-bum divinum est naturæ humanæ ultimum com-plementum, & terminus substantialis, quo fit, ut
natura

natura humana non sit sui juris, sed tam ipsa, quàm ejus potentia, v. g. intellectus & voluntas, sint natura & potentiæ Verbi, quas agat, & per quas operetur. Quemadmodum enim de puro homine propriè non dicitur, oculus ejus videt, intellectus intelligit, sed dicendum est propria locutione, homo qui est suppositum, per oculum videt, per intellectum intelligit, quia actiones sunt suppositorum: sic ubi sermo est de natura assumpta; figurata est locutio, si dicatur, quòd videat, intelligat, aut amet; sed ut fervetur proprietas sermonis, dicendum est, Verbum incarnatum videt, intelligit, amat, scilicet per potentias humanas, quas fecit suas.

Hinc nascitur 1. ineffabilis sanctitas naturæ humanæ, & absoluta impeccantia; quia repugnat Verbum divinum quoquo modo peccare; hominum tamen delicta sua esse dixit Christus Psal. 21. *longè à salute mea verba delictorum meorum*; sed ibi loquitur caput pro membris, sponsor pro iis, pro quibus spondit. Item 2. Cor. 5. dicitur factus pro nobis peccatum; sed eo sensu, quo Osee 4. dicitur, Sacerdotes peccata populi comedere, hoc est hostias pro peccatis oblatas. 2. Communicatio idiomatum, hoc est mutua & reciproca attributorum & proprietatum divinæ & humanæ naturæ de se invicem & de Christo prædicatio, v. g. Deus est homo, homo est Deus: Deus est passus, mortuus: homo est immortalis, æternus. Sed ut in hujusmodi prædicationibus caveatur error,

Observandum est, nomina alia esse abstracta, alia concreta: abstracta solam formam significant, ut divinitas, humanitas, albedo, dulcedo: con-

creta verò formam & subiectum seu suppositum exprimunt, ut Deus, homo, album, dulce; Deus enim sive homo idem est ac habens divinitatem, sive humanitatem; dulce aut album idem ac habens dulcedinem aut albedinem.

Porro ex hac observatione certa statuitur regula, nempe concreta in Christo prædicari de se invicem, v. g. homo est Deus, omnipotens, æternus immensus, & vicissim Deus est passus, sepultus, descendit, ascendit: abstracta verò nec de se invicem, nec de concretis, nec concreta de abstractis prædicari, v. gr. non potest dici, divinitas est humanitas, & vice versa, nec, homo est divinitas, aut omnipotentia facta est infirma, æternitas temporalis. Ratio est quia propositio vera est, ubi prædicatum idem est cum subiecto; falsa verò, ubi diversum: atqui in prædicationibus, in quibus concreta de concretis enuntiantur, prædicatum est idem cum subiecto, v. gr. Deus quod est habens divinitatem, idem est cum homine, quod est habens humanitatem: nam Christus est utrumque, habens divinitatem & humanitatem; fuit etiam habens mortalitatem simul & æternitatem, omnipotentiam & infirmitatem. At humanitas & divinitas, omnipotentia & infirmitas, sunt formæ disparatæ; comparanturque ad concretum velut partes saltem methaphysicæ ad totum; concretum enim, v. g. homo, omnipotens, enuntiatur ut totum habens humanitatem, omnipotentiam: humanitas verò sive omnipotentia est forma & pars methaphysica. Porro non prædicatur propriè pars de toto, nec totum de parte.

Dico propriè, nam figuratè Oratores & Poetæ

tæ nonnunquam sumunt partem pro toto. Hoc sensu canit Ecclesia, quòd vita in ligno mortua fuerit; S. Joannes scripsit, Verbum carnem fuisse factum, & Vigilius lib. 5. contra Eutychetem, Verbum appellat carnem.

Duo insuper hìc advertenda sunt.

Primum, concreta adjectiva à substantivis derivata, ut divinus, humanus, non esse de Christo prædicanda, nec dicendum, Christus est homo divinus, est Deus humanus; quia hujusmodi concreta significant solum aliquam participationem substantiæ, non ipsammet substantiam à qua derivantur. Hinc S. Augustinus lib. 1. Retract. cap. 19. improbat quòd scribens in Psal. 2. vocasset Christus hominem dominicum, cùm debuisset dici, hominem dominum, *quamvis* inquit, *nonnulla possit ratione defendi*. Caro tamen Christi rectè dicitur divina, non verò Deus, quia est pars pertinens ad totum, quod est Deus, quemadmodum attributa naturæ divinæ vocantur divina, v. g. intellectus divinus, omnipotentia divina, Verbum divinum si spectetur ut attributum relativum virtualiter à natura divina distinctum.

Secundum, Prædicationem concretorum falsam esse, si fiat reduplicativè, v. gr. Christus quatenus homo est ubique; sensus enim est, Christum esse ubique secundum naturam humanam, quam impietatem ausi sunt proferre nonnulli Lutherani duce Brentio in apologia pro Confessione Augustana, contra aperta tum Scripturæ, tum Traditionis testimonia, Joan. 11. *Lazarus mortuus est*, inquit Christus, *& gaudeo propter vos, ut credatis, quoniam non eram ibi*. Matth. 28. *Jesum, qui crucifixus est, quæritis; non est hic, surrexit*.

rexit. S. Augustinus epistol. 57. cap. 3. ad Dardanum, de natura Christi humana sic scribit: *secundum hanc formam non est putandus ubique diffusus. . . . Non est consequens, ut quod in Deo est, ita sit ubique ut Deus.*

Dices 1. Natura humana toti Verbo intimè unita est: atqui Verbum est ubique: ergo natura humana est ubique.

R. 1. Concessa majore & minore, Nego consequentiam: argumentum enim non est in forma, cum terminus, ubique, non reperiatur in majore: 2. Distinguo major. intimè unita est inadæquatè, Concedo: adæquatè, Nego majorem. Sic caput intimè unitum est inadæquatè toti animæ rationali, ac propterea se non extendit ad pedes sicut anima.

Dices 2. Natura humana sancta est sanctitate Verbi; quidni & immensa & æterna dicetur æternitate, & immensitate Verbi?


Distinguo anteced. Natura humana sancta est sanctitate Verbi, sanctitate, inquam, derivata & participata, Concedo: sanctitate essentiali, Nego anteced. Equidem ex unione hypostatica derivatur singularis sanctitas in naturam humanam; si enim species Eucharisticæ & vasa sacra sanctitatem moralem hauriunt ex corpore Christi quod continent; quantò magis natura humana ex Verbo, cui ita unitur, ut in eo & per illud subsistat, ipsumque habeat tanquam complementum suum substantiale? Deinde per unionem hypostaticam natura humana non est sui juris, sed fit natura Verbi à quo sanctissimè regitur & agitur, disponiturque ad hujusmodi sanctos & divinos motus: per plenitudinem gratiæ sanctificantis & aliorum dono-

donorum, ut dicemus infra. Plenitudo autem illa est excellens sanctitatis divinæ participatio. At sanctitas essentialis sicut & æternitas & immensitas est prorsus incommunicabilis, cum sit naturæ increatæ proprietas quarto modo, ut loquuntur Philosophi. Enimvero ideo illa Dei attributa dicuntur essentialia; quia intelliguntur necessariò, & reciprocè fluere ab essentia Dei, quam diximus aseitatem seu existentiam à se; ens enim à se est maximè necessarium, expers omnis potentialitatis, immutabile, & illimitatum, ac consequenter immensum, & ubique diffusum, æternum & sine durationis limite, purissimum ab omni peccato, quod sine mutatione & defectu accidere nequit. Porro nemo non videt repugnare quominus hujusmodi attributa prædicentur de de creatura, qualis est natura humana.

Q. 9. *Potestne dici Verbum incarnatum esse creaturam, aut Dei servum?*

R. Primò, SS. Ambrosius ferm. 5. in Psal. 118. Augustinus epist. 57. ad Dardanum, & Damascenus lib. 3. de Orthod. fide c. 3. Christum creaturam nuncuparunt; sed propter Hæreticos, quorum errori favet hæc propositio, omninò vitandus est hic loquendi modus, ut monet S. Thomas & omnes communiter Theologi & quidem sapienter: nam creaturæ nomine designatur suppositum, quod hic est increatum.

R. Secundò, servus vel latè sumitur & ratione officii, quo sensu filius dicitur servire patri, cum res ejus curat, & injunctum opus exequitur; vel strictè pro persona extranea minimèque ingenua, ut mancipia & famuli conductitii, qui jus non habent ad hæreditatem. Priori modo



Christus in scripturis vocatur Dei servus. Isaia 42. *Ecce servus meus, suscipiam eum*, quem locum S. Matthæus cap. 11. v. 28. de Christo interpretatur. At cap. 49. ejusdem Prophetæ. *Et nunc dicit Dominus formans me ex utero servum sibi*. Posteriori verò sensu negat Apostolus Christum esse Dei servum: nam cap. 1. & 3. ad Hebr. præfert eum Angelis & Moyfi, quòd hi sint famuli in domo Dei, Christus verò sit filius. Hinc Sanctus Joannes Damascenus lib. 3. cap. 2. & Patres Francofordienses probant Christum non esse Filium Dei adoptivum; quia non est servus. Et ante eos S. Dionysius Alexandrinus epistola adversus Paulum Samosatenum, S. Augustinus hæres. 3. & Theodoretus dial. 2. docent Verbum assumpsisse quidem formam servi, ut scribit Apostolus Philipp. 2. sed non esse servum. Simpliciter ergo dicendum est, Christum non esse servum, sed Dominum; quia servus denotat personam extraneam & minimè ingenuam. *Dominus noster*, inquit S. Augustinus citato loco, *etiam in forma servi non est servus*.

Hinc necessariò sequitur 1. Christum esse adorandum cultu supremo, eoque unico, quem latriæ vocant; quia cultus terminatur ad personam, respondetque ejus excellentiæ, quæ in Christo est increata & infinita.

Dixi, *unico*, tum quia honor defertur toti, non partibus seorsim sumptis & separatis; tum quia partes in Christo Domino subsistunt subsistentia increata; & eatenus supremus honor ipsis debetur. Nec dicas humanam naturam præcisè sumptam esse creaturam, quæ ut sic non potest esse objectum latriæ; quamvis enim
id spe-

id speculativè verum sit, atque sic abstracta mereatur honorem inferiorem, quem hyperduliam vocant, propter eximiam ejus sanctitatem & singulares dotes: attamen practicè humana Christi natura spectanda est & colenda prout existit à parte rei, id est, prout habens Verbum divinum pro complemento substantiali, neque ferendus esset, qui in Rege hominem abstraheret à dignitate regia, ut illum eo prætextu inferiori honore coleret. Hinc est quodd Ecclesia Catholica, licèt ex Scripturis edocta Christum in terris pro nobis orasse, Joan. 17. v. 20. & etiam nunc in cœlis semper esse viventem ad interpellandum pro nobis, Hebr. 7. vers. 25. nunquam tamen preces suas ad eum dirigit quasi ad intercessorem, sed semper uti omnium bonorum largitorem, *miserere nostri*, ait, non verò, *ora pro nobis*, ne scilicet humanitatem in Christo sine divinitate cogitemus.

Sequitur 2. Christum Dominum, etiam ut homo est, non esse Filium Dei adoptivum, sed naturalem; quia adoptio est gratuita assumptio personæ extraneæ ad hæreditatem, ad quam ex origine jus non habet: atqui Christus, ut homo, non est persona extranea; namque homo ex dictis idem est ac habens humanitatem: habens autem humanitatem, est ipsum Verbum, Filius Dei naturalis. Ergo.

Probatur ulterius, tum ex Scriptura, Joan. 3. *Sic . . . Deus dilexit mundum, ut Filium suum unigenitum daret.* Rom. 8. *Proprio Filio suo non pepercit; sed pro nobis omnibus tradidit illum.* Porro non tradidit illum secundum divinitatem, sed secundum humanitatem. Tum ex Traditione, S. Hilarius

lib. 3. de Trinitate, sic scribit de Christo: *Hic verus & proprius est filius, origine, non adoptione; veritate, non nuncupatione.* Et S. August. tract. 7. in in Joan. ait. *Oportebat ut ille baptizaret, qui est filius Dei unicus, non adoptivus.* Denique in Concilio Francofordiensi, cui adfuere Legati Adriani Summi Pontificis, & plures Episcopi ex Germania, Gallia, & Hispania, anno 794. damnata est sententia Felicis Urgelitani Episcopi & Elipandi Toletani, qua asserébant Christum, ut homo est, esse Filium Dei adoptivum: præiverat Adrianus & uti hæreticam proscripserat.

Dices 1. S. Hilarius lib. 2. de Trinitate, scribit naturam humanam in Incarnatione gratis fuisse adoptatam. Ergo Christus, ut homo, est Filius Dei adoptivus.

Distinguo anteced. Adoptatam, id est sine præcedentibus meritis à Verbo assumptam, Concedo: Adoptatam adoptione propriè dicta, prout hîc sumitur, Nego anteced. Adoptio enim sicut filiatio dicuntur relativè ad personam, non ad naturam: nunquam natura dicitur filia sive adoptiva, sive naturalis, sed persona naturam gerens.

Dices 2. Christus, ut homo, ex dictis non est Deus: ergo ut homo non est Filius Dei naturalis, sed Filius hominis, ut seipsum frequenter nominat: namque eatenus Christus est naturalis Dei Filius, quatenus est Deus, & habet Patris naturam: atqui quatenus homo non est Deus: Ergo.

Concesso antecedente, neg. conseq. & paritatem. Disparitas est, quòd Deus expressè denotet naturam divinam, ut monuimus in Tractatu de Trinitate: Filius verò personam genitam in similitudinem naturæ. Porro Christus secundum naturam humanam non est

est à Deo Patre genitus, sed secundum personam & suppositum, quod includitur in hoc nomine concreto, homo, quod idem est ac habens humanitatem: Christus ergo, ut homo, est Verbum, seu Filius Dei, ut habens seu terminans naturam humanam. Unde neganda est major syllogismi in confirmationem confecti; namque Christus non est Filius Dei præcisè quatenus est Deus; aliàs Spiritus Sanctus, utpotè Deus, esset quoque Filius Dei: sed est Filius Dei quatenus à Deo genitus in similitudinem naturæ: atqui Verbum ut terminans aut habens naturam humanam, est persona genita in similitudinem naturæ. Ergo.

Instabis: ex concessis, Christus eatenus est Filius Dei, quatenus est à Deo Patre genitus; atqui Christus ut homo non est sic genitus à Deo Patre, sed à Beata Virgine: ergo ut homo non est Filius Dei, sed Filius hominis.

Distinguo minorem: non est genitus à Patre, sed à matre ratione naturæ temporaliter assumptæ, Concedo; ratione Verbi assumptis & terminantis, nego minorem: nam ipsa persona, nempe Verbum, ad quam terminatur generatio temporalis, est ab æterno genita in similitudinem naturæ Patris æterni: ergo eadem persona, propter duas naturas, est Filius Dei, & Filius hominis.

Instabis iterum. Filius Dei naturalis debet esse ejusdem substantiæ & naturæ cum Patre à quo procedit; atqui Christus, ut homo, non est ejusdem substantiæ & naturæ cum Patre æterno.

Distinguo minorem: non est ejusdem substantiæ & naturæ cum Patre, ratione humanitatis, Concedo: ratione hypostasis & subsistentiæ, quam terminus ille (homo) includit, Nego minorem;

nam substantia hujus hominis, nempe Christi, est Verbum, quod consubstantiale est Patri.

Dices 3. Qui habet adoptionem, is sanè est filius adoptivus: atqui Christus ut homo habet adoptionem; gratia enim sanctificans, cujus Christus accepit plenitudinem, ut dicemus, est adoptio; & effectus ejus formalis est facere adoptivum: quemadmodum effectus formalis albedinis est facere album. Ergo Christus ut homo est filius adoptivus.

Nego minorem, cujus confirmationem distinguo; Gratia sanctificans est adoptio in subjecto apto, scilicet in persona extranea, quales sunt Angeli & homines, Concedo; in filio naturali, Nego. Quemadmodum torques aureus à Rege collatus aulicum facit cognatum Regis, non verò ejus filium. Quod autem additur, effectus formalis gratiæ sanctificantis est facere adoptivum, distinguendum est: effectus formalis secundarius, qui potest separari à causa formali, sicut effectus formalis secundarius albedinis est facere simile, Concedo; effectus formalis primarius & insuperabilis, Nego. Quemadmodum ergo albedo in pariete necessariò facit album, quia is est effectus formalis primarius, non verò facit necessariò simile vel dissimile; nam in hypothesi quòd sit unus paries; neque erit similis, neque dissimilis: ita pariter effectus formalis primarius & inseparabilis gratiæ sanctificantis est efficere sanctum; unde Christus ut homo, sanctus est, & sanctitate substantiali propter hypostasim, & sanctitate accidentali propter gratiam sanctificantem. Sed effectus formalis secundarius & separabilis, est efficere filium adoptivum: hujus autem effectus

ſtus capax non eſt filius naturalis, cùm ex nativitate ſua jus habeat ad hæreditatem paternam, quæ eſt viſio beatifica.

Sequitur 3. Beatam Virginem verè & propriè eſſe Deiparam ſeu Matrem Dei; quia illa verè & propriè eſt Mater Dei, quæ genuit hominem, qui eſt verè & propriè Filius Dei: atqui talis eſt beata Virgo, talem eam agnovit & profeſſa eſt Sancta Eliſabeth; *Unde hoc mihi*, inquit, *ut veniat Mater Domini mei ad me?* Luc. 1. Ex quibus verbis colligitur duplex miraculum in conceptione Domini- ca contigiffe. Primum, quòd Virgo conceperit; ſecundùm, quòd non paulatim & ſucceſſu temporis, quemadmodum in aliis conceptionibus; ſed ſtatim corpus Chriſti formatum & unitum fuerit animæ rationali; & utrumque ſimul, corpus ſcilicet & anima Verbo divino: nam continuò poſt diſceſſum Angeli beata Virgo cum feſtinatione ad Eliſabeth perrexit Mater Dei exiſtens. Talem etiam ab omnibus credendam definivit Concilium Ephelinum generale tertium anno Domini 431. his verbis: *Si quis dixerit eſſe abuſivum, & non verè dici Dei genitricem; anathema ſit.*

Dices: Beata Virgo plus non contulit ad incarnationem, quàm Spiritus Sanctus: ergo non magis eſt Mater Dei, quàm Spiritus Sanctus eſt illius Pater.

Antecedens probatur. Tres ſubſtantix in Chriſto ſunt diſtinguendæ, ſcilicet perſona divina ſeu Verbum, anima rationalis, & corpus: atqui beata Virgo nihil contulit ad productionem Verbi, quod æternum eſt; nec ad productionem animæ, quæ à ſolo Deo creari potuit; ſed ſolummodò materiam corporis ſubminiſtravit: Spiritus verò Sanctus animam creavit, corpus formavit, & Verbum

bum utrique substantialiter univit : ergo plus ad incarnationem contulit, quàm beata Virgo, & nihilominus nec est, nec dici potest Pater Filii Dei : multò igitur minùs beata Virgo dicenda est ejus Mater.

Distinguo anteced. Beata Virgo plus non contulit ad incarnationem, absolutè loquendo, Concedo, propter rationes allatas : plus non contulit certo quodam modo, scilicet suam propriam substantiam subministrando, Nego anteced. namque ad generationem propriè dictam, quæ est fundamentum paternitatis & maternitatis, requiritur ut persona generans suam substantiam genito communicet, ut constat ex definitione generationis allata in Tractatu de Trinitate. Porro Spiritus Sanctus nihil de sua substantia Christo communicavit, ac proinde nullatenus dici potest Pater Christi aut Filii Dei, alioquin ipse Filius Dei dicendus esset sui ipsius Pater, cùm opus incarnationis sit ipsi commune cum Patre & Spiritu Sancto, ut dictum est. Sed Christi productio respectu beatæ Virginis est vera generatio, quia est ex substantia ejus in similitudinem naturæ.

Nec obstat quòd Christi subsistentia seu personalitas à beata Virgine non procedat; neque enim in generationibus humanis subsistentia humana propriè producitur à parentibus, sed resultat; corpus duntaxat formant, Deus creat & infundit animam, & ex anima & corpore unitis exurgit totum in concreto, & totalitas seu substantia in abstracto, quæ est ultimus generationis terminus. Subsistentia autem illam generationem terminans, vel est humana, si ambæ partes unitæ in se existant, vel Angelica in hypothese fortè impossibili, quòd

quòd ambæ partes substantialiter uniantur Angelo: vel divina in nostra hypothefi vera & existente, quòd hypoftaticè uniantur personæ divinæ.

Dixi in hypothefi fortè impossibili, quòd anima rationalis & corpus, hoc est natura humana, ita uniantur Angelo, ut subsistant subsistentia Angelica: quia supposita tali unione, Angelus utpotè finitus evaderet perfectior; totum enim ex natura Angelica & humana conflatum effèt quid melius quàm Angelus solus. Unde utraque natura per illam conjunctionem amitteret suam subsistentiam: quia neutra haberet rationem totius quemadmodum suprà vidimus de duabus aquæ guttis unitis, ex quibus resultat novum totum, ac proinde nova subsistentia. At in hoc mysterio Verbum in omni genere perfectionis infinitum, nec ulterius perfectibile, retinet suam totalitatem & personalitatem, ad quam terminatur generatio ex beata Virgine. Ergo homo ex beata Virgine genitus, verè est Filius Dei; & ipsa puerpera verè & propriè Mater Dei.

COROLLARIUM.

Hæc summatim & methodicè uno capite complexi sumus, ut Clerici ad manum habeant, quæ in catechesibus docere oportet circa mysterium Incarnationis; atque inter explicandum præcipuum illud Religionis nostræ dogma, cautè vitent errores oppositos; in quos faciliè incurritur; nisi recensitæ regulæ præcefferint.

Imprimis mysterii definitionem hic accuratè explanatam proferent. Tum subjicient Verbum, ex quo naturam humanam assumpsit, vocari cœpisse Jesum Christum, cùm antea simpliciter dice-
retur

retur Filius Dei. In Christo autem esse duas naturas integras & inconfusas, divinam scilicet & humanam; unicam verò Personam divinam, quæ est secunda Sanctissimæ Trinitatis. Atque ut mente percipiant auditores quod auribus excipiunt, exponent Catechistæ illud esse discriminis inter naturam & personam, quòd naturæ nomine intelligatur principium agendi: natura enim definitur à Philosophis, primum principium motus & quietis ejus, in quo est: unde tot sunt in aliquo naturæ, quot sunt agendi principia: atqui in Christo duo sunt agendi principia; per aliud enim, nimirum per divinitatem, cælum & terram creavit, mortuos & seipsum à mortuis suscitavit, innumera patravit miracula: per aliud verò, scilicet per humanitatem, esurivit, tristatus est, passus, & mortuus. Ergo in Christo duæ sunt naturæ, divina & humana.

At unica est persona, eaque divina; quia personæ nomen significat unum totum per se subsistens: atqui Christus est unum quid & totum conflatum ex duabus naturis; nam, ut habetur in Symbolo, quod sub nomine sancti Athanasii circumfertur, *sicut anima rationalis & caro unus est homo, ita Deus & homo unus est Christus*, cum hoc tamen discrimine, quòd anima rationalis & corpus, cum sint duæ naturæ incompletæ & partiales, coalescunt in unam naturam totalem simul & unam personam: sed quia natura divina & humana sunt seorsim completæ & integræ, non efficiunt in Christo unam naturam sicut anima, & corpus; sed subsistunt in una & eadem Verbi persona.

Meminerint etiam Catechistæ, dum explicant attributa quæ spectant sive divinam Christi personam,

sonam, five utramque ejus naturam, nomina concreta & abstracta non esse indiscriminatim usurpanda, sed observandas regulas præmissas, alioquin in absurdos errores impingerent.

Exponendum superest; quod à nemine ignorari licet, nempè Incarnationis mysterium esse peractum ad redimendum humanum genus, de quo pluribus Capitibus tractandum, ubi de causa finali Incarnationis.

CAPUT II.

Utrùm notitia mysterii Incarnationis sit omnibus necessaria?

Præmittendum est, duplicem esse necessitatem; alia dicitur medii, alia præcepti.

Necessitas medii est eorum, sine quibus finis haberi non potest, etiam in hypothese quòd impossibilia fiant. Sic necessarius est cibus ad conservandam vitam corporalem; Baptismus saltem in voto ad consequendam salutem æternam; quia his deficientibus, nec vita corporalis conservabitur, nec salus æterna obtinebitur.

Necessitas præcepti, est eorum quæ sine culpa negligi nequeunt propter præceptum, atque adeo necessaria sunt ad cavendum peccatum; talis est observatio mandatorum, de quibus ait Christus Matth. 19. *Si . . . vis ad vitam ingredi, serva mandata.*

Nec inde inferas observationem omnium mandatorum esse necessariam necessitate medii, cum sine ea ingressus ad vitam æternam non pateat. Namque ubi occurrit alicujus mandati ignorantia invin-

invincibilis, vel impotentia, propter quam mandatum prætermisſum eſt, non occludetur propterea janua regni cœleſtis, quia in illo caſu omiſſio præcepti peccatum non eſt, cùm non ſit voluntaria; ac proinde obſervatio cujuſlibet mandati non eſt neceſſaria neceſſitate mediï; ſed ſolùm neceſſitate præcepti ad cavendum peccatum. At ſubtractio mediï neceſſarii, etiam involuntaria & inculpabilis, arcet à regno cœlorum.

Advertes tamen, ea quæ ſunt neceſſaria neceſſitate mediï ad ſalutem, eſſe quoque neceſſaria neceſſitate præcepti; quia lex naturalis & divina prohibent ea negligere; ſine quibus finem noſtrum conſequi non poſſumus. Unde qui Baptiſmum v. gr. negligunt, non ſolùm vita æterna privabuntur, quia medio neceſſario caruere; ſed inſuper pœnis æternis punientur, quia vóluntariè præceptum ſunt tranſgreſſi. Ex quo ſequitur notitiam myſterii Incarnationis, ſi neceſſaria ſit neceſſitate mediï, eſſe quoque neceſſariam neceſſitate præcepti, ſolamque addicendi impotentiam à peccato excuſare eos, qui myſterium illud ignorant.

Quæſtio itaque præſertim hîc movetur utrum notitia myſterii Incarnationis ſit neceſſaria neceſſitate mediï. Ad quam

R. 1. Certum eſt non eſſe neceſſariam parvulis baptizatis, qui ante uſum rationis decedunt; quia ſi potuit eis nocere mala voluntas primi parentis, à fortiori prodeſt illis pia matris Eccleſiæ voluntas, in cujus fide baptizantur: Deus enim pronior eſt ad miſerendum, quàm ad ulciſcendum, ut paſſim argumentatur ſanctus Auguſtinus.

R. 2. Certum eſt notitiam hujus myſterii non fuiſſe neceſſariam neceſſitate mediï iis adultis, qui

qui à statu justitiæ quam per baptismum in infantia sunt consecuti, non recessere; utpotè qui in ipso ferè rationis crepusculo decesserint antequam potuerint addiscere: Deus enim justos non deserit, nisi priùs ab eis per peccatum deseratur; nec illis denegare potest hæreditatem æternam, ad quam jus habent dono gratiæ sanctificantis.

R. 3. In lege nova notitia mysterii Incarnationis est necessaria necessitate mediis adultis non justificatis: est communis Theologorum sententia.

Probatur 1. ex Scripturis, Joan 3. *Qui... non credit, jam judicatus est, quia non credit in nomine unigeniti Filii Dei.* Act. 4. *Non est in alio aliquo salus: nec enim aliud nomen est sub cælo datum hominibus, in quo oporteat nos salvos fieri.* Et cap. 10. *Huic omnes Prophetæ testimonium perhibent remissionem peccatorum accipere per nomen ejus omnes qui credunt in eum.*

Probatur 2. Traditione. Sanctus Irenæus lib. 3. cap. 21. docet, ignorantes eum, qui ex Virgine est Emmanuel, privari munere ejus, quod est vita æterna. S. Augustinus lib. de correptione & gratiâ cap. 7. sic scribit: *Nemo liberatur à damnatione, quæ facta est per Adam, nisi per fidem Jesu Christi. Ab hac damnatione non se liberabunt, qui poterunt dicere non se audisse Evangelium Christi.* Sanctus Gregorius lib. 7. Epist. 98. definit salutis nostræ fundamentum esse fidem in Christum Dei & hominis Filium. Denique Innocentius XI. tres propositiones sequentes proscripsit: 1. *Nonnisi fides unius Dei necessaria videtur necessitate mediis, non autem explicita remuneratoris.* 2. *Fides latè dicta ex testimonio creaturarum, similive motivo ad justificationem sufficit.* 3. *Absolutionis capax est homo, quantum-*
D. Habert Theolog. Tom. II. C vis

vis laboret ignorantia mysteriorum fidei, & etiamsi per negligentiam etiam culpabilem nesciat mysterium sanctissimæ Trinitatis, & Incarnationis Domini. Circa quas propositiones sic pronuntiavit Clerus Gallicanus anno 1700. *Hæ tres propositiones in Deum remuneratorem, & in Christi mediatoris nomen contumeliosæ sunt, erroneæ, & hæreticæ.*

Quæ cum ita sint, quis dubitaverit Deum requisitum sanguinem tot animarum, quæ in ignorantia pereunt, de manibus eorum, quorum curæ sunt traditæ; uti revera tradidit illas patribus-familias & Pastoribus? Consolationem non admittunt parentes, si unus ex liberis fortè sine baptismo decedat: Pastores quoque intimo doloris sensu percelluntur, & merito, cum è parochianis aliquis exit non percepto Pœnitentiæ sacramento; & nullam gerunt conscientiam, quòd plurimi è subditis sine hujus mysteriorum notitia moriantur, quorum tamen certior est damnatio, quàm eorum, qui necdum sacramentaliter reconciliati fato funguntur: in his namque Sacramentis votum supplet Sacerdotis ministerium; in illis verò nihil supplere potest hujus mysteriorum notitia. Hinc Apostolus 1. ad Cor. 1. testatur se minùs sollicitum fuisse baptizare, quàm prædicare: *non enim inquit, misit me Christus baptizare, sed evangelizare.* Quid verò prædicaret, audi dicentem c. 2. *Non... judicavi me scire aliquid inter vos, nisi Jesum Christum, & hunc crucifixum.* Ergo exploranda est fides eorum, qui ad Sacramentum Pœnitentiæ accedunt, ubi dubium esse debet, num sit satis explicita, ut validè absolvi possint.

Dices: Durior est illa doctrina, quæ à salute excludit innumeros homines, quales sunt plures
idiotæ

idiotæ, & omnes infideles negativi, quos tamen Deus vult salvos fieri; & pro quibus Christus mortuus est. Annon in eis esset iusta querela, se immeritò puniri propter ignorantiam, quam à se expellere non potuerunt?

R. 1. Hujusmodi homines non addicuntur pœnis præcisè propter ignorantiam, quæ in illis peccatum non est, nisi materiale, utpotè quæ supponatur invincibilis; sed propter peccata, quæ mala voluntate contraxerunt. Attamen ignorantia illa iusta est peccati originalis pœna, quæ nisi misericordia Dei solvatur, meritò excludit nondum justificatos à vita æterna. 2. Nihil durius habet nostra responsio, quàm doctrina Catholica de infantibus, qui in pœnam peccati originalis pereunt, si præfocentur antequam baptisimus illis applicari potuerit. 3. Deus, qui vult omnes homines salvos fieri, omnibus præparavit media, infantibus baptismum, adultis fidem in Christum, quibus possint, si non proximè, saltem remotè salutem consequi, ut dicetur, ubi de gratia sufficiente, Tractatu sequenti.

Q. 2. *Notitia mysterii Incarnationis fuitne etiam omnibus necessaria necessitate medii ante adventum Christi?*

R. Fuit: namque laudatos Scripturæ textus pro statu legis novæ sancti Patres extendunt ad omnes hominum status, *cujus hominis ejusdemque Dei saluberrima fide*, ait sanctus Augustinus epist. 102. olim 49. *etiam illi justi salvi facti sunt, qui priusquam veniret in carne, crediderunt in carne venturum. Eadem namque fides est & nostra & illorum, quoniam hoc illi crediderunt futurum, quod nos credimus factum.* Et e. 47. lib. 18. de Civit. Dei, de quibusdam Gentilibus, qui secundum Deum vivere, sic scribit,

quod nemini concessum fuisse credendum est, nisi cui divinitus revelatus est unus mediator Dei & hominum homo Christus Jesus. Quibus verbis declarat sanctus Doctor, non satis fuisse priscis temporibus generatim credere Deum providere salutem hominum, & esse bonorum remuneratorem, ut sentire videtur sanctus Thomas 2. 2. q. 2. art. 7. ad 3. Imò idem sanctus Augustinus lib. 2. Operis imperfecti num. 188. sic insectatur Pelagianos: *Agnoscamus hæresim vestram: definivit enim Pelagius, quod non ex fide Christi antiqui vixerint justi.* Sanctus Leo serm. 63. confirmat eandem sententiam his verbis: *Una fides justificat universorum temporum sanctos, & ad eandem spem & fidem pertinet, quicquid per mediatorem Dei & hominum Jesum Christum vel nos confitemur factum, vel patres nostri adorare faciendum.*

Necesse tamen non fuit ad salutem, ut fides Incarnationis futuræ esset æquè explicita, ac nostra; colligiturque ex Apostolo Gal. 3. ubi sic loquitur; *Prius autem quam veniret fides, sub lege custodiebamur conclusi in eam fidem quæ revelanda erat.*

Ex his sequitur 1. supposita Dei voluntate salvandi omnes homines, mysterium Incarnationis debuisse revelari statim post lapsum primorum parentum, cum sine ejus notitia Adamus & Eva nec educi à delicto potuerint, ut habetur Sap. 10. nec vitam æternam adipisci, quam tamen adeptos fuisse olim propugnavit Ecclesia contra veteres Hæreticos. Porro extat hujus mysterii revelatio Gen. 3. ubi Deus ad serpentem diaboli instrumentum conversus ait: *Inimicitias ponam inter te & mulierem, & semen tuum & semen illius: ipsa conteret caput tuum.* In Hebræo legitur, *ipsam*, nempe semen, quod est Christus, conteret caput tuum,

tuum, hoc est, vires & imperium; & ita legērunt sancti Irenæus, Cyprianus, Hieronymus & alii.

Dixi, *post lapsum*, quia cū primi Parentes iustitiam originalem ex Christi meritis non hauserint, dubium esse potest, an Christum venturum cognoverint. S. Thomas 2. 2. quæst. 2. art. 7. affirmat cognovisse. *Ante statum peccati*, inquit, *homo habuit explicitam fidem de Christi Incarnatione, secundum quod ordinabatur ad consummationem gloriæ, non autem secundum quod ordinabatur ad liberationem à peccato per Passionem & Resurrectionem; quia homo non fuit præsciens peccati futuri.* Probatque hanc suam sententiam ex his Adami verbis Gen. 2. *Relinquet homo patrem suum & adhærebit uxori suæ.* Quæ propheticè dicta de unione Christi cum Ecclesia scribit Apostolus Ephes. 5. *Sacramentum hoc magnum est, ego autem dico in Christo & in Ecclesia.* Sancto Thomæ consentiunt plures Theologi.

Sequitur 2. eam Religionem seu Ecclesiam veram non fuisse, quæ Deum non coluit sub publica fide & expectatione Christi venturi.

Sequitur 3. antiquos, quos Scriptura tanquam iustos celebrat, mysterium Incarnationis non latuisse. Tales fuerunt Abel, Henoch, Noe, quos Apostolus Heb. 11. in catalogo Sanctorum commemorat: talis Abrahamus, cui disertè Christus promissus est Gen. 22. & 26. *Benedicentur in semine tuo omnes gentes terræ:* Talis Jacob, qui Gen. 49. disertis verbis prædixit Christum venturum: *Non auferetur sceptrum de Juda donec veniat qui mittendus est salutare tuum expectabo, Domine.* Talis Moyfes, de quo Christus Joan. 5. *Si cre-*

deretis Moysi, crederetis forsitan, id est utique, & mihi; de me enim scripsit ille. Talis denique Judaica gens, cujus omnes Prophetæ prænuntiaverunt de adventu Justi, ut loquitur S. Stephanus Act. 7. & sacrificia & ceremoniæ illum adumbrarunt, *Finis enim legis Christus*, ait Apostolus, Rom. 10.

Negari non debet, aliquos ex Gentibus extitisse, qui compertum habuerunt hoc mysterium; probatque Hugo Victorinus c. 8. de Incarnatione, ex illo Aggæi testimonio, cap. 2. *Veniet desideratus cunctis gentibus*: quod sic expendit: *Non dicit desiderandus, sed desideratus, ut intelligas in omni gente aliquos aliquando ejus desiderio flagrasse.* Constans fuit in hac sententia sanctus Augustinus; sic enim scribit l. 18. de Civitate Dei cap. 47. *Non incongruè creditur fuisse & in aliis gentibus homines, quibus hoc mysterium revelatum est.* Epist. 102. olim 49. *Cur non credamus etiam in cæteris hac illac gentibus fuisse, qui hujus sacramenti participes fuerunt?* De Jobo Idumæo, ex progenie Esau filii Isaac, ut vulgò creditur, dubitare non licet: sic enim loquitur c. 19. *Scio . . . quod Redemptor meus vivit . . . quem visurus sum ego ipse, & oculi mei conspecturi sunt.* Idem sentiendum de Ninivitis ad Jonæ prædicationem plenè ad Deum conversis.

Ex Gentibus proferuntur libri Sybillarum, quæ ita dictæ sunt, quasi divinorum secretorum consciæ, quia multa propheticè scripsisse creduntur, præsertim de Christo longè antequam nasceretur; ut constat vel ex profanis Scriptoribus, putà Varrone, Cicerone, Virgilio, & aliis, qui ante Christi nativitatem floruerunt, & libros illos laudaverunt. Quin & Suetonius refert Cæsarem

farem Augustum tanti fecisse hujusmodi lucubrationes, ut eas ex omnibus mundi partibus colligendas Romamque afferendas præceperit, peritiorum examini subjecerit, rejectis quæ spuria videbantur, genuina summa cum religione servari curaverit. In his autem libris nativitas Christi ex virgine, passio & resurrectio tam clarè describuntur, ut non futurorum prophetia, sed rerum gestarum historia videatur. Unde antiquissimi Patres, ut sanctus Justinus, Athenagoras, sanctus Clemens Alexandrinus, & post eos Lactantius, Eusebius Cæsariensis, S. Hieronymus, S. Augustinus, & alii bene multi, Gentiles propriis eorum armis tam validè expugnabant, ut Imperatores, sub pœna capitis, illorum librorum lectionem prohibuerint: quod sanctus Justinus exprobrat in sua apologia.

Verùm libris Sibyllinis multa fuisse addita & interpolata à quibusdam Christianis, idque inordinato zelo, quo fervebant pro Religione Christiana, probant Critici, quibus assentiendum putamus, modò interpolationem non statuunt factam prioribus sæculis, & ut nonnulli contendunt superstitibus adhuc Apostolis: durum enim est fraudem per quatuor sæcula non fuisse detectam, & Patres, tam Græcos, quàm Latinos, armis mendacii pro veritate decertasse. Libros ergo Sibyllinos non habemus, quales habuere S. Justinus, Athenagoras, &c. quando autem fuerint immutati, aliis examinandum relinquimus.

Q. 3. *Potestne dici de alia gente quàm Judaica & Christiana, quod diximus de quibusdam privatis Gentilibus, illam nimirum coluisse Deum sub publica expectatione mediatoris?*

R. Non potest dici coluisse saltem diuturno tempore ab electione populi Judaici.

Probatur 1. ex Scriptura, ubi Deus dicit sibi unum Israellem delegisse, cæteras verò nationes dimisisse. Amos 3. *Tantummodo vos cognovi in omnibus cognationibus terræ.* Act. 14. *In præteritis generationibus dimisit (Deus) omnes gentes ingredi vias suas.* Psal. 95. *Omnes dii gentium dæmonia.* Eph. 2. *Eratis illo in tempore sine Christo . . . & sine Deo,* Osee 2. & Rom. 9: *Vocabo non plebem meam plebem meam, & non dilectam dilectam; & non misericordiam consecutam misericordiam consecutam.* Isaïæ 54. *Lauda sterilis quæ non parit . . . quoniam multi filii desertæ magis quàm ejus quæ habet virum.* Hæc dicuntur de omnibus gentibus sine exceptione. De Israelitis verò Rom. 9. *quorum est adoptio filiorum, & gloria, & testamentum, & promissio;* quia ex sancto Augustino lib. 18. de Civitate Dei cap. 47. *Populus revera qui propriè Dei populus diceretur, nullus alius fuit: homines autem quosdam, non terrena, sed cælesti societate ad veros Israelitas supernæ civis patriæ pertinentes etiam in aliis gentibus fuisse negare non possunt Judæi; quia si negant, facillimè convincuntur de sancto & mirabili viro Job.*

Dixi 1. diuturno tempore; quia credibile est Ismaelem & Madian ex Abrahamo progenitos, & Esau ex Isaac, religionem paternam non tam citò reliquisse.

Dixi 2. ab electione populi Judaici; quia, ut observat S. Augustinus lib. 19. de Civitate Dei cap. 12. ab ædificatione turris Babel usque ad Abraham duæ civitates, nempe cælestis, in qua regnat charitas; & terrestris, cuius lex est cupiditas, inter se permixtæ sunt, quamvis etiam tunc verus Dei cultus visibilis permaneret, ut constat vel

ex

ex Melchisedeco, qui erat Sacerdos Dei Altissimi, Gen. 14. illumque multi suspicantur fuisse Sem primogenitum Noe, qui usque ad Abrahæ tempora vitam protraxit, testis eorum, quæ audiverat tum à patre Noe, tum ab avo Lamech, qui temporibus Adami floruerat, Gen. cap. 5. quis verò fuerit status veræ Religionis ante diluvium, colligitur ex capite sexto Geneseos, ubi distinguuntur Filii Dei à filiis hominum, id est, ex Seth progeniti veri Dei cultores sub fide & expectatione mediatoris viventes, & discreti à filiis Cain societatem terrenam constituentibus.

Q. 4. *Angeli habueruntne notitiam mysterii Incarnationis?*

R. 1. Angelis beatis fuit revelatum: cum enim sint hominibus longè perspicaciores, lumine supernaturali, quo perfunduntur, facilius quàm homines sancti illud deprehendere potuerunt in Scripturis sanctis; exclamarunt quidem Christo in cælum ascendente, *Quis est iste Rex gloriæ?* Psal. 23. sed illud est admirationis, non ignorantiae, cum in ejus nativitate facta fuerit multitudo Angelorum collaudantium, Luc. 2.

Dices: Scribit Apostolus, Ephes. 3. mysterium Incarnationis fuisse absconditum à sæculis in Deo, & per Ecclesiam innotuisse Principatibus & Potestatibus in cœlestibus multiformem sapientiam Dei. Ergo.

R. 2. Distinguo antecedens, absconditum Gentibus & dæmonibus, Concedo: omnibus omnino tam Angelis quàm hominibus, subdistinguo: quoad aliquas circumstantias & multiformem Dei sapientiam: quæ eluxit in gentium conversione, Concedo: quoad substantiam, Nego

antecedens : Nam Prophetæ illud cognoverunt, *Abraham*, ait Christus, *vidit diem meum*, & *gavissus est*, Joan. 8.

R. 3. Myſterium Incarnationis dæmonibus fuit ignotum ; tum quia cognosci non poteſt ſine ſupernaturali lumine, quod dæmonibus conſeſſum credibile non eſt ; tum quia ita docent omnes Patres.

Dices : Dæmones Myſterium Incarnationis potuerunt colligere ex Scripturis. Ergo.

Nego antecedens : ſi enim plerique ex Judæis, etiam Sacerdotes & legis Doctores, juſto Dei judicio, circa Prophetias quæ erant de Chriſto, & miracula quæ patrabat, cæcutierunt : à fortiori dæmones circa ſupernaturalia magis excæcati.

Instabis. Marc. 1. & Lucæ 4. legitur dæmones Chriſtum proclamaffe Filium Dei, Sanctum Dei : Ergo.

Distinguo antecedens : Filium Dei adoptivum & ſanctum hominem, Concedo : Filium Dei naturalem, Nego : niſi fortè conjecturaliter & dubitanter. Si enim illum Dominum gloriæ cognoviſſent, nunquam Judæos ad illum crucifi-gendum impuliſſent.

Urgebis. Angelorum lapſus contigit ex invidia in naturam humanam, quòd aſſumenda eſſet à Verbo : Ergo ante lapſum cognoverunt illud Myſterium.

Nego antecedens : Sententia enim illa nonnullorum Theologorum omni prorsus fundamento caret.

CAPUT III.

Utrum solo lumine naturali demonstrari possit
Mysterium Incarnationis esse possibile ?

R. Demonstrari non potest positivè ; potest verò negativè probari, saltem supposita revelatione.

Prima Pars responsionis probatur, illud dicitur positivè demonstrari, quod evidenter colligitur ex certis & indubitatis momentis, iisque intrinsicis ; si enim res demonstranda nullam ex natura sua habeat connexionem cum illis momentis, non erit vera demonstratio ; quia evidentiam non pariet : v. g. ex eo quòd Deus dixit Christum Dominum esse suum unigenitum, idque miraculis & Prophetiis confirmaverit, evidenter credibile est, Christum esse Filium Dei incarnatum ; sed mysterium ipsum nobis est inevidens, ac proinde non demonstratur, quia testimonium Dei est quid ipsi extrinsecum. Atqui nulla sunt momenta certa & indubitata ipsique mysterio intrinseca, quibus evincatur ejus possibilitas vel existentia : Ergo.

Minor probatur 1. Quia lumen naturale non potest attingere objectum supernaturale : atqui Mysterium Incarnationis est supernaturale ; ergo.

2. Quia omnis demonstratio est vel à priori & per causam, vel à posteriori & per effectus : atqui neutro medio potest demonstrari Incarnatio. Non à priori ; namque Incarnatio agnoscit sui causam voluntatem Dei liberam & ejus omnipotentiam ; atqui ex neutro capite potest certò & evidenter colligi ejus existentia aut possibilitas. Non ex voluntate libera ; quia causa libera non habet
necef-

necessariam connexionem cum effectu libero, qualis est Incarnationis existentia, ut infra dicitur. Neque etiam ex omnipotentia; quia etsi nobis evidenter notum sit Deum posse quidquid non implicat, ratio tamen naturalis non potest scrutari illud Mysterium, utpotè supernaturale, atque evidenter affirmare nihil in eo esse contradictorium. Minus probari potest à posteriori; quia nulli sunt effectus Incarnationis naturaliter nobis noti, per quos ad ejus existentiam perveniamus.

Nec dicas, Christum miraculis evidenter probasse se esse Filium Dei. Licet enim miracula necessariam habeant connexionem cum omnipotentia divina; evidens tamen non est illum esse Deum, per quem Deus miracula operatur, Prophetæ enim & alii viri Sancti miracula ediderunt. Christus ergo suam divinitatem eatenus ex miraculis probavit, quatenus iis declaravit suum testimonium, quo se Deum assererat esse verum: certum enim & evidens est Deum non posse quidquam facere in confirmationem mendacii. Ergo miracula Christi sunt argumenta solum extrinseca, quibus nobis evidenter constat credibile esse testimonium, quo dixit se esse Deum.

Confirmatur nostra responsio, tum ex Scriptura asserente Mysterium illud esse investigabile, & citra revelationem omnibus impervium, Matth. 16. *Beatus es Simon Bar-jona, quia caro & sanguis non revelavit tibi, sed Pater meus.* Eph. 3. *Mibi omnium Sanctorum minimo data est gratia hæc, in gentibus evangelizare investigabiles divitias Christi, & illuminare omnes quæ sit dispensatio Sacramenti absconditi à sæculis in Deo.* Tum ex Sanctis Patribus Sanctus Chrysostomus homil. 24. in Matth. invehitur in eos qui
ineffa-

ineffabilem illam generationem Dei hominis cogitationibus investigari putant. S. Augustinus Epist. 3. ad Volusianum, nunc verò 137. scribit : hic si ratio quaeritur, non erit mirabile : si exemplum poscitur, non erit singulare. Demus Deum aliquid posse quod nos fateamur investigare non posse. In talibus rebus tota ratio facti est, potentia facientis.

Dices : Sancti Patres probant Mysterii Incarnationis possibilitatem variis exemplis. 1. Rami in arboribus trunco inserti : ita Theodoretus Dialogo *Inconfusus*. 2. Ferri candentis, in quo ignis cum ipso ferro unum quid efficere videtur : sic Sanctus Basilius, *de humana Christi generatione*. 3. Vocis, quæ est mentis cogitatio sono induta ; sic ex Sancto Augustino, *lib. 1. de Doctr. Christ. cap. 12. & 13.* Verbum quod erat apud Deum, jam carne velatum ad nostram notitiam pervenit. 4. Animæ rationalis corpori unitæ, ut in symbolo, quod Sancti Athanasii dicitur. Ergo.

Distinguo antecedens : Probant utcunque & ruditer, tanquam mediis aptis ad juvandos rudiores, Concedo : probant efficaciter, Nego antecedens. Una enim est eorum vox Mysterium illud esse lumini naturali inaccessum. Enimverò nemo non videt quanta sit disparitas inter Mysterium Incarnationis & ea quæ in exemplum afferuntur. Ramus non est quid unum cum trunco nisi secundum quantitatem ; ignis est in ferro tantum localiter ; cogitatio in voce tanquam in signo. Anima rationalis est substantia incompleta essentialiter ordinata ad componendum cum corpore unum hominem. At Verbum & natura humana sunt duæ naturæ integræ, quæstio autem est utrùm duæ naturæ completæ possint substantia-
liter

liter uniri. Quod si id concedatur de naturis creatis, continuò non est trahendum ad personam increatam, quia seclusa revelatione talis unio non videretur posse fieri sine mutatione utriusque naturæ, quæ sanè in divinam cadere nequit.

Secunda pars probatur. Tum existentia aut possibilitas rei alicujus dicitur probari negativè, cum dissolvuntur cum aliqua veri specie, quæ contra objici possunt: atqui sic dissolvi possunt quæ opponuntur contra existentiam & possibilitatem Incarnationis, ut patebit ex responsionibus ad objectiones sequentes: Ergo.

Dices 1. Verbum non potest incarnari sine sui mutatione. Ergo Incarnatio repugnat.

Probatur antecedens: Qui ex non homine fit substantialiter & intrinsecè homo, ille profectò mutatur substantialiter & intrinsecè: atqui Deus, supposito hoc Mysterio, ex non homine fit substantialiter & intrinsecè homo. Ergo Deus mutatur substantialiter & intrinsecè.

Nego antecedens: cujus confirmationis majorem distinguo. Qui ex non homine fit substantialiter homo, novam formam & perfectionem substantialem & intrinsecam acquirendo, quemadmodum limus, ex quo Deus formavit hominem, novam formam & perfectionem accepit; mutatur substantialiter & intrinsecè, Concedo: qui ex non terminante naturam humanam, fit homo de novo eam terminans, nec inde perfectior evadens, mutatur, Nego majorem.

Distinguo similiter minorem. Deus ex non homine factus est substantialiter & intrinsecè homo terminando naturam humanam, & nihil propriæ perfectionis ab ea accipiendo, Concedo: factus

ctus est homo accipiendo naturam humanam tanquam formam sui perfectivam, Nego minorem. Cum itaque dicitur Deus factus substantialiter & intrinsecè homo, sensus non est quòd natura humana ingrediatur substantiam divinam tanquam pars essentialis, aut substantialis eam componens: natura enim divina manet in Christo impermixta & simplicissima. Sed hujusmodi adverbii significatur solummodo Verbum substantialiter uniri naturæ humanæ tanquam ejus suppositum & ejus terminus substantialis; refelliturque Nestorii error definiens in Christo duas esse personas moraliter tantum & accidentaliter unitas, ita ut Deus humanitate indutus dicendus sit homo denominatione extrinseca, quemadmodum homo à veste, quam circumfert, extrinsecè denominatur vestitus.

Instabis: Non potest fieri nova denominatio sine nova forma adveniente: atqui Deus per hoc Mysterium homo de novo nominatur: Ergo necesse est, ut accipiat naturam humanam tanquam novam formam. Nonnulli Theologi hoc argumento valde torqueri videntur, quanquam levis sit admodum momenti.

Distinguo majorem. Sine nova forma, vel physica, vel metaphysica seu logica, quæ dicitur forma denominationis, Concedo: sine forma physica & intrinsecè componente, Nego majorem; & concessa minore, distingo similiter consequens. Necesse est, ut accipiat naturam humanam tanquam formam metaphysicam seu logicam & denominationis, Concedo; tanquam formam physicam, Nego consequens. Sic homo denominatur materialis à materia, non tanquam à forma physica: materia siquidem in physicis opponitur formæ;

mæ; sed tanquam à forma denominationis & logica: in logicis enim quod prædicatur de alio, enuntiatur tanquam forma de subiecto.

Dices 2. Illa non possunt inter se uniri, inter quæ est distantia infinita: atqui inter Verbum & naturam humanam est distantia infinita: Ergo.

Distinguo majorem sicut alibi: Distantia infinita tum entitatis, tum habitudinis, Concedo: entitatis tantum, Nego majorem.

Distinguo similiter minorem: inter Verbum & naturam humanam est distantia infinita entitatis, Concedo; unde natura humana non potest esse ejusdem entitatis cum Deo, utpotè qui sit purus actus, increatus, & in omni genere perfectionis infinitus. Est distantia infinita habitudinis, qualis est inter unitivum & unibile, terminativum & terminabile, Nego minorem. Enimvero quemadmodum dicebamus, ubi de visione beatifica, licèt nulla sit proportio entitatis inter divinam essentiam & intellectum humanum, esse tamen proportionem habitudinis: nam essentia divina est intelligibilis, intellectus verò humanus est intellectivus; ideoque essentia divina potest illi uniri in ratione objecti. Sic Verbum divinum, cum sit infinitè terminativum, potest uniri in ratione termini & suppositi naturæ humanæ, quæ est terminabilis.

Instabis: Habitudo illa utpotè relatio, debet fundari in entitate: Ergo ubi nulla est proportio entitatis, nulla quoque inest proportio habitudinis.

Nego absolutè antecedens: illa enim relatio habitudinis est essentialis & transcendens, ac proinde non præsupponit fundamentum; essentialis enim

enim est quid primum in re. Nulla ratio, nullumve fundamentum cur potentia visiva habitudinem habeat ad colores potius quàm ad odores & sapores. Hæc habitudo est ejus essentia & natura.

Dices 3. Verbum est id, quo natura divina ultimò terminatur, & fit incommunicabilis alteri: Ergo repugnat quòd sit id, quo communicatur alteri, scilicet naturæ humanæ.

Distinguo antecedens: fit incommunicabilis alteri tanquam perfectivo & tanquam supposito seu personæ, Concedo: alteri nullatenus perfectivo, seu perfectibili, Nego antecedens: Equidem natura divina per Verbum ultimo completur in ratione subsistentis & personæ, ac proinde contradictorium est, ipsam sic completam & ultimò terminatam ulterius perfici & compleri: sed convenientissimum est ipsam infinitè perfectam & completam aliam naturam perficere, eique substantialiter communicari mediante hypostasi.

Instabis: ex concessis Verbum divinum non unitur naturæ humanæ tanquam supposito, hoc est subsistenti subsistentia propria & humana: Ergo Christus non est homo perfectus. Ille enim non est homo perfectus, qui non habet, quæcunque pertinent ad naturam humanam: atqui Christus non habet quæcunque pertinent ad naturam humanam; caret enim subsistentia humana, quæ non est accidens, sed ultimum complementum substantiale: Ergo.

Nego consequens: cujus confirmationis majorem distingo. Non est homo perfectus, qui non habet quæcunque pertinent ad naturam humanam tanquam partes essentielles aut integrales,

Concedo: quæ pertinent tanquam modus existendi tantum, **Nego** majorem. Distinguo similiter minorem. Christus non habet quæcunque pertinent ad naturam humanam, id est, non habet modum, quo naturaliter existeret in se, si Verbo non esset unita, **Concedo:** natura enim humana Christi existit in alio, & quidem longè nobiliori modo. Non habet quæcunque pertinent ad naturam humanam tanquam partes ejus essentielles & integrales, ex quibus homo perfectus dicitur, **Nego** minorem. Solutio patet ex dictis primo capite.

Dices 4. Verbum non distinguitur à natura divina, in qua est quid unum cum Patre & Spiritu Sancto: Ergo Verbum non magis potest dici incarnatum, quàm Pater & Spiritus Sanctus.

Distinguo antecedens. Non distinguitur realiter, **Concedo:** formaliter, **Nego** antecedens. Porro sicut illa distinctio sufficit ex dictis ubi de Trinitate, ut Verbum dicatur generatum, non verò Pater; efficit quoque ut verè dicatur incarnatum, non verò Pater, aut Spiritus Sanctus, qui tamen ambo sunt in Christo per circuminfessionem, ut ibidem diximus.

Atque hæc de Incarnationis possibilitate dicta sunt supposita Dei revelatione, quæ nobis ex indubitatis testimoniis constat. Cum enim à facto ad posse valeat consecutio, ut loquuntur Philosophi; certò colligit ratio falsa esse, quæ contra possibilitatem Mysterii peracti & revelati opponuntur; quamvis talem veri speciem præseferant, ut eis seclusa revelatione assentiendum videretur. Quocirca præcipuum nostrum opus fuerit in hoc Tractatu firmissimis argumentis Incarnationis existentiam stabilire; hoc enim veluti cardine nituntur

& quæ hætenus diximus, & quæcunque deinceps dicturi sumus.

Triplicis autem generis hostes hujus mysterii existentiam impugnant: Gentilibus enim est stultitia, Judæis scandalum, 1. ad Corinthios, cap. 1. & Hæreticis lapis offensionis. Contra tres illos cuneos non iisdem armis est decertandum; sed contra Gentiles, apud quos Scripturæ divinæ nullius sunt auctoritatis, producenda sunt motiva credibilitatis, ut ajunt. Contra Judæos contorquendæ sunt veteris Testamenti prophetiæ, quas rejicere non possunt, sed vanis interpretationibus eludere conantur. Contra Hæreticos verò, urgendi textus utriusque Testamenti, quod suscipiunt, sed pro libidine interpretantur.

CAPVT IV.

Quomodo efficaciter probatur contra Gentiles, mysterium Incarnationis fuisse impletum, & quidem in Christo Domino?

R. Probantur efficaciter illa duo, nempe mysterium Incarnationis esse impletum, & quidem in Christo Domino, ex motivis iisdem, quibus evidenter demonstramus Religionem Christianam esse veram, ac divinitus institutam. Namque illud mysterium est evidenter credibile, quod Religio evidenter vera credendum docet tanquam fundamentum totius suæ doctrinæ. Quæ posteriora verba addiderim propter Novatores, qui contra omnium veterum fidem contendunt veram Ecclesiam posse errare in levioribus, non verò præcipuis articulis, quos fundamentales vocant:

atqui Religio Christiana evidenter vera est, docetque imprimis credendum mysterium Incarnationis fuisse in Christo Domino impletum. Ergo.

Major est evidens, nec ullus etiam Gentilis aut infidelis negaverit, credendum quod est præcipuum fundamentum Religionis evidenter à Deo institutæ, ut ignorantes erudiat, errantes revocet, & omnes in legitimo veri Dei cultu colligat.

Minorem verò pernegant soli infideles, quoad primam partem. Nec morari nos debet, quòd unus & alter è Catholicis his aliquatenus assentiri visi sint hac sua propositione: *Religio Christiana non est evidenter vera ... hinc infer evidens non esse, 1. quòd existat nunc in terris aliqua vera Religio: 2. quòd omnium quæ in terra sunt, veræ simillima sit Christiana: 3. quòd Apostolis manifesta fuerit divinitas Christi. 4. quòd afflante Deo fusa sint Prophetarum oracula: quid enim mihi opponas, si vel negem fuisse vera vaticinia, vel affirmem fuisse conjecturas: quòd vera fuerint, quæ à Christo edita fuisse commemorantur miracula.* Hanc enim propositionem exhorruerunt Catholici, & Clerus Gallicanus anno 1700. gravissima censura notavit his verbis: *Doctrina hac propositione contenta impia est, blasphema, erronea, & inimicis Christianæ Religionis favet.* Præiverat Innocentius XI. anno 1697: cum damnavit uti scandalosam sequentem propositionem: *Assensus fidei supernaturalis & utilis ad salutem, stat cum notitia solùm probabili revelationis, inòd cum formidine, qua quis formidet, ne non sit locutus Deus.* Cui definitioni subscripsit idem Clerus Gallicanus anno 1700. in hæc verba: *Hæc propositio scandalosa est, perniciofa, & Apostolicæ fidei definitionem evertens.* Solos igitur Gentiles & Infideles huc adversarios patimur, qui sanè ejusdem nobiscum essent sententiæ,

tiæ, si præconceptum, quo in Religionem Christianam flagrant, odium deponerent, & libera mente examinarent quæ hîc subjicimus momenta; cum omnes qui retro oderant, inquit Tertullianus Apologet. c. 1. quia ignorabant quale esset quod oderant, simul ut desinunt ignorare, cessent & odisse. Ex his sunt Christiani utique de comperto, & incipiunt odisse quod fuerant, & profiteri quod oderant. De obstinatis verò subdit: Malunt nescire, quia jam oderunt, adeo quod nesciunt, præjudicant id esse, quod si sciant, odisse non poterant.

Primum itaque momentum ducitur ex Prophetiis: namque idoneum testimonium veritatis, inquit Tertullianus apolog. 20. est veritas divinationis. Hocce testimonio Deus probat se solum verum esse Deum, quòd solus prænuntiaverit, quæ in Christo futuræ erant passiones & posteriores glorias, ut loquitur S. Petrus epist. 1. cap. 1. Annuntiate quæ ventura sunt in futurum, & sciemus quia dii estis . . . Suscitavi ab aquilone, & veniet ab ortu solis; vocabit nomen meum, &c. Is. 41. Dæmones quidem præscire possunt & prædicere futura, quæ ex naturali rerum ordine & dispositione necessario sequuntur, ut eclypses, anni tempestates, &c. quanquam & in iis facile decipiantur, cùm Deus aliquando rerum naturalem ordinem immutet: nam Josue 10. v. 13. steterunt sol & luna in medio cœli, lib. 4. Regum cap. 20. v. 11. retrogressus est sol decem lineis; & in passione Christi Domini, sine concursu causarum secundarum, sol eclypsim passus est per tres horas, scilicet à sexta ad nonam. Matth. 27. v. 45. Conjiciunt etiam tum ex sua mala nocendi voluntate, tum ex disposi-

tionibus causarum liberarum, quæ contingenter futura sunt; sed quia potestatem nocendi habere non possunt, nisi à Deo, qui ut plurimum eam denegat, & causæ liberæ divina ope impellentibus cupiditatibus obsistunt, de iis dæmones certa vaticinia edere non valent. Unde oracula eorum sunt semper ambigua, & in utramque partem converti possunt, ut advertit Cicero, & alii Gentiles patetque ex illo oraculo. *Ajo te Æacida Romanos vincere posse.* Quæ enim sita sunt extra naturalem causarum secundarum ordinem, ut secreta cordium, actiones inde emanantes propria inclinatione reluctantæ; à fortiori quæ ex liberis Dei decretis pendent, exceduntque rerum naturalium ordinem & dispositionem, ut miracula, solus naturæ auctor, qui ea ab æterno decrevit, & in tempore perficit, præscire & prænuntiare potest. Atqui Incarnatio, & quæ spectant vitæ Christi œconomiam; nativitas, passio, vel resurrectio, ascensio in cælum, Spiritus Sancti missio, Religionis Christianæ institutio, propagatio, gentium conversio, Judæorum rejectio, hæc & alia sanè ex naturali causarum secundarum dispositione non oriuntur, à pluribus Prophetis tam variè, dilucidè & luculenter prædicta sunt, ut non vaticinia, sed rerum gestarum historiæ videantur; & ita Porphyrius, insensus Religionis Christianæ hostis, librum Danielis calumniari sit ausus, teste sancto Hieronymo, Proœmio in Daniele: *Cujus impugnatio, inquit, testimonium veritatis est; tanta enim dictorum fides fuit, ut Prophetæ incredulis hominibus non videatur futura dixisse, sed narrasse præterita.* Sed ad exsufflandam calumniam tam incautè concinnatam, non ex scriniis nostris proferimus libros, sed ex ad-

adversariorum nostrorum manibus. *Per omnes gentes*, ait sanctus Augustinus in Psalm. 58. concione prima, *dispersi sunt Judæi testes iniquitatis suæ & veritatis nostræ Si quando aliquis paganus dubitaverit, cum ei dixerimus prophetias de Christo, quarum evidentiam obstupefcit, & admirans putaverit à nobis esse conscriptas, de Codicibus Judæorum probamus; quia hoc totum ante prædictum est. Videte quemadmodum de inimicis nostris alios confundimus inimicos.*

Hoc Prophetarum testimonio tam indubitato, & capite sequenti contra Judæos proferendo, sanctus Justinus ex Philosopho Christianus factus est, ut ipse testatur in Dialogo cum Triphone. Origenes quoque tanti fecit illud argumentum, ut libro primo contra Celsum asseruerit, omnium quæ ad Christi fidem astruendam adhiberi possunt, argumentum maximum hoc esse, quodd prædictus sit à Prophetis, qui apud Judæos fuerunt.

Dices: Mens humana reluctari non potest rerum evidentiae: atqui Judæi & Gentiles reluctantur testimonio Prophetarum: Ergo illud testimonium non est evidenter verum.

Confirmatur. Fides est actus liber, ex consensu omnium Catholicorum: atqui si niteretur motivis evidenter veris, non esset actus liber, sed necessarius: Ergo nullum motivum credibilitatis, ut ajunt, est evidenter verum.

Distinguo majorem. Mens humana non potest reluctari rerum evidentiae, si ita attendat, ut ea afficiatur, Concedo: secus, Nego majorem. Quot litigantes, v. g. propugnant causas evidenter injustas, non ipsis, quia præoccupati sunt, sed judicibus, qui eas sana & libera mente examinant?

minant? Sic se habent Gentiles & Judæi ad Religionis Christianæ mysteria: vel enim præ superbia crubescunt vinci à Christianis, & confiteri tam se, quàm parentes, fuisse deceptos, vel propter appetitum terrenæ felicitatis, dona spiritualia & cœlestia, quæ unicè promittuntur in Religione Christiana, velut parvuli lactentes rejiciunt.

Ad Confirmationem concessa majore, nego minorem. Non enim res aliqua actu creditur eò ipso, quò judicatur credibilis, ut patet experientia Catholicorum, qui non eliciunt actus fidei, quoties examinant testimonia, quibus nititur Religio nostra, & concludunt ea esse evidenter vera. Et ratio est, quia quantumcunque testimonium sit evidens, mysterium tamen, quod per illud declaratur, semper in se manet inevidens. Unde ad credendum actu necesse est, ut post judicium de mysterii credibilitate, sequatur aliud judicium practicum & quidem supernaturale, (cùm præcedens potuerit esse naturale) quo intellectus definat hîc & nunc esse credendum; deinde pia affectio etiam supernaturalis in voluntate, qua demum intellectus determinetur ad eliciendum ipsum actum fidei supernaturalem; quæ probant minùs esse disputandum cum infidelibus & obstinatis, quàm pro iis orandum; quia etsi rationum pondere naturaliter convinci possint, tamen sine gratia absolutè necessaria ad tres postremos actus, persuaderi & converti non possunt.

Secundum momentum petitur ex miraculis, quæ facta sunt in confirmationem Christianæ Religionis. Ad miraculum autem duo requiruntur:
pri-

primum, ut sit opus rarum, & præter consuetum naturæ ordinem: secundum, ut superet naturæ vires, & ab eo solo, qui supra naturam est, procedat. Hinc creatio animæ rationalis non est miraculum, quamvis sit supra naturæ virtutem; quia secundum ordinem naturis à Deo præfixum creatur. Sic supernaturalis justificatio impii secundum præscriptam Dei legem, miraculum propriè non dicitur; diceretur verò, si subito frangerentur obstacula malæ voluntatis, ut contigit in Apostolo Paulo, Aët. 9. & sperant peccatores impœnitentes futurum sibi in vitæ extremis; quia esset opus rarum præter consuetum gratiæ ordinem, & excedens naturæ vires. Mira, de quibus sanctus Augustinus lib. 21. de Civitate Dei, cap. 4. 5. & 8. sunt ea, quorum causæ latent, v. g. quòd fons in Epiro extinctas faces accendat, & accensas extinguat; sed miracula non sunt, quia horum rationes, inquit Sanctus Doctor, rebus creatis inditæ & concreatæ fuerunt; quæ, quia dæmonibus non sunt occultæ, quemadmodum hominibus, ideo mira & stupenda plerumque faciunt, sive per se, sive per Magos.

Verum itaque miraculum est opus non modò mirum, sed etiam divinum; quia licèt perficiatur per creaturam Deo servientem, sive pecus sit, ut asina Balaam, quæ locuta est ad commo-
nendum vesanum Prophetam, Num. 22. sive homo, aliquando etiam peccator, ut Judas Matth. 10. Caiphas Joan. 11. & 12, de quibus Christus Matth. 7. tamen ab eo est, qui habet in seipso absconditas quorundam factorum causas, quas rebus conditis non inseruit, illasque implet, ut

voluerit. Ita ferè Sanctus Augustinus lib. 9. de Gen. ad lit. c. 17. & 18.

Porro ex hujusmodi explicatione manifestum est, miraculum fieri non posse in erroris confirmationem: namque evidenter constat & miraculum esse opus Dei, & Deum testimonium falsum dicere non posse. Unde sic conficitur argumentum: Illa Religio infallibiliter est vera, & Deum habet auctorem, ad quam stabiliendam & propagandam innumera edita sunt miracula: atqui talis est Religio Christiana: Ergo. Major evidens est, & à nemine potest negari.

Minor probatur ex Apostolorum scriptis, in quibus tam patentia & tam multiplicia referuntur miracula, ut ne Judæi quidem repetitis examinibus inficiari potuerint. *Quid facimus*, inquit Pharisei, & Sacerdotum principes infensissimi Christi hostes, *quia hic homo multa signa facit?* Joan. 11. & de claudo per S. Petrum curato, Act. 3. sic inter se colloquuntur cap. 4. *Quid facimus hominibus istis, quoniam quidem notum signum factum est per eos. . . manifestum est, & non possumus negare?* Illud insuper movere debet Infideles, quòd Christus, tanquam naturæ Auctor & Dominus, Apostolis contulerit omnimodam potestatem operandi miracula, Matth. 10. *Infirmos curate, mortuos suscite, leprosos mundate, demones ejicite.* Hæc dixit, & facta sunt: nam Apostoli post ejus mortem & resurrectionem mundum miraculis impleverunt, ut liquet tum ex Actibus, ubi vel ipsa Petri umbra sanabat infirmos, cap. 5. ut Verbum Domini impleretur. *Qui credit in me, opera, quæ ego facio, & ipse faciet, & majora horum faciet;* Joan. 14. Nam;

Nam, ut advertit sanctus Augustinus, non legimus umbram Christi talia fuisse operatam. Tum ex Epistolis Apostolorum: namque in prima ad Corinthios legimus tam multiplicia & tam communia fuisse apud fideles miracula, ut necessum fuerit Apostolo præscribere, quo ordine quisque uteretur potestate sibi divinitus concessa, ne turbaretur societas. Quin & Apostoli potestatem à Christo acceptam successoribus suis transmiserunt, qua Verbum Evangelii recens seminatum irrigarent donec cresceret, & universum orbem impleret. Sufficit sanctum Irenæum testem proferre, qui secundo sæculo scripsit quod in omnium oculis erat positum. *In fraternitate*, inquit l. 2. cap. 57. & 58. *sæpissimè . . . reversus est spiritus mortuo, & donatus est homo orationibus Sanctorum. . . . Alii demones excludunt: alii autem & præscientiam habent futurorum: alii laborantes, aliqua infirmitate per manus impositionem curant, & sanos restitunt. Jam etiam, ut diximus, & mortui resurrexerunt, & perseveraverunt nobiscum annis multis. Quid autem? non est numerum dicere gratiarum, quas per universam mundum Ecclesia à Deo accipiens in nomine Jesu Christi crucifixi sub Pontio Pilato, per singulos dies in opitulationem gentium perficit. Hæc contra Hæreticos scripsit beatus Martyr; indeque concludit eos non esse verè Christianos, quòd talia perficere nequeant. Hæretici, inquit, non possunt cæcis donare visum . . . neque omnes demones effugare, præter eos, qui ab ipsis immittuntur. Et hoc modo ipsi demones, & Magi eorum nomine liberant, quos torquere cessant, ut advertunt sancti Patres. Tertium sæculum miraculis non caruit, ut constat ex Scriptoribus, qui in illo floruerunt, Tertullia-*

tulliano, sancto Cypriano, & aliis; quamvis minus frequentia fuerint, quàm primo & secundo; quia Religio Christiana jam radicata non indigebat tam continuis irrigationibus. Quarto verò sæculo, quo imperante Constantino & successoribus Imperatoribus Christianis extincta est tyrannorum persecutio, subversa idolorum templa & Ecclesia stabilita ac roborata, longè lateque diffusa est, nova miracula non fuere amplius necessaria, sive ad continendos fideles, sive ad revincendos Hæreticos, sive ad subigendas gentes, quæ Christo nondum crediderant; cum innumera miracula primò edita in gratiam Religionis Christianæ, eam pariter demonstrarent divinam & prioribus & posterioribus sæculis; quanquam nec defuisse miracula quarto sæculo & subsequen-
tibus testantur indubitata monimenta, historia Eusebii, Socratis, Sozomeni, Victoris Uticensis de persecutione Vandalica; scripta sanctorum Patrum, ut Augustini lib. 22. de Civ. Dei cap. 8. & seq. de reliquiis sancti Stephani. Denique nulla est ætas, in qua viri sanctitate insignes miraculis non claruerint. Horum fidem faciunt non solum qui scripserunt eorum historias, ut Severus Sulpitius Sancti Martini, Godefridus sancti Bernardi, & innumeri alii, sed & rigidum examen, cui subjecta sunt priusquam eorum auctores in Sanctorum album referrentur.

Dices 1. Scripta Apostolorum nullam habent auctoritatem apud gentiles: ergo ex iis persuaderi non possunt.

Distinguo antecedens. Nullam habent auctoritatem, sed merentur habere, Concedo: non merentur habere, quemadmodum libri quorundam

dam Ethnicorum & Hæreticorum, in quibus narrantur remotiora & occulta, quæ merito fabulosa videri possunt, Nego antecedens. Namque scripserunt Apostoli res in conspectu omnium gesta, non solum eo tempore, sed in iisdem locis, ubi gestas fuisse referunt. Numquam autem in mentem venerit quod evidenter repugnat, nimirum Apostolos cum Judæis conviventes scripsisse ipsos eosdem Judæos vidisse cæcos illuminatos, mortuos suscitatos, & civitates suas multitudo prodigiorum Christi & ejus discipulorum commotas. Denique sicut nullus Gentilis in dubium revocaverit, Christum extitisse, discipulos collegisse, tandemque à Judæis fuisse crucifixum; sic negare non potest ipsum per se & per discipulos innumera edidisse miracula; ea enim omnia pariter credibilia sunt, quia æquè palam gesta, ab iisdem auctoribus conscripta, eodem tempore & ubi peracta fuisse referuntur. Quid infideles objicere possunt contra primam Pauli epistolam ad Corinthios, in qua 1. reprehendit eorum inordinatam æmulationem pro dono linguarum; deinde præscribit quo ordine quisque uti debeat charismatibus? annon Gentilis, vel ex illa epistola fateri cogetur, Ecclesiam Corinthiorum miraculis coruscasse? Confirmatur: nec ipsi Judæi diffitebantur Christum miracula fuisse operatum, ex Tertulliani libro contra Judæos cap. 9. nec Romani, qui ea in publicos Commentarios retulerunt, ex sancto Justino, apologia secunda ad Imperatores. Quin & Sanctus Hieronymus, & ante eum Eusebius, in Chronicis proferunt testimonia Ethnicorum de terræ motu & defectu Solis in morte Christi. Sic enim Phlegon de iis scribit: *Quarto autem*

anno

anno 202. Olympiadis, qui fuit principatus Tiberii decimus octavus, magna & excellens inter omnes, quæ ante eum acciderant, defectio solis est facta; diei hora sexta ita in tenebrosam noctem versus, ut stellæ cælo visæ sint, terræque motus in Bithynia Nicænæ urbis multas ædēs subvertit. Porro defectio illa nec ab Astrologis prævisa, nec provideri potuit, cum tunc temporis Luna utpotè plena in Judæorum Paschate, non extaret media inter solem & terram.

Instabis: Gentilis suspicari potest illa Apostolorum scripta esse supposititia, & à Christianis exarata post Apostolorum tempora.

Contra, 1. viventibus Apostolis evulgata fuisse constat 1. ex c. 3. 2. Petri, ubi Apostolus laudat sancti Pauli epistolas, scribitque tunc fuisse in manibus etiam indoctorum. 2. Discipuli Apostolorum, ut sancti Clemens, Ignatius, & Polycarpus superstites Magistris testimonia ex eorum scriptis depromunt ad erudiendos Fideles. 3. Sanctus Irenæus, auditor sancti Polycarpi, & ejus contemporaneus, sanctus Justinus Hæreticos ex scriptis Apostolorum revincunt; idipsum præstant Patres, qui eos proximè excipiunt, ut Origenes & Tertullianus; hic lib. 1. contra Marcionem c. 1. objicit Hæretico, quod *Evangelia corroserit*, hoc est mutilaverit.

Dices 2. Ex Sancto Augustino lib. de unitate fidei, Ecclesia non probatur ex miraculis; sic enim scribit: *Quæcunque talia in Catholica fiunt, ideo sunt approbanda, quia in Catholica fiunt; non ideo ipsa Ecclesia manifestatur, quia miracula in ea fiunt.* Ergo miracula non sunt evidentia veræ Religionis testimonia.

Confir-

Confirmatur : Ex dictis, verum miraculum est res mira, quamvis omnis res mira non sit verum miraculum : atqui res mira dicitur ea, cujus causa latet : ergo veri miraculi causa latet, ac proinde non possumus deprehendere, an illud opus admiratione dignum, sit effectus solius omnipotentiae divinae, an artis magicæ, ut signa à Magis Pharaonis in Ægypto edita, Simonis Magi apud Samaritanos : Antichristi futura, an alicujus virtutis femina iis creaturis inditæ & congenitæ, quæ movetur vel ex concursu quarundam circumstantiarum, vel ope Angeli, sive boni, sive mali. Hinc omnes sectæ jactitant sua miracula, ut Mahumetani, Hæretici apud sanctum Augustinum, citato capite 16. de unitate Ecclesiæ. Philosophi quoque opponunt Apostolis Apollonium Thyanæum, qui sub Domitiano Imperatore futura prædixit, & mira fecit. Et Gentiles ex suis Scriptoribus proferunt plura miracula, quæ sanctus Augustinus recenset lib. 10. de Civitate Dei cap. 16. Celebre est quod Svetonius narrat de Imperatore Vespasiano, qui spūto cæcum curavit. Ergo miracula sunt signa admodum æquivoca.

Distinguo antecedens. Ecclesia non probatur miraculis dubiis, de quibus Donatistæ, (contra quos agit) in commendationem suæ sectæ gloriabantur, Concedo; miraculis indubitatis, quibus Religio Christiana sibi auctoritatem conciliavit, Nego antecedens: nam totus est sanctus Doctor cap. 8. lib. 12. de Civit. Dei, ut ostendat miracula necessariò fuisse priusquam mundus in Christum crederet; alioquin, *Unde, inquit, tanta fide Christus usquequaque cantatur in cælum cum carne*

carne sublatus? unde temporibus eruditis sine ullis miraculis nimium mirabiliter incredibilia credidit mundus? Addit, miracula nunc non esse necessaria, quamvis in Ecclesia Catholica multa fiant, quæ enumerat.

Ad Confirmationem respondeo 1. Certissimum est, resurrectionem mortuorum non posse esse nisi à Deo: atqui Christus non unum aut alterum occultè suscitavit, sed plures palàm & publicè; tres insignes expressè notant Evangelistæ: sed plures alios prætermisisse colligitur tum ex c. 11. Matth. ubi Christus Joanni Baptistæ per nuntios interroganti an ipse esset Messias? respondet: *Renuntiate quæ vidistis; cæci vident mortui resurgunt.* Tum ex cap. 21. Joan. *Sunt & alia multa, quæ fecit Jesus, quæ si scribantur per singula, nec ipsum arbitror mundum capere posse eos, qui scribendi sunt, libros.* Sed illud stupendum magis, in quo se naturæ auctorem probavit, scilicet quoddam Discipulis contulerit potestatem suscitandi mortuos: *infirmos, inquit Matthæi 10. curate, mortuos suscite.* Quàm frequenter autem Discipuli etiam post Ascensionem, & eorum successores, usi sint hac potestate, liquet tum ex libro Actuum Apostolorum, tum ex laudato testimonio sancti Irenæi.

Respondeo 2. innumera illa miracula, quorum causa est minùs patens, quàm resurrectionis mortuorum, nec casui, nec rationibus seminalibus naturæ inditis, nec malis dæmonum artibus tribui possunt.

Non casui; quia id casu contingere dicitur, quod sine consilio & præter intentionem operantis evenit; unde sic argumentari licet. Illa casu non fiunt, quæ certò obveniunt mediis ad ea produ-

producenda institutis, & consultò adhibitus: v. g. inflammatio stupæ non est casualis & fortuita respectu illius, qui de industria ignem admovit stupæ: atqui primis Ecclesiæ sæculis miraculorum dona certò obveniebant iis, qui consultò & cum pietate Religionis Sacramenta suscipiebant. Ergo.

Non rationibus seminalibus & occultis naturæ inditis tribui possunt illa miracula, quia fideles & infideles, boni & mali ejusdem erant naturæ, eodem simul utebantur cælo & aere, in iisdem prorsus versabantur circumstantiis loci & temporis. Cur ergo non indiscriminatim commovebantur illæ rationes seminales? cur Religione Christiana initiati duntaxat signa illa operabantur, & hisce temporibus hi soli, qui eximia sanctitate præfulgent? nullus non videt, nisi mentis oculos clausit, veram & unicam tot miraculorum causam fuisse fidem in Christum, & Sacramentorum ejus perceptionem, quemadmodum ipse prædixerat Marci ultimo: *Signa autem eos qui crediderint, hæc sequentur, in nomine meo dæmonia ejicient, linguis loquentur novis, &c.*

Multò minùs hujusmodi miracula tribui possunt malis dæmonis artibus; 1. quia qui miracula illa minùs perspicua in commendationem Religionis Christianæ ediderunt, ii ipsi & in eundem finem mortuos suscitaverunt virtute evidenter divina, ut jam ostendimus. Quis autem dicere audeat Satanam per eosdem homines innumera signa operatum fuisse in testimonium illius Religionis, quam Deus mortuorum resurrectione veram comprobabat; 2. quia his miraculis regnum Satanæ subversum est, idola contrita, templa destructa, oracula explosa, &c.

& æterno silentio damnata; & signorum falsitas, quibus dæmones Gentilibus illudebant, iis, qui attendere voluerint, detecta. 3. Ex indubitatis testimoniis & experienciis, quibus constat providentiam divinam invigilare rebus humanis, certò colligimus Deum nunquam permittere dæmones ita grassari, ut omnes etiam electi necessariò seducantur; sed semper suppetere aliqua media, quibus error caveri possit. Patuit Pharaoni & cunctis Ægyptiis signa Magorum fuisse meras præstigias, Exodi 8. Viderunt Samaritani se à Simone Mago fuisse delusos, quod & ipse visus est confiteri, Act. 8. Infelix Antichristi exitus demonstrabit prodigiorum ejus vanitatem, quam & præsentire debent fideles à Christo Domino præmoniti, Matth. 24. ubi & aliorum Pseudo-prophe-tarum seu Hæreticorum falsa signa prædicuntur, ne illis attendant ejus discipuli.

Quod spectat Ethnicorum & Philosophorum miracula, fortè non sunt facta, quæ de iis leguntur; non enim per idoneos testes fuere comprobata. Sed verè facta fuerunt, si examini subjiciantur, facile erit deprehendere dæmonum artibus fuisse edita, tum quia pugnant contra veritatem manifestam, tum quia non excedunt naturæ saltem Angelicæ vires. Tacitus, *lib. 4.* refert de cæco à Vespasiano illuminato, consultos Medicos respondisse, vim luminis in eo non fuisse exesam, potuisseque sanari sublatis obstaculis. Prædixit Apollonius, quod dæmon erat facturus, nempè Domitianum mitiorem erga se futurum. Fecit ipse, fecerunt & alii, quod potest dæmon, si Deus potentiam ejus non liget: denique si opus omnem

omnem vim creatam superet, ut conversio substantanea virgæ aridæ in serpentem vivum, fascinat intuentium oculos, ne percipiant virgam subductam, & serpentes in ejus locum aliunde adductos. Sed fascinatio & delusio nec diuturna nec universalis esse potest, Deo ita providente, ne universum genus humanum seducatur; unde nec illæ præstigiæ frequentes sunt, permittunturque solum, in vindictam quorundam impiorum hominum, qui ut timorem Dei à se expellunt, facile hujusmodi fallaciis incauti decipiuntur, ita ut ab errore revocari possent, si vellent. Nam quemadmodum virga Moysis in serpentem versa, Magorum virgas devoravit: sic miracula Christi & Discipulorum ejus, magicas Philosophorum & Gentilium artes traduxerunt. Tribus præsertim sæculis fuerunt ubique frequentissima, totum orbem impleverunt, & usque ad nostram ætatem, sicut nunquam defuere viri eximia sanctitate conspicui; sic nec desit divinæ virtutis operatio in ostensione signorum & prodigiorum. Addo, si in hypothese impossibili tot & tanta signa præstigiæ & dæmonis ludibria fuerunt, error prudenter caveri non potuit; quia nulla ratio, nullus prætextus esset de iis quidquam sinistri suspicandi. Imò nec viderentur Deo suppetere media saltem externa, quibus humanum genus deceptum in aliud Evangelium transferret. Quid enim amplius facturum esset ad destruendam meritorum Christi fidem? Sed demus Deum plus posse quàm cogitare possumus, certè homines per septemdecim sæcula signorum evidentia delusi in posterioribus deceptionem prudenter suspicari deberent. Liceat ergo fidenter dicere cum Richardo à Sancto Victore

lib. 1. de Trinit. cap. 2. *Quæ revelata sunt nobis cœlitus, tam multis, tam magnis, tam miris prodigiis confirmata sunt, ut genus videatur dementiæ in his vel aliquantulum dubitare. Utinam animadverterent Judæi: utinam adverterent Pagani, cum quanta conscientiæ securitate pro hac parte ad divinum judicium poterimus accedere. Nonne enim omni confidentia dicere poterimus: Domine, si error est, à te decepti sumus? Ista enim sunt nobis tantis signis & prodigiis confirmata, & talibus; quæ nonnisi per te fieri potuerint.*

Tertium momentum semitur ex mirabili Christianæ Religionis propagatione, de qua sic scribit S. Augustinus lib. 22. de Civitate Dei cap. 5. *Si per Apostolos Christi, ut eis crederetur, Resurrectionem atque Ascensionem prædicantibus Christi, etiam ista miracula facta esse non credunt (Gentiles) hoc nobis unum grande miraculum sufficit, quod ea terrarum orbis sine ullis miraculis credidit. Enimverò ubi nihil est humanum, totum est divinum: atqui in propagatione Religionis Christianæ nihil fuit humanum, quod unicuique perspicuum fiet, si duo attendat; primum, quæ fuerit suscepti operis difficultas; secundum, quæ electio mediorum, quibus tam arduum opus brevi tempore peractum est. 1. Itaque immutandi non unius gentis, sed omnium gentium mores, quod quàm difficile sit expertus est divinus ille Plato, qui ideo in periculum venit, quod vel tentasset. 2. Eradicanda erat ubique Religio, quæ à pluribus sæculis altas radices jecerat in animis, sive sapientium, sive insipientium: hac de causa magnus Socrates cicutam bibit, & præconceptum opus inau-*

inauspicatum reliquit. Sed quod longè difficillimum, & prorsus impossibile videri poterat, nova inferenda erat Religio Judæis scandalum, Gentibus stultitia, tum propter incredibilia quæ docet, v. g. Deum unum esse in tribus personis; Deum factum hominem, & crucifixum: tum ob præcepta, quibus indicitur abnegatio sui ipsius, & contemptus rerum temporalium. En perficiendum opus; ineant propterea sapientes consilium, & non fiet: jungant vires Principes terræ, copiosaque instruant agmina, & nihil proficient. Quare rejectis his omnibus humanis subsidiis, Christus ipse, secundum hominum existimationem, abjectus, Fabri filius, à Principibus suis damnatus ut impius, tandemque crucifixus, eligit quæ stulta sunt mundi & contemptibilia, 1. Cor. 1. Apostolos numero duodecim, homines viles, idiotas, piscatores, crassi & tardi ingenii, ut ex Evangelio liquet, & quod caput est, meticulosos, qui eum in periculo turpiter deseruerant metu mortis: non eos præmiis allicit, nec falsa spe deludit; sed præmonet odio futuros omnibus hominibus, flagellandos, & morte afficiendos; nihilominus pauci & viles illi homines, contra omnem spem, & ut sapientiæ humanæ videbatur, temerè & insipienter opus aggrediuntur, totum lustrant orbem, & tanquam luminaria cæli, ubique tenebras erroris expellunt, Evangelii lumen spargunt, Philosophos in suam sententiam trahunt, licèt idiotæ; Oratores movent & persuadent, licèt rudes piscatores; nobiles, etiam Senatores, & viri Consulares, amore crucifixi non solum affectum, sed & usum divitiarum suarum abdicant, ut impleatur, inquit Sanctus Au-

gustinus, quod prædixerat Christus, discipulos suos majora facturos, quàm ipse fecerat. Namque juvenem divitem ipse non adduxit, ut venditis omnibus, quæ habebat, & in pauperes erogatis, ipsum sequeretur; cùm idipsum innumerum in Judæa, ut constat ex libro Actuum; tum in Imperio Romano, in aula etiam Imperatorum, & ubique faciliè præstiterunt. Hic cum Propheta exclamare liceat: Nunquid mulier una die concipiet & pariet? nam sparso Evangelii semine, subito mundus ex idololatra factus est Christianus. Vident Reges & fremunt, sed homines natura timidi, virtute Crucifixi minas eorum spernunt; rident nec rebellant, cùm præ multitudine jam possent; omnis sexus & ætas, teneræ puellulæ crudelia & hætenus inaudita gaudentes perferunt tormenta, omnes orbis partes madent eorum sanguine, ex quo, tanquam ex sæcundo semine, Christiani multiplicantur, nedum imminuantur, & amplissima seges exuberat, quin & ipsi lupi (Imperatores dico) carnibus agnorum jam satiati, agni fiunt, Christo se devovent, crucem ejus in diademate honoris causa sculptam deferunt, & cultum ejus amplificant. Hæc quantumcunque incredibilia, jam cernuntur impleta; unde magnum prodigium est ille, qui mundo credente non credit, ait sanctus Augustinus.

Tria recensita credibilitatis motiva maximè juvant, 1. Auctoris Christianæ Religionis sanctitas; 2. doctrinæ puritas; 3. diuturnitas, & indefectibilis perseverantia. Illa enim Religio credenda est vera, quam commendat summa Auctoris sanctitas, doctrina ab omni erroris labe purissima,

rissima, & multis sæculis probata invincibilis firmitas. Atqui talis est Religio Christiana.

Prima pars minoris, quæ est de sanctitate Auctoris, constat ex tota ejus vitæ serie in Evangelio scripta, quæ non minus fuit supra humanam virtutem, quàm infirmorum curatio, & mortuorum resurrectio, adeo ut sanctitatis ejus fulgor falsas criminationes ipso tacente dispulerit, tum coram Judæorum Principibus, ad fovendam omnem calumniam alioquin paratissimis; tum coram Pilato homine ethnico, qui ipsius innocentiae evidentia coactus est confiteri, se nullam in eo damnationis causam invenire. Addunt testimonium, Eusebius Cæsariensis lib. 4. de demonstrat. Evang. sanctus Hieronymus lib. de Scriptoribus Ecclesiasticis, sanctus Isidorus Pelusiota, lib. 4. epist. 225. Sozomenus lib. 1. Hist. cap. 1. & alii, ex Josepho Judæo desumptum, qui tempore Vespasiani scripsit antiquitates gentis suæ. Sic enim legitur cap. 4. lib. 18. ejus Historiæ: *Fuit autem hoc tempore Jesus vir sapiens, si tamen virum illum oportet dicere; erat enim mirabilium operum effector, magister hominum, qui veralibenter amplectuntur, & plurimos ex Judæis, plurimos etiam ex Gentibus ad se pertraxit. Hic erat Christus. Cùmque à primoribus gentis suæ ad crucem damnatus esset, ab eo diligendo non abstiterunt, qui primum dilexerant eum. Post tertium diem rediivus ipsis apparuit, cùm divini Vates hæc, & alia plurima admiranda prædixissent.*

Egregium quidem adversus Judæos testimonium; sed ut nobis necessarium non est, sic nec indubitatum: namque benemulti ex recentioribus contendunt, textum esse adjectitium, i. quia

nonnisi Christianus, qualis non erat Josephus, potuit ita scribere; 2. quia falsum est plures ex Gentibus adhæsisse Christo, cum non prædicaverit nisi Judæis: 3. quia textus ille filum orationis abrumpit: 4. quia stylus est planè diverius: 5. quia Patres antiquiores, ut Tertullianus & Origenes, hunc locum nunquam proferunt contra Judæos, cum tamen Josephi libros meminerint. Attamen in nullo ex codicibus, sive Latinis, sive Græcis, deest ille locus, vixque credi posset Josephum, qui in accurata gentis suæ Historia minora accenset, v. g. de Joanne Baptista, & de Jacobo fratre Domini, prætermisisse quæ Christum spectant, multò graviora, præsertim cum ejus ætate Christianum nomen esset celebre etiam apud Romanos.

Secunda pars minoris, quæ est de veritate doctrinæ, inde suadetur, quòd supra naturalem sit hominis conditionem nullibi & nusquam à vero deficere, juxta illud Psalm. 115. *Omnis homo mendax.* Erravit Plato in sua Republica; lapsi sunt Lycurgus & Romani scribendo leges; Judæi, ubi à Deo recessere, falsa & fabulosa legi divinitus acceptæ admiscuerunt, ut constat ex eorum Talmud; sic & Mahometani. Denique sicut membrum à corpore abscissum continuò corrumpitur, ita Novatores hujus temporis ab Ecclesia separati statim in graves errores impeerunt, docentes Deum esse auctorem peccati; rebellandum contra legitimos Principes, & obedientiæ jugum, etiam in civilibus, sub prætextu Religionis, esse excutiendum; hincque in absurdissimas sectas dividuntur. At in Religionis Christianæ doctrina mores spectante, etsi multoties ad rigidum examen

men revocata, nihil adversarii invenerunt quod reprehenderent: quin ipsi Philosophi fateri coacti sunt ipsam idoneam esse & ad privatum hominem perficiendum, & ad absolutam Rempublicam constituendam. Sed illud præsertim mirum est & divinum, quòd à septemdecim sæculis pura & integra fluat.

Tertia pars minoris, quæ est de diuturnitate Religionis Christianæ, probatur ratione à Gamalielie in generali Judæorum concilio adducta & probata Act. 5. v. 38, & 39. *Si est, inquit de Religione Christiana, ex hominibus consilium hoc aut opus, dissolvetur; si vero ex Deo est, non poteritis dissolvere illud.* Enimverò ea est humanarum rerum conditio, ut fluxæ sint & caducæ, nulloque extrinsecus impellente, suo proprio pondere in interitum ruant; atque ut fileam de imperiis potentissimis Assyriorum, Medorum & Græcorum, Romanum, omnium fortissimum, uno lapillo de monte cadente contritum est, Dan. 2. Stat quidem Mahometanorum secta ab undecim sæculis, sed qua vi & qua arte? nempè & armorum potentia, qua cavetur ne sub pœna capitis, quisquam ejus doctrinam fabulosam verbis aut scriptis impugnet; & singulari Præpositorum vigilantia, ut subditi cæremonias quasdam addiscant, dogmata verò prorsus ignorent: toti terrenæ felicitati attenti; quam lex eorum carnalis pollicetur, voluptati & cæteris cupiditatibus indulgent. Hinc est quòd illa secta consistere nequeat, ubi non dominantur Principes Mahometani, utpote quæ non sua, sed illorum virtute & fortitudine nitatur. Christiana verò Religio à septemdecim sæculis in persecutionibus emicuit; floridior ejus

ætas apparuit vexantibus eam Imperatoribus crudelissimis. In subsequente pace, quæ propter Hæreticos & Schismaticos fuit illi amarissima, eadem semper stetit; pristinas vires ubique exeruit usque ad copiosam sanguinis effusionem, multo tempore contra Arianos, Regum potentia fretos, dimicans, & subinde contra Eutychianos, Iconomachos, ac tandem contra Novatores hujus temporis, qui anno proximè elapso tot Martyres effecerunt in Aquitania, quot Catholicos horrendis cruciatibus tentaverunt, cum ipsi paulò ante, non timore mortis, sed solo amittendorum bonorum metu, omnes ubique hæresim suam ejurare simulaverint, etiam cum perjurio; quæ utinam non commemoraverim ut confundantur, sed magis ut ad Catholicam redeant Ecclesiam, quam insuper illis demonstramus ex nativo illius vigore, qui non decrescit succedentibus annis, quemadmodum quotidie experimur in firmissimis ejus membris, quibus parum est ut affectu, nisi & actu omnia dimittant, ut Christum lucrifaciant, & ad illum omnes adducant. Vivificus enim ardor dilatandi & amplificandi Religionem Christianam, quem Christus Apostolis inspiravit, manet in ejus corpore, quod est Ecclesia, atque eo incitata viva ejus membra non quiescunt, donec universum orbem impleant; eo animo excurrunt ad exterarum gentes, ut & ipsæ corpori Christi fociantur. Contra verò Hæretici, tanquam membra mortua, manent & putrescunt in eo loco ubi fuerint excisi. Permanet quidem usque adhuc, & juxta Prophetarum oracula permanebit Judæa gens, sic in nationibus dispersa, ut maneat inconfusa, sed in obsequium Christianæ Religionis, & sicut

sicut jam monuimus, ut in testimonium ejus Judæi libros proferant Gentilibus minimè suspectos. Quæ cum ita sint, *Dubitabimus*, inquit sanct. Augustinus lib. de utilitate credendi, nos istius Ecclesiæ condere gremio, quæ usque ad confessionem humani generis ab Apostolica sede per successiones Episcoporum frustra Hæreticis circumlatrantibus, & partim plebis ipsius judicio, partim Conciliorum gravitate, partim etiam miraculorum majestate damnatis, culmen auctoritatis obtinuit? Cui nolle primitias dare vel summæ profectò impietatis est, vel præcipitis arrogantia:

Hæc momenta contra quoslibet Infideles efficaciter concludunt; sed contra Judæos habemus specialiora: quare fit

CAPUT V.

Utrùm ex Prophetiis possit demonstrari Judæis, Mysterium Incarnationis fuisse in Christo Domino impletum, ipsumque esse Messiam in lege promissum?

R. Demonstratur planè. Ille enim est verus Messias, qui venit tempore à Prophetis notato, cuique competunt omnia, quæ de Messia prædicta sunt: atqui Christus Dominus venit tempore à Prophetis notato, eique conveniunt cuncta, quæ de vero Messia prædicta sunt, nec ulli alteri convenire possunt. Ergo.

Majorem admittunt Judæi; minoris verò probandæ duæ sunt partes. Prima, quòd Christus venerit tempore, quo Prophetæ prædixerunt Messiam venturum. Secunda, quòd in eo cuncta cernantur completa, quæ de Messia prænuntiata

tiata sunt. Quæ duo totidem paragraphis exponemus.

§. I.

Exponuntur Prophetiæ, quæ venturi Messiaë tempus præfigunt.

Ex omnibus, quæ proferri possunt, tres duntaxat celeberrimas adducemus.

Prima habetur Gen. 49. ubi Patriarcha Jacob morti proximus cum filiis suis fausta precaretur, & quæ ipsis postmodum essent eventura, prædiceret, sic Judam allocutus est : *Juda, te laudabunt fratres tui . . . non auferetur sceptrum de Juda, & Dux de femore ejus, donec veniat qui mittendus est ; & ipse erit expectatio gentium.*

Duo continet hæc Prophetia. 1. Is mittendus dicitur, qui sit expectatio gentium ; quod non potest intelligi nisi de Messia, ut agnoscunt omnes veteres Judæi in Targum & in Talmud. 2. Designatur tempus, quo venturus est Messias, nempe cum deficiet sceptrum ex Juda, & Dux de femore ejus, vel antequam deficiat, vel statim atque defecerit : vox enim, donec, pati potest hos sensus. Atqui sceptrum & Ducem de Juda defecisse cernimus ; experiuntur quoque Judæi dura servitute jampridem depressi, completum quod prædixerat Osee cap. 3. ipsos futuros diebus multis sine Rege & sine Principe : nec diffitentur antiqui eorum Doctores.

Quodd defecerit sceptrum adveniente Christo, dubium esse non potest, cum ex eo tempore cæperit Judæorum captivitas ; sed quo præcisè tempore, an ante ejus nativitatem, an post ejus mortem,

tem, controvertitur in Scholis, suprema enim Judæorum potestas paulatim est imminuta, & tandem extincta. Pompejus 1. ei detraxit, cum pro regno contenditibus Hircano & Aristobulo abnepotibus Simonis Machabæi, venit in Judæam cum exercitu Romano, regnum asseruit Hircano; capta Jerosolyma, tributum Judæis imposuit, & Templum contaminavit. Non multò post Senatus Romanus Hircano & Antigono extinctis Regem Judæis præfecit Herodem, quo regnante natus est Christus, & sceptrum tunc Judæis ablatum, sat communis est Scholæ sententia. Namque 1. Herodes supremum Judæorum Senatum extinxit, interfectis omnibus Senatoribus, uno Sanna excepto; & alios è facie plebis in eorum locum substituit. 2. Ipsum fuisse alienigenam, constans est veterum tum Christianorum, tum Judæorum sententia. Antigonus è familia Assamonæorum seu Machabæorum, qui de regno cum Herode contendit, ipsum vocat Idumæum, ex Josepho lib. 14. Antiquit. c. 27. Idipsum tradit ipse Josephus eodem lib. cap. 2. & lib. 1. de bello Judaico cap. 5. docetque avum ejus fuisse Antipam Ascalonitam, id est, Philistæum: patrem verò Antipatrum apud Idumæos præpotentem, unde Herodes dicitur Ascalonita & Idumæus, Judæus quoque; quia Hircanus, subactis Idumæis, voluit illos Judæos & dici & fieri suscepta circumcissione; quo factum est, ut Herodes in Idumæa natus, fuerit Judæus Religione, sed non ex stirpe sive Jacob, sive Esau, ex quo orti sunt Idumæi; quanquam etsi descenderet ex Esau, nihilominus esset alienigena; quia Esau aliam gentem constituit. Nam Genes. 25. Deus dixit Rebeccæ matri

Iaco-

Jacobi & Esau : *Dux gentes sunt in utero tuo.* Ergo in Herode Judæorum Rege Dux de femore Judæ defecit, & sceptrum in alienigenam translatum est. Illud ipsum secundo sæculo agnoscunt Judæi apud sanctum Justinum, Dialogo cum Triphone, *Herodem*, inquit *Ascalonitam fuisse dicitis.* Et deinceps cuncti Patres tradiderunt, Origenes homil. 17. in Genes. Julius Africanus Origeni coætaneus, Epistol. ad Aristidem; Eusebius Cæsariensis lib. 1. Hist. cap. 7. Sanctus Ambrosius lib. 3. in Lucam; Sanctus Hieronymus in cap. Osee; Sanctus Augustinus lib. 12. contra Faustum cap. 47. & alii. Quare non audiendus Nicolaus Damascenus, Herodis familiaris, qui per fœdam adulationem scripsit, Herodem genus ducere ex primoribus Judæorum, qui è captivitate Babylonica in Judæam rediere. Nicolaum assentationis infimulat: Josephus lib. 14. Antiquit. cap. 2. & lib. 16. cap. 1. cum ipse in graviores culpam incidere, Prophetiam Jacobi in Vespasianum detorqueus, ex sancto Epiphanio hæresi 20.

Defuncto Herode, Archelao quoque ejus filio, & regni successore in Galliam relegato, Augustus Cæsar Judæorum libertatem amplius deprefcit: namque Judæam in provinciam Imperii Romani redegit, & jus gladii in præpositum à se Procuratorem transtulit, ex Josepho lib. 2. de bello Judaico cap. 11. sicque Judæi non fuerunt amplius sui juris, sed Romanorum.

Nihilominus Judæi retinuerunt aliqualem partem pristinae potestatis; ait enim ad eos Pilatus: *Accipite eum vos, & secundum legem vestram judicate eum.* Joan. 18. Apostolos in carcerem conjecerunt, Actorum 4. flagellarunt cap. 5. Saulus à Principe

cipe Sacerdotum accepit potestatem inquirendi in Christianos, & vinctos perducendi in Jerusalem, Actor. 9. Sed regnum Judæorum penitus extinctum est quadraginta annis post Christi mortem, cum Vespasianus, & Titus templum & urbem Jerusalem funditus subverterunt. Ergo prophetiam Jacobi illo saltem tempore fuisse completam fateri necesse est, & abhinc Messiam non esse expectandum.

Recentiores Judæi pondere hujus argumenti oppressi contra fidem suorum Doctorum in Targum, & Talmud, maximæ hætenus apud eos auctoritatis, negant prophetiam Jacobi spectare Messiam, sed Mosen Israelis liberatorem; vel Jero-boam in Silo Regem creatum: ait enim Jacob, *donec veniat Schilo*, id est, is qui in Silo est inaugurandus; vel Nabuchodonosorem, vel Cyrum, qui ab Isaia cap. 45. vocatur Christus: hi enim sunt Schilo, id est à Deo missi: vel ipsum Davidem, vel Salomonem filium ejus: Schilo enim, juxta multos Interpretes, significare potest, *filius ejus & pacificus*. David autem insignis fuit filius Judæ; & Salomon, juxta nomen suum, fuit pacificus. Est & alia ratio cur hæc Jacobi verba, *donec veniat Schilo*, videantur convenire David; quia tabernaculum, quod erat in Silo, transtulit Jerusalem; quæ erat sedes regni ejus. Præterea in Hebræo sceptrum exprimitur per vocem Schevet, quæ idem est ac virga, scilicet castigationis, adeo ut sensus sit: Non desinent calamitates apud Judæos, donec veniat qui mittendus est. Denique contendunt sceptrum in Juda hætenus permanisse; quia statim post excidium Jerosolymitanum habuerunt Patriarchas cum suprema potestate

state Judæis imperantes, atque etiam nunc in Assyria extat florentissimum Hebræorum imperium, in quo præficiuntur duces ex Tribu Juda progeniti.

Sed leviora sunt ista, nimisque absurda, quàm ut iis refellendis diutius immoremur. Namque 1. hæc prophetiæ verba, *non auferetur sceptrum . . . & dux de femore ejus*, manifestè demonstrant, Regum seu ducum seriem futuram in Tribu Juda antequam veniat qui mittendus est: atqui sceptrum nondum ingressum erat illam Tribum quando Moses & David venerunt. David primus in ea regnavit, Salomon primus in ea successit David; Salomon verò plures habuit successores, ac proinde nedum in illo terminata sit series Regum in Tribu Juda, illam fuit auspicatus. Multò minùs terminata est in translatione tabernaculi ex urbe Silo, cùm contigerit regnante Davide, in quo Tribus Juda regno & scepro potiri cœpit. 2. Qui mittendus dicitur, est expectatio gentium, quod de Nabuchodonosore & Cyro dici nequit; hi enim fuerunt gentium terror & vastatores. Jeroboam electus est in Sichem, 3. Reg. cap. 13. non in Silo, præterquam quod ridiculum sit impiissimum Regem omnibus noxium statuere gentium expectationem. Isaias quidem prædixit, Cyrum fore Judæorum liberatorem; sed propterea dici non potest gentium expectatio; nunquam enim Scriptura hoc nomine comprehendit Judæos, sed semper gentes à Judæis distinguit. 3. Jacob fausta prædicit Tribui Judæ: *Juda, inquit, te laudabunt fratres tui*. Ergo per virgam intelligere non potuit castigationes & calamitates. Adde quòd graviores non fuerint

rint in hac Tribu, imò leviores & minùs diuturnæ quàm in aliis: his enim apud Assyrios captivis, illa floruit sub Ezechia & Josia; jugum captivitatis Babylonicæ excussit, aliis in sua captivitate remanentibus; sub Machabæis contra plures Reges prævaluit, & celebre nomen sibi comparavit. 4. Faciliùs mendacium suum tegerent recentiores Judæi, si fictitiam suam monarchiam in globo lunæ collocarent: nam Mercatores & alii illuc non peregrinantur, sicut in terram Assyriorum, ubi Judæos viles & servos deprehendunt sicut in aliis regionibus. Fabulam de priscis illis Patriarchis deriserunt Origenes lib. 4. de Principiis cap. 1. sanctus Epiphanius in hæresi Ebionitarum, & Theodoretus in Dialogo primo. Vide Huetium in Demonstratione Evangelica cap. 5.

Longè gravior est difficultas, quomodo sceptrum in Tribu Juda permanserit ab excidio templi Jerosolymitani sub Nabuchodonosore usque ad adventum Christi Domini, hoc est per sexcentos circiter annos. Namque 1. septuaginta annis Judæi captivi fuerunt apud Babylonios. 2. Post solutam captivitatem nullus apud Judæos Rex extitit, sicut prædixerat Jeremias cap. 22. v. 29. & 30. ubi sic alloquitur Jechoniam: *Audi sermonem Domini, hæc dicit Dominus: Scribe virum istum sterilem . . . nec enim erit de semine ejus vir, qui sedeat super solium David & potestatem habeat ultra in Juda.* 3. A diebus Machabæorum usque ad adventum Christi, hoc est per ducentos annos, Sacerdotes ex Tribu Levi præfuerunt genti Judæorum. Ergo pluribus annis ante adventum Christi, sceptrum defecerat in Tribu Juda.

Nego conseq. ad antecedens verò

Respondeo 1. regnum Judæorum non fuisse extinctum in captivitate Babylonica, sed solum intermissum, cum spe illud repetendi, sicut prædixerat Jeremias cap. 29. *Cum ceperint impleri in Babylone septuaginta anni . . . suscitabo super vos verbum meum bonum, ut reducam vos ad locum istum.* Deinde in illo interregno resedit suprema potestas, seu jus vitæ & necis, penès Judæorum Principes, ut patet ex Historia Susannæ, Dan. cap. 13. legiturque cap. 25. 4. Reg. quòd Evilmerodach Rex Babylonis è carcere Joachin Regem Juda eduxerit, posueritque *thronum ejus super thronum Regum, qui erant cum eo in Babylone.* Atque in hac responsione Catholici habent Judæos sibi consentientes.

Respondeo 2. ex textu Jeremiæ ad summum posse colligi sceptrum in familia David defecisse; nam in Tribu Juda remansisse constat ex mox dicendis. Quanquam nec statim post captivitatem ablatum sit à familia David; nam legitur 1. Paralip. cap. 3. vers. 18. Jechoniam genuisse Salathiel, à quo ortus est Zorobabel, qui fuit dux populi Babylone redeuntis. Jeremias ergo solum prædixit, Jechoniam non habiturum filios regia dignitate fulgentes, & ut subdit, *qui sedeant super solium David.* Eventus autem veram prophetiam demonstravit; neque enim Zorobabel, nec ullus deinceps ex familia David usque ad Christum regia dignitate potitus est; imò post Zorobabelem principatus Judæorum ad summos Pontifices, qui erant de Tribu Levi, delatus est. Hinc exurgit præcipua difficultas, quomodo verè dicatur sceptrum & Ducem in Tribu Juda non defecisse à morte

morte Zorobabelis usque ad Christi adventum. Omissis variis Theologorum opinionibus

Respondeo 3. juxta communioem sententiam, sceptrum resedisse primariò penès Tribum Juda; secundariò verò & ministerialiter penès Tribum Levi; quia summi Pontifices & Senatores Concilii Sanedrin à Tribu Juda electi, ejus nomine, & tanquam ejus Ministri rempublicam administrabant. Sic olim Romani dicebantur imperare, licet non rarò exteri, ut Trajanus Hispanus, sceptrum apud illos tenerent; & in Polonia nostra ætate Dux Saxonum, natione Germanus, regio titulo potitus est, sed ab illa gente accepto, ut illius nomine & auctoritate communi bono invigilaret.

Instabis 1. Ait Jacob Patriarcha: *Non auferetur sceptrum de Juda, & Dux de femore ejus*; atqui summi Pontifices non erant duces de femore Juda, sed de femore Levi: Ergo prophetiæ veritas in ipsis stare non potuit.

Respondent nonnulli, summos Pontifices per lineam maternam ex Juda duxisse originem; namque Aaron, Exodi 6. v. 23. uxorem accepit Elisabeth filiam Aminadab, qui erat de Tribu Juda, & alii deinceps ex illa Tribu uxores sibi asciverunt, ut constat ex cap. 22. lib. 2. Paralip. ubi Josabeth filia Regis Joram dicitur uxor Jojadae summi Pontificis.

Verum probari non potest ista sententia, tum quia nulla extat lex, qua astringerentur Sacerdotes ex Tribu Juda uxores ducere; nec demonstrari potest hanc apud Judæos invaluisse consuetudinem: tum quia origo materna jus ad sceptrum conferre non potuit; aliàs jus illud transmissum fuisset ad filios Herodis, qui Ma-

riamnem Affamonæorum filiam sibi in uxorem fumpferat.

Respondeo itaque concessa majore, distinguendo minorem; Summi Pontifices non erant Duces de femore Juda, Duces, inquam, primarii; Conc. Duces secundarii, id est, nomine Tribus Juda Rempublicam administrantes, nego minorem & consequentiam. Solutio patet ex dictis.

Instabis 2. Summi Pontifices, & Senatores Concilii Sanedrin non à sola Tribu Juda, sed ab aliis unà eligebantur: Ergo sceptrum non magis in Tribu Juda, quàm in aliis Tribubus perseveravit.

Respondent quidam Theologi, prophetiam Jacobi non spectare solam Tribum Juda, sed ad omnes Tribus pertinere; ita ut solum voluerit sanctus Patriarcha suam familiam ex duodecim Tribubus conflata nulli extraneo subdendam, sed sui juris futuram usque ad Christum ducem.

Sed contra 1. hæc sententia contra Scripturam manifestè pugnat: Jacobus enim benedixit singulis filiis suis benedictionibus propriis, c. 49. Gen. 28. Et hoc liquet ex contextu capitis 49. *Juda, inquit Jacob, te laudabunt fratres tui. In quo autem ipsos antecellat, subdit. Non auferetur sceptrum de Juda, concluditque suam Benedictionem his verbis, Pulchriores sunt oculi ejus vino, & dentes ejus lacte candidiores; quæ sanè ad solum Judam pertinent.* 2. Omnes Patres, Sanctus Justinus Apol. 2. Origenes homil. 17. in Gen. SS. Cyrillus Jerosolymitanus, & Alexandrinus, lib: 8. contra Julianum; S. Epiphanius in hæresi Ebionitarum; Sanctus Augustinus lib. 12. contra Faustum, capite 47. & alii hunc locum

cum ad solam Tribum Juda referunt, consentiuntque Judæi.

Respondeo ergo, post captivitatem Babylo-
nicam, Tribum Juda aliis Tribubus nomen & au-
thoritatem dedisse: hæc enim una nominatim &
solemniter dimissa est libera, cum facultate uten-
di suis legibus. *Constitue Judices*, ait Esdræ Ar-
taxerxes lib. 1. Esdræ cap. 7. . . . *ut judicent*
omni populo, qui est trans flumen . . . & omnis, qui non
fecerit legem Dei, & legem Regis diligenter, judicium
erit de eo, sive in mortem, sive in exilium. Scribit qui-
dem Joseph. libro 11. Antiquitatum cap. 10.
non mediocrem Sacerdotum & Levitarum turbam
omnesque Benjamitas Tribui Judæ se adjunxisse.
Sed hæc non impediunt, quominus ex sola Tribu
Juda respublica coaluisse affirmetur; quia Levi-
tæ ex officio rebus sacris mancipabantur, & Ben-
jamitæ adeo pauci numero erant, ut vix uno
loco haberentur, quemadmodum colligitur ex li-
bro 4. Regum cap. 17. ubi abductis in captivitatem
decem Tribubus Israel, dicitur solam Tribum
Juda remansisse, quamvis Tribus Benjamin, &
multi Levitæ in ea permixti cum eadem perman-
serint. Ex aliis quidem Tribubus, quas idem
Joseph c. 5. ejusdem libri 11. commemorat trans
Euphratem transportatas, & usque in hodiernum
diem infinita multitudine ibidem fixisse sedes, ali-
qui ad Judæos transierunt, sed propterea impe-
rium cum ipsis non sunt partiti, sicut nec partiun-
tur Gallorum imperium, verb. gr. sive qui à se-
dibus suis expulsi in Galliam confugiunt; sive pro-
vinciæ, quæ huic Monarchiæ adjiciuntur.

Secunda prophætia, quæ tempus adventus
Messiæ designat, habetur Danielis cap. 9. ubi de-

precanti pro Judæorum libertate, cum instaret septuagesimus annus, quem Deus captivitatis Babylonice terminum præfixerat, sic affatur Gabriel Angelus: *Septuaginta hebdomades abbreviatæ sunt (in Hebræo, definitæ sunt) super populum tuum, & super urbem sanctam tuam, ut consummetur prævaricatio, & finem accipiat peccatum, & deleatur iniquitas, & adducatur iustitia sempiterna, & impleatur visio & prophetia, & ungatur Sanctus Sanctorum (in Hebræo, sanctitas sanctitatum.)* Scito ergo & animadvertite, ab exitu sermonis ut iterum ædificetur Jerusalem usque ad Christum ducem, hebdomades septem & hebdomades sexaginta duæ erunt, & rursus ædificabitur platea & muri in angustia temporum. Et post hebdomades sexaginta duas occidetur Christus (Hebraicè, excindetur;) & non erit ejus populus, qui eum negaturus est. Et civitatem, & sanctuarium dissipabit populus cum duce venturo, & finis ejus vastitas, & post finem belli statuta desolatio. Confirmabit autem pactum multis hebdomada una, & in dimidio hebdomadis deficiet hostia & sacrificium, & erit in templo abominatio desolationis, & usque ad conummationem & finem perseverabit desolatio. In quem locum sic scribit S. Hieron. proæmio in Daniele: *Illud commoneo nullum Prophetarum tam aperte dixisse de Christo. Non enim solum scribit eum esse venturum, quod est commune cum cæteris, sed etiam quo tempore venturus sit, docet, & Reges per ordinem digerit, & annos dinumerat, & manifestissima signa prænuntiat.* Et in caput nostrum Danielis adducit testimonium Julii Africani asserentis, omnes Scriptores usque ad suam ætatem, hoc est, ad secundum & tertium sæculum, hanc prophetiam de Christo fuisse interpretatos. Nulli dubium, inquit, quin de adventu Christi prædictio sit, qui post septuaginta hebdomadas

das mundo apparuit: quod & consequentium Patrum unanimis consensio confirmavit. Vide S. Augustinum ep. 199. aliàs 80. Quin & ipse Christus Dominus Matth. 24. hanc prophetiam de primo suo adventu intelligendam docet. Cum ergo videritis, inquit, abominationem desolationis, quæ dicta est à Daniele Propheta, stantem in loco sancto tunc qui in Judæa sunt, fugiant ad montes. Et Lucæ 21. Cum videritis circumdari ab exercitu Jerusalem, tunc scitote quia appropinquavit desolatio ejus. Addo veteres Judæorum Doctores, teste Sancto Hieronymo in caput nonum Danielis, Messiam hîc à Daniele prænuntiatum agnovisse.

Enimverò Messias, *quod est interpretatum Christus*, inquit S. Joannes cap. 1. v. 41. bis in hac prophetia nominatur, pingiturque iis omnibus characteribus, quibus alii Prophetæ sparsim illum designarunt. Est Sanctus Sanctorum, sanctitas sanctitatum: orietur in diebus ejus justitia sempiterna, finem accipiet peccatum: confirmabit pactum, de quo Jerem. 32. Quæ nec Cyro, nec Onlæ, nec Antiocho Epiphani impiissimo, nec alteri cuiquam nisi Messiæ aptari possunt.

Jamverò prophetiam ex omni parte in Christo impletam cernunt vel ipsi Judæi. Atque ut à lætis exordiar, quibus Angelus Danielelem consolatus est: pactum seu novum testamentum confirmatum est; nam multis dedit Deus Spiritum suum in visceribus eorum, contestantibus variis signis & prodigiis, Petrus piscator rete suum extendit semel & iterum, & octo millia simul traxit ad Christum; augebatur quotidie numerus creden-

dentium, nec modica turba Sacerdotum credit, ut habetur in libro Actuum. In his omnibus finem accepit peccatum, & effloruit iustitia, atque, ut verbis utar propheticiis, Judæus in primis Christi discipulis factus est velut ros vivificus super universam faciem terræ: ubique iustitia & sanctitas germinavit; cœperunt Gentes concurrere ad montem Domini, dicentes Judæis, Tantummodo inter vos invocatus est Deus, venerunt ex Africa & Lydia, Italia & Græcia, & ex Insulis procul, If. 66. & quidem in tanta multitudine, ut conqueri viderentur quasi angustus esset locus, & diceretur ad novam Jerusalem; *Dilata locum tentorii tui, & pelles tabernaculorum tuorum extende, ne parcas*, If. 54. His lætis Angelus subjungit tristitia de Judæis incredulis: negarunt Christum, qui & ab iisdem occisus est, atque in pœnam tanti sceleris, remanserunt sine Rege, sine sacrificio: secuta est talis abominatio in templo, qua major esse non potuit, sive cùm Fanatici illud repleverunt homicidiis, sacrilegiis, & omni genere spurcitiarum, ut refert ipse Joseph, sive cùm Romani sub Vespasiano & Tito Fanaticos illos expugnarunt, templum suffoderunt & incenderunt, eamque Judæorum stragem ediderunt, quæ & horrorem incutiat legentibus apud Josephum belli Judaici historiam, & veram Christi prophetiam demonstret. *Erit tunc tribulatio magna, qualis non fuit ab initio mundi*. Matth. 24. Addit S. Lucas cap. 21. *quia dies ultionis sunt, ut impleantur omnia quæ scripta sunt*. Denique ad visionis complementum perseverat Judæorum dispersio & servitus, talis desolatio templi, & urbis vastitas, ut non ex iis remanserit lapis super lapidem: quæ
enim

enim nunc extat Jerusalem, alia est, quam Romanorum Imperator Ælius Adrianus ædificavit, unde ab ejus nomine Ælia vocata est.

Dices 1. Danielis prophetia ita obscura est & intricata, ut quisque ad suum votum possit illam interpretari. Namque 1. numerat septuaginta hebdomades, sed liberum relinquit quo sensu accipiantur, an hebdomades jubilæorum, aut sæculorum, an dierum vel annorum. 2. Sic dividit illas hebdomades in tres partes, & quidem non sine aliqua rarione, ut omnia, quæ prædixit, non videantur complenda, nisi in ultima hebdomade. Porrò si mille anni sunt apud Deum tanquam dies una, 2. Petri c. 3. quid per hebdomadam unam intelligere non liceat? Ergo ex ista prophetia nihil concludi potest.

Nego antecedens 1. quia Angelus non accepit hebdomadas, nisi in vulgari Judæorum acceptione: atqui illud nomen non usurpatur apud Judæos, nisi vel pro hebdomada dierum, Levit. 23. *Numerabitis . . . septem hebdomadas plenas usque ad alteram diem expletionis hebdomadæ septimæ, id est quinquaginta dies*: vel pro hebdomada annorum, ut Lev. 25. *Numerabis tibi septem hebdomadas annorum, id est septies septem, quæ simul faciunt annos quadraginta novem*. Porrò in prophetia Danielis hebdomadæ dierum intelligi non possunt; quia in tam brevi spatio, quod est unius anni circiter cum dimidio, nulla insignis mutatio in Judæorum regno contigit. Restat ergo ut intelligatur de hebdomadis annorum. 2. Quia Angelus clarè & nitidè asserit numerandas hebdomades septuaginta, quæ conficiunt annos 490. usque ad Christum ducem.

En regula certa, & nulli errori obnoxia, ad cognoscendum quo tempore Messias venturus sit. Tum dividit illum annorum numerum in tres partes, non obscuritatis causa, sed majoris claritatis, nempe ut distinguat annos ultimæ hebdomadæ, & notet quid in unaquaque eveniet: ait enim, post sexaginta novem hebdomadas, hoc est post 483. annos, ungetur Sanctus Sanctorum, scilicet ineunte septuagesima hebdomada declaratus est Messias, cum in Jordane vox Patris de cælo audita est, *Hic est Filius meus dilectus*: & exinde Evangelium suum multis miraculis confirmavit usque ad medium ejusdem hebdomadæ, hoc est annum quartum, quo crucifixus est; quæ cum sigillatim explicentur in prophetia, videtur potius historia quàm vaticinium. Falsò autem, in objectione supponitur intra spatium septuaginta hebdomadarum contineri prædictam desolationem & vastitatem: ex contextu enim sermonis facile intelligitur excidium secuturum post illas hebdomadas: *In medio hebdomadis* (scilicet ultimæ) *deficiet hostia & sacrificium, & erit in templo abominatio desolationis*. Porro circa illius excidii tempus, quo vulgò creditur legem veterem, quæ in morte Christi fuerat mortificata, evasisse mortiferam, & cultum ejus superstitiosum, gens Judaica propriè & plenè desit esse populus Dei; quia à vera Religione & legitimo cultu defecit. Cur autem Angelus primas septem hebdomades à cæteris diviserit, hæc fortè posset afferri ratio, quòd Judæi totidem annos insumpserint ad ruinas reparandas, urbes reædificandas & muniendas, & suam Rempublicam componendam. Quibus perfectis & stabilitis, monet Angelus, iterum numerandas sexa-

sexaginta duas hebdomades usque ad Christum venturum.

Instabis : Ex hac prophetia non potest colligi tempus venturi Messiae, nisi certò numerentur anni ab Angelo prænотati : atqui certò numerari non possunt : Ergo,

Minor probatur. Ut numerentur illi anni, necesse est scire imprimis unde ducendum sit illorum exordium : atqui fatentibus etiam Catholicis, non constat de illo exordio, hinc variae Scholæ opiniones ; alii repetunt à tempore vaticinii Jeremiæ, cap 29. v. 10. *Cum cœperint impleri in Babylone septuaginta anni, visitabo vos . . . ut reducam vos ad locum istum.* Alii ab edicto Cyri, Esdræ 1. Alii à secundo anno Darii Hystaspis, quem dicunt in conjugem assumpsisse Estherem, & erga Judæos propensum. Alii hebdomades inchoant à secundo anno Artaxerxis Longimani ; alii à septimo ejus anno, alii ab ejus filio, qui dictus est Darius Nothus.

Distinguo majorem. Non potest colligi præcisè ante oraculi eventum, Conc. post oraculi eventum, Nego majorem. Probatur efficaciter etiam contra Judæos responsionis veritas argumento à simili. Prædixerat Jeremias Judæos post septuaginta annos Babylone in patriam redituros. Hoc vaticinio nixi Judæi sperabant suam captivitatem non fore diuturnam : sed quo præcisè anno finem esset acceptura prævidere non potuerunt ; quia Propheta non designaverat temporis punctum, ex quo numerandi erant illi septuaginta anni : ex variis tamen prophetiæ circumstantiis intellexerunt instare tempus pristinae libertatis recipiendæ : hinc frequentes Danielis ad Deum preces, ut verbum suum im-
pleret.

pleret. Soluta autem per Cyrum captivitate, hoc est, impleto Jeremiæ vaticinio, Christiani simul & Judæi securius investigant exordium illorum septuaginta annorum, & quamvis illud certò figere non possint, nec in sua computatione conveniant etiam Judæi, propterea vaticinium non nutabit: namque vaticinii veritas potissimum ex eventu probatur. *Propheta*, inquit Jeremias cap. 28. *qui vaticinatus est pacem, cum venerit verbum ejus, tunc scietur Propheta, quem misit Dominus in veritate.* Ex eventu verò judicatur, quis in computatione septuaginta annorum ad veritatem accedat, quis verò aberret, Verisimilius est v. g. eos errare, qui initium illorum annorum sumunt ab undecimo anno Sedeciæ Regis, quo excisum est templum; quia exinde ad solutam captivitatem, seu ad primum annum Cýri, non fluxere nisi triginta anni, 4. Esdræ cap. 3. vers. 1.

Similiter Judæi ex prophetia Danielis colligere debuerunt, Messiam intra septuaginta hebdomadas, hoc est intra annos 490. venturum, id enim non obscure prædixit Propheta; sed utrùm eo aâno, qui fuit decimus quintus imperii Tiberii Cæsaris, declarandus esset, præscire non potuerunt; quia ex divino oraculo non constat quis annus primo loco numerandus sit in computatione septuaginta hebdomadarum, quanquam per vulgata apud Judæos esset fama, quando Christus advenit, adimpletas esse illas hebdomadas, atque ea persuasione jugum Romanorum excutere tentaverint duce Barchocheba, ut notat Rabbi Manasses in Terminò vitæ. Jam verò cùm in Christo cernantur peracta quæcumque Daniel in adventu Messię futura prædixit, nullum superesse potest

potest dubium, quin septuaginta hebdomades in illo defierint; nec varia annorum computandorum ratio hujus oraculi veritatem magis obscurat, quàm vaticinii Jeremiæ, imò ex ejus eventu erroris arguuntur, qui hebdomadas inchoant vel à Jeremiæ vaticinio, vel ab edicto Cyri.

Namque ab initio hebdomadarum non debent numerari usque ad baptismum Christi, nisi 483. anni, hoc est sexaginta novem hebdomades, cùm à vaticinio Jeremiæ numerentur plusquam sexcenti anni, & ab edicto Cyri quingenti sexaginta circiter.

Refellitur insuper utraque opinio ex verbis ipsis oraculi; ait enim Daniel: *Ab exitu sermonis ut iterum ædificetur Jerusalem usque ad Christum ducentem, hebdomades septem & hebdomades sexaginta duæ erunt; & rursus ædificabitur platea & muri in angustia temporum.* Nomine autem sermonis Prophetæ significat edictum quoddam, virtute cujus muri & platea Jerusalem ædificentur. Atqui edictum Cyri effectu caruit, nec Judæi templum, cujus fundamenta ipso regnante jecerant, (Esdræ 3. & 4.) perficere potuerunt, nisi sub Dario, Esdræ capite 6. prohibiti enim fuerant regnante Artaxerxe, Esdræ 4. sed non licuit eis manus admove-re ad urbem reparandam, nisi anno vigesimo alterius Artaxerxis; qui & Assuerus dicitur, Esdræ 4. Perfecerunt murum in angustia temporum, hoc est quinquaginta duobus diebus, Nehem. 6. Plateas autem & ædificia publica & privata constructa fuisse per triennium scribit Joseph lib. 11. Antiq. cap. 5. tum solemniter celebrata est dedicatio muri & urbis anno 23. Artaxerxis; Nehem. 12. atque in illa dedicatione contigisse creditur

ditur illud miraculum, de quo lib. 2. Machab. c. 1. & 2. Ergo verba oraculi cogunt inchoare septuaginta hebdomades vel à vigesimo anno Artaxerxis, quo murus constructus est; vel à vigesimo tertio, quo ipsa urbs reparata.

Sed quis sit ille Artaxerxes ambigitur: quia Reges Persarum & Medorum dicebantur lingua Persica Artaxerxes, id est magnus bellator; & lingua Medica Assuerus, id est Princeps.

Secundùm communioem sententiam, quæ nobis videtur verior, Artaxerxes hic est Longimanus filius Xerxis, probaturque duplici ratione. Prima, quia vigesimus annus illius Artaxerxis, ex quo cum patre regnavit (nam Xerxes contra Græcos profecturus, filium in regno collegam instituit) in annum mundi 3550. incidit; Baptismus verò Christi in annum 4033. Atqui ab anno 3550. ad 4033. sunt præcisè 483. anni, hoc est 69. hebdomades. Secunda, eaque certissima ratio numerandi annos sumitur ab Olympiadicis. Olympiades autem sunt ludi solemnes in honorem Jovis Olympii instituti 23. annis ante Romanam conditam, tempore Ozia Regis Juda; celebrabanturque tantùm anno intercalari circa solstitium æstivum, unde Olympias constat annis quatuor. Porro juxta Scriptores tum profanos, tum Ecclesiasticos, annus vigesimus Artaxerxis Longimani, concurrit cum secundo anno Olympiadis 81. mors verò Christi cum Olympiade 202 exeunte, ex Phlegonte supra citato, qui scribit insolitam Solis eclypsim, quæ in Christi morte mundum terruit, ea ipsa Olympiade contigisse. Numerantur ergo à vigesimo

fimo Artaxerxis anno usque ad Christi mortem 121. Olympiades, quæ cum tribus annis Olympiadis 81. conficiunt sexaginta novem hebdomades cum dimidia, in qua mortuus est Christus, hoc est annos 487. Nihil ergo expressius hoc Danielis vaticinio, nec efficacius ad convincendos Judæos, quorum effugia sunt Christianorum victoria: aded enim manifestè Scripturæ textum depravant, ut superfluum videatur illorum cavillationes refellere.

Nec obstat quòd Josephus scribat. 1. Nehemiam à Xerxe missum esse in Judæam. 2. eundem Sanaballat, (qui filiam in uxorem dederat uni ex filiis Jojadæ summi Sacerdotis, Nehemiæ 13. v. 28.) occurrisse cum octo millibus Alexandro Tyrum obsidenti. 3. Jaddum summum Pontificem, cujus meminit Nehemias cap. 12. v. 11. & 22. pacatum Alexandrum reddidisse. Ex quibus concluditur Nehemiam non fuisse missum ab Artaxerxe Longimano; aliàs vixisset plusquam ducentis annis. nam Esdræ cap. 1. numeratur inter eos, qui sub Cyro Jerosolymam ascenderunt. Atqui à Cyro usque ad Alexandrum, qui devicit Darium Codomanum, ultimum Medorum Regem, fluxere anni ducenti. Non obstat, inquam, quia cum constet, Nehemiam jam grandævum fuisse primo anno Cyri, vel concedendum est ipsum vitam protraxisse ultra ducentos annos, si superstes fuit tempore Alexandri Magni, quod non est credibile; vel necessariò admittendum, Josephum errare, dum refert unum & eundem Sanaballat, (qui cœtaneus fuit Nehemiæ) Alexandro suppetias tulisse; sicut nec ab errore vindicari potest, ubi asserit Nehemiam

miam à Xerxe missum, cùm Scriptura Artaxerxem expressè appellet. Quod Jaddum seu Jeddoam spectat, alii duplicem Jaddum admittunt; alii fatentur unum & eundem, qui recensetur in libro Nehemiæ, occurrissè Alexandro; quia apud Josephum utrobique eosdem habet parentes & majores: sed contendunt aliena manu nomen Jaddus in libro Nehemiæ fuisse insertum: quemadmodum c. 34. Deuteronomii à Moyse conscripti, mors ipsius describitur.

Tertia prophetia signans tempus venturi Messiae profertur ex cap. 2. Aggæi, ubi Propheta Zorobabelem & alios Judæos Babylone reduces ad reædificandum templum his promissis accendit: *Adhuc unum modicum est, & ego commovebo cælum, & terram, & mare, & aridam; & movebo omnes gentes, & veniet desideratus cunctis gentibus: & implebo domum istam gloria, dicit Dominus exercituum. Meum est argentum, & meum est aurum, dicit Dominus exercituum. Magna erit gloria domus istius novissimæ plusquam primæ, dicit Dominus exercituum, & in loco isto dabo pacem.* Malachias quoque, qui unà cum Aggæo & Zacharia Judæos divinis pollicitationibus ad templi reædificationem impellebat; sic eos affatur cap. 3. *Ecce ego mitto Angelum meum, qui præparabit viam ante faciem meam; & statim veniet ad templum suum Dominator, quem vos quæritis, & Angelus testamenti, quem vos vultis: ecce venit, dicit Dominus exercituum.* Negare non possunt Judæi quin hic promittatur Messias brevi venturus. Quis enim nisi Messias expetitur à Judæis, desideratur à cunctis gentibus; cujus sit templum, quod ædificabatur; qui sit dominator, Angelus novi testamenti & fœderis, qui adventu suo commoturus est cælum

cælum & terram: qui secundum templum, quamvis structuræ tam vilis, ut quasi non esset in oculis Judæorum, qui primum viderant, (Aggæi 2. v. 4.) longè majori gloria impleturus est? Atqui illud templum, quod Aggæus & Malachias mirificè commendabant, à Tito est funditus eversum in excidio Jerosolymitano. Ergo Messiam ante illud excidium venisse necessum est. Indicent autem Judæi alium præter Dominum nostrum Jesum Christum, qui adventu suo cælum commovit, cùm missus est Gabriel Angelus; facta est multitudo cœlestis exercitus in ejus nativitate; stella Magos ad præsepe adduxit; vox Patris de cœlo audita est in ejus baptismo, Spiritum sanctum in figura venti vehementis & ignearum linguarum in discipulos effudit; cùm solem nativo suo lumine moriens spoliavit, Qui commovit terram innumeris prodigiis, Oraculi Delphici & aliorum silentio, teste ipso Cicerone lib. 2. de Divinatione, Statuarum & Idolorum, tum in Capitolio, tum alibi, liquefactione & dejectione, ex Dione lib. 37. & aliis, horrendo terræ motu, qui contigit in Passione Christi, de quo ipse Plinius lib. 2. cap. 48. commotione omnium gentium per Evangelii prædicationem, & horrendam ubique Martyrum stragem. Qui commovit mare, partim per generalem terræ motum tempore Passionis, nam mare etiam concuti necesse fuit; partim per ejus imperium, quo & sedatæ procellæ, undæ pedibus calcatæ; partim etiam stupenda piscium multitudine, quos in Petri retia semel & iterum collegit. Novum testamentum condidit ipse Angelus testamenti: pacem dedit ipse pax nostra, non quomodo mundus dat, hoc est

non quæ foveat vitia, sed quæ extinguat: non quæ cupiditates contra rationem armet, sed quæ eas comprimat & subjiciat; quam Angeli ipso nascente prædicaverunt dicentes: *Gloria in excelsis Deo, & in terra pax hominibus.* Venit ad templum suum Dominator Dominus, templum, inquam, à Zorobabele constructum; de eo enim loquebatur Aggæus, non de alio tertio, quod fingunt Judæi à Messia nunc frustra expectato ædificandum. In illo Zorobabelis templo, cùm Virgo Mater purificationis legi obsequeretur, pro carnalibus victimis oblatuſ est hostia Deo acceptissima, aliquando mactanda: oracula divinæ suæ sapientiæ sæpius effudit, illudque præsentia majestatis suæ sic illustravit gloria, ut nec aurum, quo circumtectum fuerat templum Salomonis, nec arca fœderis, nec Urim & Thummim, quæ erant præcellentissima ejus ornamenta, jam ascendant super cor, quemadmodum prædixerat Jeremias c. 3. v. 16.

Indubitatum itaque manet ex tribus insignibus Prophetarum oraculis explicatis, Messiam debuisse venire eo tempore, quo Christus Dominus apparuit. Et

Confirmatur primò ex interpretatione somnii Nabuchodonosoris, Dan. capite secundo, ubi Divinus Vates per statuam designat quatuor florentissima regna, nempe Assyriorum, Medorum, Græcorum, & Romanorum: per lapillum verò de monte excisum sine manibus, qui statuam comminuit, & factus est mons magnus universam terram implens, demonstrari docet regnum æternum (scilicet Messiæ fatentibus Judæis) quod consumet quatuor illa regna, & stabit in æternum. Vide caput

caput septimum, ubi Daniel sub imagine quatuor bestiarum, describit quatuor regna à filio hominis conterenda. Atqui contrita sunt illa regna: Ergo Messias venit.

Confirmatur secundò ex pervulgata apud omnes homines opinione circa Christi tempora Messiam advenisse. *Invenimus Messiam*, ait Andreas, Joan. 1. v. 41. Scio, inquit mulier Samaritana Joan. 4. *quia Messias venit*. Herodiani, hoc est Judæorum Secta, impia adulatione Herodem pronuntiabant Messiam. Synagoga Sacerdotes & Levitas misit ad Joannem, ut eum interrogarent, num esset Christus Joan. 1. Plures Pseudoprophetae, de quibus in Actis Apostolorum, ut Simon Magus; & in Historia Ecclesiastica, ut Barchochebas, pro Messia voluerunt haberi, quod ante illa tempora fuerat inauditum. Quin & apud Gentiles percrebuerat ille rumor. Cicero lib. 2. de Divinatione sic scribit de Rege tunc prodituro, & à Romanis suscipiendò, si salvi esse vellent. Cecinit Virgilius Ecloga 4. de progenie è cœlo ventura, & aureo sæculo mox reducendo. Suetonius in Vespasianum cap. 4. *Percrebuerat*, inquit, *Oriente toto vetus & constans opinio esse in fatiis, ut eo tempore Judæa profecti rerum potirentur*. Denique Tacitus lib. 5. Hist. scribit: *Persuasio inerat antiquis Sacerdotum litteris contineri, eo ipso tempore fore, ut valesceret Oriens, profectique Judæa rerum potirentur*. Hujus rei ita conscii sunt Judæi, ut diris jam vovere soleant, qui adventus Messiae tempora supputant in Sanhedrim cap. 11.

Nec dicant Judæi, Messiam quidem juxta Prophetarum oracula jam venire debuisse; sed propter Judaici populi peccata adventum suum distu-

lisse; namque 1. oracula absolute pronuntiant: & sine ulla conditione. 2. Messias non solis Judæis, sed & Gentibus promittitur. 3. Si deicidium in persona Christi admissum excipias, Judæi minus gravia deliquerunt à tempore captivitatis Babylonicæ, quàm sub Judicibus & Regibus Israel & Juda, præsertim Achaz & Manasse; quæ tamen priora peccata, nec irrita fecerunt, nec suspenderunt Dei promissa. Denique promittitur Messias, ut finem accipiat peccatum, & oriatur justitia. Nullus itaque Judæis superest subterfugii locus, tempus adventui Messię præfixum elapsum est: Ergo Messias non est ultrà expectandus, sed haud dubiè venit. Restat nunc expendendum, utrùm in Christo impleta sit visio & prophetia, id est, utrùm omnes characteres, quibus Prophetæ Messiam delinearunt, occurrant.

§. II.

Ostenditur consensus Evangelii cum libris Prophetarum.

Primò, nuntius ex deserto profectus viam Messię præparabit, Malach. 3. *Ecce ego mitto Angelum meum, & præparabit viam ante faciem meam: & statim veniet, &c.* Is. 40. *Vox clamantis in deserto.* Sanctus Joannes Baptista è solitudine exiens præcessit Messiam in spiritu & virtute Eliæ, Luc. 1. Prodigia, quæ ejus conceptionem & nativitatem comitata sunt, probant ministerium illud fuisse peractum Dei consilio, non humano; aut mala arte.

Secundò, Messias matrem habiturus est virginem, Is. 7. *Ecce virgo concipiet & pariet filium, &*
voca-

vocabitur nomen ejus *Emmanuel*, id est, nobiscum Deus. Hic filius non est Ezechias, utpotè qui jam natus esset: non Isaïæ filius, cujus conceptio & ortus referuntur cap. 8. v. 3. tum quia conceptus non est de virgine: tum quia non est Emmanuel, nec terra Juda ipsius est, sed Emmanuelis, c. 8. v. 8. *implens latitudinem terræ tuæ, ò Emmanuel!* Quod autem virgo sumatur pro puella viro incognita, colligitur ex Hebræo, ubi pro virgine legitur *alma*, quæ vox significat puellam absconditam, seu incognitam; sumiturque eo sensu 1. Cant. v. 2. Psal. 67. v. 26. & alibi frequenter. Septuaginta quoque Interpretes longè ante adventum Christi virginem reddiderunt. Denique ea fuit veterum Rabbiorum sententia Messiam ex virgine nasciturum. Atqui Christus Dominus natus est ex virgine; quod . . . in ea natum est, de Spiritu sancto est, ait Angelus ad Josephum Matth. 1. nec audiendi sunt recentiores Judæi, qui cum Celso apud Origenem dicere audent, Christum Dominum natum esse ex adulterio, cum gratis id effutiant contra communem patrum suorum fidem, qui illum omnes crediderunt esse filium Josephi, à quo beata Maria nullo divortio fuit separata. *Nonne hic est filius Joseph?* inquirebant ejus concives, Luc. 4. Annon ex suis Synagogis illum expulissent, si pro legitimis ejus natalia non habuissent?

Dices: si Christus ex Josepho non est genitus, filius David dici nequit: constat enim ex cap. 1. Lucæ, matrem ejus fuisse de Tribu Levi, & consanguineam beatæ Elizabeth, quæ dicitur de filiabus Aaron: Ergo.

Nego antecedens. Namque iidem ipsi Evangelistæ hæc tria scripserunt: 1. Christum Dominum esse filium David: 2. non esse ex Iosepho progenitum. 3. beatam Elizabeth esse ex filiabus Aaron, cognatam Virginis Deiparæ. Qui verò homines mentis compotes evulgassent inter æmulos, quales erant Judæi, tam manifestè pugnantiâ, si beatissima Virgo ex Davide originem non duceret? Constat ergo apud Judæos beatissimam Virginem, cùm fratribus careret, nupsisse viro ejusdem Tribus & familiæ, juxta legis præscriptum Num. c. 36. *Cunctæ fœminæ de eadem Tribu maritos accipiant, ut hæreditas permaneat in familiis:* Ergo ubi periculum non erat aliò transferendæ hæreditatis, licebat uxores deligere ex qualibet Tribu, ut patet in Davide, qui uxorem accepit filiam Saulis è Tribu Benjamin, 1. Reg. 18. Et ita beata Virgo potuit esse de Tribu Levi secundum lineam maternam.

Tertiò, Messias nasciturus prædicatur in urbe Bethlehem: *Sic enim scriptum est per Prophetam, inquit Principes Sacerdotum Matth. 2. Et tu Bethlehem terra Juda, nequaquam minima es in Principibus Juda; ex te enim exiet Dux, qui regat populum meum Israel.* Michææ 5. Atqui Christus Dominus, licet Nazareth in Galilæa conceptus, Deo tamen providente Bethlehem natus est.

Quartò, Messias Salvatoris nomine insignitur Luc. 2. *Jesus enim idem est ac Salvator.*

Quintò pauperem vitam aget Messias. *Sicut radix de terra sitienti . . . & vidimus eum . . . despectum & novissimum virorum,* inquit Isaias c. 53. Et Zacharias c. 9. ait: *Ecce Rex tuus . . . ipse pauper.*
Chri-

Christus autem adeo pauper fuit, ut testetur Luc. 9. se non habere ubi caput reclinet.

Sexto, Messias prædicaturus est. *Ad annuntiandum mansuetis*, inquit, Is. 61. *misi me, ut mederer contritis corde, & prædicarem captivis indulgentiam. Doctrinam suam multis signis confirmaturus. Tunc aperientur oculi cæcorum, & aures surdorum patebunt.* Is. 35. Et tamen ab auditoribus odio habendus: *Expandi manus meas tota die ad populum incredulum.* Is. 65. Quæ omnia in Christo impleta Judæi agnoscunt.

Septimò, Messias asino vectus solemniter ingressurus Jerusalem prædicatur Zach. 9: *Ecce Rex tuus veniet tibi . . . ascendens super asinam & super pullum filium asinæ.* Atqui turba Judæorum non modica Christum in hoc apparatu urbem ingredientem cum plausu suscepit, Joan. 12.

Octavò, Prophetæ cecinerunt Messiam multa passurum, ac tandem occidendum; omnesque passionis ejus circumstantias accuratè descripserunt. 1. ab amico & familiari prodendus erat: *Homo pacis meæ qui edebat panes meos, magnificavit super me supplantationem*, Psal. 40. v. 10. 2. vendendus triginta argenteis postea projiciendis, & ex eis emendus ager Figuli, Zach. 11. v. 12. *Appenderunt mercedem meam triginta argenteos . . . & projecit illos ad Statuarium*, id est, qui effingit statuas ex luto vel metallo. 3. deferendus à suis: *Percute Pastorem, & dispergentur oves gregis*, Zach. 13. v. 7. 4. Accusandus à falsis testibus, *verbum iniquum constituerunt adversum me*, Ps. 40. 5. accusationibus non responsurus: *Non aperuit os suum*, Is. 53. v. 7, 6. Sputa & omnis generis contumelias passurus. *Corpus meum dedi percutientibus: &*

genas meas vellentibus, faciem meam non averti ab increpantibus & conspuentibus in me. If. 50. v. 6. 7. Cruci inter iniquos affigendus, Psalm. 21. v. 7. Foderunt manus meas & pedes meos. Zac. 13. v. 6. Quid sunt plagæ istæ in medio manuum tuarum? If. 53. Cum sceleratis reputatus est. 8. à prætereuntibus irridendus. Omnes videntes me deriserunt me: Speravit in Domino, eripiat eum. Psalm. 21. 9. Nudandus erat, & super vestes divisas mittenda fors. Diviserunt sibi vestimenta mea, & super vestem meam miserunt sortem, Psal. 21. 10. felle & aceto potandus. Dederunt in escam meam fet, & in siti mea potaverunt me aceto. 11. In latere fodiendus; Et aspicient ad me quem confixerunt. Zach. 12. Porro hæc de Christo vaticinia ipsimet Judæi incauti nec advertentes impleverunt; unde, nisi cæcitatis vitio laborarent, perspicuum illis esset Christum Dominum eum ipsum esse, quem Prophetæ pinxerunt. Ad hæreticos pergimus.

CAPVT VI.

Quomodo asseritur contra Hæreticos mysterium Incarnationis esse peractum?

Ex Scriptura, præsertim novi Testamenti, & ex Ecclesiæ Traditione; utramque enim admittunt Hæretici, paucis exceptis. Verum non ex una parte, neque conjunctis viribus, sed divisis turmis illud mysterium impetunt. Alii siquidem Christi divinitatem impugnant, alii unionem hypostaticam. Qui impugnant humanitatem, rursus inter se dissentiunt; namque alii negant Verbum assumpsisse carnem, alii, admissa carne, negant ani-

animam; alii animam & carnem in Christo agnoscunt; sed contendunt non assumpsisse intellectum: alii voluntatem humanam solummodo rejiciunt: alii denique naturam humanam in Christo integram confitentur, sed nulli dolori fuisse obnoxiam volunt; adeò ut merito in hæreticos transferas quod in Psalmo 117. de Christi persecutoribus legitur: *Circumdederunt me sicut apes*; sicut enim milites singula Christi membra in Passione vexaverunt, ita & hæretici Incarnationis ejus œconomiam veneratis linguarum suarum aculeis undique pupugerunt. *Certum est*, inquit sanctus Fulgentius lib. 1. ad Trasimundum cap. 3. *penè omnes hæreticæ pravitatis errores hinc multipliciter surrepisse, cian magnam pietatis sacramentum, quod manifestatum est in carne . . . nonnulli aut non sicut est, credunt, aut omnino non credunt.* Quare nobis hinc probanda incumbit Incarnationis definitio capite primo explicata, singulæque ejus partes contra totidem hæreses vindicandæ; atque ut efficacius id à nobis præstetur, operæ pretium est breviter referre præcipuarum hæresum auctores, ortum & progressum: namque, ut ait S. Augustinus lib. 16. de Civitate Dei cap. 1. *Multa ad Fidem Catholicam pertinentia, dum Hæreticorum callida inquietudine exagitantur, ut adversus eos defendi possint, & considerantur diligentius, & intelliguntur clarius, & instantius prædicantur, & ab adversario mota quæstio, discendi existit occasio.* Jam diximus satis de hostibus divinitatis Christi Domini in Tractatu de sanctissima Trinitate, ubi invictissimis argumentis probavimus Christum esse Deum. His ergo omissis, ad alios recta transimus.

§. I.

Veram in Christo carnem & verum sanguinem negarunt.

Primo sæculo, (superstitibus adhuc Apostolis) Saturninus & Basilides, Simonis Magi ambo discipuli, docueruntque Corpus Christi fuisse phantasticum, ac propterea minimè passum, ex sancto Irenæo lib. 1. cap. 22. Tertulliano de præscript. cap. 46. & S. Clemente Alexandrino lib. 4. Stromatum. Addidit Basilides Christum luisse Judæorum conatum, dum Simonem Cyrenæum, cui milites crucem imposuerant, in propriam figuram mutavit, ipse verò in Simonem transfiguratus evasit.

Secundo sæculo Basilidis sententiam amplexus est Cerdo, ex Tertulliano lib. de præscript. cap. 15. & ejus discipulus Marcion, ex eodem Tertulliano lib. de carne Christi, ubi Hæreticum his verbis ad molliendum animum aptissimis compellat, cap. 3. *Parce unicæ spei totius orbis, qui destruis necessarium decus fidei. Quodcumque Deo indignum est, mihi expedit, salvus sum, si non confundar de Domino meo.* Refert S. Irenæus lib. 3. cap. 3. S. Polycarpum interrogatum à Marcione, num ipsum agnosceret? Respondisse se illum nosse primogenitum diaboli.

Manes, qui à suis dictus est Manichæus, quasi manna fundens, errorem Basilidis & Marcionis tertio sæculo disseminavit, ex sancto Augustino lib. de hæresibus cap. 46. Manichæis quarto sæculo adhæserunt Priscillianistæ, ex sancto Leone epist. 93.

Eodem

Eodem secundo sæculo Valentinus Christo tribuit corpus cæleste seu aereum, quod per Mariam Virginem veluti per canalem, nihil ex ea accipiens, transisse finxit, ex Tertulliano lib. contra Valentinianos c. 15. Apelles Marcionis discipulus, relicto Magistro, adhæsit Valentino, ex Tertulliano, lib. de carne Christi.

Refelluntur 1. ex Scriptura: Sanctus Joannes contra hujusmodi fabulas primam suam epistolam scripsit. *Omnis Spiritus, inquit c. 3. qui confitetur Jesum Christum in carne venisse, ex Deo est; & omnis spiritus qui solvit Jesum, ex Deo non est, hic est Antichristus.* Rom. 1. Christus dicitur, *ex Semine David secundum carnem.* Texitur ejus genealogia à sanctis Matthæo & Luca: in ea autem dicitur filius David, & Abrahæ. Semen Abrahæ apprehendit, Hebr. 2. addit Apostolus v. 14. *quia pueri communicaverunt carni & sanguini, & ipse similiter participavit eisdem.* In ultima cæna sanguinem suum Apostolis bibendum distribuit. Post resurrectionem ait ad discipulos: *Palpate & videte, quia spiritus carnem & ossa non habet, sicut me videtis habere,* Luc. 24. Videntibus discipulis cum corpore in cælum ascendit, cum eodem iterum descendet homines judicaturus, Act. 1. Sanguinem suum in Eucharistia nobis reliquit, Matth. 26. & tanquam Summus Sacerdos novi testamenti in cælum velut in sancta sanctorum, non cum alieno sanguine, sed proprio introivit, Hebr. 9.

Refelluntur 2. ex Traditione, quam demonstrant tum Symbolum Apostolorum, in quo confitemur Christum natum ex Maria Virgine: tum laudati Patres, S. Irenæus, Tertullianus, S. Augustinus, qui contra hujusmodi errores pugnant;

runt; ac præsertim sancti Clemens Alexandrinus lib. 2. Pædagogi cap. 2. Athanasius epistola ad Epictetum; Gregorius Nazianzenus Or. 42. qui ex professo docent corpus Christi in cælo non esse exangue.

Dices 1. Philip. 2. dicitur Christus in similitudinem hominum factus: Ergo non fuit verus homo.

Distinguo antecedens: in similitudinem naturalem & substantialem, qua homines sunt inter se similes, concedo: similitudinem accidentalem, secundum quam imago depicta similis dicitur prototypo, Nego anteced.

Dices 2. Ex Apostolo 1 Cor. 15. *Primus homo de terra terrenus; secundus homo de cælo cælestis*: Ergo Verbum corpus terrenum non assumpsit.

Distinguo antecedens: secundus homo de cælo cælestis, vel propter personam, quæ de cælo descendit; vel propter mores sanctos & omnino cælestes; vel denique propter dotes gloriosas, quibus corpus ejus post resurrectionem ornatum fuit, concedo: cælestis propter materiam sydeream, ex qua compactum fuerit ejus corpus, Nego antecedens. Namque Apostolus vult ibidem Christianos similiter fieri cælestes: *Quales, inquit, cælestis, tales & cælestes*, ad quod sanè necessum non est, ut exuant substantiam terrenam & carneam.

Dices 3. 2. Cor. 5. ait Apostolus: *Et si secundum carnem cognovimus Christum, sed nunc jam non novimus*. Ergo Christus post resurrectionem exiit carnem.

Nego conseq. nam de omnibus hominibus, qui oculis ejus obversabantur, similiter scribit: *Ex hoc neminem novimus secundum carnem*: an inde sequi-

sequitur omnes homines fuisse phantasmata? Vult itaque Apostolus veros Christi discipulos nihili facere honores, hominum favores, & cætera commoda temporalia. Novimus olim Christum secundum carnem, hoc est, plurimi faciebamus quod cognatus noster esset secundum carnem, quod apud nos temporaliter sanaverit ægros: nunc verò spiritualia sectantes, hoc præsertim in ipso spectamus, quod pro omnibus mortuus sit, ut omnes Deo vivant, sed spirituales.

Dices 4. Christus Luc. 8. dicit se non habere aliam matrem & alios fratres, quàm qui verbum Dei audiunt, & faciunt. Enimvero Evangelistæ ita texunt ejus genealogiam, ut credendum nobis relinquant ipsum non habuisse parentes carnales, sed spirituales.

Respondeo, Christum hinc non negare Mariam Virginem esse suam matrem, sed præferre unionem spiritus, quæ per charitatem habetur, omni conjunctioni sanguinis: sanctissima autem Virgo utramque habuit.

Quod spectat verò Christi genealogiam, quæ diversa est apud Matthæum c. 1. & Lucam c. 2. duplex est sententia. Alii volunt Matthæum texere Christi genealogiam secundum lineam maternam; Lucam verò secundum lineam paternam, adeò ut Heli idem sit ac Joachim pater beatæ Virginis; sive Heli & Joachim sint duo nomina ejusdem personæ, juxta sanctum Hilarium & alios, sive idem sit nomen & Joachim per apocopen dicatur Eli, quemadmodum 4. Reg. cap. 23. Idem Rex Juda vocatur Eliacim & Joakim. Alii docent Matthæum recensere parentes Christi naturales, Lucam verò legales; nempe Eli & Jacob fuisse

fuisse fratres uterinos ex eadem matre Jesca; sed cum Eli sine liberis defunctus fuisset, Jacob, juxta præscriptum legis, duxisse ejus viduam, ex qua genuit Josephum, qui est filius legalis Heli, naturalis verò Jacobi. Et ita Africanus apud Eusebium dicit se accepisse ex ipsismet consanguineis Josephi.

Dices 5. Pro Lutheranis benemultis, qui duce Osiandro, ut impugnent dogma catholicum de concomitantia naturali sanguinis cum corpore sub specie panis, & vicissim corporis cum sanguine sub specie vini; contra Scripturæ & Traditionis auctoritatem fingere ausi sunt Christum in cœlo esse exanguem, quia sanguis est necessarius tantum ad vegetandum & nutriendum corpus animale; est enim proximum ejus alimentum. Corpus autem gloriosum, quale est corpus Christi, non est animale, sed spirituale, 1. Cor. 15. non est nutritioni obnoxium, sicut nec mutationi: Sed est prorsus incorruptibile & immortale. Ergo:

Respondeo 1. Argumentum nimis probat, nam sequeretur, corpus gloriosum carere stomacho & intestinis, quæ nutritioni subserviunt, corde & hepate, quibus conficitur sanguis. 2. Etiam si sanguis non sit actu pars corporis, pertinet tamen ad naturæ humanæ constitutionem, & spiritus vitales & animales, subtiliores sanguinis partes, sunt necessaria vitæ animalis instrumenta.

Duo hîc agitantur in Scholis, Primum, utrùm corpus Christi fuerit formosum. Secundum, utrùm Verbum sit immediatè unitum sanguini.

Pri-

Primum est incertum; quia neque ex Scriptura, neque ex Traditione definiri potest. Pro deformitate affertur illud Isaïæ 53. *Non est ei species, neque decor: sed ad passionem referri potest, in qua plagis & sputis fuit deformatus.* Pro oris venustate laudantur verba Psalmi 44. *Speciosus forma præ filiis hominum; diffusa est gratia in labiis tuis.* Sed plures è sanctis Patribus illa exponunt de animæ pulchritudine, & oris facundia, propter quam dicebant turbæ: *Nunquam sic locutus est homo.* Joan. 7. Non eadem quoque Patrum est sententia: antiquiores scripserunt, Christum non fuisse aspectu decorum, ut sanctus Clemens Alexandrinus lib. 3. Pædagogi cap. 1. & lib. 1. Stromatum. Origenes ejus discipulus objicienti Celso, qui sub Adriano floruit, Christum fuisse vultu deformem, respondet lib. 6. id quidem in confesso esse apud omnes: Tertullianus lib. contra Judæos; SS. Cyprianus lib. 2. contra eosdem; Basiliius in Psal. 44. Augustinus in Psal. 127. Sanctus Chrysostomus contra asserit homil. 27. in Matth. Christum fuisse aspectu gratissimum. Sanctus Hieronymus epistola ad Principiam scribit Christum, nisi in vultu & oculis habuisset quiddam sydereum, nunquam uno verbo Apostolos fuisse tracturum. Hanc sententiam amplexi sunt sanctus Joannes Damascenus, & alii deinceps.

Quod spectat alteram quæstionem, num Verbum immediatè sit unitum sanguini, an mediatè tantum, & eo modo, quo unitur operationibus ab humanitate Christi elicitis? Durandus in 4. Dist. 10. quæst. 1. & nonnulli alii Theologi censuerunt mediatè tantum unitum, quia sanguis non est pars corporis, ac proinde in triduo mortis

tis sanguinem fuisse à Verbo separatum, nec latria tum adorandum; fuisse tamen pretii infiniti cum effunderetur, & in redemptionem generis humani à Christo offerretur, utpote qui esset personæ infinitè dignæ, à qua trahebat valorem infinitum quemadmodum actiones ab humanitate Christi elicite.

Verum nunc concors est Theologorum sententia, à qua recedere non licet post decretum Clementis VI. de quo supra, cap. 1. Verbum immediatè uniri sanguini.

Probatur 1. ex Scriptura, Heb. 2. sic loquitur Apostolus: *Quia ergo pueri communicaverunt carni & sanguini, & ipse similiter participavit eisdem.* Atqui Verbum immediatè carni communicavit; Ergo & sanguini: nam Apostolus scribit similiter participasse utrique.

Probatur 2. ex Traditione. In Concilio Chalcedonensi, actione prima, approbatur illa explicatio sancti Cyrilli, *Verbum caro factum est*, id est, *carnem & sanguinem sumpsit.* Sanctus Gregorius Nazianzenus orat. quinquagesima, *Assumpsit*, inquit, *corpus ex carne, ossibus, & sanguine constans.* Clemens VI. in Extravag. *Unigenitus*, de pœnit. & remiss. docet unam guttam sanguinis Christi fuisse sufficiens pretium redemptionis nostræ, propter unionem ad Verbum.

Dices: S. Augustinus epistola 3. ad Volusianum, nunc 137. scribit Verbum per animam rationalem corpus humanum sibi coaptavisse. Ergo à fortiori non assumpsit sanguinem nisi mediante anima & corpore.

Distinguo antecedens per animam rationalem corpus sibi coaptavit ordine intentionis, quia pro-

propter animam rationalem assumpsit corpus humanum, concedo: ordine executionis, nego antecedens. Assumpsit itaque simul animam rationalem, corpus & sanguinem; sed prius intendit rationem seu intellectum, quàm animam, & hanc priusquam corpus & sanguinem; quia illud prius intenditur in opere, quod est dignius & aptius ad finem propositum. Atqui in assumptione naturæ humanæ anima rationalis est dignior corpore, & aptior ad finem Incarnationis, nempe ad reconciliandum genus humanum, & satisfaciendum Deo. Ergo.

§. II.

Christum ex Virgine natum inficiati sunt

Primo Cerinthus & Carpocrates, qui docuerunt primo sæculo beatam Virginem ex sancto Josepho Christum concepisse. Ita sanctus Irenæus libr. 1. cap. 25. Tertullianus libr. de præscript. cap. 48. & libr. de carne Christi cap. 28.

Secundò, Jovianus quarto sæculo voluit Matrem Dei, licet in conceptione virgo permanferit, in partu integritatem amisisse. *Ne Christum cum Manichæis phantasia crederemus, si Matris corrupta virginitate diceremus exortum*, inquit sanctus Augustinus lib. 1. contra Julianum cap. 1. Joviano præiverat Tertullianus lib. de carne Christi cap. 23.

Durandus, quamvis Mariam in partu virginem agnoscat, ejus tamen integritatem quodammodo labefactat; cum enim corporum penetrationem non putet possibilem, vult beatissimam Virginem

Christum effudisse partium dilatatione absque fractura aut divisione. Hanc sententiam amplectuntur Calvinistæ, ea ratione ducti, qua negant possibile esse Christum in Eucharistia existere sine extensione locali.

Tertiò. Helvidius eodem quarto sæculo docuit beatam Virginem, post Christi nativitatem, ex sancto Josepho filios suscepisse, ut testatur sanctus Hieronymus libro contra eundem Hæreticum, ubi facit illum auctorem Antidicomarianitarum, id est, Mariæ adversariorum; quanquam Origenes hæ. 7. in Lucam, & sanctus Hilarius can. 1. in Matth. Helvidio antiquiores hujus hæresis meminerint. Olim extinctum Helvidii errorem plures à Novatoribus suscitavunt, ex Canisio lib. 2. de beata Maria.

Contra hos errores invicta manet catholica veritas in Concilio sexto generali, actione undecima his verbis expressa: *Mariæ virginitas ante partum, in partu, & post partum intemerabilis.*

Prima pars est de fide; probaturque 1. ex Scriptura, Matth. 1. *Quod in ea natum est, de Spiritu sancto est Hoc autem totum factum est, ut adimpleretur quod dictum est à Domino per Prophetam dicentem (Isaiæ 7.) Ecce virgo in utero habebit & pariet filium.* 2. Ex constanti Traditione, quæ satis colligitur ex laudatis Patribus, qui contra errorem oppositum scripserunt.

Dices: Textus Isaiæ non potest intelligi de conceptione Christi; namque propheta ibi loquitur de conceptione, & partu futuris antequam Reges Syriæ & Samariæ extinguerentur, ut patet ex v. 16. Atqui extincti sunt duo illi Reges biennio post Isaiæ vaticinium. Ergo.

Nego

Nego antecedens, & oppono auctoritatem Evangelistæ. Ad confirmationem verò sanè difficilem, respondeo distinguendo maiorem: Loquitur de conceptione & partu brevi futuris, & simul de alia conceptione per priorem adumbrata, Concedo: de illa sola conceptione, Nego maiorem. Itaque Deus cap. 7. & 8. promittit duos filios; unus vocatur Emmanuel, capite 7. v. 14. Qui est Christus Dominus, & nobiscum Deus. Alter appellatur accelera spolia detrahere, capite 8. v. 3. Primus est veritas, & Filius Dei; secundus est figura, & filius Isaïæ: *Accessi*, inquit, *ad Prophetissam*, c. 8. v. 3. id est ad uxorem. Paulò post nativitatem hujus posterioris, regnum Syriæ & regnum Samariæ privata sunt suis Regibus, in typum & figuram prioris: Christo enim nato Herodes Rex Judææ & Samariæ, & Oboda Rex Syriæ, ex Josepho, libr. 16. Antiq. cap. 6. interierunt; & eorum regna in potestatem Cæsaris Augusti devenerunt, qui & ipse erat Rex Assyriorum. Sed longè nobiliori modo natus puer festinavit prædari, cum in ortu suo oraculis Gentilium silentium imposuit, multa idola contrivit, teste Dione & aliis Scripto-ribus profanis; Magos ad suum præsepe, non revinctis manibus, sed liberis affectibus supplices & adoratores attraxit.

Secunda pars, quæ est de virginitate in partu, probatur 1. ex laudato Isaïæ testimonio, *Ecce virgo concipiet & pariet*: ibi enim Mater Dei prædicitur virgo æquè in partu ac in conceptione. 2. ex constanti Ecclesiæ Traditione. In Symbolo Apostolorum Christus dicitur *natus ex Maria Virgine*. S. Epiphanius hæresi 78. *Quis unquam*, ait, *aut quo sæculo ausus est proferre Mariæ nomen & interroga-*

tus non statim intulit virginis vocem? ex ipsis enim nominibus etiam virginitatis signa elucent. Patres communiter comparant egressum Christi ex utero Virginis cum exitu ejus de sepulcro, lapide non re-ferato, & ingressu in cœnaculum januis clausis. Ita sanctus Cyrillus in Concilio Ephesino; *Miraculum hoc, inquit, stupidum me reddit.* Sanctus Augustinus Epist. 137. aliàs 3. *Ipsa virtus per inviolatæ matris viscera, membra infantis eduxit, quæ postea per clausa ostia membra juvenis introduxit. Hic si ratio quæritur, non erit mirabile: si exemplum poscitur, non erit singulare. Demus Deum aliquid posse, quod nos fatemur investigare non posse. In talibus rebus tota ratio facti est potentia facientis.* Quæ verba Concilium Toletanum Secundum in eandem rem usurpat. Contra Durandum verò expressa sunt sancti Chrysologi verba, serm. 142. *In tuo conceptu, in tuo partu, crevit pudor, aucta est castitas, integritas roborata.* Item Guarriçi h. 2. de laudibus Virginis: *Nequaquam Rex gloriæ vincula laxavit, aut dilatavit.* Rationem affert Auctor sermonis vulgati sub nomine sancti Augustini, aliàs 15. de Tempore nunc 123. in appendice, *Qui dirupta corporum membra in aliis poterat redintegrare tangendo, quanto magis in sua Matre quod invenit integran, potuit non violare nascendo? Crevit in ejus partu integritas corporis potius quàm decrevit, & virginitas ampliata est potius quàm fugata.* S. Fulgentio tribuitur à Lovaniensibus.

Dices: Patres communiter docent Christum nascendo vulvam matri aperuisse. *Hic est, inquit S. Epiphanius hæresi 78. qui verè aperuit uterum matris.* Ergo.

Distinguo antecedens. Aperuit vulvam matris, quatenus dedit ei fœcunditatem, quemadmodum dicitur Gen. 20. vulvam claudere, qui steri-

sterilem reddit, Concedo: aperuit propriè, Nego antecedens. Hæc solutio est sancti Hieronymi, Dialogo 2. contra Pelagium, ubi sic loquitur: *Solus Christus clausas portas vulvæ virginæ aperuit, quæ tamen clausæ jugiter permanferunt.*

Tertia pars, scilicet Matrem Dei nunquam virum cognovisse, & permanfisse virginem post partum, probatur ex constanti Ecclesiæ Traditione, cujus testes sunt Patres, qui Helvidii & Bonosi errorem tanquam doctrinæ catholicæ contrarium infectati sunt, ut sanctus Hieronymus libro contra Helvidium; sanctus Ambrosius epistola 81. ad Siricium summum Pontificem, nomine Concilii Mediolanensis. Sanctus Siricius cum Concilio Romano, epistola, quæ est Octogesima inter Epistolas sancti Ambrosii, habeturque Tom. I. Conciliorum. Sanctus Epiphanius hæresi 78. Sanctus Martinus Papa in Concilio Romano, Can. 3. Sanctus Joannes Damascenus lib. 4. cap. 15. & alii; colligitur ex Scriptura, Lucæ 1. *Quomodo fiet istud, quoniam virum non cognosco?* Quibus verbis beata Virgo significat suum propositum servandæ virginitatis: Namque Christus Joannem pro filio non dedisset Matri Joan. 19. si hæc habuisset naturales filios.

Dices 1. Fratres Christi sæpe in Evangelio comparent. Ergo.

Respondent plures ex sanctis Patribus, Josephum viduum duxisse beatam Virginem, & filios, quos ex prima uxore suscepit, vocari fratres Domini. Alii probabilius censent Josephum perpetuam virginitatem servasse, fratres autem Domini esse cognatos ejus; mos enim Judæorum erat vocare fratres quoscumque consanguineos,

Genes. 13. Abraham & Loth appellantur fratres, sicut Jacob & Laban. Gen. 29. Jacobus minor, filius Cleophæ seu Alphæi, vocatur ab Apostolo Gal. 1. frater Domini; & Simeon Jerosolymitanus, frater Jacobi, dicitur etiam frater Domini, ex Hegesippo apud Euseb. lib. 3. Hist. c. 10. & 16.

Dices 2. Matth. 1. legitur de S. Josepho, & *non cognoscebat eam donec peperit filium suum primogenitum.* Ergo beata Virgo post nativitatem Christi alios filios peperit.

Nego conseq. Christus dicitur Mariæ primogenitus, quemadmodum Sapientia æterna primogenita, quia ante Christum & Sapientiam æternam alius non est genitus. Quod autem legitur, *non cognoscebat*, non sequitur quòd postea convenirent, sed Scriptura quid factum non sit ostendit, ait S. Hieronymus in cap. 1. Matth. nam, ut scribit S. Basilius hom. 25. de humana Christi generatione: *donec dispensabatur Christi generatio, necessaria erat virginitas: quid verò postea sit factum, ad mysterii hujus doctrinam, non anxie conjungendum est. Verumtamen, ne hoc eorum, qui Christum amant, ferre cogantur aures, quod Genitrix Dei aliquando desierit esse virgo, has rationes sufficere putamus.*

§. III.

*Non agnoverunt in Christo animam
rationalem*

Primò Arius, qui cùm quarto sæculo Verbum Divinum Patre inferius & minimè consubstantiale profiteretur, non dubitavit asserere ipsum in Christo instar animæ extitisse, ex S. Athanasio, libro

libro de adventu Christi, Epiphanio hæresi 69. & aliis. Unde Patres, qui contra hunc Hæreticum pugnarunt, posteriorem ejus errorem confutatum credidere eo ipso, quod Verbum Patri consubstantialia evicerunt; neque enim videbatur posse venire in cujusquam mentem Deum verum factum esse corporis animam. Nihilominus

2. Apollinaris seu Apollinarius, secundum sanctum Hieronymum Laodiceæ Episcopus, filius alterius Apollinaris professione Grammatici, vir prius magni nominis, & contra Arianos & alios Hæreticos catholicæ veritatis defensor acerrimus, de quo sanctus Hieronymus lib. de Scriptoribus Ecclesiasticis, refert ipsum scripsisse innumerabilia volumina, & ejus adversus Porphyrium triginta libros inter cætera ejus opera, vel maxime probari; docuit eodem quarto sæculo, Verbum assumpsisse corpus humanum sine anima, cujus vicem suppleret, atque adeo Verbum fuisse passum. Cumque ipsum hæreticæ amentiae puderet, admisit animam, sed rationem negavit, juxta Platoniorum placita inter animam & mentem distinguendum. *Videte*, inquit sanctus Augustinus tractatu 47. in Joan. *absurditatem & insaniam non ferendam; animam irrationalem cum habere voluerunt, rationalem negaverunt; dederunt ei animam pecoris, subtraxerunt animam hominis.*

Refellitur absurdissimus error, non minus rationi repugnans, quam fidei; & origo multarum hæresum, præsertim Eutychianorum & Monothelitarum, de quibus infra: 1. ex Scriptura, Marci 14. Christus ait ad discipulos, *Tristis est anima mea usque ad mortem*: & in oratione procidens, subdit ad Patrem, *sed non quod ego volo, sed quod tu.*

Atqui tristitia illa, oratio & voluntas non sunt actus naturæ increatæ, sed creatæ & rationalis: ergo. 2. ex omnibus Conciliis, in quibus Apollinaris cum sua impietate damnatus est: Alexandrino anno 362. Romano sub Damaso, anno 373. Antiocheno, anno 378.

§. IV.

*Unionem hypostaticam, seu personalem
negarunt*

Primò Nestorius olim cum Joanne Antiocheno auditor Theodori Mopsuesteni, ac Diodori Tarsensis, ex Monacho, dehinc Presbytero Antiocheno, ob eloquentiæ ac sanctitatis famam creatus Episcopus Constantinopolitanus anno 428. voluit hominem in Christo per gratiam sanctificantem moraliter duntaxat esse unum quid cum Verbo, quemadmodum de omnibus justis scriptum est 1. Cor. 6. *Qui adhæret Domino, unus spiritus est,* & eatenus Christum improprie & methaphoricè dici Deum, Filium Dei; Beatam Virginem esse Matrem Dei, juxta illud Matth. 12. *Quicumque fecerit voluntatem Patris mei, ipse meus frater & soror & mater est.* Ex quo falso principio impiè deduxit, 1. in Christo duas esse personas, divinam scilicet & humanam; 2. duos filios unum naturalem, alterum adoptivum: quem errorem octavo sæculo suscitaverunt Felix & Elipandus, de quibus primo capite: 3. beatam Virginem non esse proprie Deiparam, sed Christiparam: 4. nullam in Christo esse idiomatum communicationem, nec proprie dicendum, *homo est Deus, Deus est natus, passus, mortuus.* S. Cyrillus Alexandrinus plurimis ad Nesto-

Nestorium epistolis frustra scriptis, commonuit Cœlestinum summum Pontificem, qui ex communi Romani Concilii sententia vices suas Cyrillo demandavit, præcipiens ut Nestorium, nisi intra decem à prima monitione dies impia dogmata revocaret, Episcopali honore & sede privatum declararet: Cyrillus ex consilio Episcoporum, quos ex universa Ægypto asciverat, decretum Cœlestini cum duodecim celebratissimis anathematismis ad Nestorium misit, qui statim totidem anathematismos oppositos in sanctum Cyrillum detorsit. Hinc magna controversia, ad quam terminandam generale Concilium Ephesi indicitur anno 431. Nestorius ad Concilium accedere contempsit, licet ter vocatus & monitus, interim palam affirmare non desinens se bimestrem aut trimestrem Deum appellare non posse. Quocirca omni Sacerdotis gradu & Christiani nominis communione privatus est, ad pristinum suum Monasterium relegatus, ac deinde Oasim in Armeniam deportatus, ubi vita excessit, lingua maledica vermibus scaturiente.

Nonnulli è Novatoribus Nestorium excusare præsumunt, atque in odium Concilii Ephesini, in quo habentur egregia munimenta cultus Beatæ Virginis, & præsentiae realis in Eucharistia, contendunt ipsum errasse in facto; probantque 1. ex scriptis Nestorii ser. 4. ubi ait: *De voce (Deipara) nulla est invidia tantum ne Virginem faciat Deam.* Ser. 12. *Naturæ sunt duplices, Filius singularis.* Epistola ad Cyrillum laudat illum, quod divinitatis & humanitatis conjunctionem in unam Christi personam prædicaret; contestaturque se solum vitare velle Apollinaris errorem, quo beatam Virginem dei-

tatis genitricem assererebat. Unde Socrates Nestorio coætaneus scribit lib. 7. Hist. cap. 32. Nestorium imperitia tantum quasdam voces, ut larvam reformidasse. Secundo, Joannes Antiochenus & Theodoretus, cum Nestorio amicitia conjuncti, affirmant sanam esse Nestorii doctrinam; ipsam proscribere, idem esse ac pietatem anathematizare. Tertio etiam nunc Nestoriani idem cum Catholicis sentiunt. licet diversis vocibus mentem suam exprimant.

Respondeo ad singula.

Ad primum Nestorius unam in Christo personam, Matrem Deiparam confitetur subdolè, scilicet propter unionem moralem hominis cum Deo, Concedo; sincerè & propriè, Nego. Enimverò, Hæretici, ut invidiam Catholicorum vitent, eorum voces æquivoce usurpant. Sic Pelagius Patres Diospoliticos decepit, subscribens eorum definitioni, gratiam ad benè operandum esse omnino necessariam. Nomine autem gratiæ intellexit creationem & conservationem. Sic Ariani confessi sunt Filium Dei esse Patri per omnia similem, sed eo modo, quo perfecta tabella est similis suo prototypo. Hanc artem in Nestorio agnoverunt Patres in Concilio quinto generali, Can. 8. anno 553. *Si quis unam subsistentiam Domini nostri Jesu Christi sic intelligit quasi susipientem plurimarum subsistentiarum significationem . . . & duarum personarum, quas introducit, unam personam dicit propter dignitatem, & honorem, & adorationem, sicut Theodorus (Mopsuestenus) & Nestorius scripserunt; anathema sit.* Et Can. 6. notat eum dixisse Dei genitricem abusivè, non verè. Nam ser. 7. ait, *Maria non peperit Deum, sed peperit hominem divinitatis instruantem.* Mirum autem

tem non est Socratem Historicum & minimè Theologum verbis æquivocis Nestorii fuisse deceptum.

Confirmatur responsio. Si Nestorius rectè sensisset, cur non subscripsit definitioni Concilii Ephesini, in quo detracta larva, quæ metum injiciebat, impium dogma Apollinaris explosum est, & nitidè definitum, unionem factam esse in persona? Cur non acquievit sanis consiliis familiarium Joannis Antiocheni & Theodoret, etiam post compositam pacem Cyrillum inter & Joannem? nam à Cyrillo tanquam ab Apollinarista Joannes recesserat. Denique cur Nestoriani Magistri vestigiis inhærentes hætenus à Catholicis separati permanent, nec ab illis redeuntes ab Ecclesia suscipiuntur, nisi ejurata hæresi, & emissa nova professione?

Ad secundum distingo. Joannes Antiochenus & Theodoretus sanam Nestorii fidem affirmarunt, quamdiu ejus errorem compertum non habuerunt, nihil sinistri suspicantes de amico, quem piium & orthodoxum fuerant experti, quique venenum sui erroris vocibus catholicis obvelabat, Concedo: postquam obfirmatum ejus animum in impietate deprehenderunt, Nego. Nam & Joannes Antiochenus auctor fuit, ut Nestorius è Monasterio, ubi plebem Antiochenam depravabat, in exilium ejiceretur, & Theodoretus, qui quidem serius Nestorii vafritiem detexit, lib. 4. Hæreticarum Fabularum cap. 12. Nestorii doctrinam inter hæreses recensuit, eique anathema dixit, in Concilio Chalcedonensi.

Ad tertium patet solutio ex responsione ad primam objectionem.

Secundò, Eutyches Archimandrita, seu Abbas Monasterii Constantinopoli, dum Nestorianos

nos acrius infectaretur, ex imperitia potius, quàm ex malitia, incidit in oppositum errorem, qui majores motus excitavit, Ecclesiamque per centum annos & amplius valde turbavit; sed Aulicorum, & maximè Imperatricis simul & Monachorum patrocínio fretus, magna cum impietate & pertinacia defendit quod inconsultè protulerat, nimirum, unionem factam fuisse in natura, ita ut in Christo unica sit natura sicut & persona. Anno 448. coram Flaviano Episcopo Constantinopolitano accusatus, à præconcepta opinione dimoveri non potuit; quapropter Sacerdotii honore & Monasterii administratione spoliatus est à Synodo, cujus acta ad Sanctum Leonem, qui tertius post Sanctum Cælestinum Romæ sedebat Pontifex transmissa, comprobata sunt. Verùm cum patroni Eutichetis multa contra Synodum objicientes non quiescerent, indictum est Concilium generale Ephesi celebrandum anno 449. In eo præfuit Dioscorus Episcopus Alexandrinus, sancti Cyrilli successor, & amicus Eutychetis, simul cum Legatis summi Pontificis. In hoc autem Concilio jus omne sic violatum est, ut meritò latrocinium vocatum fuerit. Legati summi Pontificis non sunt auditi, nec ejus epistola lecta prohibente Dioscoro; Sanctus Flavinus exauctoratus est, pugnis & ictibus impetitus martyr occubuit, Eutyches verò in integrum restitutus fuit. Quibus auditis, Sanctus Leo conciliabuli acta rescidit, Dioscorum damnavit, qui & ipse contra summum Pontificem excommunicationis sententiam proferre ausus est. Dolet Theodosius Imperator se ab uxore & Aulicis fuisse deceptum, & moritur; succedit Marcianus Imperator

rator piissimus. Chalcedone celebratur Concilium generale quartum, anno 451. in quo Legati sancti Leonis præsent, abrogatur latrocinium Ephesinum, asseritur duplex in Christo natura; Eutyches ob hæresim damnatur, Dioscorus omni dignitate exuitur, Theodoretus tandem dicit anathema Nestorio, alioquin è Concilio ejciendus.

Cùm verò Eutyches nunquam explicare voluerit, quo sensu diceret post unionem, unicam superesse naturam, sectatores ejus inter se sunt divisi. Triplicem enim modum Hæreticus ille commisceri potuit, nempe commixtionis, compositionis, & conversionis. Duo priores evidenter repugnant: namque in commixtione substantiali, substantiæ, quæ commiscuntur, desinunt esse quod erant prius: & ex eis tertia exurgit, ut videre est in pharmaco ex multis herbis confecto, sicque in Christo nec natura divina, nec humana superessent, sed alia tertia ex ambabus exurgens. Quid autem absurdius, quàm naturam divinam desiisse? Non minùs evidenter repugnat ex natura divina & humana fieri unam naturam per compositionem. Vel enim compositum ex natura divina & humana esset totum essentiale, sicut homo compositus ex natura & anima rationali; Manifestè autem contradictorium est & chimericum, duas naturas integras & completas in unam essentiam coalescere, putà in hircocervum; præterquam quod id non fieret sine mutatione; quæ non cadit in divinam naturam: Vel compositum esset totum integrale, quemadmodum ex multis aquæ guttis fit una moles & unum continuum, quod rebus corporeis & quantitate affectis

etis solum convenit. Restat ergo in Incarnatione, ad mentem Eutichetis, ambas naturas in unam confluxisse per conversionem unius in aliam, adeo ut quemadmodum in Eucharistia panis fit corpus Christi, sic in hoc mysterio Verbum caro fit, factum, non per assumptionem carnis, quemadmodum cæcus natus (Joan. 9.) factus est videns per receptionem visus; sed per conversionem unius naturæ in aliam. Neque hinc sistere possunt Eutychiani; si enim Verbum caro factum est per conversionem, sicut panis fit corpus Christi, Verbum æternum, & immutabile post incarnationem non existit, sicut nec panis post consecrationem. Quis verò non horreat tantam blasphemiam? nec ipsi Eutychiani eam proferre audeant, sed communiter definiunt naturam humanam in Deum esse conversam, & carnem Verbum esse factam; ex qua vulgari eorum opinione sequitur Trinitatem passam fuisse, propterea huic trifragio, *Sancte Deus, Sancte fortis, Sancte immortalis*, addiderunt, *qui passus es pro nobis*. Et hi dicti sunt Theopaschitæ, Petro Knapheo duce Episcopo Antiocheno. Postmodum varia sortiti sunt nomina deducta ab iis, qui sectam novis erroribus diviserunt, v. g. Severiani à Severo Monacho, qui in sedem Antiochenam intrusus est; Jacobitæ à Jacobo Cyro ignobili, quem faciunt auctorem sectæ Armenorum; Gajanitæ à Gajano Episcopo Alexandrino, qui sententiam Juliani Episcopi Halicarnensis asserentis Christum impassibilem, amplexus est; unde & incorrupticolæ dicti sunt.

Refellitur duplex ille capitalis error, scilicet, quòd in Christo duplex sit persona, & unica natura,

tura, quomodocunque tandem illa naturæ unitas explicetur, 1. ex Scriptura, cujus unum textum Philipp. 2. ex bene multis proferre sufficiat, ubi Apostolus de Christo sic loquitur: *Cum in forma Dei esset, non rapinam arbitratus est esse se æqualem Deo; sed semetipsum exinanivit, formam servi accipiens, in similitudinem hominum factus; & habitu inventus ut homo. Humiliavit semetipsum, factus obediens usque ad mortem . . . propter quod & Deus exaltavit illum.* Hic de Christo manifestè prædicantur duæ naturæ; alia quæ est in forma Dei; alia quæ est in forma servi. Per primam est æqualis Deo; per secundam, similis hominibus; hac alteri obediens est usque ad mortem, propter quod illa exaltatur, ista exaltat. Prædicata autem tam opposita non possunt convenire uni & eidem naturæ: ergo in Christo revera duæ sunt naturæ. Sed illa prædicata quantumcunque opposita de eodem supposito & de eadem persona enuntiantur; idem enim est Patri æqualis, hominibus similis: seipsum exinanivit, formam servi accepit, factus est obediens usque ad mortem, & exaltatus. Ergo Christus est una persona, unum suppositum; nihil clarius.

Confirmatur. Deus infundens gratiam sanctificantem, & alia Spiritus Sancti dona, per quæ moraliter unitur homini, non dicitur, nec potest dici exinaniri, fieri obediens, & mori obediens & occumbente iusto. Atqui per Incarnationem hæc omnia de Deo dicuntur: ergo per Incarnationem naturæ humanæ unitur substantia-liter & hypostaticè.

Refellitur 2. hæc eadem tum Nestorianorum, tum Eutychianorum impietas ex Traditione,

tionem, 1. ex Symbolo Nicæno & constantinopolitano, in quo Patres confitentur Filium Dei Patri consubstantialem descendisse de cœlis, incarnatum, natum ex Maria Virgine, hominem factum, mortuum resurrexisse, & ascendisse in cœlum. Hanc autem fidei professionem expendent Patres Ephesini & Chalcedonenses, censuerunt tam luculenter continere suas definitiones de unica in Christo persona, & duplici natura, ut laudato Symbolo quidquam addi aut interferi prohibuerint, 2. ex Patribus. S. Ignatius epistola ad Ephesios sic scribit: *Verbum caro factum est, incorporalis in corpore, immortalis in corpore mortali.* Sanctus Augustinus lib. 2. contra Maximinum cap. 10. *Christus, inquit, una persona est gemina substantia; quia Deus & homo est.* Non minus expressa scribit Enchiridii capite 25. Vide actionem secundam Concilii Chalcedonensis, in qua antiquorum testimonia congeruntur.

Dices pro Nestorio: antiquiores vocant Christum divinitatis instrumentum, Deiferum; Templum divinitatis, Hominem divinum: ergo.

Distinguo antecedens. Vocant aliquando, & recto sensu, Concedo: semper, & pravo Nestorii sensu, Nego antecedens. Revera Christus est instrumentum divinitatis, sed hypostaticè unitum: est Deifer, & Templum ejus: quia divinitas in ipso habitat, sed corporaliter, ait Apostolus, id est hypostaticè.

Instabis: Sanctus Chrysostomus homilia 3. in primum caput ad Hebræos, scribit in Christo duas esse personas, duo prosopa, Deum & hominem: addit personas secundum hypostasim distinctas. Ergo.

Respon-

Respondeo 1. Etsi daremus adversariis sanctum Chrysostomum à tradita veterum Patrum doctrina recedere; propterea non nutaret Fides nostra: quid enim unus contra omnes? Sed absit, ut impium illum errorem tribuamus S. Doctori, utpote qui potenter illum subvertat Epistola ad Cæsarium, in qua sic habet: *Pium est Christum, qui morte circumdatus est, confiteri in divinitate perfectum, & in humanitate perfectum; unum filium unigenitum non dividendum in filiorum dualitatem, habentem tamen in semetipso indivisarium duarum naturarum minime confusas proprietates, non alterum & alterum, absit, sed unum & eundem Dominum Jesum Christum, Dei Verbum, carne amictum, & ea non inanimata & sine mente, ut impius Apollinaris dixit . . . Etsi duplex natura, veruntamen indivisibilis unitio, nam in una filiationis confitemur persona, & una subsistentia & hypostasi.* Ergo Sanctus Chrysostomus non tam conciliandus est cum aliis sanctis Patribus, quàm cum semetipso.

Respondeo 2. variam esse lectionem hujus homiliæ: alii enim legunt duas personas & Deum, alii duas personas ad Deum, ita ut sensus sit, Pater ungens, & Filius unctus, ut habetur Psalmo 44. sunt duæ personæ & unus Deus; & ita exponit eundem Apostoli locum Theophylactus sancti Chrysostomi discipulus. Scopus etiam sancti Doctoris id postulare videtur; ait enim hoc Apostoli textu confodi Sabellium & Judæos, qui personarum pluralitatem negant. Alii hæc sancti Chrysostomi verba intelligunt de Christo sine ordine ad Patrem, velleque sanctum Doctorem in illo esse duas personas seu hypostases, sed improprie dictas. Nomen enim personæ

apud veteres sæpè usurpatum est pro natura, aliquando etiam pro diversis naturæ officiis & proprietatibus. Eo sensu Philosophi dixerunt tria esse animæ nostræ prosopa seu personas; quia tribus fungitur muneribus. Sabellius, qui Patrem & Filium & Spiritum Sanctum non distinxit: tres tamen in Deo personas, tria prosopa non refugit. Eodem sensu sanctus Athanasius Epistola ad Antiochenos, duas in Christo personas, hominis assumpti, & Verbi Dei assumptis, asseruit. Imò sanctus Leo, acerrimus vindex unius in Christo personæ, & duplicis naturæ, Serm. 3. de Epiphania cap. 2. triplicem personam in Christo agnoscit, Regiam, Divinam, & humanam.

Dices 2. pro Eutychete: S. Irenæus Lib. 2. c. 21. Tertullianus Apologet. cap. 21. S. Augustinus Epist. 137. ad Volusianum, num. 11. Incarnationem vocant mixtionem. Ergo in Christo naturæ confusæ sunt, & in unam mixtæ.

Nego consequens, nomine enim mixtionis intelligunt intimam & supernaturalem naturarum unionem in hypostasi. *In hac persona*, inquit sanctus Augustinus, laudata Epistola, *mixtura est Dei & hominis; si tamen recedat auditor à consuetudine corporum, qua solent duo liquores ita commisceri, ut neuter servet integritatem suam.*

Instabis 1. S. Gregorius Nyssenus Lib. 4. contra Eunomium, & Lib. contra Apollinarem, scribit, hac mixtione naturam humanam in divinam transiisse, quemadmodum aceti gutta pelago immixta naturalem qualitatem in prævalentis immensitate deperdit. Ergo.

Distin-

Distinguo antecedens. Natura humana in divinam transiit quoad defectus, qui sunt peccati conſectaria, ut concupiſcentia, paſſionum inordinatio, ignorantia, ægrotudo; Concedo: quoad ſubſtantiam & naturales proprietates, Nego antecedens: illas enim Chriſto permanſiſſe probat contra Apollinarem.

Instabis 2. S. Cyrillus Epist. 1. ad Succellum unam prædicat Chriſti naturam: & Epist. 2. ſcribit: *Duas quidem naturas aſſerimus, poſt unionem verò, ſublata diſiſſione in duas, unam eſſe credimus filii naturam tanquàm unius, ſed inhumanati & incarnati*; addit illas naturas in Chriſtum coaluiſſe, quomodo in hominem conveniunt anima & corpus. Ergo.

Reſpondeo 1. multos equidem, ut Joannem Antiochenum & Theodoretum, in S. Cyrillum, tanquam Apollinaristam, inſurrexiſſe: Eutychetem & ejus aſſectas illo veluti magiſtro & patrono ſolitos gloriari; nec non è Calviniſtis quodam etiam nunc contendere, ſanctum Doctorem Eutycheti præluſiſſe. Sed immeritò; namque 1. Sanctus Cœleſtinus in Epistoſa ad eundem Sanctum Cyrillum ſignificat, ſe ejuſdem cum illo Fidei, Fidem Catholicam ab eo eſſe firmatam, & per eum triumphaviſſe: & in Epistoſa ad Joannem Antiochenum Sanctum Cyrillum vocat ſummum Eccleſiæ Catholicæ defenſorem. 2. Concilium Ephelinum, actione prima, & Chalcedonenſe actione prima, ſecunda & quinta, ejuſdem Sancti Doctoreſis Epistoſas probarunt & laudarunt; ac tandem Concilium quintum damnavit ſcripta Theodoreti contra Sanctum Cyrillum exarata. 3. Ipſemet Sanctus Cyrillus ſæpius in ſuis ſcriptis hæreſim Eutychianam confodit: *Non quòd natura-*

rum differentia, inquit Epistola ad Nestorium, unionem sublata sit, sed quoddam unum nobis, Dominum Jesum Christum divinitas & humanitas effecerint. Et Lib. 3. contra Nestorium; Altera res divinitas, altera naturæ similis humanitas, si eam, quæ naturalis inest, rationem consideres: verum conventionem, quæ in veram unionem fit, unus ex ambabus Christus existit. Quin ipsemet Epistola secunda ad Successum diluit criminationem, qua fama ejus proscindebatur propter verba in objectionem allata. Si, inquit, cum unam diximus naturam, tacuissimus, nec statim adjunxissemus incarnatam, probabilitate fortè non careret eorum sermo; sed quoniam humanitatis perfectio, & eadem nobiscum substantia ea voce exprimitur, desinant considerare super baculum arundineum.

Respondeo itaque 2. distinguo antecedens, juxta explicationem Sancti Cyrilli. Una est Filii natura incarnata, id est, carni seu humanitati substantialiter unita, Concedo: una est simpliciter & absolute: Nego antecedens. Enimverò qui unam Christi naturam incarnatam agnoscit, inquit Theodoretus Dialogo 2. eo ipso duplicem in Christo naturam confitetur; alia enim est, quæ carnem assumat, alia verò carnis assumptæ. Et eo loquendi modo multi post sanctum Cyrillum usi sunt ad exprimendam contra Nestorium unionem substantialem & hypostaticam, qua fit ut sola divinitas in se subsistat, humanitas verò in alio, nempe in Verbo. Unde familiare fuit Patribus asserere, post unionem unam in Christo naturam subsistentem, sed incarnatam, id est, non sine carne seu humanitate, ut explicat Martinus I. in Concilio Romano contra Eutychianos, qui sub hac loquendi formula venenum sui erroris occultabant, quamvis ipse Euty-

Eutyches in Synodo Constantinopolitana confiteri detrectaverit unam naturam Verbi incarnatam.

At, inquires, quomodo sanctus Cyrillus potuit dicere duas naturas ante unionem; cum natura humana in primo instanti fuerit Verbo unita?

R. Dixit ante unionem, non prioritate temporis, sed prioritate naturæ; quia prius natura concipitur in suo esse constituta, quam uniatur, quamvis in eodem instanti temporis utrumque extiterit.

§. V.

Christum doloribus obnoxium negaverunt

Primò Valentinus, ex sancto Clemente Alexandrino Lib. 3. Stromatum. 2. Eutychiani incorrupticolæ ex Acephalorum grege, id est, eorum qui fuerunt sine capite, ex quo à Petro Moggo Episcopo Alexandrino recesserunt, eo prætextu, quòd Concilio Chalcedonensi anathema palàm dicere dissimularet. Hanc hæresim multum adjuvit Justinianus Imperator, uxore sua Eutychiana deceptus, cùmque excandesceret in orthodoxos strenuè adversantes, exilii-que pœnam esset decreturus, repentina morte sublatuſ est anno 565. superstitibusque graves de sua salute dubitandi rationes vir antea de Ecclesia bene meritus reliquit.

Refellitur hic error, 1. ex Scriptura. Isaïæ 53. Christus dicitur Vir dolorum, sciens infirmitatem. Matth. 4. esuriit. Joan. 4. fatigatus est ex itinere. Matth. 26. ait: *Tristis est anima mea usque*

ad mortem. Luc. 22. factus est in agonia, & factus est sudor ejus sicut guttæ sanguinis, & apparuit illi Angelus de cælo confortans eum, Luc. 24. *oportuit Christum pati.* 2. Ex Traditione. In Symbolo Apostolorum & Constantinopolitano Christus dicitur passus. Tertullianus Lib. 2. contra Marcionem cap. 7. scribit, ipsum passionibus humanis fuisse objectum. Ita Origenes Lib. 1. contra Celsum. Sanctus Athanasius Libro de Incarnatione.

Dices 1. Sanctus Dionysius Alexandrinus contra Paulum Samosat. docet Christum tristatum, sicut de Spiritu Sancto legitur Ephes. 4. *Nolite contristare Spiritum Sanctum.* Atqui illud posterius metaphorice dicitur; ergo & prius.

Distinguo majorem: Christum ut Deum metaphorice tristatum, Concedo: ut hominem, Nego majorem. Nempè quæstio versabatur Dionysium inter & Paulum, utrùm Christus esset verus Deus. Paulus colligebat esse purum hominem, ex eo quòd tristatus esset. Sanctus Doctor contra arguebat, Deum in Christo fuisse tristatum, quemadmodum Spiritus Sanctus dicitur gemere, orare, & contristari in Justis.

Instabis: atqui sanctus Dionysius docet Christum, etiam ut homo est, fuisse metaphorice contristatum; docet enim sanguinem ejus non fuisse corruptioni obnoxium.

Nego subsumptum, cujus confirmationem distinguo. Docet sanguinem corruptioni actuali non fuisse obnoxium; Concedo: corruptioni naturaliter possibili, Nego. Enimverò Paulus contendebat sanguinem Christi effusum, fuisse corruptum, ac proinde non fuisse à Verbo assumptum,

ptum, nec dicendum Dei sanguinem. Sanctus Dionysius hoc ratiocinium destruit, exemplo Spiritus Sancti, quem Propheta Joel prædixit effundendum super omnem carnem. Si enim Spiritus Sanctus non est corruptus, licet effusus; neque credendum est sanguinem à Christo fusum fuisse corruptum.

Dices 2. S. Hilarius Lib. 10. de Trinitate fuisse probat Christum non habuisse doloris sensum. *Quamvis*, inquit, *ictus incideret, aut vulnus descenderet afferrent quidem hæc impetum passionis, non tamen dolorem passionis inferrent.* Et hoc explicat exemplis aquæ, ignis & aeris, quæ si verberentur, perforentur aut dividantur, minimè sentiunt: Ergo.

Respondeo 1. à pluribus sæculis inter Catholicos agitari, quæ in hac parte fuerit mens Sancti Hilarii. Erroris eum accusarunt Claudianus Mamertus Lib. 2. de statu animæ cap. 9. Baronius ad annum 563. num. 4. Illum contra vindicant Lanfrancus contra Berengarium, hanc noxam Hilario impingentem; Magister Sententiarum in tertium; Sanctus Bonaventura in tertium dist. 16. quæst. 5. Sanctus Thomas tertia parte, & omnes passim Theologi. Alii existimant sanctum Doctorem incidisse quidem in hunc errorem, sed revocasse; ut Guillelmus Parisiensis, teste sancto Bonaventura, citato loco; & Petavius Lib. de Trinitate, cap. 5. Namque sanctus Hilarius sententiam Catholicam disertè exprimit in Psal. 53. num. 7. *Esurivit, inquit, sitivit, dormivit, lassatus fuit, mæstus fuit, & flevit, & passus, & mortuus est.* In Psal. 44. num. 6. *In eum, inquit, omnia quæ nostræ necessitatis*

sitatis sunt, irruerunt; sed ab eo naturæ suæ virtute suscepta sunt, dum mortem nostram potens non mori, etiam timorem in se morti ingruentem non remittit. In Psalm. 68. num. 23. Percussus est Dominus peccata nostra suscipiens, & pro nobis dolens, num. 25. Gerens hominis Deique naturam, habet, & ex hominis infirmitate trepidationis affectum, & ex conscientia Deitatis fiduciam securitatis.

Respondeo 2. juxta communem Theologorum sententiam, sanctum Hilarium secum conciliari posse, nec contraria scripsisse in opere de Trinitate, ex quo desumpta est objectio, & in Commentario super Psalmos: namque Lib. 10. de Trinitate num. 47. sic scribit: *pro nobis dolet, num. 55. flevit & doluit, num. 67. Passus quidem est unigenitus Deus quæ homines pati possunt.* Absit enim tam firmum Ecclesiæ propugnaculum alicubi cecidisse, cujus opera inoffenso pede decurri posse testatus est sanctus Hieronymus Epistola septima. Itaque non doluit Christus, ictuum tela non sensit ex necessitate & conditione naturæ, quæ concepta est de Spiritu Sancto, immunis ab omni peccato sicut caro Adami, & hypostaticè unita Verbo: quomodo enim natura, quæ suo tactu febres fugabat, suo eloquio & sua virtute discipulos contra mortem firmabat, hujusmodi infirmitatibus fuisset obruta? ait sanctus Doctor; sed illas affectiones humanas libera voluntate & ex charitate immensa erga discipulos admisit. *Pro his, inquit cap. 31. in Matth. rogat dicens: Transeat à me calix: id est, quomodo à me bibitur, ita & iis bibatur sine spei diffidentia, sine sensu doloris, sine metu mortis, id est, sine sensu aut metu animam obruente.*

§. VI.

*Ex Apollinaristarum & Eutychianorum principiis
unam in Christo voluntatem docuerunt
septimo sæculo*

Cyrus Episcopus Alexandrinus, Macarius Episcopus Antiochenus, Sergius Episcopus Constantinopolitanus, & ejus successores Pyrrhus & Paulus. Cyro fortiter repugnavit sanctus Sophronius adhuc Monachus: tum promotus ad sedem Jerosolymitanam, coacta Synodo, nascentem hæresim proscripsit.

Sergius callidè scripsit ad Honorium summum Pontificem, ut duarum voluntatum perinde ac unius professione abstinendum decerneret, maxime cum antiqui Patres hujusmodi quæstionem silentio compressissent, & duarum voluntatum prædicatio contrarietatem in Christo invehere videretur. Honorius incautè assensit Sergio, & paulò post defunctus successorem habuit Severinum. Sergius, Litteris Honorii acceptis, cum Cyro & Theodoro Heraclium Imperatorem jam titubantem facilè in præceps impulit, suisque consiliis effecit, ut Ecclësim ederet, hoc est Fidei expositionem, statuens ne quis unam aut duas in Christo voluntates nominaret, cum jam in multorum animis opinio unius voluntatis esset disseminata. Quare Joannes IV. Severini successor Ecclësim meritò proscripsit. Constantinus Heraclii filius decreto Joannis adhæsit: sed Constantinus, ejus in Imperio successor, agente Pyrrho, avi Ecclësim famoso suo Typo confirmavit. Martinus verò I. coacta Synodo Lateranensi ex cen-

tum quinque Episcopis , tam Heraclii Eccl̃esim , quàm Constantis Typum , nec non & primarios Hæreticorum duces damnavit. Hinc commotus Constans Martinum Constantinopolim accersit , ubi crudeliter excipitur , ignominiosè per urbem traducitur , tandemque ærumnis confectus Cherfonæ exul gloriosus Martyr occumbit , sed non sine divina in persecutorem ultione : nam Constans occiditur ; succedit Constantinus Pogonatus , id est Barbatus , religiosus Princeps , quo favente , sextum generale Concilium Constantinopoli indicitur anno 680. in quo præsunt Legati Agathonis summi Pontificis , anathema dicitur Theodoro Pharanitæ , Cyro , Sergio , Honorio , & aliis ; asseriturque duplex in Christo voluntas & operatio.

Probatur hæc Catholica Fidei definitio. 1. ex Scriptura , in qua Christus sæpissimè distinguit voluntatem suam , ut homo est , à voluntate Patris , quæ est una & eadem in tribus personis divinis , Joan. 4. *Meus cibus est , ut faciam voluntatem ejus , qui misit me.* Joan. 14. *Sicut mandatum dedit mihi Pater , sic facio.* Mandatum certè & obedientia pertinent ad duas voluntates : Luc. 22. *veruntamen non mea voluntas , sed tua fiat.*

Nec dicas cum Monothelitis , ex hoc loco non elici duplicem in Christo voluntatem , nisi simul admittatur aliqua dissensio & inordinatio , quod est evidenter impium : namque 1. nulla est inordinatio ; quia mortis metus & aversio non fuerunt in Christo involuntaria , nec rationem anteverterunt , sicut in nobis contingit ; sed pars superior , Deo volente , ordinante & concurrente , hujusmodi motus imperavit & excitavit , tum
ut

ut Christus verus homo probaretur; tum ut acutissimis & acerbissimis mortis aculeis pungeretur: minùs enim cruciat ictus mortis, quàm ejus timor & horror, si vehementes sint. Ad solatium autem membrorum suorum Christus expertus est vehementiores, quàm possit purus homo, ut juxta sanctum Augustinum nullus in his extremis deiciatur propter affectiones, quas invitus patitur rebelles; sed speret in eum, qui voluntariè participavit eisdem, *ut liberaret eos*, inquit Apostolus Hebr. 2. *qui timore mortis per totam vitam obnoxii erant servituti*; dicantque exultantes redempti à Domino: *ubi est, mors, stimulus tuus?* 1. Cor. 15. per Christum enim retusus est, & inefficax evasit. 2. Nulla quoque fuit in Christo dissensio voluntatum; Deus enim voluntate sua divina utrumque voluit, & Christum pati & naturam ejus humanam mortem averfari. Similiter & Christus Patri obtemperans utrumque exequutus est, morti ultrò se obtulit, mortis horrorem, & fugam in se excitavit, ea mensura & pondere, quæ ipse præscripserat. Quòd autem in his nulla sit pugna inter voluntatem divinam & humanam, illustrari potest quibusdam exemplis; 1. membrorum nostrorum, quibus Deus indidit propensionem, tum ad sui, tum ad totius individui conservationem. Manus naturaliter ictum refugit, & naturaliter ictui se exponit ad tuendum caput; 2. filiifamilias, qui in hypothesi, quòd parentis vita ex morbo periclitetur, juxta Dei legem & ordinationem debet parere, & quidem absoluta voluntate Deo animam patris revocanti, & nihilominus dolere ex pietatè erga patrem. Verùm in hujusmodi affectibus humanis defectus occur-

occurrit ; quia plerumque rationem præveniunt, & præscriptos ab ea limites transcendunt. Talis autem inordinatio à Christo prorsus exulat, tum quia est à peccato : tum quia ad redemptionem generis humani nihil confert. Hinc vulgò dicitur in Christo fuisse propassiones, non verò passionem, quia nomen, *passio*, secundum communem acceptionem motus inordinatos significat.

Probatur 2. Traditione, quam S. Hippolytus apud Theodoretum Dialogo 2. tuetur contra Beronem quendam, quem dicit à phantasmate Valentini recessisse, sed in maiorem pravitatem incurrisse, quatenus assereret carnem ejusdem esse cum divinitate operationis. Sanctus Athanasius Lib. de Incarnatione, expendens illa Christi verba : *Non mea sed tua voluntas fiat*, ait : *Duas hic voluntates ostendit, unam videlicet humanam, quæ carnis est propria, alteram divinam.* Idem in hunc locum advertunt sancti Gregorius Nyssenus Lib. contra Apollinarem, Chrysostomus, & Augustinus.

Dices 1. Dionysius vulgò Areopagita Epist. ad Cajum, tribuit Christo unam theandricam operationem, hoc est divinam & humanam : Ergo, inquiebant Monothelitæ, censuit ambas naturas in unam confluisse, ex qua exurgeret una voluntas & una operatio.

Respondeo 1. adulteratum fuisse à Monothelitis textum, legendumque *novam*, non verò unam *theandricam*, ut monet Synodus sub sancto Martino, & Concilium generale sextum, actione decima quarta. 2. Etiam si legatur, *una theandrica operatio*, nihil inde concludi potest adversus doctrinam Catholicam. Enimverò an ideò non est humana

mana voluntas in iusto, quia Deus in eo operatur velle & perficere? Est quidem una Dei & iusti operatio, sed ad eam duplicis est voluntatis influxus, humanæ scilicet liberè consentientis & vitaliter agentis; & divinæ per omnipotentiam cor moventis & efficaciter concurrentis: quo fit ut opus bonum magis sit Dei, quàm hominis; atque hoc sensu Patres jam laudati, & alii, qui disertè duas in Christo voluntates profitentur, scribunt unam in ipso operationem divinam, cùm in omnibus ejus actionibus voluntas divina regnaret; theandricam quoque, cùm esset hominis Dei.

Dices 2. Adversus Concilii sexti definitionem pugnabat universalis Ecclesiæ Traditio: nisi enim Ecclesia Orientalis & Occidentalis unam in Christo voluntatem propugnassent, Concilium anathemate non contrivisset omnes Ecclesiæ Patriarchas uti hæreticos, Cyrum nempe Alexandrinum, Sergium, Pyrrhum & Paulum Constantinopolitanos, & Honorium summum Pontificem: Ergo.

Nego antecedens, tum quia illi Patriarchæ, uno Cyro excepto, non ita palam & constanter unam in Christo voluntatem asseriebant: sed contendebant duntaxat, neque unam, neque duplicem prædicandam, ne turbarentur Orthodoxi: ex quo colligitur Monothelitas timuisse majorem Orthodoxorum numerum: tum quia ubi virus erroris apparuit, fortiter ejectum est, ut patet ex Concilio Jerosolymitano sub sancto Sophronio, Lateranensi sub sancto Martino. His adde persecutiones, quas Orthodoxi passi sunt pro defen-

ensione veritatis adversus Imperatores: tum denique quia communior & verior est sententia, Honorium non fuisse Monothelitam: namque 1. legenti ejus Epistolas patebit, ipsum absolutè non negasse duas in Christo voluntates, sed solum rejecisse à natura assumpta (utpotè quæ esset ab omni contagione peccati libera) legem carnis & concupiscentiæ repugnantem legi mentis. *Unam fatemur*, inquit Epistola prima, *voluntatem Domini nostri Jesu Christi . . . quia non est assumpta à Salvatore vitiosa natura, quæ repugnaret legi mentis ejus; nam lex alia in membris, aut voluntas divisa non fuit vel contraria Salvatori; quia super legem natus est humanæ conditionis.* Epistola verò secunda operationes utriusque naturæ, divinæ scilicet & humanæ, expressè distinguit his verbis: *Duas naturas cum alterius communione operantes atque operatrices confiteri debemus; divinam, quæ Dei sunt operantem, humanam, quæ carnis sunt exequentem, non divisè, neque confusè, neque convertibiliter.* Pacis tamen & concordie causa, de duabus voluntatibus perinde ac de una silentium imprudenter indixit. *Auferentes*, inquit Epistola secunda, *scandalum novellæ adinventionis, non nos oportet unam vel duas operationes definientes prædicare, sed . . . oportet nos unum operatorem Christum Dominum in utrisque naturis* (quas dicit propria operari) *veridicè confiteri.* 2. Sanctus Maximus Honorio coætaneus, ipsum ab omni hæreseos labe immunem demonstrat, tum ex ejus Epistolis, tum ex testimonio Joannis Abbatis Honorio à secretis, & Joannis IV. ejus successoris. Prior autem Joannes, qui scripserat primam Honorii Epistolam, sic loquitur in sua Epistola ad Imperatorem, relata à sancto Maximo in Dialogo: *Unam*, inquit,

inquit, voluntatem Domini diximus, non Deitatis ejus & humanitatis: cum enim scripsisset Sergius esse qui dicerent in Christo duas contrarias voluntates, rescripsimus Christum non habuisse duas contrarias voluntates, carnis, inquam, & spiritus; sed unam tantum. Id ita esse evidenter ex eo demonstratur, quod in membrorum & carnis facta est mentio, quæ Deitati quoque ejus non possunt attribui. Posterior verò in Epistola sua apologetica pro Honorio ad eundem Imperatorem, sic habet, citato Dialogo: *Decessor meus docens de mysterio Incarnationis Christi dicebat non fuisse in eo, sicut in nobis peccatoribus, mentis & carnis contrarias voluntates; quod quidam ad proprium sensum convertentes, Deitatis & humanitatis unam eum voluntatem docuisse suspicati sunt; quod veritati omnino est contrarium.*

At, inquires, major habenda est Fides Concilio œcumenico, à quo Honorius declaratus est Hæreticus, & uti talis cum Cyro, Sergio, & aliis Monothelitis damnatus. Quin & ipse Sanctus Leo II. idem de Honorio judicium tulit statim post Concilium, in Epistola ad Imperatorem. *Anathematizamus, inquit, novi erroris inventores, id est, Theodorum Pharanitam Episcopum, Cyrum & Honorium, qui hanc Apostolicam Ecclesiam non Apostolicæ Traditionis Doctrina illustravit, sed prophana prædicatione immaculatam maculari permisit.*

Non una est responsio ad hanc gravem & celebrem difficultatem.

Quidam existimant Honorium non fuisse revera à Concilio damnatum, sed Græcos ægré ferentes, quòd soli viderentur errasse, vel nomen Honorii in actis inseruisse absoluta Synodo, vel seorsim convenisse, actionemque
duode-

duodecimam & sequentes , in quibus nomen Honorii legitur , esse opus illius Conventiculi furtim additum germanis actis Synodi sextæ.

Sed commentum illud fabulæ potius quàm historiæ præfert speciem , exploditurque
1. quia Constantinus piissimus Princeps , & Sedi Apostolicæ addictissimus , definitionem Concilii ipso præsentē emissam statim annulo suo obsignavit , ne quid in ea mutaretur.
2. Quia interpolatio tam gravis tantique momenti statim animos Episcoporum offendisset , atque in ejus auctores commovisset , quod propria auctoritate summum Pontificem Hæreticum pronuntiarant , & anathemati subjecerant , cùm ipsi maturo judicio eum ab hac criminatione absolvissent. Saltem Legati Sedis Apostolicæ contra tam horrendum scelus non tacuissent , vindictamque expetiissent , tum ab Imperatore , tum à Leone II. qui econtra simul cum actis Concilii sexti damnationem Honorii confirmavit : quod & præstiterunt Concilium generale septimum , actione sexta ; Concilium generale octavum , actione decima ; & Adrianus II. in Epistola ad Concilium octavum , in qua scribit , primam Sedem à nemine judicari , nisi in causa hæresis , propter quam Honorio fuit anathema dictum.

Alii respondent , Concilium errore lapsum fuisse , nec satis perspectis Honorii Epistolis , immeritò cum aliis Hæreticis illum connumerasse : quamvis enim , inquiunt Concilium generale errare non possit in definiendis Fidei dogmatibus ,
falli

falli tamen potest in quæstionibus facti. Ita Anastasius Bibliothecarius in Præfatione ad sua Collectanea, anno 873. Joannes à Turrecremata Cardinalis anno 1468. Lib. 2. de Ecclesia, Baronius Cardinalis, ad annum 681. Bellarminus è Societate Jesu Cardinalis, Lib. 4. de summo Pontifice cap. 2. Binius Theologus Colonienfis, in Notis ad Honorii vitam; Andreas Duvallius è Societate Sorbonica, Professor Regius, de infallibilitate summi Pontificis, parte 2. quæst. 1. & alii bene multi, tum ex Academia Parisiensi, tum ex familia Dominicanorum, ut Nicolaus Coeffrellus, Libro adversus Mornaium; Combefesius in Acta Concilii sexti; Gonetus, de Fide, disp. 4. Contensonus Lib. 5. tum ex Societate Jesu, ut Gretserus in Defensione Bellarmini: Becanus in Summa Controversiarum; Petavius Lib. 1. de Incarnatione cap. 21. Ergo secundum hanc sententiam, non solum Concilium sextum, sed & septimum & octavum, Leo quoque II. & Adrianus II. cæcutierunt, & innocenti injustè anathema dixerunt. Quid verò posteriores isti Scriptores novi proferunt, ut judicium universalis Ecclesiæ toties confirmatum iniquum demonstrent, Honoriumque ipsi privati absolvant? *Habemus*, inquiunt, *ejus epistolas, & testimonia familiaritum ejus.* Sed nunquid illa omnia in Concilio sexto non fuere prolata, examinata & ponderata?

Respondeo itaque, juxta communem Theologorum sententiam, Honorium meritò fuisse damnatum, & inter Hæreticos connumeratum, quamvis ipse Hæreticus non fuerit; quòd grassantem hæresim nedum pro officio summi Pontificis

cis represserit, quin suo decreto Orthodoxis classificum canentibus indixerit silentium; Monothelitas, qui jam primas sedes occupabant, in errore præconcepto tutos reddiderit; aliis Episcopatum ambientibus ne via obtruderetur, auctor fuerit: denique Catholicorum causam ignavè proderit; Hæreticorum verò partes non hæretico quidem animo, sed imprudenti nimis adjuverit, frustra præmonitus à sancto Sophronio flammam hæreseos ubique serpere, nec jam tempus esse silendi. Cum igitur Honorius non sine sua culpa Hæreticis sic patrocinnatus sit, inter Hæreticos connumerari, & eadem cum ipsis pœna plecti meruit.

CAPUT VII.

Utrum natura humana in Christo, præter unionem hypostaticam, aliarum gratiarum donis fuerit ornata?

R. **H**abuit plenitudinem scientiæ in intellectu, & gratiarum in voluntate, & quidem ab instanti conceptionis suæ.

Probatur 1. ex Scriptura, Luc. 2. *Ideoque & quod nascetur ex te sanctum, vocabitur Filius Dei.* Jo. 1. *Vidimus gloriam ejus, gloriam quasi Unigeniti à Patre, plenum gratiæ & veritatis.* Ubi gratiæ & scientiæ plenitudo insinuat veluti appendix & gloria debita unigenito Dei Filio Col. 2. *In quo sunt omnes thesauri sapientiæ & scientiæ Dei.* Jo. 21. *Domine, tu omnia nosti.* Isa. 11. *Requiescet super eum Spiritus sapientiæ & intellectus, Spiritus consilii & fortitudinis, Spiritus scientiæ & pietatis, & replebit eum Spiritus timoris*

moris Domini. Timoris, inquam, non fervilis, sed reverentialis, quo divinam majestatem summe reveritus est. Vox autem, *requiescet*, significat plenam permanentem copiam donorum Spiritus Sancti, juxta illud Jo. 3. *non ad mensuram*: id est limitatè, *dat Deus Spiritum*, Christo scilicet, sicut partitur cæteris hominibus. Porro ex donis Spiritus Sancti alia pertinent ad intellectum, ut sapientia, scientia, intellectus, & consilium: alia ad voluntatem, ut fortitudo, pietas, & timor, quibus anima Christi facile erat mobilis Spiritu Sancto ad operationes extraordinarias.

Probatur 2. ex Traditione Ecclesiæ, quæ contrarium errorem proscripsit, 1. in Gnosticis & Valentinianis asserentibus Christum sub præceptore alphabetum didicisse, ex sancto Irenæo Lib. 1. cap. 17. 2. in Arianis colligentibus Christum non fuisse Deum, ob inscitiam, quam ei tribuebant, ex sancto Athanasio, Oratione quarta, 3. in Nestorianis docentibus Christum in gratia profecisse, ut supra monuimus, & speciatim in Leporio, qui in Synodo Africana errorem, quo omnimodam scientiam Christo denegabant, revocare coactus est, 4. in Agnoitis Severianis sive Eutychianis, quos sanctus Gregorius confutavit Lib. 8. Epist. 42. 5. in Erasmo, ad caput secundum Lucæ, & Calvino in sua Harmonia. Denique universa Theologorum Schola improbavit quod scripserat Hugo Victorinus, Christum nullam aliam quam divinam scientiam habuisse.

Probatur 3. ratione à minori ad majus. Primus Adam, quia futurus erat Pater & Doctor omnium hominum, disciplina intellectus fuit repletus, Eccli. 17. ergo à fortiori secundus Adam,

qui dicitur Pater futuri sæculi, Consiliarius, If. 9. Legifer noster, If. 33. & Doctor, If. 30.

Dices : Christus didicit ex his, quæ passus est obedientiam, Hebr. 5. deinde legitur admiratum fuisse & sciscitatum, quod est signum ignorantiae. 3. Marci 13. habetur : *De die autem illo vel hora nemo scit, neque Angeli in cælo, neque Filius, nisi Pater* ; denique Lucæ 2. Christus proficiebat sapientia & ætate coram Deo & hominibus : Ergo.

Respondeo ad singula.

Ad primum, didicit experientia, quod jam noverat, Concedo : didicit quod prius ignorabat, Nego.

Ad secundum respondet Origenes in c. 13. Matth. Christum alios interrogasse, quemadmodum Deus Adamum, Genes. 3. *Adam, ubi es?* Admiratio autem non est semper signum ignorantiae; mirari enim possumus res magnas & hactenus inexpertas.

Ad tertium; Certum est verba Marci 13. non esse universaliter accipienda; Christus enim saltem ut Deus noverat Judicii diem. Unde cum Ariani ex hoc textu arguerent ipsum non esse Deum, satis fuit Patribus respondere, verba illa spectare Christum ut homo est. Sed posteriores Patres ulterius progressi expenderunt utrùm Christus etiam ut homo prorsus ignoraverit diem Judicii; & una est eorum sententia, aliquo tantum sensu ignorasse, nempe naturalibus viribus, secundum S. Gregorium; vel scientia experimentalis, secundum SS. Epiphanium & Bernardum; liceat addere & scientia supernaturali, ex qua explicabat hominibus mysteria regni cælorum: sed cognovisse scientia saltem beata, qua

qua videbat in decretis divinis tempora & momenta, quæ Pater posuit in sua potestate. Cum autem cognitio illa non sit in usu apud homines, sicut nec notitia, quam Confessarius per Confessionem sacramentalem acquirit, Christus æquè ac Confessarius absque mendacio, & æquivocatione affirmare potuit se nescire, quod sub tali secreto didicit.

Ad quartum, distinguo: Christus crescebat sapientia quoad usum & quasdam operationes, Concedo: quoad habitum, Nego. In conceptione itaque accepit animam rationalem omnibus sapientiæ & scientiæ donis instructam: sed propter infantiae impedimenta ratio actu non discurrebat, non movebat oculos & alios sensus, juxta illud Isaïæ 8. *priusquam puer sciat vocare patrem*; aliàs infantia in Christo non fuisset vera, sed ficta & simulata.

Dixi, *quasdam operationes*; quæ enim à phantasmatibus & sensibus non pendent, qualis est visio beatifica, & usus scientiæ infusæ, splendebat interiorius; colligiturque ex his Apostoli verbis Hebr. 10. *Ingrediens mundum dixit: Ecce venio, ut faciam Deus voluntatem tuam.*

Q. 2. *Quotuplex distinguitur in Christo scientia?*

R. Triplex: scilicet beata, (quæ in visione Dei intuitiva consistit;) infusa, & acquisita.

Primò, negari non potest Christi animam ab initio fuisse potitam visione beatifica; quia etsi hæc propositio non sit de fide, cum nec in Scriptura clarè contineatur, nec in ullo generali Concilio fuerit definita; est tamen omnium Theologorum & Catholicorum, deducique

potest non ita obscure ex pluribus Scripturæ textibus, Joan. 1. *Deum nemo vidit unquam, Unigenitus qui est in sinu Patris, ipse enarravit.* Quod autem hæc Unigeniti notitia ad ipsum pertineat, etiam ut homo est, suadetur ex his verbis Joan. 3. *Nemo ascendit in cælum, nisi qui descendit de cælo, Filius hominis, qui in cælo est.* Quid est autem esse in cælo, aut in paradiso, nisi frui visione beatifica? Unde S. Augustinus Lib. 4. de Consensu Evang. capite ultimo, scribit hominem, cujus susceptione Verbum caro factum est, distare à cæteris, quod nemini ex his concessum sit in hac vita videre Deum, quemadmodum illi.

Enimverò Christi dignitas poscebat, ut non per speculum & in ænigmate, sed clarè & perfectè seipsum cognosceret: atqui clara & plena illa cognitio est personæ divinæ, ac proinde Dei intuitiva. Imò sanctus Fulgentius in Responsis ad Ferrandum, (& post illum Albinus Flaccus Lib. 2. de Trinitate cap. 12.) ex eo quod Christus habeat personam æqualem Patri, arguit ipsum, ut homo est, habere etiam notitiam æqualem. Unde multi Theologi existimant sanctum Doctorem eò processum fuisse, ut assereret Christum intellectu creato Deum comprehendere; quod impossibile ostendimus Tractatu de Attributis. Hoc tamen discrimen inter utramque notitiam ponit S. Fulgentius, quod notitia Patris Deus est, non verò notitia Filii hominis. Nullatenus ergo censuit cum Augustino de Roma animam Christi tam clarè & intensè Deum videre, quàm Deus videt seipsum; quæ propositio damnata est in Concilio Constantiensi.

Dices:

Dices : Si Christus ante mortem Deum intuitivè vidit , Christus ante mortem fuit comprehensor, ac proinde actiones ejus non fuerunt meritoriaë ; falsum consequens , ergo & antecedens.

Distinguo majorem. Fuit comprehensor simul & viator, Concedo : fuit comprehensor duntaxat, Nego majorem. Christus itaque fuit comprehensor secundum animam ; quia eatenus Deum possidebat & erat beatus : secundum corpus verò viator : quia nonnisi in Resurrectione beatitudinem corporis obtinuit , juxta illud Lucæ 24. *Nonne oportuit Christum pati , & ita intrare in gloriam suam ?*

Instabis : Sicut summus calor excludit omne frigus , sic summum gaudium , quod percipitur ex visione Dei , expellit omnem tristitiam & dolorem. Atqui Christus acerbissimos dolores passus est : Ergo non fruebatur summo gaudio, nec proinde visione beatifica.

Distinguo majorem : expellit naturaliter , Concedo : supernaturaliter , Nego majorem. Distinguo etiam minorem : Christus acerbissimos dolores passus est in parte inferiori , Concedo ; in parte superiori, Nego minorem. Itaque ubi Christus Deo fruebatur , ibi summo gaudio perfundebatur , hoc est in superiori animæ parte ; naturaliter quidem torrens ille voluptatis in inferiorem partem erupisset , eamque totam impleisset , nisi Christus sponte fluentem grandi miraculo continuisset. Quis ergo membrorum consensus cum capite , si ad dolorem vitandum miracula expeterent, cum Christus ad patiendum miracula ediderit ?

Secundò, Christus habuit scientiam infusam, qua extra Verbum cognovit supernaturalia cordium secreta: *ipse enim sciebat, quid esset in homine.* Joannis 2. & res contingentes; nam ex dictis in Tractatu de Attributis, beatis plura vel pauciora revelantur, secundum officia, quæ in terris exercuerunt. Cum ergo Christus sit Doctor, Mediator, Judex & Caput omnium hominum, ad ejus statum pertinuit ut omnia futura, saltem usque ad diem Judicii, cognoverit.

Dixi 1. *futura*; nam ex ibidem dictis omnia possibilia cognosci non possunt quin simul comprehendatur omnipotentia divina; quod impossibile est omni intellectui creato.

Dixi 2. *usque ad diem Judicii*; quia tunc complebitur Mediatoris officium; nec ulla ratio evincit animam Christi cognoscere quæcunque futura sunt per totam æternitatem.

Tertiò, Christus instructus fuit scientia acquisita seu Philosophia Naturali, qua colligebat ex causis necessariis effectus, & ex effectibus causas: hæc enim facultas ad naturæ humanæ perfectionem pertinet; videmusque in Evangelio Christum ea plerumque usum fuisse. Dicitur autem acquisita, non quòd Christus studio, labore & experientia illam sibi comparaverit, habuit enim illam infusione, quemadmodum primus parens: sed quòd naturaliter acquiri possit. Fuit igitur acquisita quoad substantiam, infusa verò quoad modum habendi, ut loquuntur Philosophi.

Dices: Non est admittenda in Christo operatio naturalis. Atqui usus scientiæ acquisitæ est naturalis: Ergo.

Respon-

Respondeo 1. Si quid concluderet hoc argumentum, Christo denegandus esset usus oculorum & omnium sensuum, quia est naturalis.

Respondeo itaque 2. in forma, distinguendo majorem: Non est admittenda in Christo operatio naturalis, tum elicitata, tum imperata, Concedo: naturalis elicitata & supernaturaliter imperata, Nego majorem. Similiter distinguo minorem: Usus scientiæ acquisitæ est naturalis per ordinem ad principium eliciens, v. g. ad facultatem visivam, motricem, nutritivam, Concedo: per ordinem ad principium imperans, & applicans illas facultates ad usum proprium, Nego minorem & consequens. Igitur videre, ambulare, manducare, & ratiocinari ex mera naturæ inclinatione & propensione, est defectus prorsus à Christo eliminandus: sed defungi hujusmodi naturæ officiis ex motivo supernaturali, est hominis justus, & omnium virtutum donis cumulatifsimi.

Q. 3. *Quotuplex in Christo distinguitur gratia?*

R. Duplex: alia competit Christo, ut est homo singularis: alia, ut est caput omnium hominum; dicitur gratia capitis.

Q. 4. *Quomodo dividitur gratia Christi, ut est homo singularis?*

Dividitur in gratiam gratis datam, quæ directè tendit in commodum aliorum; talis est gratia sanitarum, & operatio virtutum, quas Christus operabatur in hominum salutem, tum temporalem, tum æternam; & in gratiam gratum facientem, quæ naturam humanam Christi in se ipsa perficiebat.

Q. 5. *Quotuplex fuit in Christo gratia gratum faciens?*

R. Duplex; actualis & habitualis. Actualis, si sumatur terminativè, est divina tum intellectus illustratio, tum voluntatis motio: si verò sumatur principativè, est supernaturalis & specialis Dei concursus cum intellectu & voluntate Christi ad eliciendos actus supernaturales; & hæc gratia erat Christo absolutè necessaria ad huiusmodi actus: quemadmodum enim actus naturalis non potest elici sine naturali Dei concursu; sic supernaturalis sine concursu supernaturali: Habitualis verò complectitur gratiam sanctificantem, qua anima formaliter redditur sancta; & virtutes infusas, quibus anima fit disposita ad actus supernaturales eliciendos.

Q. 6. *Habuitne Christus omnes virtutes infusas?*

R. Certum est habuisse, quia gratiæ sanctificantis sunt appendices necessariae, iis duntaxat exceptis, quæ imperfectionem includunt, ut fides obscuritatem, spes objecti beatifici absentiam; pœnitentia mutationem mali consilii; ideoque præsupponit peccatum in pœnitente.

Dices 1. Christus sperabat beatitudinem corporis sui, & nominis exaltationem: Ergo in eo erat spes.

Distinguo antecedens. Sperabat, id est, expectabat tanquam rem certò futuram, Concedo: sperabat spe theologica, & propriè dicta, Nego antecedens; tum quia spes propriè dicta est boni ardui & obtentu difficilis, proptereaque parit timorem illud non consequendi. Hæc autem à Christo exulabat: quia spes Theologica necessariò habet Deum ut attributum divinum
pro

pro objecto primario ; ex eo enim dicitur theologica , quodd circa Deum versetur. Atqui sublato primario objecto virtutis , tollitur ipsa virtus , licet remaneat ejus objectum secundarium. Hinc animæ beatæ , quia Deum jam possident , sine spe Theologica expectant resurrectionem & beatitudinem suorum corporum. Expectatio autem illa est actus charitatis omnia ad Deum referentis.

Dices 2. Christus pro peccatis nostris satisfecit ; Ergo pœnitentiam habuit.

Distinguo antecedens ; satisfecit ex charitate , quæ inclinat ad dolendum de peccatis alienis , Concedo : ex pœnitentia speciali , Nego antecedens ; quia , ut jam diximus , pœnitentia specialis non potest esse nisi de proprio peccato , cum includat & mutationem pravi consilii , & displicentiam.

Q. 7. *Gratia Christi, prout est singularis homo, differtne à gratia capitis?*

R. Est eadem entitativè , sed sub diverso respectu , nempe quatenus perficit naturam assumptam , dicitur gratia Christi , ut est singularis homo : quatenus verò derivatur à Christo in homines , dicitur gratia capitis , de cujus plenitudine omnes nos accepimus , Joan. 1. Porro aqua , quæ fontem implet , & quæ in rivum effluit , est prorsus eadem. Ceterum , gratia Christi non habet hunc respectum ad homines ex natura sua , sed ex ordinatione Dei extrinseca ; nam , ex infra dicendis , pactum intercedere debuit , ut Christus esset obtemperantibus sibi causa salutis æternæ , Hebr. 5.

Q. 8.

Q. 8. *Estne proprium Christi habere gratiarum plenitudinem?*

R. Duplex est gratiæ plenitudo ; alia ex parte objecti, seu ipsius gratiæ ; alia ex parte subjecti gratiam recipientis : quod explicari potest exemplo caloris, qui si sit summus in igne, dicitur ignis habere plenitudinem caloris ex parte objecti seu virtutis, quia in se continet quidquid nomine caloris exprimitur : homo verò gaudens perfecta sanitate, habet caloris plenitudinem ex parte subjecti ; quia nihil caloris ipsi deest ad perfectam sanitatem. Jam verò Christus utroque modo fuit gratia plenus ; sed plenitudo illa si spectetur ex parte objecti & ipsiusmet gratiæ, est ipsi propria, quia solus est omnium gratiarum fons & origo : si autem spectetur ex parte objecti, est ipsi quodammodo communis cum pluribus ; namque sanctus Stephanus dicitur plenus gratia & fortitudine, Act. 6. S. Joannes Baptista repletus est Spiritu Sancto ex utero matris suæ, Luc. 1. & beata Virgo ibidem salutatur gratia plena. Attamen sicut alia est plenitudo rivuli, alia fluminis, alia maris, secundum alvei angustiam vel latitudinem ; sic pro diversa amplitudine subjecti, diversa quoque est ejus gratiæ plenitudo. Unde minor sancti Stephani plenitudo, quàm S. Joannis Baptistæ ; quia officium Diaconi tot dotes non requirit, quot officium Præcursoris : nec plenitudo Matris Dei, quantumcumque excedat plenitudinem Præcursoris, propter singularem ejus dignitatem, accedit ad plenitudinem gratiæ, quæ competit uni-
genito Filio Dei.

Q. 9. *Gratia Christi Domini estne infinita?*

R. Physicè non est ; quia nihil creatum potest esse

esse entitativè infinitum ; unde secundùm potentiam Dei extraordinariam posset produci major : moraliter tamen potest dici infinita, quatenus summa est, quæ esse possit secundùm Dei sapientiam, & potentiam ejus ordinariam.

Q. 10. *Christus potestne dici prædestinatus?*

R. Potest, non quidem ratione suppositi & personæ, sed ratione donorum & compositi ex unionem hypostatica exurgentis, 1. quia cap. 1. Epist. ad Rom. expressè dicitur prædestinatus Filius Dei. Nec refert, quòd secundùm multos Interpretes, prædestinatus, idem sit, ac declaratus est & manifestatus Filius Dei ex virtute patrandi miracula, & seipsum à morte suscitandi, ut ibidem subdit Apostolus. Nam S. Augustinus & alii Patres ex hoc textu docent, Christum fuisse prædestinatum, & ratio evincit; prædestinatio enim est actio Dei, qua ab æterno prædefinit & præordinat, quæ in tempore facturum est in ordine supernaturali. Atqui Deus ab æterno prædefiniit & præordinavit naturam humanam ad unionem hypostaticam elevare, gratia & gloria coronare, Christumque Dominum, ut aliquod totum ex duabus naturis hypostaticè unitis componere: quæ omnia ad ordinem supernaturalem pertinent: Ergo.

CAPUT VIII.

Utrum Christus Dominus per Passionem suam
& alia bona opera meruerit?

R. De fide est, Christum Dominum meruisse.
Probatur 1. ex Scriptura, quæ hujusce
veritatis tot ferè testimonia subministrat, quot
continet

continet paginas. Isa. 53. *Pro eo quòd laboravit, videbit & satiabitur.* Philipp. 2. *Humiliavit semetipsum, factus obediens . . . propter quod & Deus exaltavit illum.* Hebr. 5. *Factus est omnibus obtemperantibus sibi causa salutis æternæ.* 2. Ex constanti & perspicua Traditione Ecclesiæ, quæ solis Christi meritis innititur nec quidquam à Deo petit, nisi per Dominum nostrum Jesum Christum: in quâ fide Concilium Tridentinum ex abundanti Fideles confirmavit suis definitionibus, nempe Sessione 6. Can. 2. 10. & 26. ubi dicit anathema aliter sentientibus. 3. Favet ratio Theologica: ille enim meruit, qui habuit omnes conditiones ad meritum requisitas: atqui Christus Dominus illas habuit: ergo.

Minor probatur. Tria generatim ad meritum requiruntur. Primum bona opera supernaturalia: secundum, persona Deo grata, liberè operans, & in statu viæ posita: tertium, pactum, quo Deus promiserit præmium & mercedem sic operanti. Atqui hæc tria in Christo adhuc mortali concurrerunt; nam de ejus operibus supernaturaliter bonis, & de ejus persona Deo gratissima nullum potest esse dubium: de pacto constat ex capite 53. Isaïæ: *Si posuerit pro peccato animam suam, videbit semen longævum, & voluntas Domini in manu ejus dirigetur.*

Dices 1. Christus ex dictis fuit beatus ab instanti conceptionis: ergo non fuit viator, nec proinde in statu merendi.

Distinguo antec. Fuit beatus secundum animam, Concedo; secundum corpus, Nego ant. Similiter distingo consequens. Non fuit viator secundum animam, Concedo: secundum corpus,

pus, Nego consequentiam. Fuit ergo simul comprehensor & viator.

Instabis : Christus non potuit mereri nisi per animam ; corpus enim per seipsum non meretur, sed duntaxat quatenus ab anima sancta movetur. Atqui Christus per animam, utpote beatam, non potuit mereri : Ergo.

Distinguo minorem. Per animam, quatenus erat lumine gloriæ illustrata, & ex eo necessario rapiebatur ad videndum & amandum Deum, Concedo : per animam quatenus erat gratia gratum faciente tum actuali, tum habituali ornata, Nego minorem. Verum quidem est Christum non meruisse per visionem intuitivam, neque per amorem beatificum ; quia illæ operationes non erant sub dominio ejus, nec de illis disponebat tanquam dominus ; cum ab illo non procederent liberè, sed necessario : *Ubi autem necessitas, nec corona, nec damnatio*, ait S. Hieronymus Lib. 2. contra Jovinianum. Sed meruit per actiones ex gratia gratum faciente elicitas ; de illis siquidem liberè disponebat.

Ergo, inquires, Beati in cœlo hac ratione merentur.

Nego consequent. Absolutè quidem Beati in cœlo sic mereri possent, & damnati in inferno demereri. Sed actu & de facto, nec illi merentur, nec isti demerentur ; quia Deus mortem fixit hominibus, pro ultimo termino merendi aut demerendi. Hinc Christus à primo post mortem instanti non meruit, quamvis sit semper vivens ad interpellandum pro nobis, Hebr. 7. illumque habeamus Advocatum apud Patrem 1. Joan. 2. Namque per suas preces nova nobis non meretur, sed impe-

impetrat, ut merita vitæ antea actæ & passionis nobis applicentur. Quod & de orationibus Sanctorum dicendum est.

Dices 2. Ubi nulla libertas, nullum quoque est meritum. *Quidam posuerunt*, inquit S. Thomas qu. 6. de malo art. 1. *quodd voluntas hominis ex necessitate moveretur ad eligendum aliquid, nec tamen ponebant quodd voluntas cogeretur; non enim omne necessarium est violentum . . . Hæc autem opinio est hæretica, & uti talis damnata est ab Innocentio X. & ab Alexandro VII. namque ex sancto Augustino Lib. de duabus animabus cap. 11. Nemo vituperatione suppliciove dignus est, qui id non faciat, quod facere non potest . . . Nonne ista cantant, & in montibus Pastores, & in theatris Poetæ, & indocti in circulis, & docti in Bibliothecis, & Magistri in scholis, & Antistites in sacris Templis? Atqui Christus non fuit liber à necessitate, cum ex dictis cap. 1. peccare non potuerit, nec præceptum Patris, præsertim de morte subeunda, prætermittere. Ergo.*

Distinguo minorem. Non fuit liber libertate contrarietatis, Concedo: libertate contradictionis, subdistinguo: quoad specificationem, ut ajunt, quando opus bonum ipsi fuit imperatum, Concedo: quoad exercitium, Nego minorem & conseq. Multiplex itaque distinguenda libertas à necessitate: alia dicitur contrarietatis, qua quis potest facere contraria, bonum scilicet & malum, qualis in homine viatore reperitur, juxta illud Eccli. cap. 31. *Qui potuit transgredi, & non est transgressus: facere malum, & non fecit.* Et hæc libertas à Christo exulavit; est enim imperfectio posse deficere, quam gratia in
homine

homine viatore minuit, & in Beato omnino tollit. Alia est libertas contradictionis, in eo sita, quod homo possit bonum velle seu facere, & non velle aut non facere, si præceptum non sit: si enim præciperetur, omissio illius esset mala, ac proinde bonum illud non posset omitti sine libertate contrarietatis à Christo prorsus eliminanda. Sed libertas contradictionis subdividitur in libertatem specificationis, qua quis est indifferens ad hoc specie bonum, vel ad aliud, quando neutrum præcipitur, v. g. ad sequendum hoc vel illud consilium; & talis libertas est in Beatis, in Deo quoque perfectissima, nec Christo deneganda, ubi præceptum non urget. At urgente præcepto, v. g. moriendi, non erat liber libertate specificationis; quia, ut jam monuimus, voluntas non potest sine peccato respuere opus præceptum. Sed præter libertatem specificationis, est alia libertas contradictionis, quæ dicitur libertas exercitii, qua voluntas potest exercere hunc vel illum actum, licet sit determinata ad unum etiam numero objectum; quod demonstratur uno & altero exemplo. Sancta Apollonia, referente sancto Dionysio Alexandrino, epistola ad Fabium, apud Eusebium lib. 6. hist. capite 41. sponte & proprio motu insiliit in rogam accensum, ad quem cremanda ducebatur: motus ille tum voluntatis, tum corporis, fuit liber, & iudicio sancti viri, laude dignus; liber, inquam, non libertate specificationis; quia hæc supplicii species erat determinata, & ab electione sanctæ Martyris independens: sed libertate exercitii, quatenus intrepida Virgo disposuit de suo actu, potuit-

que illum non ponere. Idem videre est in exemplo rei ad mortem damnati, & stipiti jam alligati, mox suspendio præfocandi; si ex desperatione præveniat carnificem, & ex schala seipsum præcipitet, graviter peccat, vituperatione æternisve suppliciis dignus est; quia libere ad tantum flagitium se determinavit. Ergo ad merendum aut demerendum libertas contrarietatis, aut specificationis non est absolutè necessaria; sed sufficit libertas exercitii, per quam homo verè & propriè est dominus sui actus, ac de eo absolutè disponit. Porro in hypothesi, quòd Christus Dominus à Patre mandatum moriendi acceperit etiam eo tempore, quo Agnus legalis immolabatur, ut veritas figuræ succederet, meritoria fuit tota ejus passio; quia libera libertate exercitii; ut patet ex historia Passionis: sponte ex urbe ad locum processit, ubi facilius à militibus comprehenderetur; *ut cognoscat mundus*, inquit Joan. 14. *quia diligo Patrem, & sicut mandatum dedit mihi Pater, sic facio; surgite, eamus hinc.* Et sciens Judam cum cohorte appropinquare, exiit eis obviam: *Processit*, ait sanctus Joan. Cap. 18. *& dixit eis: Quem quæritis?* Denique ex potestate & libertate emisit spiritum, ut vel eo probaverit quod dixerat Joan. 10. *Nemo tollit eam (animam) à me, sed ego pono eam à meipso.*

Dixi, in hypothesi quòd mandatum moriendi acceperit; non enim una est hac in re Theologorum sententia, Alii docent non accepisse, propter illud Isaïæ 53. *Oblatus est, quia ipse voluit.* Alii plures contrarium affirmant, tum quia dicitur Philip. 2. *Factus est obediens usque ad mortem crucis;* tum quia Apostolus Rom. 5. opponit Chri-

Christum Adamo, in eo, quòd per inobedientiam Adami, peccatores constituti sunt multi; per Christi verò obedientiam justì constituentur multi. Atqui in Adamo inobedientia fuit propriè dicta, & contra præceptum ipsi divinitus impositum. Ergo & obedientia Christi stricte accipienda est, supponitque moriendi mandatum; quamvis enim quælibet alia ejus actio sufficiens fuisset ad generis humani redemptionem, ut infra dicetur, certum est tamen fuisse redemptum per ejus sanguinis effusionem. Alii Theologi tertiam ineunt sententiam, qua sibi videntur conciliare duas priores; docentque Christum nullum moriendi mandatum absolutè accepisse, sed conditionatè tantum ex hypothesi quòd vellet homines redimere, adeò ut per Patrem liberum ei fuerit salvare, vel non salvari homines: sed in hypothesi quòd vellet hoc pietatis officium præstare, illud implere non potuisse nisi per sanguinis effusionem; conditionem liberè accepit; inquit, & in hoc oblatus est quia voluit: jamque duræ conditioni subditus, ex obedientia mortem oppetiit.

Secunda sententia, ut communior, sic & longè verior videtur; quia decretum Incarnationis præsupponit decretum salvandi homines, Filius Dei propter nostram salutem descendit de cœlis, carnem passibilem accepit ut moreretur; *Propterea veni in horam hanc*, ait Joan. 12. v. 27. Passionem ejus prædixerant Prophetæ, hinc Christus ad Petrum Matth. 25. *Quomodo ergo implebuntur Scripturæ? quia sic oportet fieri*, Lex igitur moriendi Christo fuit imposita, ideo ingrediens mundum dixit: *Hostiam & oblationem noluisti, corpus autem aptasti mihi . . .* (scilicet statim à conceptione) *ecce venio,*

in capite libri scriptum est de me, ut faciam, Deus voluntatem tuam, Hebr. 10. Quòd autem voluntas illa esset lex & præceptum, additur in Psalm. 39. & legem tuam in medio cordis mei.

CAPUT IX.

Utrum Christus sibi meruerit?

R. Primò, Christus sibi meruit etiam de condigno, quædam Incarnationis consecraria; 1. gloriam corporis. Luc. 24. *Nonne hæc oportuit pati Christum, & ita intrare in gloriam suam?* 2. Nominis sui exaltationem, Philip. 2. *Factus est obediens usque ad mortem . . . propter quod & Deus exaltavit illum, & donavit illi nomen, quod est super omne nomen, ut in nomine Jesu omne genu flectatur.* 3. Divinos ubique honores, Apoc. 5. *Dignus est Agnus . . . accipere . . . divinitatem, id est, ubique agnosci & collaudari ut Deus.*

R. Secundò, sibi non meruit unionem hypostaticam, neque gratiarum plenitudinem, neque earum argumentum. Tres responsionis sunt partes.

Prima pars, quæ est de unione hypostatica, probatur 1. ex Scriptura, quæ opus Incarnationis immensæ Dei misericordiæ tribuit, Luc. 1. *Per viscera misericordiæ Dei nostri, in quibus visitavit nos oriens ex alto, Joan. 3. Sic . . . Deus dilexit mundum, ut Filium suum unigenitum daret.* 2. ex S. Augustino lib. de prædest. Sanctorum c. 15. *Fit ab initio fidei suæ, homo quicumque Christianus, qua gratia homo ille ab initio factus est Christus: Et infra; Quisquis in capite nostro præcedentia merita singula-*

gularis illius generationis invenerit, ipse in nobis membris ejus præcedentia merita multiplicatæ regenerationis inquirat. 3. Ratione duplici: Prima, quia prius est esse, quàm operari: ergo Christus per opera mereri non potuit, ut esset homo Deus. Secunda, quia principium meriti non cadit sub meritum, cum omni merito præsupponatur. Atqui Incarnatio est principium totius meriti; omnia enim opera tum Christi, tum membrorum ejus, ex unione hypostatica habent ut sint meritoria. Ergo.

Secunda pars, quæ est de Plenitudine gratiarum, probatur; quia gratia sanctificans cum suis appendicibus, & gloria animæ, Christo debebantur vi unionis hypostaticæ, qua erat Filius Dei naturalis, ac proinde hæres regni paterni, & eorum donorum particeps, sine quibus agere non posset, quemadmodum decet Filium Dei naturalem.

Tertia pars, quæ est de augmento gratiarum; patet ex dictis capite præcedenti, ubi probatum est Christum ab instanti conceptionis ea plenitudine gratiarum cumulatam fuisse, quæ secundum ordinariam Dei potentiam augeri non posset, essetque, si non physicè, saltem moraliter infinita.

Dices 1. Effectus nonnunquam præcedit causam moralem: merces v. g. solvitur mercenario antequam perfecit opera, quæ sunt causa moralis hujus anticipatæ solutionis: sic merita Christi futura fuere causa moralis gratiarum Patriarchis & Prophetis concessarum. Ergo à pari potuerunt esse causæ unionis hypostaticæ, etiamsi tempore ipsam præcesserint.

Concesso antecedente, nego consequentiam & paritatem. Disparitas autem est, quòd unio hypostatica sit principium totius meriti; ac proinde non potest esse effectus etiam moralis ullius meriti. Hinc vulgare Theologorum effatum, *Principium meriti non cadit sub merito.*

Dices 2. Pertinuit ad gloriam Christi Domini ut plenitudinem gratiarum possideret duplici titulo, nimirum hæreditatis & mercedis, quemadmodum Beati in cælo felicitate æterna potiuntur hoc duplici titulo. Ergo.

Nego antecedens. Imò in contumeliam filii Regis verteretur, si pater insignia & ornamenta ejus nativitati debita denegaret quamdiu non fuisset ea promeritus: quia in illa hypothese non ut legitimum filium & hæredem agnoscere videretur. Posset quidem accidentaria quædam dona meritis filii rependere, quemadmodum Deus Pater Filio, ob victoriam in morte reportatam, gloriam corporis retribuit.

Dices 3. Sancti Patriarchæ per gratiam meritis Christi sibi collatam meruerunt Incarnationem: ergo à fortiori Christus ipse.

Distinguo antecedens. Meruerunt Incarnationem quoad substantiam: hoc est meruerunt ut Filius Dei incarnaretur. Nego: quoad aliquas circumstantias, subdistinguo: meruerunt de congruo, Concedo: meruerunt de condigno, Nego antecedens. Opera itaque Patriarcharum non potuerunt esse merita Incarnationis, tum quia eam præsupponebat futuram tanquam causam moralem gratiarum, per quas bona operabantur, tum quia etiam in hypothese falsa quòd independenter à meritis Christi futuri gratiæ fuissent illis

con-

concessæ, merita illorum utpotè finita, nullam habuissent proportionem cum Incarnatione, quæ est præmium infinitum. Meruerunt tamen aliquas Incarnationis circumstantias. Abraham namque fide sua meruit ut Messias è stirpe sua ori-
retur, Gen. 22. v. 18. *Benedicentur in semine tuo omnes gentes quia obedisti voci meæ.* Ita etiam David Psalm. 131. *De fructu ventris tui ponam super sedem tuam.* Ita & Daniel cap. 9. votis suis acceleravit Messiae adventum.

Non meruerunt tamen de condigno, tum quia non intercessit Dei pactum, quod diximus prærequiri ad meritum de condigno; promissa enim mox recensita non præcesserunt, sed subsequuta sunt Patriarcharum opera: tum quia illæ circumstantiæ non sunt præmium, ad quod natura sua tendant bona opera. Quapropter sicut bona temporalia non sunt virtutis merces de condigno, sed ad summum de congruo; quia bona opera per gratiam elicita non tendunt ex natura sua nisi ad beatitudinem supernaturalem, & ad perficiendum principium, ex quo procedunt, nempe gratiam sanctificantem: ita de Incarnationis circumstantiis ratiocinandum est. Congruum tamen fuit, ut Deus iis beneficium concederet, quos accipiendi fecerat dignos; eorumque preces exaudiret, ad quas gratia sua incitaverat.

Instabis: Mereri Matrem Dei fieri, idem est, ac mereri substantiam Incarnationis, cum Mater Dei existere non possit, nisi Deus temporaliter nascatur. Atqui beata Virgo meruit fieri Mater Dei; canit enim Ecclesia, *quem meruisti portare, resurrexit*: ergo beata Virgo meruit substantiam Incarnationis.

Distinguo majorem. Mereri nullo supposito Dei decreto Incarnationis peragende, Concedo: supposito decreto, Nego majorem. Namque supposito tali decreto, beata Virgo potuit mereri duntaxat ut Filius Dei Incarnandus, ex ipsa potius, quàm ex alia nasceretur, quod pertinet ad circumstantias Incarnationis, quemadmodum de Abrahamo & Davide diximus.

Distinguo similiter minorem. Beata Virgo meruit fieri Dei Mater, de congruo, Concedo: de condigno, Nego minorem propter rationes mox allatas.

Confirmatur 1. auctoritate sanctorum Patrum. Sanctus Hieronymus lib. 1. contra Pelagianos sic scribit: *Adverte quòd beatam se dicat non proprio merito, sed Dei in se habitantis clementia.* Sanctus Bernardus serm. de nativitate: beatæ Virginis, *Maria*, inquit, *non prætendit meritum, sed gratiam quærit.* 2. Ratione, gratia ordinatur ut perfectè Deo subditi simus per cognitionem & amorem: at maternitas hunc transcendit ordinem, efficitque ut persona creata cum homine Deo per identitatem & in primo consanguinitatis gradu sit unita, ita ut verè & propriè dicere queat Christo Domino: *Filius meus es tu, ego genui te, caro mea es.* Tantò excellentior Angelis effecta, inquit sanctus Bernardus, *quantò differentius præ illis nomen Matris accepit:* sub quo titulo supremus omnium Dominus filialem illi reverentiam exhibuit.

Urgebis; Illa meruit de condigno fieri Mater Dei, quæ tanto honore fuit digna. Atqui beata Virgo fuit digna, quæ Mater Dei fieret, ex sancto Ambrosio lib. 2. de Virginibus. Sanctus
Dama-

Damasceus & S Bernardus vocant eam sacrarium Spiritus sancti, & templum Deo dignum: canit quoque Ecclesia eam fuisse præparatam, ut dignum fieret Filii Dei habitaculum. Ergo.

Nego majorem: beneficium enim non debetur eo ipso, quo quis illius accipiendi est dignus. Rex non tenetur induere vestem, quæ censetur Rege digna: homo pietate & eruditione insignis, ideoque Episcopatu dignus, Episcopatum propterea non meretur de condigno. Vox itaque (dignus) significat solum aptitudinem, decentiam & ad summum meritum de congruo.

Porro beatam Virginem de congruo maternitatem meruisse concessimus, tum propter auctoritates in objectione adductas, tum propter rationem, quam sanctus Thomas quæst. 27. proponit in hunc modum. Deus neminem eligit ad aliquod munus, quin prius illum disposuerit, idoneumque reddiderit, juxta illud Apostoli 2. Cor. 3. *qui & idoneos nos fecit Ministros novi testamenti.* Atqui beatam Virginem præ cæteris elegit, ut esset Mater unigeniti Filii sui: ergo dubitandum non est, quin idoneam præparaverit ad singularem illam dignitatem; colligiturque ex Angeli verbis Luc. 1. *Invenisti gratiam apud Deum, ecce concipies.*

Q. 2. *Quibusnam gratiarum donis beata Virgo idonea effecta est, ut esset Mater Dei?*

R. Quatuor recensentur à sancto Thoma, quæst. citat.

Primò, immunis fuit ab omni labe peccati actualis etiam levissimi: tum quia honos & ignominia parentum redundant in filios, juxta illud Prov. 17. *Gloria filiorum patres eorum;* tum quia

Dei sapientia habitavit non solum in ejus anima, sed etiam in utero. *In malevolam autem animam non introibit sapientia, nec habitabit in corpore subdito peccatis*, Sap. 1. tum quia per maternitatem conjuncta est cum Filio Dei incarnato in primo gradu consanguinitatis, adeò ut caro Christi sit caro Mariæ, ex sancto Augustino: ergo fuit ab omni labe pura; *quæ enim societas luci ad tenebras?* 2. Cor. 6. illudque Cant. 4. in ea impletum est: *Tota pulchra es, amica mea, & macula non est in te.* Et ita semper Ecclesiam piè credidisse docent Patres Tridentini, sess. 6. Can. 23. De immunitate autem à peccato originali diximus, ubi de lapsu primi hominis.

Secundò, libera fuit à fomite peccati, seu ab omni inordinato concupiscentiæ motu, quo vel inclinaretur ad malum, vel difficultatem pateretur in bono; quia talis inordinatio est quædam macula, quæ matrem Dei dedecet & corpus virgineum, ex quo nasciturus erat Filius Dei. Nec obstat quod scribit sanctus Joannes Damascenus, Spiritum sanctum supervenisse, ut purgaret eam; purgavit enim eo modo, quo Angeli superiores dicuntur purgare inferiores, quatenus illos illuminant; hoc est mentem illius amplius illustravit, & in amore Dei magis accendit, ita ut per allegoriam de beata Virgine dicere liceat, quod legitur Ezech. 43. *Ecce gloria Domini Israel ingrediebatur per portam orientalem*; id est, per Mariam; & *terra*, id est caro ejus, *splendebat à maiestate Dei.*

Tertiò sanctificata est ex utero; quamvis enim Scriptura de ejus nativitate & conceptione omnino sileat, una tamen est Theologorum,
& Ca-

& Catholicorum sententia, illud privilegium Matri Dei non fuisse denegatum, quod alii concessum legimus, ut Jeremiæ, qui sanctificatus est priusquam exiret de vulva, Jer. 1. & Sancto Joanni Baptistæ, qui Spiritu Sancto repletus est ex utero matris suæ, Luc. 4. *Inde enim scimus*, inquit S. Augustinus lib. de natura & gratia cap. 36. *quod ei plus gratiæ collatum fuerit ad vincendum omni ex parte peccatum, quæ concipere ac parere meruit eum, quem constat nullum habere peccatum.*

Quartò, per hujusmodi sanctificationem consecuta est plenitudinem omnium gratiarum: *Ave gratia plena*, ait ad eam Angelus Luc. 1. quò enim Sancti Christo omnium gratiarum fonti conjunctiores fuerunt, eò largiùs de ejus plenitudine receperunt, ut Sanctus Joannes Baptista & Apostoli. Atqui beata Virgo fuit singulariter & in primo gradu Christo conjuncta: ergo habuit eam gratiarum plenitudinem, quæ nec Sancto Joanni Baptistæ, nec Sancto Stephano, nec Angelis, nec ulli puræ creaturæ convenire possit. *Bene gratia plena*, inquit Auctor Commentariorum in Lucam apud Sanctum Hieronymum; *quia cæteris per partes, Mariæ verò se totam simul infundit gratiæ plenitudo.*

Objicit sibi Angelicus Doctor: ei quod est plenum & perfectum, non restat aliquid addendum: sed gratia Mariæ primò collata augmentum accipit, tum in Incarnatione, cum audivit ab Angelo; *Spiritus sanctus superveniet in te*: tum in glorificatione. Ergo.

Respondet ad antecedens, triplicem esse distinguendam perfectionem & plenitudinem; alia est dispositionis, qualis in ligno proximè disposito

fito ad ignem, qua lignum dicitur plenè, perfectè, & summè calidum: alia est formæ, qualis est calor, qui cum igne introducit in lignum: alia denique finis, qui est ultima rei perfectio, ultra quam progredi non licet. Beata Virgo in sanctificatione primam accepit plenitudinem; in Incarnatione secundam; in glorificatione tertiam. Distinguenda quoque est plenitudo capitis à plenitudine cujuslibet membri etiam præcipui; sicut distinguitur plenitudo fontis à plenitudine conchæ, quamvis latissimæ & profundissimæ. Prior, quia talis est tum ex parte subjecti, tum ex parte objecti & virtutis, nullum omnino admittit augmentum: posterior vero, quæ talis dicitur sola ratione subjecti, majorem virtutis & gratiæ influxum recipere potest; nec dubitandum est, quin beata Virgo suis bonis operibus in gratia creverit.

Nec dicas fontem in concham semel plenam non influere, sed effluere. Fons namque in fluxu suo non auget conchæ dimensiones, secundum quas capax est recipiendæ aquæ, contra Deus influendo sapientiam & gratiam, spiritus humani & Angelici virtutem dilatat & perficit; dedit Salomoni cordis latitudinem, Scriptura teste, eo ipso, quo potioribus scientiæ donis illum cumulavit, adeò, ut spiritus fiat vel angustior vel latior, secundum donorum spiritualium mensuram. Unde licet beata Virgo in sanctificatione sua fuerit gratia plena, nullumque vacuum in ejus corde remanserit, cum omnes ejus animæ vires gratia ad se traxerit; nihilominus bonorum operum merito nova in dies illi accessit gratia, sicut & cordis latitudo.

CAPUT X.

Utrum Christus aliis meruerit?

R. Primò, meruit nobis vitam æternam, & omnes gratias, per quas illam consequi possimus.

Probatur 1. Scriptura generatim, Ephes. 1. *Benedixit nos omni benedictione spirituali in cœlestibus in Christo*: spirituali ait, & in cœlestibus, non verò temporali & terrena; neque enim mortuus est Christus ut homines nasceremur, sed ut spiritualiter renasceremur, ut loquitur sanctus Augustinus, neque ut sæculi felicitate gauderemus, sed ut jugum cupiditatis excuteremus. Ad hanc autem victoriam plus juvant adversa, quàm prospera. Quod tamen non ita accipiendum est, quasi in adversis ad Christum non sit recurrendum; nam & ipse tum cæcis restituit visum, ægris sanitatem, mortuis vitam, cùm ad æternam salutem expedire advertit; diximusque tractatu de Attributis hujusmodi bona temporalia posse aliquando numerari inter effectus prædestinationis: sed si ad ea petenda cupiditate agimur, non in nomine Salvatoris petimus, quia contra rationem salutis petimus; ita ferè sanctus Augustinus tract. 102. in Joan.

Probatur 2. speciatim quoad singulas responsionis partes de prædestinatione, quæ est gratiarum prima, habetur cap. 1. ad Ephesios: *Prædestinavit nos in adoptionem filiorum per Jesum Christum*. De vocatione, primo prædestinationis effectū, 2. ad Tim. ad 1. *Vocavit (nos) vocatione sua sancta quæ data est nobis in Christo*. De
justi-

De justificatione, quæ vocationem consequitur, 1. Joan. cap. 1. *Sanguis Jesu Christi, Filii ejus, emundat nos ab omni peccato.* De bonis operibus, quæ sunt justificationis fructus, Joan. 15. *Qui manet in me, & ego in eo, hic fert fructum multum; quia sine me nihil potestis facere.* De vita æterna Rom. 6. *Gratia autem Dei, vita æterna, in Christo Jesu Domino nostro.*

Dices 1. Ait Christus Joan. 6. *Nemo potest venire ad me nisi Pater traxerit eum:* ergo Christus non meruit nobis vocationem & fidem.

Nego conseq. nam Pater trahit ut causa physica, Filius ut causa Moralis & meritoria, quatenus homo est.

Dices 2. Christus eam gratiam nobis meruit duntaxat, quam primus parens amisit. Atqui primus parens non amisit fidem: ergo non meruit nobis fidem.

Respondeo primò negando majorem: nam Christus nobis meruit gratiam, qua propter peccatum originale privamur. Atqui certum est nos privari fide propter peccatum originale; non enim fideles nascimur, sed renascimur per gratiam Domini nostri Jesu Christi. Ergo. Secundò negari potest etiam minor: quia multi Patres censent Adamum amisisse fidem, & credidisse diabolo affirmanti, contra Dei Verbum, se ex esu fructus vetiti nequaquam esse moriturum.

Q. 2. *Christus meruitne Angelis?*

R. Meruit Angelis beatis gratias consecratorias; per ipsum enim innotuit Principatibus & Potestatibus in cœlestibus multiformis sapientia Dei, cap. 3. ad Ephes. v. 10. Utrùm autem meruit gratiam, in qua conditi sunt Angeli, perseverantiam eorum in bono, & beatitudinem pendet ex
alia

alia quæstione, scilicet an Adamo non peccante Filius Dei fuisset incarnandus?

Scotistarum Schola, cui se adjungunt alii Theologi, docet Filium Dei venturum impassibilem, etiamsi Adamus non peccasset: ex quo Principio concludunt ipsum meruisse Angelis omnem gratiam & gloriam, & primis parentibus justitiam originalem.

Thomistarum Schola, & plures alii Theologi contra statuunt in eadem hypothese Incarnationem non futuram, ac proinde nec gratiam & gloriam Angelis, nec justitiam originalem primis parentibus fuisse concessam meritis Christi.

Hæc posterior sententia longè conformior est Scripturis sacris, & Ecclesiæ Traditioni. 1. Scripturæ sacræ unicam afferunt Incarnationis causam nempe generis humani liberationem. Isa. 61. *Dominus misit me, ut mederer contritis corde, & prædicarem captivis indulgentiam.* Matth. 9. *Non est opus valentibus Medicus, sed male habentibus non enim veni vocare justos, sed peccatores.* Luc. 19. *Venit Filius hominis querere & salvam facere quod perierat.* Similia habentur Joan. 3. vers. 16. cap. 10. vers. 10. Galat. 4. vers. 4. 1. Timot. 1. vers. 15.

Secundò, hæc eadem sententia est Sanctorum Patrum. S. Irenæus lib. 5. cap. 14. sic scribit: *Si non egebat caro salvari, nequaquam Verbum Dei caro factum fuisset.* Origenes h. 24. in Num. *Si non fuisset peccatum, Filius Dei mansisset hoc quod erat in principio Deus Verbum.* S. Athanasius Orat. 3. contra Arianos: *quod homo est factus (Filius Dei) id nunquam contigisset, nisi hominum necessitas causam præbuisset.* Sanctus Ambrosius

fius de Incarnatione c. 6. *Quæ erat causa Incarnationis, nisi ut caro, quæ peccaverat, redimeretur?* Sanct. Augustinus sermone 3. de verbis Apostoli: *Si homo non periisset, Filius hominis non venisset.* Sanctus Cyrillus Alexandrinus lib. 5. de Trinitate: *non peccassemus, neque factus similis nobis esset Filius Dei.* Denique Ecclesia in benedictione cerei Paschalis, prævaricationem, Adami vocat felicem culpam, peccatum necessarium; necessarium, inquam, ut talem haberemus Redemptorem.

Probari etiam potest hac ratione Theologica. Decretum Dei liberum, & à sola ejus voluntate pendens, eatenus nobis innotescit, quatenus nobis revelavit: nam *quæ Dei sunt, nemo cognovit, nisi Spiritus Dei*, ait Apostolus 1. Cor. 2. Atqui æternum decretum de Verbo incarnando est liberum, utpotè respiciens opus ad extra: diciturque ab Apostolo sacramentum à sæculis in Deo absconditum, Ephes. 3. nec ullibi Deus revelavit implendum, etiam in hypothese, quòd homines in Adamo non peccassent. Ergo divinationis genus est asserere in eadem hypothese, tale decretum extitisse in Deo, & convenienti tempore fuisse implendum.

Dices: Filius Dei venit, non solum ut redimerentur homines, sed etiam ut esset eorum Doctor, Exemplar, & Caput. Quidni ergo tanta beneficia ipsis non peccantibus contulisset, cum actu & de facto Angelis in gratia perseverantibus factus sit Doctor & Caput?

Respondeo 1. illud argumentum nimis probare; probat enim Filium Dei assumptisse carnem propter Angelos, quod tamen est falsissimum. Unde illud retorqueo in adversarios: Filius
Dei

Dei non venit ut esset Doctor & Caput Angelorum, qui in gratia perseveraverunt: ergo neque hac de causa venisset propter homines, si a gratia non excidissent.

Respondeo 2. distinguendo antecedens. Filius hominis venit ut esset Doctor & caput hominum; venit, inquam, secundario, Concedo; primario, Nego antecedens. Incarnatio itaque 1. decreta est ad salvandum hominem: *Vocabis nomen ejus Jesum*, inquit Angelus ad Joseph, Matth. 1. *ipse enim salvum faciet populum suum à peccatis eorum*. Ex hoc autem primario Salvatoris titulo cæteri, tanquam ejus appendices, fluunt. Ideo enim Christus est hominum Doctor, quia illuxit his, qui in tenebris peccati, & umbra mortis sedebant. Ideò Caput, quia cùm per veterem Adam, infaustum hominum caput, peccatores constituti sint multi, novus Adam factus est nobis justitia & sapientia à Deo. Quia verò ratione hypostaseos & personæ, omnem creaturam, etiam Angelicam, antecellit, consequenter subduntur illi Principatus & Potestates, qui in ministerium ejus dati sunt, & per illum Dei mandata & consilia percipiunt, atque ita Caput Angelorum effectus est.

Dices 2. Tertullianus lib. de resurrectione Christi cap. 6. scribens de formatione corporis Adami, sic habet: *Quodcunque limus exprimebat, Christus cogitabatur homo futurus*. S. Cyrillus Alexandrinus lib. 15. Thesauri, comparat Christum fundamento domus, quod sanè prius est in ædificio. Ergo Christus prædestinatus est ante omnem creaturam, ac proinde ante prævisum Adami peccatum, hinc dicitur creatus ante omnes

creaturas, Prov. 8. Primogenitus omnis creaturæ, Col. 1.

Nego conseq. Christus quidem ut Deus & Sapientia æterna, est ante omnem creaturam, sed ut sic non est prædestinatus: ut homo verò prædestinatus est, & præconceptus antequam Adamus fieret, sed non antequam peccatum ejus futurum prævideretur. Est quoque fundamentum reparationis generis humani, non creationis universi, alias sanctus Cyrillus sibi contradiceret. Et quamvis gratia Angelorum sit entitate similis gratiæ hominum, illis tamen concessa non est meritis Christi, sicut nec Adamo in statu innocentiae; nec in illis per se fuit efficax sicut in hominibus post Adami lapsum. Cum autem Adamus peccando gratiam amiserit, Christusque amissam restituerit, certum est Adamum redemptum omnem suam gratiam & gloriam, Christi meritis debere.

Ex dictis hoc capite & præcedenti sequitur, Incarnationis causam finalem esse salutem hominum, efficientem verò solam Dei misericordiam, & omnipotentiam.

CAPUT XI.

Utrum Christus propriè satisfecerit pro hominum peccatis?

Negant Sociniani, reclamantibus Scripturis, in quarum paginis ferè omnibus Christus prædicatur hominum Mediator, Salvator & Redemptor; Agnus pro nobis occisus; Sacerdos, qui in sanguine non alieno, sed proprio, Deum nobis

bis propitiavit. Sed ista pro more detorquent ad sensus improprios & methaphoricos: Christus, inquit, est Redemptor, quemadmodum Deus dicitur Salvator & redemptor Israël, Isaïæ 48. & 63. quatenus scilicet liberavit nos doctrina sua, & intercessione absque soluto pretio: est Mediator eo modo, quo Moyses Gal. 3. vers. 19. Pro nobis mortuus est, quia in commodum nostrum, hoc est, ut ejus exemplo mortem, spe melioris vitæ, alacrius oppeteremus. Denique est Sacerdos non quòd ullum verum sacrificium obtulerit, aut in cruce victima piacularis extiterit; sed quia divinæ voluntatis fuit interpres, & in proprio sanguine cælum introivit, ut appareat vultui Dei, pro nobis intercedendo quemadmodum summus Pontifex Judæorum in sanguine alieno Sancta Sanctorum ingrediabatur, ut fusè prosequitur Apostolus cap. 8. 9. & 10. ad Heb. Sed contra hanc hæresim

R. De fide est Christum Dominum propriè satisfecisse pro hominum peccatis; & hæc doctrina adeò constans est apud omnes, qui Christiano nomine censentur, ut ante Socinum nullus etiam Hæreticus eam inficiatus sit; nec Tridentini Patres nova definitione firmandam esse dixerint; sed eam tanquam inconcussam & indubitatam supposuerint sess. 22. c. 1. & 2. & Can. 3. & 4. Cùm autem innumeri propè Scripturæ textus ad hanc veritatem demonstrandam suppetant, omnes in uno syllogismo concludimus.

Probatur itaque hoc uno argumento, tum ex omni hominum sensu, tum ex Scripturis deprompto. Ille verè & propriè pro alienis offensis

satisfecit, qui 1. se sponforem & vadem pro illis constituit: 2. qui illorum loco pœnas peccatis debitas exolvit: 3. qui iram personæ læsæ & offensæ placavit, atque ita reos cum illa reconciliavit, pristinamque amicitiam peccatis solutam redintegravit. Atqui Christus Dominus hæc tria pro nobis apud Deum præstitit: ergo verè & propriè pro nobis satisfecit. Majorem admittunt Sociani.

Minor probatur 1. ex Isaïæ capite 53. quod de Christo interpretantur etiam Sociniani. In illo autem capite 1. Christus ultrò se sponforem obtulit, *oblatus est quia ipse voluit*; & quidem non pro peccatis propriis; *Propter scelus populi mei percussit eum . . . eo quod iniquitatem non fecerit, neque dolus fuerit in ore ejus.* 2. Deus peccatis nostris læsus sponfionem admisit: *Posuit Dominus in eo iniquitatem omnium nostrum . . . & Dominus voluit conterere eum in infirmitate.* 3. Christus revera pœnas peccatorum nostrorum tulit, non à cervicibus nostris illas duntaxat removendo, quemadmodum morbos corporales removet, ut fingunt Sociniani, sed & à nobis abstulit, & in se suscepit: *Vulneratus est propter iniquitates nostras, attritus est propter scelera nostra.* 4. His vulneribus peccata nostra expiata fuere, & debita persoluta. *Si posuerit pro peccato animam suam* (Hebraicè, Si posuerit seipsum in Victimam piacularem) *videbit semen longævum.* Denique pax & reconciliatio nostra inde consecuta est, *disciplina pacis nostræ super eum, & livore ejus sanati sumus.*

Probatur 2. eadem minor ex cap. 2. primæ Petri: *Qui peccata nostra ipse vertulit in corpore suo*
super

super lignum, ut peccatis mortui, justitiæ vivamus; cuius livore sanati estis. Ergo vulnera Christi non sunt mera exempla obtinendæ sanitatis, ut somniant Sociniani, sed remedia efficacia; aliàs sanari diceremur livore & plagis Martyrum, cum iis incitemur ad vitæ præsentis contemptum, & futuræ desiderium.

Probatur 3. ex epistola ad Hæbræos, in qua diceret Apostolum ex professo confutandum suscepisse errorem Socinianum, adedò fortiter illum ex qualibet parte confodit, & accuratè omnia effugia occludit. Ac 1. quidem ex communi omnium gentium notione & usu demonstrat Sacerdotem primariò esse institutum ad placandum divinum numen viæctimarum oblationibus, adedò ut ille non sit Sacerdos, cui non competit sacrificium offerre: *Omnis namque Pontifex, inquit c. 5. ex hominibus assumptus, pro hominibus constituitur in iis, quæ sunt ad Deum, ut offerat dona & sacrificia pro peccatis. Et c. 8. Omnis . . . Pontifex ad offerendum munera & hostias constituitur: unde necesse est & hunc habere aliquid, quod offerat. Talis autem decebat ut esset nobis Pontifex (qualis Christus, ait cap. 7.) sanctus, innocens, impollutus, segregatus à peccatoribus, & excelsior cælis factus, qui non habet necessitatem quotidie, quemadmodum Sacerdotes, prius pro delictis suis hostias offerre, deinde pro populi.* 2. Expendit Apostolus quæ hostia piacularis respondeat excellentiæ tanti Pontificis, & maiestati divinæ; ac 1. definit non esse trucidatum pecus, his verbis c. 8. v. 4. *Si ergo esset (Christus) super terram, nec esset Sacerdos, cum essent qui offerrent secundum legem munera, qui exemplari & umbræ deserviunt cælestium.* Hoc est, si Christus offerret super

terram victimas terrenas & legales, non esset Sacerdos, tum quia non est ex Tribu Levi, nec ex familia Aaron; tum quia illæ victimæ erant figuræ & umbræ futurorum & verorum, quæ per novum Sacerdotem erant implenda, ac proinde staret adhuc vetus sacerdotium, quo Christus, utpote ex Tribu Juda oriundus, insigniri non potuit. Hinc 3. declarat cap. 10. v. 5. & sequentibus, ipsum esse Sacerdotem simul & victimam piacularem. *Ideo, inquit, ingrediens mundum dicit: Hostiam & oblationem, noluisti, corpus autem aptasti mihi; holocausta pro peccato non tibi placuerunt. Tunc dixi; Ecce venio . . . ut faciam, Deus, voluntatem tuam . . . in qua voluntate sanctificati sumus per oblationem corporis Christi semel.* Christus itaque juxta ratiocinium Apostoli succedit victimis Aaronicis, sicut lux umbræ, veritas figuræ. Atqui constat ex Scripturis victimas legales loco hominum nocentium substitutas & cæsas fuisse, Lev. 17. v. 11. *Anima carnis in sanguine est: & ego dedi illum vobis, ut super altare in eo expietis pro animabus vestris, & sanguis pro animæ piaculo sit* c. 16. v. 22. hircus pro peccato dicitur portare omnes iniquitates, quas Sacerdos in caput ejus transmittere significabat ritu ibidem præscripto v. 21. *Et posita utraque manu super caput ejus (hirci) confiteatur omnes iniquitates filiorum Israel, & universa delicta, atque peccata eorum quæ imprecans capiti ejus, &c.* Ergo Christus novi testamenti vera & unica victima in se suscepit peccata nostra, & pœnas pro iis debitas. Hinc dicitur factus peccatum, 2. Cor. 5. v. 21. & maledictum, 3. Gal. v. 13. namque hostia pro peccato immolata dicitur peccatum, Osee 4. v. 8. *Sacerdotes peccata populi mei*
come-

comedent, id est, vescuntur victimis pro peccatis populi oblati.

Supereſt tertium & ultimum controverſiæ caput, an & quomodo Chriſtus pro nobis propriè ſit ſponſor & mediator, Sacerdos & victima particularis, quemadmodum haſtenus demonſtravit Apoſtolus, actu & de facto debita noſtra ſolverit, & peccata noſtra, quæ in ſe ſuſcepit, vero ſacrificio expiaverit. Hanc difficultatem aggreſſitur idem Apoſtolus c. 9. & 10. decernitque Chriſtum in cruce hæc omnia præſtitiffe, atque hanc ſui oblationem loco omnium victimarum & ſacrificiorum legalium ſubſtituiſſe. *Et omnis quidem Sacerdos*, inquit c. 10. v. 11. *præſto eſt quotidie miniſtrans, & eaſdem ſæpè offerens hoſtias, quæ nunquam poſſunt auferre peccata.* Loquitur de jugi ſacrificio, in quo ſinguliſ diebus agnus immolabatur: de Chriſto verò pergens ſubdit: *hic autem unam pro peccatis offerens hoſtiam, in ſempiternum ſedet in dextera Dei.* In Græco habetur, *poſtquam obtuliſſet*, quod denotat oblationem cruentam & expiaticem in cruce ſemel peractam, & nunquam repetendam, ut Apoſtolus præmiſerat, c. 9. verſ. 25. 26. & 28. *non ut ſæpè offerat ſemetipſam alioquin oportebat eum frequenter pati ab origine mundi.* Nempe ſi una illa cruenta oblatio non ſufficeret ad expianda tum priorum, tum poſteriorum ſæculorum peccata: *nunc autem ſemel in conſummatione*, id eſt in fine ſæculorum, *ad deſtructionem peccati per hoſtiâ ſuam apparuit.* *Et quemadmodum ſtatutum eſt hominibus ſemel mori ſic & Chriſtus ſemel oblatuſ eſt ad multorum exhaurienda peccata.*

At, inquiunt Sociniani, Chriſtus ex Apoſtolo manet Sacerdos in æternum; eo quòd ſemper

fit vivens ad interpellandum pro nobis in cœlo, in quod semel ingressus est per proprium sanguinem, quemadmodum Pontifex Judæorum semel in anno introibat in Sanctum Sanctorum: *Non sine sanguine, quem offert pro sua & populi ignorantia*, c. 9. v. 7. Ergo peccata nostra non expiavit, nisi quatenus doctrina sua sustulit ignorantiam, dum in terris ageret, & nunc in cœlo per sanctuarium adumbrato, offert suum sanguinem pro nobis interpellans.

Contra, 1. omnia peccata dicuntur stultitia & ignorantia, juxta illud vulgare effatum: *Omnis peccans est ignorans. Stultè egi nimis*, ait David 2. Reg. cap. 24. *Ignorantias meas ne memineris*, Psal. 24. 2. Christus substitutus est non solum victimæ solemnis expiationis, quæ semel in anno immolabatur, Levit. c. 16. sed & omnibus aliis, quæ per singulos dies mactabantur, Heb. 10. v. 11. 3. Apostolus distinguit duplicem oblationem: altera est cruenta, eaque unica & nunquam repetenda, qua una consummavit in æternum sanctificatos, cap. 10. v. 14. hoc est, qua plenè expiavit omnium peccata, meruitque omnibus sanctificationem: altera incruenta, quam nunc in cœlis continuo peragit Advocatus noster apud Patrem, ut Passionis & cruentæ oblationis fructus nobis applicetur. Hujus autem oblationis duplicis umbram & figuram fuisse sacrificium expiationis demonstrat Apostolus; namque vitulus & aries pro peccatis Sacerdotis, & Hircus pro peccatis populi offerebantur in holocaustum extra sanctuarium; sanguis harum victimarum fundebatur super cornua altaris, & corpora extra castra comburebantur. Sed ut expiatio compleretur, Pon-

tifex

tifex Sanctuarium ingressus sanguine vituli & hirci aspergebat propitiatorium, Levit. 16. Sic Christus assistens Pontifex & victima futurorum bonorum in ara crucis mactatus & oblatus est in holocaustum toto sanguine effuso; deinde per proprium sanguinem introivit in sancta non manufacta, id est, in cælum, ut appareat vultui Dei & virtute sanguinis sui interpellet pro nobis: quæ eleganter Apostolus prosequitur cap. 9. & 10.

Non adducimus traditionem, quæ nullius est pretii apud Socinianos, quamque in hac parte sibi adversari ultrò fatentur, eò temeritatis progressi, ut contendant Apostolorum discipulos Magistrorum mentem non fuisse affecutos, adeo ut veritas detegenda & liberanda Socinum expectaret, qui ita sentit, desipit, ut verbis Sancti Augustini loquar.

Objiciunt 1. Sociniani, absurdè & contra Scripturarum luculenta testimonia asseritur Deum hominibus fuisse iratum, cum ibique prædicetur benevolus. *Nolo*, inquit Ezech. 33. *mortem impii, sed ut convertatur.* Joan. 3. *Sic Deus dilexit mundum, ut Filium suum unigenitum daret.* Rom. 2. *Ignoras quoniam benignitas Dei ad pœnitentiam te adducit?* Peccatores inimicitias contra ipsum gerentes sibi reconciliare non destitit, 2. Cor. 5. v. 19. Non ergo erat opus Mediatore, qui Deum hominibus reconciliaret, qui ipsum placaret, pœnasque lueret; aliàs Christus ipse, utpote Deus fuisset placandus.

Nego antecedens: scriptum est enim Gal. 3. v. 10. *Maledictus omnis, qui non permanferit in omnibus, quæ scripta sunt in libro legis,* Rom. 1. v. 18. *Revelatur . . . ira Dei de cælo super omnem impietatem.*

tatem. Epes. 2. vers. 3. *Eramus natura filii iræ.* Psalm. 4. *Odisti omnes qui operantur iniquitatem.* Ergo placandus erat Deus, ac proinde Christus ipse, quatenus Deus, & nobis reconciliandus, quamvis jam benevolus, quemadmodum pater in filium protervum & in se contumeliosum irascitur, & nisi resipiscat, ipsique satisfaciat, illum exhæreditare meditatur. ne autem ad illum extremum compellatur, pietas paterna illum quovis modo, interpositis etiam mediatoribus, ad pœnitentiam, & ad debitas reconciliationis condiciones, duras quidem, adducere satagit.

Instabis: Negari non potest, quin immensa Dei misericordia in hominum reconciliatione eluxerit: atqui nulla deprehenderetur si ab eorum sponfore plenam & integram satisfactionem exigisset. Quæ enim indulgentia in creditore erga debitorem, qui ab ejus sponfore usque ad novissimum quadrantem repetit? Ergo.

Nego minorem: latum enim discrimen est inter restitutionem & satisfactionem: restitutio non spectat personam, sed rem ipsi debitam; præcisèque tendit, ut in rebus æqualitas reponatur, adeò ut creditor non plus retineat, quàm ad ipsum pertinet; creditor verò nihil minus habeat, quàm ipsi debetur. Unde si amicus creditoris oblata pecunia totum damnum resarcire velit; creditor, aliàs debitori infensus, & novis expensis illum opprimere appetens, solutionem abjicere non potest; licetque illi dicere: *Tolle quod tuum est, & vade.* At satisfactio directè respicit personam, quæ læsa est & depressa ab eo, qui in illam superbè & contumeliosè insurrexit; jusque habet, ut ille ipse depri-

deprimatur, pœnas luat, rejecta alterius satisfactione, qui ultrò tantum honorem, quantus à reo ablatum est, rependere offerret. Si igitur mediatorem admittat, qui pro reo veniam precetur, & pœnam subeat, reo sanè gratificatur; quem sic reconciliatum in amicitiam suam recipit, quantò magis si ipse talem mediatorem reo per se ad condignè satisfaciendum impari præparasset & suscitasset? Sic autem Deus dilexit mundum.

Objiciunt 2. Lex divina & humana prohibet: ne innocens pro nocente spondeat, & plectatur: *Non occidentur patres pro filiis*, ait Dominus Deus Deut. 24. *nec filii pro patribus, sed unusquisque pro peccato suo morietur.* Ergo.

Distinguo antecedens. Si Judex non habeat dominium directum in vitam innocentis, nec ipse innocens consentiat in suam necem, Concedo: secus, Nego antecedens. Judices quidem habent jus vitæ & necis, quatenus nocentes perimere possunt eo modo, quo licet Medico membra putrida & corpori noxia amputare; sed nulla potestas in vitam innocentis, etiam consentientis, ipsis concessa est, ut docent Theologi Tractatu de Justitia & Jure. Hanc potestatem Deus sibi retinuit Deut. 32. *Videte quòd ego sum solus, & non sit alius Deus præter me. Ego occidam, & ego vivere faciam.* Atque hac suprema potestate præcepit Abrahamo, ut sibi Isaac immolaret, Gen. 22. minatur, Exod. 20. se visitaturum iniquitatem patrum in filios in tertiam & quartam generationem, quod in nepotes Achab opere complevit 3. Reg. cap. 25. Porro idem ipse proprio Filio suo non pepercit, sed pro nobis omnibus tradidit

didit illum, Rom. 8. Christus quoque Deus, & propriæ vitæ Dominus sponte se obtulit *ad multorum exhaurienda peccata*, Hebr. 9.

Instabis : Ergo plus Christo debemus, quàm Patri.

Nego sequelam : Christo enim satisfacere plus non fuit, quàm Patri Filium suum dare ; nam utrumque fuit infinitæ charitatis opus.

CAPUT XII.

Utrùm Christi Satisfactio fuerit necessaria ?

R. Primò : Neque Incarnatio, neque Satisfactio Christi absolutè fuerunt necessariae. 1. quia opera Dei ad extra sunt liberrima : Deus enim, cùm ex sese sit infinitus & undequaque beatus, rebus extra se positis egere non potest. Atqui Incarnatio est opus ad extra : Ergo 2. quia Deus potuit vel hominem peccatorem punire, quemadmodum Angelos perduelles, vel aversum per gratiam suam convertere. *Universa massa*, inquit S. Augustinus lib. de natura & gratia cap. 5. *pœnas debet, & si omnibus debitum damnationis supplicium redderetur, non injustè procul dubio redderetur.* Et lib. de agone Christiano cap. 11. *Sunt stulti, qui dicunt : Non poterat aliter sapientia Dei homines liberare, nisi suspiceret hominem, & à peccatoribus omnia illa pateretur. Quibus dicimus, poterat omninò ; sed si aliter faceret, similiter stultiæ displiceret.*

Dices : Omne peccatum sub Deo justo puniri necesse est : Ergo Deus sine prævia satisfactione peccata hominibus condonare non potuit.

Distin-

Distinguo antecedens. Puniri necesse est vel à Deo vindicante, vel ab ipso peccatore seipsum puniente, Concedo: à Deo solo vindicante; Nego antecedens: licet enim sit optimi Principis non sinere impios impunè grassari, laudandus tamen est, si aliquos à peccatis ad meliorem frugem adducat deinceps Reipublicæ profuturos.

Instabis 1. Merces merito negari non potest: Ergo nec pœna peccato.

Nego consequens. Disparitas est, quod meritum acquirat jus personæ benemeritæ; peccatum vero personæ læsæ. Deus autem potest cedere juri suo, remittendo pœnas, cum sit misericors; non verò alterum spoliare jure acquisito, cum sit justus.

Instabis 2. S. Athanasius libr. de Incarnatione asserit 1. Deum integra & illæsâ sua veritate & justitia, non potuisse hominem absque legitima satisfactione liberare. 2. Indecorum futurum fuisse, si hominem lapsum deseruisset. Et hæc duo fusè probat sanctus Anselmus libro, cui titulus est: *Homo Deus*: in quam sententiam consentire videntur Richardus Victorinus & Guillelmus Parisiensis: Ergo.

Distinguo anteced. non potuisse hypotheticè, nempe quia legem statuerat de pœna repetenda, & illud prædixerat, Concedo: non potuisse absolute, Nego antecedens: *citra Incarnationem*, inquit idem sanctus Doctor Orat. tertia contra Arianos, *poterat Deus solummodo loqui, & maledictionem solvere. Sed considerandum est quid hominibus expediat.* Opus equidem Incarnationis & redemptionis generis humani est convenientissimum, cum

cum in eo Deus manifestaverit infinitam suam misericordiam & justitiam, simul & odium, quo prosequitur peccatum; atque inde infinitus honos in ipsum refulserit, & incomprehensibilis ejus Sapientia sensibilibus innotuerit ad spectantium stuporem. Hic autem decor sine Incarnatione & Christi satisfactione mundo defuisset, ac propterea scribit Athanasius indecorum fore, si illud mysterium non fuisset peractum: indecorum, inquam, non positivè, quasi Deo repugnans; Deus enim producere non tenetur quidquid perfectissimum est, cum nullo indigeat, quemadmodum nec humanus artifex pretiosissimam quamque materiam ad operandum assumere; sed sufficit, si susceptum opus juxta artis leges accuratè perficiat. Indecorum itaque foret negativè, hoc est minùs decorum, & minus conveniens, si Deus alia ratione hominem liberasset. Et ita conciliandi sunt inter se alii Patres, qui disertè docent aliis modis genus humanum potuisse salvari, ut S. Augustinus supra laudatus, S. Leo serm. 2. de Nativitate, S. Cyrillus Alexandrinus lib. de Incarnatione; S. Bernardus epist. 1. *Quis neget*, inquit, *Omnipotenti fuisse alios & alios modos nostræ redemptionis?* Et nihilominus aliquando scribunt nullum esse salutis remedium, nisi Christus advenisset. Ita S. Augustinus serm. 14. de Tempore, & serm. 8. de verbis Apostoli; sanctus Leo serm. 1. de Passione; sanctus Cyrillus Alexandrinus Dialogo de Incarnatione: excipiendum tamen S. Anselmum censent Vassquesius & Petavius, existimantes duriora ejus verba, ut cum communi sententia conciliari possint.

R. Secundò, Incarnatio Christi & Satisfactio, ex hypothesi quòd Deus plenè & perfectè sibi satisfieri voluerit, necessariæ fuerunt; nec ulla pura creatura, etiam gratiis ornata, id præstare potuit.

Probatur 1. ex auctoritate tum Scripturæ, tum SS. Patrum. Hebr. 9. & 10. Apostolus multis argumentis demonstrat solo Christi sanguine peccata expiari potuisse: Id ipsum sancti Patres colligunt ex his verbis Psalmi 48. *Frater non redimit, redimet homo; non dabit Deo placationem suam.* In quem locum sic scribit S. Basilii: *Ne igitur fratrem quæras, qui redimat; sed eum, qui naturam tuam superet; neque merum hominem, sed hominem Deum Jesum Christum, qui & solus potest dare propitiationem Deo pro omnibus nobis.* Ita S. Ambrosius expositione in eundem Psalmum, & lib. 4. in Lucam; & S. Paulinus epistola quarta ad Severum. *Ideo dictum puto, inquit, frater non redimit, redimet homo; quia quos frater non redimeret, hoc est Propbeta seu Legislator, qui homo tantum erat; hos homo redemit, quia & Deus erat; hujusmodi enim homo solus prævalere potuit adversus sententiam mortis.* Hinc S. Leo ferm. 1. de Nativitate ait: *Nisi esset verus Deus, non afferret remedium: si non esset homo, non afferret exemplum.*

Probatur 2. ratione. Ad perfectam satisfactionem tria requiruntur: 1. ut fiat ex propriis: 2. ex indebitis: 3. ut sit injuriæ æquivalens. Atqui nulla pura creatura, etiam gratiarum donis instructa, talem satisfactionem Deo offerre potest: Ergo.

Major evidens est: namque 1. si quis ex bonis creditoris satisfaceret, nihil ei daret: 2. Si ex bonis aliunde debitis, puta ex locatione,
solve-

solveret pro mutuo accepto, debitor remaneret.
3. Si cùm deberet centum, quinquaginta dumtaxat exhiberet, non esset adæquata solutio.

Minor probatur quoad singulas ejus partes:

1. Quidquid creatura habet & est, Dei est. *In ipso enim vivimus, & movemur, & sumus*, Act. 17. *Non quòd sufficientes sumus cogitare aliquid à nobis quasi ex nobis; sed sufficientia nostra ex Deo est*, 2. ad Corinth. 3. *Deus est enim qui operatur in vobis & velle & perficere*, Philip. 2. Ergo creatura nihil offerre potest, quod non sit Dei proprium: Ergo & debitum; quia quod ad te pertinet, id tibi debetur.

Nec dicas hominem, utpotè liberum, habere dominium suarum actionum, cùm libertas sit facultas disponendi de suis actionibus. Unde Theologi nonnulli supererogationis vocant, ex eo quòd Deo ultra debitum offerantur. Namque & libertas nostra & usus ejus Dei sunt, & in ejus obsequium converti debent. Opera autem supererogationis dicuntur ea, quæ sine peccato omitti possent, cùm nulla lege præcipiantur. Sed in hypothesi, quod fiant, sicut à Deo exeunt, sic ad illum dirigi debent, nec sine Dei injuria quis supererogaret pauperibus propter mundanam gloriam. Itaque homo, non Dei respectu, sed creaturarum dumtaxat, dominus est tum actionum, quas liberè elicit, tum fundi, quem legitimè possidet.

Supereſt probanda tertia minoris pars, nempe creaturam non posse satisfactionem offerre, quæ Dei injuriæ æquivalet. Probatur autem efficacissime. Ut satisfactio sit plena & adæquata, neces-

necesse est, ut tantum honoris personæ læsæ re-
pendatur, quantum per injuriam fuit ablatum.
Atqui nulla creatura tantum honoris Deo repen-
dere potest, quantum per peccatum detraxit: Ergo.

Major patet ex sola terminorum explicatio-
ne. Enimverò justitia dicitur æquitas seu æqua-
litas, ex eo quòd æqualitatem servet aut repo-
nat, ubi jus proximi læsum est, minusque habet
alter, quàm habere debeat: unde & injustitia di-
citur inæqualitas. Cùm autem proximus injusta
pati possit vel in rebus ad se pertinentibus, puta
in bonis fortunæ & famæ; vel in propria per-
sona, nempe si secum indignè & cum honoris
dispendio agatur; duplex quoque distinguitur ju-
stitiæ actus; alter dicitur restitutio, qua æquatur
res, quæ redditur, cum re ablata, nulla ratione
habita personæ, sive quæ damnum intulit, sive
quæ damnum passa est; non enim refert Princeps-
ne sit, aut ignobilis, qui centum rapuit, tantun-
dem restituere debet, quia restitutio tota est in
rebus æquandis, nec comparat personas cum per-
sonis, sed rem cum re. Unde proinde est à quo
fiat, an à raptore & injusto detentore; an à pa-
rente ejus, aut amico, dummodo reponatur æqua-
litas, recipiatque proximus totum, quod suum
est.

Alter justitiæ actus dicitur satisfactio; qua re-
sarcitur injuria personæ illata, ut si quis vestem
alterius detraxerit & laceraverit cùm ejus perso-
næ grandi contumelia, satis non est reddere ju-
stum vestis pretium, quod fieri posse diximus per
patrem contumeliosi; sed insuper tantumdem
honoris reddendum est personæ læsæ; quan-
tum dehonestata est. Id autem ab ipsomet con-

tumelioſo præſtari debet; cùm enim ſuperbè in alium inſurrexerit, & injuſtè illum dejecerit, ſibi-que quodammodo ſubjecerit; juſtitia exigit, ut ipſemet reus per ſui dejectionem erigat, quem depreſſit, tantumque honoris rependat, quantum abſtulit. Unde ſatisfactio ſita non eſt in rebus, ſicut reſtitutio, ſed in actionibus, in quibus habenda eſt ratio perſonarum, & comparanda perſona nocens cum perſona læſa. Namque injuria creſcit pro dignitate perſonæ læſæ, & vilitate lædentis; quia majoris obſervantiæ & honoris dignus eſt princeps, quam perſona inferioris gradus, magiſque deprimitur à cive infimæ plebis, quàm à viro æqualis ſecum dignitatis: ſatisfactio contra decreſcit pro vilitate perſonæ ſatisfacientis & dignitate perſonæ læſæ; quia perſona ſatisfactionem ingreditur, quatenus per actionem ſatisfactoriam dejicitur ad erigendam perſonam, quæ per injuriam fuit depreſſa. Qualis autem poteſt eſſe dejectio perſonæ infimi gradus, & qualis honos ex ea in Principem læſum reſluit? nullus fanè aut ferè nullus; cùm tamen injuria ſit graviffima. Hinc pœna talionis, quæ poteſt eſſe juſta inter perſonas ejuſdem dignitatis, erit iniqua, ſi reus & innocens ſint gradu diſpares: v. g. ſi Magiſtratus alium Magiſtratum alapa percuſſit, juſtitia ſervabitur, ſi ſimiliter reperiatur: at bajulus, qui ſic in Magiſtratum exarſiſſet, non alapa, ſed ſuſpendio plectendus eſt, ut ipſemet Ariſtoteles advertit. Ex hac autem elucidatione

Minor, nempe quòd nulla creatura tantum honoris Deo rependere poteſt, quantum peccando detraxit, evidenter ſequitur. Namque ex dictis

dictis crescit offensa pro vilitate personæ nocentis, & dignitate personæ injuria affectæ: contra verò proportionem eadem decrescit satisfactio, adeò ut injuria sit summa, & satisfactio minima, si persona læsa sit in supremo gradu, & persona satisfaciens in infimo. Atqui est distantia infinita inter majestatem divinam & creaturam qualibet gratia ornatam. *Omnes gentes quasi non sint, sic sunt coram eo, & quasi nihilum & inane reputatæ sunt ei.* Isa. 40. v. 17. Ergo creatura non potest exhibere Deo satisfactionem injuriæ æqualem.

Hæc ratio efficaciter concludit, 1. pro peccato lethali, sive malitia ejus sit intrinsecè infinita in ratione offensæ, juxta communioem Theolorum sententiam; sive sit intrinsecè finita, & extrinsecè tantum infinita, ut nonnulli Theologi opinantur. 2. pro peccato veniali, quod non videtur offensa intrinsecè infinita: quia etsi injuria à plebejo Regi terreno irrogata sit finita, cum inter utrumque non sit distantia nisi finita, nihilominus vilior est reus læsæ majestatis, quàm ut condignè satisfacere possit: Ergo à fortiori.

Nec dicas inde sequi peccatum veniale mereri pœnam infinitam, cum expiari non possit condigna justæ satisfactione. Sicut enim plebejus, qui in regem peccavit, non est infinita pœna puniendus, quamvis pro læsa majestate facere satis non possit; sic nec justus, qui venialiter in Deum peccavit; sed uterque poterit satis pati, & pœna ex gravitate injuriæ erit definienda. Sed de his ex professo in Tractatu de peccatis.

Dices: Tanta est bonitas in actu charitatis, quanta malitia in omissione ejusdem actus præcepti,

cepti, cum utrumque se habeat ut forma & privatio: nam vita v. g. æquè bona est, ac mors mala. Atqui pura creatura auxilio gratiæ potest elicere, & offerre Deo actum charitatis: Ergo condignum offerre potest pro peccato.

Distinguo majorem: tanta est bonitas, &c. quanta malitia, &c. si physicè spectentur, hoc est actus charitatis secundum entitatem & valorem intrinsecum; omissio verò ut mera privatio actus debiti, Concedo: si spectentur moraliter, scilicet actus charitatis secundum valorem extrinsecum, & à persona derivatum: omissio verò, quatenus est offensæ Dei à creatura proficiens, nego minorem. Concessa minore, distingo similiter consequens, Ergo creatura condignum potest offerre pro peccato, si comparetur res cum re, ut sit in commutationibus & restitutione, Concedo: si comparetur persona satisfaciens cum persona læsa, habeaturque offensæ ratio, ut debet in satisfactionibus, Nego consequens: namque ex dictis, qui Regi restitueret justum pretium coronæ per injuriam ablata, non condignè satisfaceret.

Instabis: Justus absolutè potest alteri de condigno mereri gratiam sanctificantem: Ergo & pro illo satisfacere, cum gratia sanctificans per se sit peccati expulsiva, & amicitia Dei conciliativa.

Transeat antecedens; cum tamen negari possit & debeat; siquidem peccator indignus est gratia sanctificante, quamdiu offensæ Dei expiata non fuerit: solus autem Christus illam expiare potuit. Sed admissio antecedente neganda est consequentia; quia in hypothesi falsa, quòd justus

stus gratiam sanctificantem peccatori mereretur, inde concludi non posset ipsum pro peccato satisfacere, sed Deum dumtaxat condonare offensam, quemadmodum si vir præpotens propter egregium aliquod facinus, torquem à Rege pro filio læsæ majestatis reo & pœnitente obtineret, non censeretur, Regi satis fecisse, sed benevolentiam Regis & gratiam filio conciliasse.

CAPUT XIII.

Utrum Christi satisfactio offensæ Dei fuerit æquivalens?

R. Satisfactio Christi non solum fuit sufficiens, sed & superabundans.

Probatur 1. ex Scriptura. Hebr. 10. v. 14.

Una oblatione consummavit in sempiternum sanctificatos, Rom. 5. v. 20. *Ubi autem abundavit delictum, superabundavit gratia.*

Probatur 2. ex Patribus: ex S. Cyrillo Jerosolymitano Catech. 3. *Non tantum nos peccavimus, quantum ille justè egit.* Ex S. Chrysoft. hom. 10. in ep. ad Rom. *Multò plura bis, quæ debebamus, rependit Christus; atque adeo tantò plura, quantò mare immensum ad pusillam aquæ guttam collatum esse possit.* Ex S. Anselmo libr. de conceptu virginali c. 22. *Quoniam nullus potest reddere (Deo) quantum debet, solus Christus reddidit pro omnibus, qui salvantur, plusquam debent.* Ita S. Thomas q. 48. art. 2. & omnes Theologi.

Probatur 3. ratione. Christus in satisfactionem seipsum Patri obtulit, Phil. 2. *Cum in forma*

Dei esset . . . semetipsum exinanivit . . . & . . . humiliavit, factus obediens usque ad mortem: Atqui satisfactio Christi pro offensis nostris se offerentis & humiliantis usque ad mortem, est sufficiens & superabundans: Ergo.

Dices 1. Non potest dari infinito majus: atqui peccatum est offensa infinita: Ergo non potest dari satisfactio Dei offensa major.

Distinguo majorem. Non potest dari infinito majus in eodem genere infiniti; v. g. linea altera infinita major, calor intensior calore infinito, Concedo: in alio genere infiniti, Nego majorem: nam superficies infinita esset major linea infinita, infinitè enim extenderetur in longum & latum, cum linea in longum dumtaxat protenderetur. Item sapientia infinita esset quid majus & perfectius calore infinito. Porro persona divina est quid substantialiter infinitum in omni genere perfectionis, cum offensa Dei sit tantum derivativè infinita, scilicet à dignitate Dei infinita, & à vilitate creaturæ, ex quibus proficiscitur.

Dices 2. Christus satisfecit per actiones ab humana natura elicitas. Atqui actiones illæ finitæ sunt; cum sint aliquid creatum: Ergo.

Respondeo 1. distinguendo majorem: Per actiones humanas simul & per propriam personam Concedo: per actiones humanas dumtaxat & nudè spectatas, Nego majorem; nam seipsum obtulit, humiliavit & exinanivit.

Respondeo 2. distinguendo minorem. Actiones humanæ Christi sunt aliquid finitum, si secundum entitatem & valorem internum, vel etiam à gratia sanctificante derivatum spectantur, Concedo:

cedo: si secundum valorem extrinsecum, & persona Verbi derivatum æstimentur, Nego minorem. Equidem actiones Christi secundum entitatem sunt bonitatis & valoris finiti, cum sint quid creatum. Hauriunt etiam aliquem valorem extrinsecum à gratia sanctificante, quemamodum actus fidei aut alterius virtutis; licet sit ejusdem speciei in justo & peccatore, parisque bonitatis & valoris intrinseci; tamen pluris apud Deum æstimatur in justo, quàm in peccatore, quia ex gratia sanctificante, quæ justo inest, derivatur aliquis valor extrinsecus in actiones supernaturaliter bonas. Sed cum gratia sanctificans quantumcumque perfecta in Christo finita sit, non potest ex ea nisi valor finitus emanare. At persona Christi infinita est in omni genere perfectionis: Ergo ex ea derivatur valor infinitus in actiones à natura humana elicitas, cum ipsius sint, dicanturque theandricæ, hoc est divinæ simul & humanæ. Unde neganda est consequentia; Christus enim satisfecit per aliquid infinitum, tum quia seipsum obtulit, tum quia actiones liberæ, per quas seipsum obtulit, infiniti sunt valoris ab ejus persona derivati.

Instabis: Valor ille derivatus est quid creatum, Ergo & finitum.

Nego antecedens: neque enim est creatus, neque increatus; quia non est quid physicum, sed morale, necessario resultans ex persona, cujus sunt actiones.

Dices 3. persona divina nec demitti, nec subjici potest: Ergo satisfactionem non est ingressa.

Distinguo antecedens: demitti non potest ratione naturæ divinæ, Concedo: ratione naturæ

humanæ assumptæ, Nego antecedens; actiones enim ideo dicuntur suppositorum, quia persona ipsa per suam naturam, potentiasque naturales agit & patitur. Hinc Filius Dei (Phil. 2.) humiliavit semetipsum, factus est obediens, mortuus est & crucifixus, scilicet ratione naturæ assumptæ.

Dices 4. Sponsor non sufficienter solvit, nisi debitorem ita debito exoneret, ut creditor nihil ab eo repetendum habeat: Atqui Christus non ita exemit homines; namque 1. obnoxii sunt morti, & aliis hujus vitæ miseriis, quæ sunt pœna peccati. 2. Qui sunt Christi, carnem suam pœnitentiæ exercitiis crucifigere debent, Gal. 5. Hinc ipse Dominus & Magister crucem sequentibus se imposuit, Luc. 9. v. 23. *Si quis vult venire post me . . . tollat crucem suam quotidie.* Qui huic debito in præsentī vita non satisfecerint, in futura punientur, sive in inferno, sive in purgatorio. Ergo Christus, inquit Socinianus, pro nobis nullatenus satisfecit, nedum plenè; sed ex 1. Petri cap. 2. *Pro nobis passus est, vobis relinquens exemplum, ut sequamini vestigia ejus.* Calvinistæ contra, ut confiteantur perfectam Christi satisfactionem, concludunt ableganda opera satisfactoria, utpote satisfactioni Christi detrahentia.

Distinguo majorem. Si debitum sit reale, & solutio fiat per modum restitutionis, in qua comparatur res cum re, pretium cum damno illato, nulla ratione habita personarum, Concedo: si debitum sit personale, & solutio fiat per modum satisfactionis, Nego majorem. Itaque in restitutione debiti realis sine culpa debitoris contracti, V. g. in solutione census annui, si
spon-

sponsor totum solvat, etiam invito debitore, creditor nihil habet repetendum; quia, ut jam diximus, justitia id unum exigit, ut in rebus ponatur æqualitas. Sed in satisfactione, quæ tendit ad reconciliandum reum cum persona læsa, duo requiruntur: primum, ut fiat adæquata injuriæ compensatio, tantumque honoris personæ læsæ rependatur, quantum per injuriam fuit depressa, & illud sponsor per se solum præstare potest. Secundum, ut reus fruatur beneficio compensationis, reconcilietur personæ læsæ, redeatque in ejus amicitiam; quod fieri nequit, nisi reus cum sponsore concordet, crimen retractet, de eo doleat, spemque creditori injiciat, fore, ut illum deinceps honorificè observet. Alioquin si reus à sponsore dissentiat, personam læsam negligat, nec facti eum pœniteat, quantacunque fuerit abundans & superabundans sponsoris satisfactio, nullum ex ea fructum percipiet. Et ita corrui Socinianorum & Calvinistarum obiectio. Licet enim Christus sponsor noster solverit extra debitum, nihilque addi possit satisfactionis, quam pro nobis obtulit infinitam, verè tamen scripsit Apostolus Col. 1. *Adimpleo ea, quæ defunt, passionum Christi*, deerat enim, & etiamnum in plurimis deest effectus tam plenæ satisfactionis, nempe reconciliatio hominum & sanctificatio, cujus minister erat Apostolus, & ad quam requiritur, ut homines per pœnitentiam ad Deum revertantur, hoc sentiant in se quod in Christo Jesu, Philipp. 2. compatiantur ut & glorificentur, Rom. 8. absurdum enim est & nimis proprium reum in deliciis vivere, sponsore ejus gratia usque ad contumeliosam mortem exinanito.

nito. *Prædestinavit* (nos) *conformes fieri imaginis Filii sui*, ait Apostolus Rom. 8. Et Discipulus, quem diligebat Jesus, 1. epist. cap. 2. *qui dicit se in ipso manere, debet, sicut ille ambulavit, & ipse ambulare.* Propterea mors & aliæ hujus vitæ miseriæ, quæ primi hominis peccatum secutæ sunt, manent in renatis, non ut reatus pœnæ, qui per baptismum deletus est, sed ut pœnitentiæ & virtutis exercitium. Hanc crucem nobis impositam sponzor non exemplo suo duntaxat, sed & gratia sua interiore inunxit ut eam levius & alacrius feramus. Quin & hunc patiendi affectum membris suis inspirat caput nostrum effectus, ut per quandam idiomatum communicationem ipse in nobis patiatur (quemadmodum ait Actor. 9. *Saule, Saule, quid me persequeris?* caput namque hic pro membris conculcatis loquitur, ex S. Augustino) totumque corpus, quod est Ecclesia, tanquam hostiam sanctam, & pœnitentiæ afflictationibus mactatam Deo offerat, ut sit integrum holocaustum; atque eo sensu Apostolus dicere etiam potuit, se adimplere ea, quæ deerant passionum Christi, quatenus singula ejus membra cum ipso & per ipsum pati debent.

Neque propterea credimus nos addere quidquam satisfactioni Christi, quemadmodum Novatores impiè calumniantur; quin imò ejus meritum & efficaciam in his operari agnoscimus; tanta enim fuit, ut non solum debita nostra expunxerit; sed meruerit insuper, ut Deus quasi nostri indigus averfos præveniret, suavitæ sua deliniret, & ad omne opus bonum aptaret in laudem gloriæ gratiæ suæ, ut ait Apostolus
Ephes

Ephes. 1. Porrò si æterna damnatio sine injurià satisfactionis Christi manet eos, qui contra Deum tam misericorditer exhortantem obduruerint, quidni & temporalis pœna purgatorii alios, qui ex toto corde non acquieverint.

CAPUT XIV.

Utrum Satisfactio Christi fuerit ex justitia ?

Theologi circa hanc quæstionem, quæ ad fidem non pertinet, variè opinantur. Alii negant fuisse ex justitia ; quia, inquiunt, non est justitia sui ipsius ad seipsum, nec filii ad patrem, nec vicissim patris ad filium, cum pater & filius quasi una persona habeantur : justitia enim necessariò intercedit inter personas distinctas, quibus competant jura distincta. Atqui satisfactio Christi non est ad alterum, sed ad seipsum ; satisfecit enim Deo, qui, cum sit unus in tribus personis subsistens, sibi ipsi satisfecit : est quidem persona à Patre & Spiritu Sancto distincta ; sed præterquam quod persona Filii non habet jus speciale & distinctum, non minùs læsa est peccatis hominum, quàm persona Patris & Spiritus Sancti : Ergo quomodolibet spectetur Christus, sibi ipsi satisfecit. Alii censent satisfactionem Christi ex justitia quidem profluxisse, sed minùs accurata. Alii denique utrumque affirmant, docentque satisfactionem Christi fuisse ex justitia, eaque accurata ; cum quibus ad propositam quæstionem

Respondeo primò : Satisfactio Christi fuit ex justitia. Probatur 1. ex Scriptura, Rom. 3. v. 25.

qui

quem proposuit (Christum) propitiationem Deus . . . ad ostensionem justitiæ suæ. 2. ex Patribus : ex S. August lib. 3. de libero arbitrio cap. 10. Christus diabolum subjugavit, non violento dominatu, *sed lege justitiæ.* Ex S. Leone, *ad dominationem diaboli destruendam magis usus est (Deus) justitia rationis, quàm potentia virtutis.* 3. ratione ; quia solius est justitiæ jus violatum resarcire ad æqualitatem. Atqui Christus satisfactione sua id præstitit : ergo.

Respondeo secundò : satisfactio Christi fuit juxta strictos justitiæ apices. Probatur, actus justitiæ strictè sumptæ debet esse 1. ad alterum ; 2. ex propriis bonis ; 3. ex aliàs indebitis ; 4. æquivalens offensæ. Atqui hæ quatuor conditiones in satisfactione Christi concurrunt : ergo.

Minor probatur quoad tres priores partes ; nam quartam cap. præcedenti demonstravimus.

Primò, satisfactio Christi fuit ad alterum ; quia ibi est vera alteritas ad rationem justitiæ requisita, ubi persona libera, licèt realiter una, virtualiter tamen est duplex. Atqui in Christo, licèt non sit realiter alter, & alter, ut fingeat Nestorius, sed una realiter persona libera, tamen & virtualiter duplex : ergo.

Major explicatur duplici exemplo. 1. Sint duo rami diversæ speciei unico trunco inserti, erit unica realiter arbor, & duplex virtualiter ; quia duo illi rami præstabunt, quod duæ arbores realiter distinctæ. 2. Supponamus duas naturas creatas liberas substantialiter uniri : ex illa unionem exurget una realiter persona, ut capite primo docuimus, quæ erit virtualiter duplex, & capax
jurium

jurium & dominiorum distinctorum propter naturas liberas, ex quibus componitur; adeò ut, si una alteram deliberatè lædat, contra justitiam peccet, & damnum illatum ex eadem virtute refarcire teneatur. Namque ad exercendam justitiam eatenus requiritur alteritas, quatenus necesse est æquare jus unius cum altero: unde si sit locus duplici juri, erit & æqualitati, in qua consistit justitia. Porro in nostra hypothese quælibet natura jus habet, ut ab altera servetur indemnis, & si læsa fuerit, injuria reparetur.

Cùm ergo in Christo, qui est unica realiter persona, sint duæ naturæ liberæ, fundamentum quoque debet agnosci duplicis juris & dominii: libertas enim est facultas disponendi de suis actibus.

Confirmatur. Hæc virtualis personæ distinctio sufficit, ut Christus quatenus homo verè obediens fuerit non solum Patri, sed & sibi ipsi & Spiritui Sancto, ab iis præceptum acceperit: Ergo ut & sibi, quatenus Deus est, satisfecerit.

Secundò, satisfactio Christi fuit ex propriis; quia satisfecit seipsum offerendo: nihil autem tam nostrum est, quàm nos ipsi, si non simus sub dominio alterius.

Tertiò, fuit ex indebitis; quia persona Christi, utpotè divina & independens, immunis est ab omni debito.

Dices 1. Minor est distinctio inter Christum hominem & Deum, quàm inter patrem & filium, inter creaturam & Deum. Atqui non satis distinguuntur pater & filius, Deus & creaturà, ut inter eos actus justitiæ exerceri possit: Ergo.

Nego

Nego minorem : namque pater verè est injustus, si bona filii propria dilapidet, & ex justitia restituere tenetur : similiter & filius si bona paterna furripiat. Deus quoque sub dominio suo quidpiam ita retinere posset, ut homo sine injustitia manus in illud non injiceret. Sed de his plura in tractatu de justitia & jure tom. 4.

Dices 1. Tam humana Christi voluntas, quàm ea, de quibus ipsa disponit, sunt sub Dei dominio. Atqui Christus non satisfecit, nisi per ea, de quibus humana voluntas disponebat ; nam si assumpsisset naturam ratione destitutam, nec mereri nec satisfacere potuisset : Ergo non satisfecit ex propriis.

Respondeo voluntatem propriè non disponere, sed ipsam personam per voluntatem rationalem, tanquam per id, quo : persona autem Christi sub nullius est dominio : nec pretium, quod obtulit in satisfactionem, sunt actiones humanæ secundum entitatem & valorem internum spectatæ, ut diximus ; sed ipse valor personalis, qui est proprius Verbi.

Instabis 1. Ex Symbolo vulgò sancti Athanasii, Dominus Pater, Dominus Filius, & Dominus Spiritus Sanctus ; & tamen non tres Domini, sed unus est Dominus : Ergo Filius non habet quid proprium, à quo Dominus dici possit excludendo Patrem & Spiritum Sanctum.

Distinguo antecedens : unus Dominus, si absolutè spectentur Pater & Filius & Spiritus Sanctus, Concedo ; ut sic enim tres personæ dicuntur unus Dominus & unus Omnipotens
per

per ordinem ad creaturas, quatenus subjacent omnipotentiae divinae, quae est tribus personis communis; Unus Dominus, si relativè spectentur, & secundum proprietates personales, Nego antecedens: illae enim proprietates non sunt communes tribus personis. Equidem in sanctissima Trinitate non constituunt tria dominia, cum non operentur nisi per voluntatem divinam tribus personis communem: sed in Christo persona Filii per voluntatem humanam, quae ipsius est, de se ipsa disponit.

Instabis 2. Christus ex dictis est aliquod compositum à Deo pendens, tum in fieri, tum in conservari. Ergo totus Christus est sub Dei dominio.

Distinguo consequens: est sub Dei dominio praesuppositivè & indirectè, Concedo: formaliter & directè, subdistinguo: ratione naturae humanae & unionis, Concedo: ratione personalitatis, Nego consequens. Itaque meritum Christi praesupponit quidem unionem hypostaticam, quae à tota Trinitate est, & conservatur, quemadmodum dignitas, quam puella nubendo Regi consequitur, praesupponit matrimonii Sacramentum per Sacerdotem confectum. Sed sicut illa dignitas est Reginae propria, non verò Sacerdotis: sic meritum Christi est ejus personae proprium.

Dices 3. Christi satisfactio fuit Deo debita titulo obedientiae, religionis, & charitatis: Ergo Christus non satisfecit ex indebitis.

Probatur antecedens 1. Christus ex dictis praecceptum à Patre accepit redimendi genus humanum. 2. sicut Deus infinitum cultum meretur, sic

sic Christus, quantum potuit, Deum colere & diligere debuit: Ergo honor, quem pro injuria Dei reparanda exhibuit, erat Deo debitus titulo obedientiæ, religionis, & charitatis.

Ad hanc gravissimam difficultatem alii aliter respondent. Suarezius respondet, solutionem esse ex justitia strictè sumpta: etiamsi aliunde sit debita ex alio quàm justitiæ titulo: v. g. superior præcipit inferiori, ut mutuum ante terminum solvat mutuanti indigenti: hæc solutio debita est ex præcepto obedientiæ, gratitudinis, & charitatis, & nihilominus est verus justitiæ actus; quia debitum aliarum virtutum non impedit, quominus reponatur æqualitas: impediret autem, si aliud justitiæ debitum occurreret, puta ex titulo emptionis & depositi; & mutuarius redderet duntaxat pecuniam, quam mutuo acceperat; mutuans enim minùs acciperet, quàm ipsi deberetur. Nonnulli Thomistæ observant personam Verbi esse infinitam in omni genere perfectionis: unde concludunt Verbum incarnatum, cum sit multipliciter infinitum, potuisse pro nobis satisfacere ex indebitis; quia quod in eo infinitum est, non fuit exhaustum aut absorptum per exhibitionem honoris infiniti ex motivo religionis. Alii melius respondent actiones Christi & passionem secundum entitatem spectatas esse quidem debitas titulo obedientiæ, religionis & charitatis: non verò ejus personam, quæ, cum sit divina, nulli debito potest esse obnoxia: hanc autem pro nobis obtulit: Ergo ex bonis propriis & indebitis pro peccatis nostris satisfecit.

CAPUT XV.

Utrum Christus pro omnibus & singulis hominibus sit mortuus?

Quæstio non est utrum mors Christi Domini fuerit sufficiens ad redimendos omnes & singulos homines; cum enim ex dictis satisfactio fuerit superabundans, nihil dubii superesse potest, quin fuerit sufficiens non solum ad singulos homines, sed & ad omnes dæmones liberandos. Sed difficultas est, an morte sua voluerit omnes & singulos homines redimere, an aliquos dumtaxat, nulla aliorum sicut nec dæmonum ratione habita? Hæc observatio imprimis necessaria est propter cavillationes & subterfugia quorundam, qui ore aperto negare non audent Christum mortuum esse pro omnibus & singulis hominibus, sed dicunt mortuum esse sufficienter, ita ut adverbium *sufficienter*, cadat non in Christi voluntatem, sed in mortem, quæ cum sit meriti infiniti, sufficiens est non solum pro omnibus & singulis hominibus, sed & pro dæmonibus; atque hac sua ambigua responsione circumveniunt incautos. Sed ne superfit quidquam ambigui

Observandum, in illa Christi voluntate duo intelligenda, nempe & pretium ex animo solutum pro singulis redimendis, & præparationem mediorum, saltem eorum, sine quibus nullatenus possent frui redemptionis beneficio. Siquidem Princeps, qui pactam cum hoste pecuniam ad redimendos quotquot ex subditis detinet captivos, integram numeravit, non censetur propterea velle singulos liberare, si imbellem unum

expunxit è numero eorum, quos virtute solutionis expletæ misit repetendos.

Observandum præterea hîc duplicem in Christo distinguendam voluntatem, alteram absolutam, alteram conditionatam: quemadmodum ubi de decretis divinis tractatu de Attributis, dicimus Deum velle omnes homines salvos fieri, alios voluntate antecedente, quæ propter defectum causarum secundarum caret effectu; aliòs, nimirum prædestinatos, voluntate absoluta & consequente, quæ semper impletur illibata hominum libertate. Enimverò perfecta fuit Christi cum Patre consensio, *quæ placita sunt ei, facio semper*, ait Joan. 8. v. 29. & rationem affert cap. 6. *quia*, inquit, *descendi de cælo, non ut faciam voluntatem meam, sed voluntatem ejus, qui misit me.* Ergo Christus, qui scivit voluntate Deum velle omnes homines salvos fieri, eadem voluit offerre meritum sanguinis sui pro omnium salute, ac proinde quæstio proposita hoc uno definitur syllogismo: Christus pro illorum salute mortuus est, quos Deus vult salvos fieri per meritum mortis ejus. Atqui Deus vult omnes & singulos homines salvos fieri, saltem voluntate antecedente, per meritum mortis Christi: Ergo Christus pro omnium & singulorum salute revera mortuus est.

Verùm, quominus nostra hîc sistat disputatio, obstant varii & oppositi errores, quibus generalis alia in Deo & in Christo voluntas humanæ salutis in alienos sensus detorquetur, quosque ad plenam propositæ quæstionis elucidationem, refellere necesse est.

§. I.

Refelluntur errores.

Primò itaque Semipelagiani, qui & Massilienses, ex eo quòd circa Massiliam in Galliis consistèrent, statuerunt Deum sic velle homines salvos fieri, & propitiationem in sacramento sanguinis Christi singulis proposuisse, ut non præveniat, sed expectet eorum voluntates, exaudiat rogantes adjuvetque conantes. Fatebantur quidem humanas voluntates à Deo præveniri eo ferè modo, quo pater præparat filii voluntatem suis consiliis, monitis & exhortationibus: admittebant enim Evangelii prædicationem præire debere, nec prorsus rejiciebant divinas suasionem etiam interiores, sed negabant Deum tribuere ipsum velle, seu credulitatis affectum & voluntatis conatum, vel ad opus perficiendum, vel saltem ad fidem concipiendam, idque duabus de causis. Prima, quia Catholicorum doctrina, quam tuebatur S. Augustinus, ipsis videbatur tollere diligentiam & industriam, fovere inertiam, cum obvia cuivis protervo esset contra objurgationes excusatio, nimirum se à Deo non accepisse obediendi voluntatem. Secunda, quia esset in Deo vitiosa personarum acceptio, si ex duobus, qui sunt meritis aut demeritis pares, unum assumeret, alterum dereliqueret; cum contra consentaneum sit divinæ ejus Sapientiæ & bonitati, si deprecantem exaudiat, conantem & quod in se est facientem gratia sua adjuvet, negligentem verò spernat.

Ut autem hanc fuisse Semipelagianorum mentem demonstretur, adversus Jansenium Iprensensem

fem & ejus patronos, qui (ut negarunt ullam esse Christi veram gratiam, cui aliquando resistatur; atque adeo Christum esse mortuum pro eis, qui fidem non suscipiunt vel qui in suscepta fide non perseverant;) contendebant Semipelagianos admisisse necessitatem gratiæ prævenientis, qualis erat in statu innocentiae, hoc est sufficientis; operæ pretium est Semipelagianos in tres classes distribuere.

In prima classe occurrunt, qui ad bene operandum, cum Juliano, gratiæ necessitatem adversus Pelagium asserabant; sed eam negabant ad velle credere, & ad velle bene agere, seu ad credulitatis & boni operis affectum. *In tantum à Pelagianis semitis non declinant*, inquit S. Prosper epistola ad S. Augustinum, in qua describit Semipelagianorum errores, *ut cum ad confitendam eam Christi gratiam, quæ omnia præveniat merita humana, cogantur, ne si meritis reddatur, frustra gratia nominetur, ad conditionem (id est naturalem constitutionem) hanc velint uniuscuiusque hominis pertinere, in qua cum nihil prius merentem, quia nec existentem liberi arbitrii & rationalem gratia Creatoris instituat, ut per discretionem boni ac mali, & ad cognitionem Dei, & ad obedientiam mandatorum ejus possit suam dirigere voluntatem, atque ad hanc gratiam, qua in Christo renascimur, pervenire, per naturalem scilicet facultatem, petendo, querendo, pulsando: ut ideo accipiat, ideo inveniat, ideo introeat, quia bono naturæ bene usus, ad istam salvantem gratiam initialis (id est naturalis) gratiæ operuerit pervenire.* Eadem refert Hilarius epistola ad eundem Augustinum. Cæterum, inquit, ad nullum opus vel incipiendum, nedum perficiendum, quatenus sibi sufficere posse consentiunt unde
con-

consequens putant, exhibendam ab eo fidem, cujus naturæ id voluntate conditoris concessum est; & nullam ita depravatam vel extinctam putant, ut non debeat vel possit velle sanari, propter quod vel sanetur quis à sua, vel si noluerit, cum sua ægritudine puniatur. Obiicientibus autem Catholicis gratiam non fore gratiam, cum merito præcedentis voluntatis retribueretur, respondebant ex Hilario ibidem; nec negari gratiam, si præcedere dicatur talis voluntas, quæ tantum medicum quærat, non autem quidquam ipsa jam valeat. S. Augustinus respondens Prospero & Hilario, libro de prædestinatione Sanctorum, sic scribit, & confutat hunc errorem cap. 1. *Prævenierunt etiam, ut præveniri voluntates hominum (non ad credendum, sed ad bene operandum) Dei gratia fateantur, atque ad nullum opus bonum vel incipiendum, vel perficiendum sibi quenquam sufficere posse.*

In secunda classe numerantur, qui & bonum opus, & ipsum operis affectum ac orationem gratiæ tribuebant; sed initium fidei, & credulitatis affectum naturæ viribus exurgere, causamque esse, cur Deus aliquos, rejectis negligentibus, ad Christum, ac demum ad æternæ salutis portum deducat. *Sed nunc eis respondendum esse video, inquit S. Augustinus lib. de prædestinatione Sanctorum cap. 2. qui divina testimonia ad hoc dicunt valere, ut noverimus ex nobis quidem nos habere ipsam fidem, sed incrementum ejus esse ex Deo; tanquam fides non ab ipso donetur nobis, sed ab ipso tantum augeatur in nobis, eo merito, quo cæpit à nobis. Non ergo receditur ab ea sententia, quam Pelagius ipse in Episcopali judicio Palæstinæ damnare compulsus est, gratiam Dei secundum merita nostra dari.* Porro Pelagius

in istis meritis præcedentibus nullam gratiam nisi naturalis conditionis agnoscebat; nam si agnovisset, ab Ecclesia non fuisset excisus, ut expressis verbis testatur sanctus Augustinus libro de gratia Christi cap. 47. *Si ergo consenserit nobis non solum possibilitatem in homine, sed ipsam quoque voluntatem, & actionem adjuvari divinitus, & sic adjuvari, ut sine illo adjutorio nihil bene velimus & agamus, eamque esse gratiam Dei per ipsum Christum Dominum nostrum, nihil de adjutorio gratiæ inter nos, ut arbitror, controversia relinquetur.*

Tertiam classem constituit Cassianus vir magni nominis, & quondam S. Joannis Chrysostomi auditor. Hic enim collationum collatione decima tertia scripsit, gratiam initium fidei aliquando præcedere, aliquando verò subsequi; ac proinde negavit gratiam esse necessariam ad concipiendum credulitatis affectum, unde S. Prosper sic eum insectatur cap. 4. libri, quem contra ipsum scripsit sub nomine Collatoris: *Tantam circa universos homines admittit Collator bonitatem esse Creatoris, ut alii ab eo, quia sponte veniunt, suscipiantur laudati; alii & quia resistunt, attrahantur inviti, atque adeo volentium susceptor, nolentium verò salvator sit. Et cum pars Ecclesiæ ex gratia, pars autem ex libero justificetur arbitrio, gloriosiores sint quos natura pro-
vexerit, quam quos gratia liberaverit.* Nonnulli tamen existimant hunc errorem non Cassiano, sed Abbati Cheremoni esse ascribendum; cujus placita Cassianus simpliciter refert, sicut & Paphnutii collat. tertia, in qua ille Abbas necessitatem gratiæ prævenientis asserit; quod indicium esse potest Cassianum non suam, sed aliorum promere sententiam, ut in præfatione ejusdem libri ipse testa-

testatur. Vix tamen excusandus est, quod Lectorem non moneat, ubi cavendus est error, & venenum indiscriminatim cum alimentis sanis subministret. Utrum verò Gennadius erga S. Augustinum & ejus discipulos minùs propensus inter Semipelagianos numerandus sit, non potest certo colligi ex opere de dogmatibus Ecclesiasticis; tum quia non omninò certum est, cujus sit opus illud; tum quia nunc habetur interpolatum & minimè sanum; in eo quippe leguntur canones Concilii Arausicani secundi, quod post mortem Gennadii celebratum est, & caput, quod Adrianus laudat numero quadragesimo in epistola ad Carolum Magnum, nunc septuagesimus tertius existit.

Omnes ergo Semipelagiani negarunt necessitatem gratiæ saltem ad initium fidei; docueruntque Deum ita velle omnes homines salvos fieri, & propitiationem in Sacramento Sanguinis Christi sic proposuisse, ut humanas voluntates Evangelii prædicatione vocatas expectet, paratus suscipere venientes & adjuvare conantes.

Refellitur hic error. 1. ex Scriptura Rom. 9. *Non volentis, neque currentis, sed misipientis est Dei.* Philip. 2. *Deus est enim qui operatur in nobis & velle & perficere.* Joan. 6. *Nemo potest venire ad me, nisi Pater, qui misit me, traxerit eum.* 2. Cor. 3. *Non quod sufficientes simus cogitare aliquid à nobis quasi ex nobis, sed sufficientia nostra ex Deo est.* 2. Ex Traditione Ecclesiæ, quæ hanc hæresim, ex quo apparuit, insectari non destitit, donec fuerit extincta. Prodiit autem occasione libri, quem sanctus Augustinus scripsit de correptione & gratia, in quo hæc & similia: *Subventum est infirmitati*

voluntatis humanæ, ut divina gratia indeclinabiliter & insuperabiliter ageretur, ita offenderunt animos Massiliensium, qui alioquin erant viri pietate & eruditione celebres & commendati, ut, cum prius meliora sentirent ex epistola S. Prosperi, novum errorem cuderint; novum, inquam, fateri enim coacti sunt se nihil in antiquis invenisse, quod posteriori suæ opinioni faveret ex eadem epistola. Nihil ergo ex pulvere subtilissimi erroris Semipelagianorum adhæsit antiquioribus Patribus, sive Græcis, sive Latinis, ut caluminatur Jansenius libro de hæresi Pelagiana cap. 4. Hunc errorem in Massiliensibus natum statim oppugnavit sanctus Augustinus libris de prædestinatione Sanctorum, & de dono perseverantiæ; & illo defuncto Cælestinus summus Pontifex epistola ad Episcopos Galliæ; S. Prosper sub S. Leone; Hormisdas Papa Epistola ad Episcopos Africæ, in qua commendat laudatos libros de prædestinatione & dono perseverantiæ; Sanctus Fulgentius, Concilium secundum Arausicanum sub Felice IV. anno 529. (cujus canones universalis Ecclesia adoptavit) Canon. 6. damnat eos, qui à semitis Pelagii vix recedebant. Si quis, ait, sine gratia Dei credentibus, volentibus, desiderantibus, petentibus, nobis misericordiam dicit conferri divinitus . . . & humilitati & obedientiæ humanæ subjungit gratiæ adjutorium, resistit Apostolo. Can. 5. confodit sententiam eorum, qui plurimum à Pelagio distabant: Si quis sicut augmentum ita etiam initium fidei, ipsumque credulitatis affectum, non per gratiæ donum, sed nobis naturaliter inesse dicit, Apostolicis dogmatibus adversarius reperitur. Et Can. 8. revincit Cassianum his verbis; Si quis alios misericordia,
alios

alios verò per liberum arbitrium ad gratiam posse venire contendit, à recta fide probatur alienus quod ipse Dominus probat; qui non aliquos, sed neminem ad se venire posse testatur. Tandem Concilium Tridentinum sess. 6. can. 3. sic definit: Si quis dixerit, sine præveniente Spiritus Sancti inspiratione atque ejus adjutorio hominem credere, sperare, diligere, aut pœnitere posse, sicut oportet, ut ei justificationis gratia conferatur, anathema sit.

Secundò extinctum Semipelagianorum errorem nostris temporibus nonnulli recentiores suscitaverunt, mutatis duntaxat quibusdam vocibus; docent enim facienti quod in se est viribus naturæ Deum obligari dare gratiam, non propter meritum illorum operum; sed ex pacto inter Christum fidejussorem nostrum, & Patrem inito.

Refellitur hic error iisdem momentis, quibus præcedens, cùm sit planè idem, sicut declaravit Clerus Gallicanus anno 1700. hac sua censura: *Hæ duæ propositiones, inquit, qua parte causam discernendi inter justos & non justos in opera merè naturalia referunt, Semipelagianismum instaurant mutatis tantum vocibus. Pactum autem; quod inter Deum & Christum asseritur, commentum est, temerarium, erroneum, nec solum tacente, sed etiam adversante Scriptura & Sanctorum Patrum Traditione prolatum.*

Tertiò, Christum Dominum Passionis suæ meritum obtulisse non solum ut à peccatoribus amoveret æternam, quam meruerunt pœnam, sed ut etiam liberaret quotquot eidem erant actu traditi, docuere Origenes & antiquiores Hæretici, de quibus S. Augustinus, lib. de hæresibus hæresi 79. Gregorius Magnus homilia 22. in Evangelia, & Beda in primam Petri epistolam. Ad

eum errorem accessit Auctor Commentariorum in epistolas sancti Pauli, ad caput quintum epistolæ ad Romanos, inter opera S. Ambrosii. Id ipsum senserunt de quibusdam, qui inter Paganos ad rationis normam mores exigere studuerunt, S. Clemens Alexandrinus lib. 6. Stromatum, & S. Joannes Damascenus lib. de defunctis.

Refellitur ille error, 1. ex Scriptura, quæ sæpius definit peccatorum supplicium esse æternum, ut Matth. 25. nec eis post mortem esse sperandi locum, Eccl. 11. *Si ceciderit lignum ad austrum aut ad aquilonem, in quocumque loco ceciderit, ibi erit.* 2. Ex Traditione Ecclesiæ, quæ sententiam hic à nobis impugnatam constanter respuit ut manifestam hæresim, testibus sanctis Augustino, Gregorio Magno, & Beda, mox laudatis; quibus adde S. Irenæum lib. 4. cap. 39. Sanct. Ambrosium in Psal. 118. Theodor. hæresi 69. & Ecclesiam Gallicanam nono sæculo, aded ut Hincmarus Episcopus Remensis, cum in Concilio Valentiniano hujus erroris insimularetur, illum detestari in libro de prædestinatione cap. 27. coactus fuerit. *Non ita scripsimus - inquit, contra illud propheticum: Ero mors tua, o mors! ero morsus tuus, inferne.* Additque se ab hac hæresi abhorrere, quam beatus Augustinus, Gregorius, & Beda commemorarunt.

Objici potest illud 1. Petri c. 3. ubi de Christo ad inferos descendente sic loquitur Apostolus: *His qui in carcere erant Spiritibus veniens prædicavit qui increduli fuerant aliquando, quando expectabant Dei patientiam in diebus Noe, cum fabricaretur arca.* Unde S. Gregorius lib. 12. Moral. cap. 8. expendens illud Oseæ cap. 13. *Ero mors tua, o mors! morsus*

morsus tuus ero, inferne, sic scribit: Quod occidimus, agimus, ut penitus non sit; Ex eo autem quod mordemus, partem abstrahimus, partemque relinquimus. Quia ergo in electis suis funditus Dominus mortem occidit, mors mortis extitit: quia verò ex inferno partem abstulit, partemque reliquit: non occidit funditus, sed momordit infernum. Ergo.

Respondeo distinguendo antecedens. Prædicavit his qui increduli fuerant, Noe prædicante pœnitentiam, sed postea credidere & pœnitentiam egere, cùm viderunt impleri prædicta, aquis ubique exundantibus, Concedo: qui increduli, & impœnitentes aquis prævocati sunt, Nego antecedens. Innuit itaque Apostolus, quod ipsa ratio suadet, multos tempore diluvii ad Deum recurrisse pœnitentes. Hi judicati sunt & puniti secundum homines in carne, ut ait idem Apostolus cap. 4. ut viverent secundum Deum in Spiritu, & à Christo cum sanctis Patriarchiseducti, impœnitentibus relictis; nec aliud docet sanctus Gregorius.

Quartò, Origenes ad dæmones; imò & ad astra, juxta Platonem & alios Philosophos animata, meritum Passionis Christi extendit: alii hæretici, ex Tertulliano, libro de carne Christi, & Didymus ipse Alexandrinus in caput tertium primæ Petri, idem senserunt quoad dæmones, quin & sanctus Hieronymus in epist. ad Ephes. huic errori favere visus est. *Neque enim, inquit, scire possiamus, quomodo Angelis, qui in inferno erant, sanguis Christi profuerit, & tamen quin profuerit nescire non possumus.* Sed agens contra Ruffinum, hanc noxam à se longè repulit. Utrum autem Origenes voluerit Christum pro dæmonibus simul

mul & pro hominibus passum, vel aliquando in aere sive in cœlo passurum, non constat. Sanctus Bernardus sermone 54. in cantica illud posterius asserit: *Operatus est Christus, inquit, salutem in medio terræ, nunquid & in medio aeris? hoc adversus Originem, qui in aere Dominum gloriæ denuo impudenti crucifigit mendacio, cum hujus conscius mysteriorii Paulus affirmet, quod Christus resurgens ex mortuis jam non moritur.*

Refellitur ille error, 1. ex Scriptura Hebr. 2. *Nusquam . . . Angelos apprehendit, sed semen Abrahæ apprehendit.* Luc. 15. Christus tanquam verus hominum Pastor 99. oves dimisit, ut unam perditam, scilicet genus humanum, quæreretur. Prima ad Tim. cap. 2. dicitur Mediator Dei & hominum Matth. 25. lata est in dæmones sententia nunquam revocanda. Secunda Petri cap. 2. *Deus Angelis peccantibus non pepercit.* 2. ex Traditione. Tertullianus lib. de carne Christi cap. 14. *Nullum, inquit, mandatum de salute Angelorum suscepit Christus à Patre: nam etsi Angelis perditio reputatur, nunquam tamen illis restitutio repromissa est.* Sanctus Augustinus Enchirid. cap. 6. *non . . . pro Angelis mortuus est Christus.* Idem supponit tanquam in Ecclesia certissimum S. Gregorius, lib. 9. Moral. cap. 28. Porro mera fabula est, astra esse animata, ut demonstrant Philosophi: dicuntur quidem in Scripturis laudare Deum; sed quemadmodum gelu, nix, & spiritus procellarum, scilicet per os hominis ad Deum conversum, ut loquitur S. Augustinus.

Quintò, Calvinistæ meritum Christi ad solos prædestinatos restringunt, contenduntque reprobos, quamvis à Deo vocentur & Sacramentis
initi-

initientur, justitiam non consequi, & quidem consequenter ad primum ab ipsis præstructum principium, scilicet, neminem justificari posse, nisi per fidem certam, quod sit in numero prædestinatorum: quam Sententiam ipsi Lutherani uti impiam detestantur, & Concilium Tridentinum multis Canonibus, præsertim 17. sess. sextæ, proscripsit his verbis: *Si quis justificationis gratiam nonnisi prædestinatis ad vitam contingere dixerit, reliquos verò omnes, qui vocantur, vocari quidem, sed gratiam non accipere, utpote divina potestate prædestinatos ad malum: anathema sit.* Refelletur autem illa impietas simul cum errore sequenti.

Sextò, quorundam est sententia Deum velle reproborum salutem, non quòd velit illis vitam æternam, sed quòd velit sufficienter gratiam, in qua antecederet & veluti in virtute continetur vita æterna: atque eo sensu Christum mortuum fuisse pro salute reproborum, quatenus nempe consentiendo voluntati Patris, voluit ipsis gratias temporales, puta justificationem, quæ fit per Baptismum, non verò vitam æternam. In prima parte à Calvinistis dissentiunt; in secunda verò ipsis consentiunt.

Jansenius hanc sententiam amplexus est, contendens eam esse genuinam S. Augustini doctrinam: sic enim scribit lib. 3. de gratia Christi Salvatoris cap. 21. *Illà extensio tam vaga modernorum Scriptorum, non ex alio capite, quàm ex ista generali & indifferenti voluntate Dei erga salutem omnium, & ex illa sufficientis gratiæ omnibus conferendæ præparatione fluxit, quorum utrumque Augustinus, Prosper, Fulgentius, & antiqua Ecclesia veluti machinam à Semipelagianis introductam repudiant quæ sanè cum*

in

in Augustini sententia perspicua certaue sint, nullo modo principiis ejus consentaneum est, ut Christum Dominum vel pro infidelium in infidelitate morientium, vel pro justorum non perseverantium æterna salute (nota) mortuum esse, sanguinem fudisse, seipsum redemptionem dedisse, Patrem orasse sentiat; scivit enim quod quisque jam ab æterno prædestinatus erat, scivit hoc decretum, neque ullius pretii oblatione mutandum esse, nec seipsum velle mutare. Ex quo factum est, ut, juxta sanctissimum Doctorem, non magis Patrem pro æterna liberatione ipsorum, quam pro diaboli deprecatus fuerit. Sed si quid pro illis rogavit Patrem, pro temporalibus quibusdam justitiæ effectibus rogavit, & pro iisdem obtinendis obtulit pretium, fuditque sanguinem suum. Ex quibus verbis expressa est celebris illa propositio; quam autem fideliter, legentibus patebit: Semipelagianum est dicere Christum pro omnibus omnino hominibus mortuum esse, aut sanguinem fudisse; sed mortuus est dumtaxat pro salute prædestinatorum.

Duæ propositionis sunt partes. Prima scilicet, Semipelagianum est dicere Christum pro omnibus omnino hominibus esse mortuum, primò est falsa, quia falsum est ex dictis illud fuisse dogma Semipelagianorum. Secundò temeraria; quia nullus hactenus erroris infimulaverat Sanctos Augustinum, Prosperum, Fulgentium, & alios, qui hanc tradiderunt doctrinam, ut mox ostendemus. Tertiò, scandalosa: quia id sine offensione Catholicorum dici non potest. Non tamen est hæretica; quia nondum fuit definitum, quod hæreticum sit negare Christum mortuum esse pro omnibus omnino hominibus, nullo dempto, singulisque gratiam præparasse.

Secun-

Secunda verò propositionis pars, nempe, *Christum mortuum esse pro salute dumtaxat prædestinatorum*, primò est hæretica; quia de fide est *Christum mortuum esse pro aliorum salute*, quàm *prædestinatorum*: quod tamen negat Jansenius, dum asserit non esse mortuum pro salute infidelium, qui in infidelitate moriuntur, & Justorum, qui non perseverant: nam præter illos nulli alii assignari possunt, nisi prædestinati. Secundò, est impia, blasphema, contumeliosa divinæ pietati; quia impium est & blasphemum, dicere Deum iis præsertim non velle salutem, nec Christum hac de causa pro illis esse mortuum, quibus tribuit gratiam adoptionis, quæ est jus ad hæreditatem æternam; atque ideò denegare gratias, sine quibus in mandatorum observatione perseverare non possunt.

§. II.

Statuitur doctrina Catholica.

Christus mortuus est pro salute omnium hominum, prædestinatorum quidem efficaciter; aliorum verò sufficienter.

Prima pars, de prædestinatis, est extra controversiam, constat enim apud omnes Christum esse causam meritoriam prædestinationis. *Nemo venit ad Patrem, nisi per me*, ait Christus Joan. 14. *Omne quod dat mihi Pater, ad me veniet, & eum, qui venit ad me, non ejiciam foras* *Hæc est autem voluntas . . . Patris, ut omne quod dedit mihi, non perdam ex eo.* Joan. 6. *Oves meæ . . . non peribunt in æternum, & non rapiet eas quisquam de manu mea.* Joan. 10. *Quos dedisti mihi custodiri, &*
nemo

nemo ex eis perijt, nisi filius perditionis, Joan. 17. Pro iis specialiter orat: Ego pro eis rogo, non pro mundo rogo, ibid. & quidem voluntate absoluta; subdit enim. Pater, quos dedisti mihi, volo ut ubi sum ego, & illi sint mecum, ut videant claritatem meam.

Secunda pars probatur 1. ex Scriptura, Lucæ 23. Christus, qui in cœnaculo speciatim pro Apostolis & prædestinatis Patrem rogaverat, in ara crucis sacrificium suum peragens orat pro omnibus carnificibus suis, quorum maxima pars in infidelitate periit. 1. ad Tim. 2. vult Apostolus pro omnibus fieri orationes, quia hoc acceptum est coram Salvatore nostro Deo, qui vult omnes homines salvos fieri unus enim Deus, unus est mediator Dei & hominum, homo Christus Jesus, qui dedit redemptionem semetipsum pro omnibus. Ubi pro omnibus sine exceptione est orandum; quia Deus omnes vult salvos fieri, quia est omnium Deus, quia Christus est omnium mediator, & pro omnibus semetipsum dedit. Vitiosum autem esset Apostoli ratiocinium, si particula, *omnes*, toties repetita, & ad probandam propositionem universalem assumpta, exceptionem admitteret; nam ex particularibus non potest universaliter concludi. Sed pressiori adhuc argumento quæstionem definit Apostolus capite 5. ad Rom. ibi enim componens cum Adamo Christum ait: *Sicut per unius delictum in omnes homines in condemnationem, sic & per unius justitiam in omnes homines in justificationem vitæ.* Hic redemptio tam latè patet, quàm damnatio, quemadmodum Adamus fuit ab omnibus & singulis causa ruinæ & damnationis æternæ; sic Christus quantum ex se fuit causa salutis æternæ.

Nihil

Nihil fingi potest expressius. Idem argumentum urget Apostolus 2. Cor. 5. sed mutato ordine. Si unus, inquit, pro omnibus mortuus est, ergo omnes mortui fient. Et pro omnibus mortuus est Christus, ut & qui vivunt, jam non sibi vivant, sed ei, qui pro ipsis mortuus est. Hoc loco evincit Apostolus omnes & singulos mortuos fuisse in Adamo, ex eo quòd pro omnibus mortuus sit Christus. In omnem partem se vertunt adversarii, ut vim hujus argumenti declinent; sed frustra: pugnant enim non solum contra Apostoli contextum, ut expendenti patebit, sed & contra unanimem sanctorum Patrum interpretationem. Quare,

Probatur 2. ex sanctis Patribus.

Sanctus Clemens Alexandrinus libr. 7. Stromatum ait: *Non est hujus salvator, illius autem minimè.*

Origenes l. 1. contra Cels. Pro humano genere tanta pertulit Christus, inquit, ut quantum in ipso erat, Græci omnes & Barbari à malitia deciscerent.

S. Gregorius Nazianzenus Orat. 25. de passionibus Christi sic scribit: *Per quas omnes reformati sumus, nullo penitus excepto, qui eidem Adamo participavimus.*

Sanctus Chrysostomus homil. 7. in primam ad Timoth. expendens illa verba, unus mediator, sic habet: *Etiam pro gentibus mortuus est. Et quo pacto, inquires, illi non crediderunt? quia noluerunt: quod erat partium ipsius, completum est.*

Sanctus Hieronymus epist. ad Oceanum: *Mentitur Joannes digito Christum & voce demonstrans, Ecce Agnus Dei, ecce qui tollit peccata mundi, si*
D. Habert Theolog. Tom. II. P sint

sint adhuc in sæculo, quorum peccata non tulerit Christus.

Sanctus Augustinus, cujus auctoritate singulariter nituntur adversarii, lib. 6. contra Julianum cap. 4. urgens illud Apostoli 2. Cor. 5. Si unus pro omnibus mortuus est, ergo omnes mortui sunt, sic ait: *Ex hoc probavit Apostolus omnes mortuos esse; quia pro omnibus mortuus est unus; impingo, inculco, infercio recusanti, accipe, salubre est, nolo moriaris, unus pro omnibus mortuus est. Vide quia consequens esse voluit, ut intelligantur omnes mortui, si pro omnibus mortuus est. Et Tract. 12. in Joan. Quare Salvator dictus est mundi, nisi ut salvet mundum; non ut judicet mundum? Salvati non vis ab ipso? ex te ipso judicaberis. Denique S. Prosper jam pridem vindicavit sanctum Doctorem ab illo errore; quem ejus æmuli ipsi impingebant, & etiam nunc non pudet adversarios nostros ipsi impingere; nam in præfatione ad objectiones Vincentianas hanc calumniam primo loco ponit, quod objicerent in Sententia S. Augustini, Dominum nostrum Jesum Christum non pro omnium hominum salute & redemptione fuisse passum; illamque accusationem in decursu operis tam feliciter confutat, ut Jansenius ipse lib. 3. de gratia Salvatoris c. 21. dicere cogatur S. Prosperum non assecutum fuisse mentem S. Augustini, nec vestigiis ejus instituisse. Prospero, inquit, antiquior & doctior S. August. At inquam ego, Jansenio antiquior est & doctior S. Prosper.*

S. Leo, qui opera S. Prosperi usus est ad extinguendas Pelagianorum reliquias, serm. 1. de Nativitate, sic loquitur: *Dominus noster peccati mortisque destructor, sicut nullum à peccati reatu*

reatu liberum reperit, ita & liberandis omnibus venit.

Concilium Moguntinum sub Rabano, & Carisiacum sub Hincmaro Rhemenſi nono ſæculo damnarunt Gotheſcalcum Monachum, definieruntque nullum eſſe, pro quo Chriſtus paſſus non fuerit.

Nec dicas Concilia Valentinum & Lingonenſe, Eccleſiam quoque Lugdunenſem lib. de tenenda veritate Scripturæ, & lib. de tribus Capitulis, imò & Nicolaum I. reprobaſſe Concilium Carisiacum; namque 1. licet Valentinum & Lingonenſe duriora contra Carisiacum protulerint, & nonnulla falſa ipſi impoſuerint propter ſimilitates, quam contra Hincmarum ſuſceperant; attamen capitulum, de quo hic agitur, rejecerunt dumtaxat ut inutile, non verò ut falſam doctrinam continens. 2. Concilium Tullenſe, ad quod convenerunt Epiſcopi ex duodecim Provinciis, ſimilitates & contentiones conſopivit: confirmavitque capitula Concilii Carisiaci. 3. Falſum eſt Nicolaum I. reprobaſſe Concilium Carisiacum; commotus quidem fuit in Hincmarum, quem in Jura Sedis Apoſtolicæ inſurgere ſuſpicabatur: Sed ex Prudentio Tricaſſino, *de ſanguine Chriſti, ut pro credentibus omnibus fuſus ſit, fideliter confirmavit.* Hæc Prudentii verba refert Hincmarus epiſt. 27. ad Egilonem Senonenſem. Attamen propter ſiniſtros rumores, quos ſpargebat Prudentius jam Hincmaro offenſus, quòd Nicolaus faveret Gotheſcalco, idem Hincmarus in eadem epiſtola Egilonem rogat, ut Nicolaum de his certiore faciat.

S. Thomas, quem sibi vindicat Jansenius, lectione prima in caput secundum primæ ad Timoth. ait: *Jesus est mediator Dei & hominum, non quorundam, sed inter Deum & omnes homines, & hoc non fecisset, nisi vellet omnes salvare.* Eadem docet 5. p. q. 48. art. 1. & in cap. 26. Matth.

Concilium Tridentinum sess. 6. cap. 4. & 3. *Hunc, inquit, proposuit Deus propitiatorem per fidem in sanguine ipsius pro peccatis nostris, non solum autem pro nostris, sed etiam pro totius mundi. Verum, etsi ille pro omnibus mortuus; non omnes tamen mortis ejus beneficium recipiunt, sed ii dumtaxat, quibus meritum Passionis ejus communicatur.*

Dices 1. Matth. 26. Christus discipulis porrigens poculum sanguinis sui, ait; *qui pro multis effundetur*: ergo non pro omnibus.

Respondeo negando consec. namque vox *multi*, usurpari solet vel comparatè & distributivè ad significandam magnam totius collectionis partem, ut Joan. 4. *Multi crediderunt in eum Samaritanorum*: Vel absolutè & collectivè ad denotandam totam collectionem, quo sensu dicimus de eo, qui totam suam substantiam & quidem amplam devoravit; hinc multam consumpsit pecuniam. Et Apostolus scribit Rom. 5. *Per inobedientiam unius hominis peccatores constituti sunt multi*, id est, omnes. Quòd autem hoc posteriori sensu Christus Dominus de suo sanguine dixerit, *qui pro multis effundetur*, discimus non solum ex sanctis Patribus, sed ex ipsomet Apostolo 2. Cor. 5. *Pro omnibus mortuus est Christus*: pro omnibus, inquam, voluntate sufficienti & conditionata; pro multis verò voluntate efficaci & absoluta. Ita sanctus Thomas in caput vigesimum sextum Matthæi;

thæi: Si consideretur sufficientia, inquit, ipse est propitiatio pro peccatis totius mundi; sed si consideremus effectum, minorem habet effectum, in iis nempe, qui salvantur, & hoc ex culpa hominum. Quæ posteriora verba notatu sunt dignissima; non enim dici potest dæmones sua culpa non salvari etiamsi sanguis Christi sit ad id sufficiens, quia non est ea intentione fusus, ut meritum ejus ipsis applicaretur, carentque mediis, quibus applicari possit.

Dices 2. S. Augustinus libr. de adulterinis conjugiiis scribit: *Omnis qui Christi sanguine redemptus est, homo est: tamen omnis homo in sanguine Christi redemptus non est.* Et epist. 48. dicit Christum esse propitiationem pro peccatis totius mundi, propter triticum, quod est per totum mundum. Similia habet sanctus Bernardus epist. 109. ubi sic alloquitur Abailardum: *Non potes gratias agere cum redemptis, quia redemptus non es.* Ergo.

Distinguo antecedens: redemptus non est speciali & efficaci modo, Concedo; generaliori & sufficienti modo, Nego antecedens. Explicatur solutio familiari exemplo. Solutum est redemptionis pretium pro certo captivorum numero, qui serviunt apud Turcas; sed ex illis alii quibusdam commodis deliniti exire nolunt, alii oblatam gratiam læti suscipiunt, & jugum servitutis excutientes patriam repetunt. In hac hypothesis omnes absolutè redempti sunt; sed si comparentur priores cum posterioribus, hos dumtaxat redemptos dicimus; cum hi soli pristinam libertatem receperint. Porro juxta hanc explicationem facillè conciliantur sancti Augustinus, Bernardus, & alii Patres, ubi opposita scribere videntur; nam posteriori modo soli justî, ma-

ximè qui in gratia perseverant, redempti sunt; quia hi soli à servitute peccati plenè & efficaciter liberantur; cùmque per totum orbem diffundantur, propter eos, quos S. Augustinus vocat triticum & verum semen, totus mundus hoc mundo redemptus per Synecdochen dicitur. Alii tamen, qui elegerunt servire peccatis suis potiùs quàm Deo, priori sensu redempti dicuntur ab iisdem Patribus propter pretium pro eorum redemptione solutum. Judas, inquit S. Augustinus in Psalmum 68. projicit pretium argenti, quo ab illo Dominus venditus fuerat, nec agnovit pretium, quo à Domino redemptus erat. S. etiam Bernardus ferm. 2. in Psalmum 90. ait: *Possunt omnes homines dicere: Salvator meus es tu: at verò Susceptor meus es tu, is tantum dicere potest, qui habitat in adjutorio Altissimi.*

Dices 3. S. Augustinus lib. 21. de Civitate Dei c. 24. sic habet: *Si de aliquibus ita certa esset (Ecclesia) qui licet adhuc in hac vita sint constituti, tamen prædestinati sunt in æternum ignem ire cum diabolo, tam pro eis non oraret, quàm pro ipso.* Ergo, cùm Christus nosset quinam essent prædestinati ad ignem æternum, nullatenus pro illorum salute oravit, nec proinde seipsum in sacrificium obtulit: oblatio enim illa est perfectissima orationis species.

Distinguo antecedens. Non oraret oratione absoluta & contraria voluntati divinæ, concedo: hæc enim oratio non esset honesta: non oraret oratione conditionata & conformi voluntati divinæ, Nego antecedens. Patet autem ex ipso capitis contextu, S. Doctorem loqui de oratione absoluta; refellit enim eorum errorem, qui docebant, reprobos in extremo judicio liberandos

randos precibus Sanctorum; demonstratque fictitiam illam orationem pugnare contra immutabilem Dei voluntatem, qua reprobos post mortem addixit æternis pœnis, ac proinde justorum merita & charitatem ad illos non magis extendi, quàm ad diabolum. Tum occurrit objectioni, quod Ecclesia nunc oret pro inimicis & persecutoribus, respondetque Ecclesiam hoc pietatis officium illis impendere; quia piè credit illos omnes aut vocatos, aut aliquando vocandos ad æternam salutem; cum Deus velit omnes homines salvos fieri præcipiatque Apostolus, ut pro omnibus indiscriminatim & absolutè fiant orationes; ac tandem addit, quòd si Ecclesia nosset aliquos ex illis absoluta Dei voluntate esse rejectos, non magis pro illis, quàm pro diabolo oraret, nimirum absoluta, qua nunc voluntate orat.

Confirmatur responsio. Christus plenè noverrat plures ex justis non esse perseveraturos, ac proinde æterno Dei decreto dæmonum sortem experturos: Atqui Christus pro eorum salute oravit, Joan. 17. *Non pro eis (Apostolis) rogo tantum, sed & pro eis, qui credituri sunt per eorum verbum in me.* Enimverò Deus vult justos salvos fieri; cum dederit eis jus ad vitam æternam; ac proinde impium est dicere iisdem gratias deesse, quibus mandata Dei possibilia fiant, & sine quibus perseverare non possint, ex Constitutionibus Innocentii X. & Alexandri VII. Imò videtur minor impietas in Calvino, qui ex hoc falso & hæretico principio, nempe Deum ad pœnam æternam quosdam creasse, colligit eosdem usu Sacramentorum gratiam non consequi: quam in iis, qui cum contra fateantur quosdam per Sacramenta

verè justos fieri, negant tamen Deum velle eos salvare; Christum pro illorum salute orasse, & sanguinem fudisse; dari illis gratias, sine quibus nec mandata implere, nec perseverare possint; contenduntque Ecclesiam, si illos plenè cognosceret, non magis pro salute illorum, quàm diaboli sollicitam fore, ne voluntati divinæ repugnare videretur. Nam si Deus absque præjudicio suæ bonitatis vult aliquos perire independentem ab eorum demeritis, ut falsò supponit Calvinus; sapientiæ ejus est, quòd deneget ipsis gratiam adoptionis filiorum, & media ordinata ad salutem consequendam. At bonitati simul & sapientiæ Dei manifestè repugnat, quòd illos nolit salvos fieri, Christum & Ecclesiam pro illorum salute ullo modo orare, quos ad salutem per gratiam suam ordinavit, sanctificavit, gratos sibi & diligentes se effecit.

CAPUT XVI.

De titulis Christo competentibus.

Inter Christi titulos hi numerantur præcipui. 1. est Filius Dei naturalis, non adoptivus, non servus, nisi in latiori acceptione, atque ideo uno cultu, eoque supremo, qui dicitur patriæ adorandus. 2. est Caput hominum & Angelorum. 3. est Sacerdos. 4. est Rex, Legislatores & Judex. 5. est Mediator Dei & hominum. De filiatione & adoratione Christo debitis satis diximus primo capite: de reliquis nonnulla hic paucis subjiciemus.

§. I.

Christus est Caput hominum & Angelorum.

Probatur 1. ex Scriptura. Ephes. 1. *Ipsium dedit caput supra omnem Ecclesiam, quæ est corpus ipsius.* Ait 1. *ipsum dedit* : quia Christus formaliter non constituitur caput per unionem hypostaticam, quæ tendit dumtaxat ad uniendam naturam humanam cum persona divina; neque per gratiam sanctificantem, quæ est ejusdem speciei cum natura; sed per potestatem, quam Deus illi contulit in omnes Angelos & homines. Præsupponuntur tamen ad rationem capitis unio hypostatica & gratiarum plenitudo, quemadmodum morum probitas & excellens eruditio desideratur in eo, quem judicem Rex constituit. Ait 2. *supra omnem Ecclesiam*, quæ ex Angelis simul, & hominibus integratur, juxta illud Hebr. 12. *Accessistis ad Sion montem . . . & multorum millium Angelorum frequentiam; & Ecclesiam primitivorum, qui conscripti sunt in cælis.* Unde sanctus Hieronymus in caput primum Epistolæ ad Ephesios : *non solum hominum, inquit, sed etiam Angelorum, cunctarumque virtutum & rationabilium creaturarum Ecclesia intelligi potest.* Similia habent sanctus Ambrosius epistola 37. & Augustinus in Psalmum 36. *sed de Angelis speciatim Apostolus Coloss. 2. Estis in illo repleti, qui est caput omnis principatus & potestatis.*

Probatur 2. ratione; quia ad perfectam capitis rationem quatuor requiruntur : primum, ut dignitate superemineat : secundum, ut cum membris sit connexum, quatenus ex illa conjunctione unum corpus exurgat compactum ex ca-

capite & membris : tertium , ut sit in corpore quid præstantissimum & ab eo tanquam ex fonte emanet vivifica virtus , juxta mensuram & capacitatem cujusque membri , capitis enim est membra inter se vincere , vegetare , tueri & regere per juncturam subministrationis , ut loquitur Apostolus cap. 4. ad Ephes. quartum , ut ejusdem naturæ cum membris sit particeps ; qua communione quidquid inest voluptatis , & doloris in corpore , illud excipiat tanquam proprium : Atqui hæc omnia Christo maximè competunt : ergo.

Minor ostenditur quoad singulas ejus partes.

Primò supereminet. Ephes. 1. *suscitans illum à mortuis, & constituens . . . supra omnem principatum . . . & omnia subjecit sub pedibus ejus.*

Secundò , arcta est Christi cum membris conjunctio , 1. Cor. 12. *Sicut corpus unum est , & membra habet multa , omnia autem membra corporis , cum sint multa , unum tamen corpus sunt , ita & Christus.* Ad quam mirabilem Christi nobiscum connexionem respiciens Augustinus , sic scribit in Psalm. 127. *Non ille unus , & nos multi ; sed & nos multi , in illo unum : unus ergo homo Christus caput & corpus.* Quod est corpus ejus ? *Ecclesia ejus.*

Tertiò , in Christo sunt omnes thesauri sapientiæ & scientiæ absconditi , & de plenitudine ejus omnes nos accepimus , Joan. 1. Spiritum suum in nos effudit , illo spiritualiter vegetamur , in unum colligimur , movemur & regimur , *Unum corpus & unus spiritus* , inquit Apostolus ad Eph. 4. *Si quis autem spiritum Christi non habet , hic non est ejus.* Rom. 8.

Quartò , Christus naturæ nostræ est particeps ; quia pueri communicaverunt carni , & sanguini , & ipse

ipse participavit eisdem ut misericors fieret, Hebr. 2. Non enim habemus Pontificem, qui non possit compati infirmitatibus nostris: tentatum autem (id est afflictum) per omnia pro similitudine absque peccato, Hebr. 4.

Ergo Christus verè & modo singulari est nostrum Caput, & nos vicissim sumus ejus membra ipsi conjuncta non morali & exteriori nexu dumtaxat, sicut cives respectu Magistratus; sed reali interiori, nempe ejusdem gratiæ, quo plenus est, diffusionem, & Spiritus, quo ipse vivit, communicationem; nam juxta S. Augustinum, corpus Christi non vivit nisi de Spiritu Christi, ex quo, inquit Apostolus Ephes. 4. *totum corpus compactum, & connexum per omnem juncturam subministrationis, secundum operationem in mensuram uniuscujusque membri, augmentum corporis facit in ædificationem sui in charitate.* Quo nihil sublimius & magnificentius de Religione Christiana audiri potest; hinc enim sequitur, quòd quemadmodum corpus humanum spiritu rationali vegetatum non habet motus nisi rationales & singula ejus membra naturaliter & incunctanter pro capite periculo se exponunt; sic Fideles, cum Spiritu Christi, qui Deus est, vivant, minus rationaliter quàm divinè aguntur; non sua, sed quæ capitis sunt, sectantur, & sublimiora in præceptis Evangelicis non tanquam dura aut impossibilia audiunt, sicut infideles; sed ea in cordibus suis jam insculpta sentiunt, & mentis suæ propensioni maximè consentanea excipiunt, ut Christus per omnia adimpleatur, quemadmodum loquitur Apostolus Ephes. 1. v. 23. hoc est secundum Interpretes in hunc locum, Christus ut caput in singulis membris perficiatur;

ciatur ; caput enim videtur mutilum & debile, nisi membra conjuncta habeat, agat & regat juxta mensuram uniuscujusque. Sed ad pleniorē hujus mysterii explicationem nonnullæ supersunt difficultates expendendæ.

Quæritur itaque qua ratione Christus sit Caput hominum & Angelorum, an quatenus Deus, an quatenus homo ?

Respondet S. Chrysostomus homilia prima in epistolam ad Ephesios, Christum esse Caput hominum secundum carnem, Angelorum verò quatenus est Deus. Verum etsi Deus sit rerum omnium auctor & motor, minus tamen propriè dici potest Caput ; quia natura infinitè distat à creaturis : Christus verò, ut homo est, propriè est Caput etiam Angelorum ; cum illis enim ratione spiritus rationalis communicat naturæ similitudine, sin minus specifica, saltem generica ; in illos gratiam influit, non quidem primariam & sanctificantem ; sed secundariam, ut diximus, ubi de Christi merito. Denique illos regit, cum sint administratorii Spiritus in ministerium missi, Hebr. 1.

Q. 1. *Estne caput omnium hominum ?*

R. Primo, non est damnatorum, tum quia tanquam Pastor segregavit eos ab ovibus, Matth. 25. *Ite maledicti* : tum quia nullum eis præbet influxum ; conservat quidem in baptizatis characterem baptismalem, & in Sacerdotibus sacerdotalem ; sed ad eorum ignominiam, & in signum perfidæ desertionis.

R. Secundo, non est actu Caput infidelium ; quia inter membra corporis ejus, quod est Ecclesia, numerari non possunt. Dicitur tamen
Caput

Caput infidelium in potentia, quemadmodum cibus, qui virtute nutritiva disponitur ad nutriendum corpus animale, est pars ejusdem corporis in potentia; Infideles enim non carent omni Christi influxu, quo possint justificari & salvari, ut dicetur Tractatu de Gratia.

R. Tertio, est Caput omnium Fidelium etiam peccatorum: cum omnes sint Ecclesiæ membra, ut demonstrabimus ubi de Ecclesia.

Nec dicas peccatores esse membra diaboli, à Christo per peccatum separata; namque peccatores adhærent Christo saltem per fidem, quam in illis conservat; nec repugnat membrum morale sub duplici capite militare, ut videre est in malo cive, qui contra patriam cum hoste noxia init consilia.

Q. 2. *Ratio Capitis estne Christi propria?*

R. Solus Christus est Caput principale; quia solus omnem gratiam nobis meruit, ut constat ex dictis; solusque est Sacramentorum auctor. Quilibet verò Pastor est caput ministeriale, quia Christus dedit quosdam Apostolos alios autem Pastores & Doctores ad consummationem Sanctorum in opus ministerii, in ædificationem corporis Christi. Ephes. 4. Duo autem requiruntur in capite ministeriali. Primum, ut eodem agatur spiritu, quo Caput principale, cui servit; sitque tanquam instrumentum illi conjunctum per fidem & charitatem. Secundum, ut erga subditos se gerat juxta quatuor recensitas Capitis conditiones: dignitatem & auctoritatem tueatur; quatenus viderit subditis utile; sit eis conjunctus charitate præcipua, jam plenus, ut supponi debet, gratiarum donis, fideliter & assidue effundat, etiam viliores tanquam propria

pria membra foveat ; & ad singulos sic afficiatur , ut cum gaudentibus gaudeat , flentibus compatia-
tur , & sibi adversantes ut ægra corporis membra
curet , & pro eis sollicitus , benignè ferat.

Q. 3. *Potestne dici diabolus Caput reproborum ?*

Respondet sanctus Thomas , non esse Caput
per influxum interiorem ; quia non infundit mali-
tiam , sicut Christus gratiam & justitiam ; sed dici
Caput reproborum , quatenus per influxum exte-
riorem illis suggerit malitiam , ad consentiendum
suggestionibus suis , illos inflammat , regit , ac tan-
dem ad damnationem æternam deducit. Propterea
vocatur Princeps hujus mundi , Joan. 52. Rex su-
per omnes filios superbiæ , Job. 41.

§. II.

Christus est Sacerdos.

Probatur ex Scriptura , Psal. 109. *Tu es Sacerdos
in æternum secundum ordinem Melchisedech* : quem
locum Apostolus de Christo interpretatur , Hebr.
cap. 5. & sequentibus.

Q. 1. *Quomodo Christus est Sacerdos secundum ordi-
nem Melchisedech ; cum ipse debeat in omnibus primatum
tenere ?*

R. Melchisedech hic non proponitur tanquam
fons & origo Sacerdotii Christi , quemadmodum in
veteri lege ex Aarone , tanquam ex primo Capite ,
Sacerdotes per successionem generationum proce-
debant. Sed exhibetur dumtaxat ut adumbrans
& præfigurans novum Sacerdotium in Christo in-
stituendum ; obtulit enim sacrificium in pane &
vino ; fuit Rex justitiæ & pacis , nec successit aliis ,
nec habuit successores ; *cujus generatio* , inquit Apo-
stolus ,

stolus, Hebr. 7. *non annueneratur in eis* ; supra Aaronem & totam Judæorum gentem extitit, cum Abrahæ Patriarchæ eorum, ut se minori benedixerit. Unde concludit Apostolus, quod per omnia assimilatus fuerit Filio Dei.

Dices : Christus obtulit cruentum sacrificium, & secundum lineam maternam ex familia Aaron ortus est : nam sancta Elifabeth cognata B. Mariæ, dicitur de filiabus Aaron, Luc. 1. Ergo Christus fuit Sacerdos secundum ordinem Aaron.

Nego conseq. tum quia sacrificium crucis, licet cruentum, non fuit oblatum ritu Aaronico, ut patet ; nullusque dixerit illud pertinuisse ad cæremónias legales : tum quia Sacerdotes Aaronici per lineam paternam ab Aaron necessariò descendebant ; Oſias, cujus mater ex Aaron fuit progenita, percussus est lepra propter arreptum Sacerdotis officium, Paralip. 26.

Q. 2. *Secundum quam naturam Christus est Sacerdos ?*

R. Affirmant Novatores Christum esse Sacerdotem ratione Divinitatis : sed manifestè falluntur ; nam Sacerdos superiorem agnoscit : Omnis Pontifex ex hominibus assumitur, ut offerat dona & sacrificia, Hebr. 5. ergo Christus ea ratione est Sacerdos, qua oravit, & dixit, *Pater major me est*, hoc est ratione humanitatis, non quidem nudè spectatæ, sed subsistentis subsistentia divina, à qua Christi sacrificium & oratio hauriunt suum meritum & valorem. Ut homo, est pro nobis orator ; ut Deus, est cum Patre exauditor, inquit S. Augustinus.

Q. 3. *Christus estne Sacerdos vi unionis hypostaticæ ?*

R. Præter unionem hypostaticam, necessaria fuit Patris deputatio, quemadmodum supra diximus non extitisse Sponsorem nostrum sine Dei

Dei acceptatione : quod non obscurè innuit Apostolus Hebr. 5. *Nec quisquam sumit sibi honorem, sed qui vocatur à Deo, tanquam Aaron.* Sic & Christus non semetipsum clarificavit, ut Pontifex fieret : sed qui locutus est ad eum, *Filius meus es tu quemadmodum & in alio loco dicit : Tu es Sacerdos in æternum secundum ordinem Melchisedech.*

Q. 4. Christus habetne in sacerdotio successores ?

R. Negat absolutè Apostolus Hebr. 7. v. 23. 24. & 25. *Alii quidem plures facti sunt Sacerdotes, idcirco quòd morte prohiberentur permanere : hic autem eo quòd maneat in æternum, sempiternum habet sacerdotium.* Unde & salvare in perpetuum potest accedentes per semetipsum ad Deum, semper vivens ad interpellandum pro nobis. Constituit tamen sibi ministros, ex Apost. Ephes. 4. *Et ipse dedit quosdam quidem Apostolos alios autem Pastores & Doctores ad consumptionem Sanctorum, in opus ministerii, in ædificationem Corporis Christi.* Sed illi Sacerdotes ministeriales nullatenus dici debent & possunt successores Christi : cum per eos tanquam per instrumenta ipse operetur semper vivens. Sed de his ex professo in Tractatu de Sacramento Ordinis.

Q. 5. Omnes Christiani per Baptismum suntne constituti Sacerdotes ?

R. Non sunt, strictè & propriè loquendo ; rectè tamen dici possunt Sacerdotes in latiori significatione & minùs propria. Sacerdotes propriè dicuntur, qui potestatem habent Sacramenta conficiendi & administrandi, Fideles regendi, & verbum Dei prædicandi : hanc autem potestatem non habent omnes baptizati, sed hi duntaxat, qui per Sacramentum Ordinis sacris ministeriis consecrantur : nam ex Apostolo Rom. 12.

Sicut

Sicut . . . in corpore . . . omnia membra non eundem actum habent, ita multi . . . sumus in Christo . . . habentes . . . donationes . . . differentes. Et 1. Cor. 12. Numquid omnes Apostoli? . . . nunquid omnes Doctores? Sed de his ubi de Ministro Sacramentorum & sacrificio Missæ. Nihilominus, quia ex S. Augustino paragrapho præcedenti laudato: Unus homo Christus caput & corpus; omnes fideles per Baptismum membra ejus effecti participes sunt ejus Sacerdotii, & ea ratione in Scripturis non infrequenter Sacerdotes vocantur, Hebr. 13. Per ipsam ergo offeramus hostiam laudis semper Deo. Apoc. 1. Fecit nos regnum & Sacerdotes . . . Patri suo. 1 Petri cap. 2. v. 5. superædificamini, domus spiritualis, sacerdotium sanctum offerre . . . hostias acceptabiles Deo per Jesum Christum. Et v. 9. Vos autem genus electum, regale sacerdotium. Enimverò Christus noster Pontifex ideo Caput nostrum singulari illo, quo diximus modo, effectus est, ut ex toto se Deum coleret & diligeret; ac proinde negari non potest, quin membra sua moveat, ut Deum pro viribus colant & diligant, se quoque hostias per ipsum & in ipso offerant: quod luculentius in Missæ sacrificio adimplent, ut suo loco dicetur. Atque eo sensu Christi sacerdotium ad omnes baptizatos, five viros, five mulieres, extenditur.

Dixit Apostolus, regale Sacerdotium; quia Christus regis etiam suæ potestatis corpus suum particeps efficit, quatenus nempe viva ejus membra per ipsum affectibus suis imperant, passiones rebelles subjiciunt; omnia, etiam quæ adversa videntur, in proprium commodum convertunt: nam diligentibus Deum omnia cooperantur in bonum, Rom. 8. Porro, sicut ex his sancti Petri verbis

nullus sanæ mentis colligit omnes baptizatos posse licitè jugum dominorum temporalium excutere, sic Heterodoxi ineptè colligunt baptizatos habere jus conficiendi & administrandi Sacramenta, aliaque hierarchica munia obeundi, accedente Magistratum consensu. Sed de his aliàs.

§. III.

Christus est Rex.

Primò ut Deus quod per se evidens est. Secundò, ut homo, quod testantur utriusque Testamenti paginae, Psal. 2. *Ego autem constitutus sum Rex ab eo super Sion montem sanctum ejus.* Atqui non est constitutus Rex ut Deus, cùm titulum illum ex natura sua divina habeat, æquè ac Pater & Spiritus sanctus: Ergo ut homo. Luc. 1. *Dabit illi, ait Angelus ad Mariam, Dominus Deus sedem David Patris ejus, & regnabit in domo Jacob in æternum.* Denique Apostoli & universa Ecclesia Christum simpliciter & absolutè Dominum compellant. *Dominus enim Jesus Christus, inquit S. August. lib. de consensu Evang. c. 3. unus verus Rex, & unus verus Sacerdos; illud ad regendum nos, illud ad expiandos.*

Q. *Christus ut homo estne Rex temporalis, & ita supremus terræ Monarcha, ut omnes Reges coronas ab eo accepisse censeantur?*

R. Minimè; hanc enim regiam dignitatem haberet, vel titulo donationis sibi factæ à Patre: vel titulo successionis & jure nativitatis humanæ: vel titulo electionis: vel denique jure belli. Atqui nihil horum dici potest: Ergo.

Non

Non fuit Rex quatenus homo, donationis titulo; namque ubi confessus est coram Pilato se esse Regem, (Jo. 18.) statim negavit regnum suum esse de hoc mundo, ut dilueret criminationem, qua Judæi eum onerabant, quasi contra Cæsarem insurrexisset, ex S. Ambrosio, Cyrillo & Augustino.

Non titulo successionis, quatenus est filius David; tum quia familia David amisit jus regni in Jechonia: Jerem. c. 22. *Scribe virum istum sterilem... nec enim erit de ejus semine vir, qui sedeat super solium David, & potestatem habeat ultra in Juda.* Quod manifestè impletum est in Machabæis, qui ex Tribu Levi Duces populi Israelitici extiterunt usque ad Herodem Ascalonitam, sub quo natus est Christus, cui Deus dedit sedem David patris ejus, *non carnaliter, sed spiritualiter regnatura*, ait S. Augustinus lib. 17. de Civ. cap. 7. Ita ut regnum temporale David, utpotè umbra & figura, evanesceret veritate adveniente, nimirum spirituali Christi regno. Tum quia, etiamsi regnum temporale ad familiam David tum pertinuisset, cum Christus natus est; non constat, an Christus ex omnibus Davidis nepotibus esset propinquior.

Non titulo electionis, quam Christus declinavit, Jo. 6. *Cum cognovisset, quia venturi essent, ut... facerent eum Regem; fugit.* Et Luc. 12. Christus homini ipsum interpellanti, ut litem de re temporali motam dirimeret, sic respondit, *Homo, quis me constituit Judicem... super vos?*

Non jure belli: nam bellum ejus non fuit cum Regibus mortalibus: sed cum Principibus tenebrarum, *expolians principatus & potestates*, ait Apostolus Col. 2. Unde Christus ex mortuis redivi-

vus mittens Apostolos sic loquitur Matth. 28. *Data est mihi omnis potestas in cælo & in terra. Euntes ergo, ad Reges rebelles dejecturi, & alios instituturi? minimè; sed docete omnes gentes, &c.* quibus posterioribus verbis Christus demonstrat omnimodam illam potestatem sibi à Patre concessam, spectare spiritualia duntaxat; & ita interpretati sunt Apostoli & eorum successores. *Omnis anima, ait Paulus Rom. 13. potestatibus sublimioribus subdita sit.* Addit Chrysostomus in hunc locum: *Etiam si Apostolus sis, si Evangelista, si Propheta, sive quisquis tandem fueris... Est autem prima hujus constitutionis justitia, quod à Deo ordinata sint ista; Subdit enim Apostolus; Non... est potestas nisi à Deo... Itaque qui resistit potestati, Dei ordinationi resistit... Ideo enim & tributa præstatis; Ministri enim Dei sunt, in hoc ipsum servientes.* Hinc Tertullianus lib. ad Scapulam cap. 1. *Colimus ergo & Imperatorem sic, quomodo & nobis licet & ipsi expedit, ut hominem à Deo secuturum, & quidquid est, à Deo consecutum solo Deo minorem.* Sic enim omnibus major est, dum solo Deo minor est. Celebris est sententia Osi Constantinum alloquentis, apud S. Athanasium epist. ad Solitarios: *Tibi Deus imperium commisit, nobis quæ Ecclesiæ sunt concredidit: & quemadmodum qui tuum imperium malignis oculis carpit, contradicit ordinationi divinæ: ita & tu cave, ne quæ sunt Ecclesiæ ad te trabens, magno crimini obnoxius fias. Neque igitur fas est nobis in terris, imperium tenere; neque tu thymiamatum & sacrorum potestatem habes, Imperator.*

Dux itaque in corpore Christi, quod est Ecclesia, agnoscendæ sunt divinitus constitutæ & distinctæ supremæ potestates; alia temporalis penes sæculares Principes: alia spiritualis penes Sacer-

Sacerdotes. Per alteram Reges terræ à Deo secundi, post quem & primi, & ante omnes, (ex Tertulliano Apol. c. 30.) administrant res temporales in ordine ad ultimum finem, tanquam Ministri Omnipotentia divinae, & Providentiæ; atque eo nomine gladium materiale portant in vindictam malorum, laudem vero bonorum, Rom. 14. Per alteram, Sacerdotes Dei etiam Ministri toti sunt in excolendis & perficiendis animis: nec defunt illis arma, non quidem carnalia, sed spiritualia, potentia Deo, ad destruendam omnem altitudinem extollentem se adversus scientiam Dei; & in promptu habent ulcisci omnem inobedientiam, ut loquitur Apostolus 2. Cor. cap. 10. Quantò autem anima præstantior est corpore, tantò spiritualis potestas temporalem antecellit. Quapropter & Princeps Sacerdotes colat & observet ut patres & Pastores; ipsum enim inter oves computatum Deus commisit Pastoralis curæ & sollicitudini: nec Pastor supra Principem se superbè extollat: quem enim sibi à Deo Dominum temporaliter constitutum didicit, necesse est ut & subditus ipsum diligat, & revereatur, ex Tertulliano libr. ad Scap. capit. 1. Sed ambo conjunctis animis & viribus juxta ministerii sui mensuram, cultum Dei & honorem promoveant, multisque prodesse potius, quàm præesse appetant.

Dices: Ille est Rex temporalis, qui habet jus vitæ & necis: atqui S. Petrus jus tale habuit, eo-que usus est Act. 4. dum Ananiam & Saphiram morte multavit: Ergo.

Distinguo minorem. Sanctus Petrus jus vitæ & necis habuit potestate extraordinaria, Concedo: potestate ordinaria, & ad successores transmittenda, Nego minorem.

Instabis: atqui sanctus Petrus jus illud ad successores transmisit; nam Romani Pontifices temporaliter regnant, & sceleratorum crimina gladio materiali vindicant; Ergo.

Nego subsumptum, cujus confirmationem distinguo. Temporaliter regnant in terris sibi liberalitate & munificentia Principum concessis, quemadmodum & multi Episcopi in Germania, Concedo: temporaliter regnant ex Christi institutione, & quatenus sunt Caput Ecclesiæ, Nego. Namque ex S. Leone serm. 1. in Natali Apostolorum, Roma per sacram beati Petri sedem Caput orbis effecta, latius præsidet Religione divina, quàm dominatione terrena. Et Facultas Parisiensis anno 1663. declaravit hanc esse suam antiquam doctrinam; quòd Rex Christianissimus nullum omnino agnoscat, nec habeat in temporalibus superiorem præter Deum.

Instabis iterum: Sequeretur Christum, ut homo est, 1. nullum habuisse dominium temporale, quod falsum est, & damnatum à Joanne XXII. 2. subditum fuisse Dominis temporalibus, & tributum ipsis debuisse; quod tamen negat Matth. 17.

Nego sequelam. Primò namque aliud est esse Regem, aliud habere proprietatem quorundam bonorum, qualem habent etiam privati. Joannes autem XXII. damnavit eos, qui asseriebant Christianos nihil possidere tanquam proprium, nec Christum habuisse dominium loculorum, quos Judas portabat. Secundò, cùm unica persona eaque divina in Christo sit agnoscenda, sequitur ipsum, etiam ut homo est, non fuisse subditum Dominis temporalibus, nec debuisse ipsis tributum.

Faten-

Fatendum tamen est probabilitate non carere eorum Theologorum sententiam, qui docent Christum, etsi regię potestatis temporalis actum non exercuerit, cum videretur contrarius fini Incarnationis, scilicet hominum saluti, quam consequi non possunt, nisi contemptu rerum temporalium; tamen jure fuisse Regem temporalem, & totius orbis Dominum, cum ex dictis capite primo esset Filius Dei naturalis, etiam ut homo: sed hanc potestatem ad ministros non transtulisse; quia est potestas excellentię ipsi propria sicut potestas instituendi Sacramenta, & dimittendi peccata absque usu ullius signi.

§. IV.

Christus est Legislator.

Ita definivit Concilium Tridentinum sess. 6. Can. 21. contra Lutherum: *Si quis dixerit Christum Jesum à Deo hominibus datum fuisse ut Redemptorem, cui fidant; non etiam ut Legislatorem, cui obediant; anathema sit.* Et Can. 19. *Si quis dixerit, nihil præceptum esse in Evangelio præter fidem; cætera esse indifferentia, neque præcepta, neque prohibita, sed libera; aut decem præcepta nihil pertinere ad Christianos; anathema sit.*

Probatur ex Scriptura, Joan. 14. *Si diligitis me, ait Christus, mandata mea servate.* Multa autem de moribus sanxit, præter ea, quæ fidem spectant. 1. Legem naturalem, quæ Decalogo continetur, ad Christianos maximè pertinere declaravit Matth. 5. *Non veni, inquit, legem solvere... donec transeat cælum & terra, jota unum, aut unus apex non præteribit à lege, donec omnia fiant.* Id

est, quæ magis fixa sunt & stabilita, potius à suo statu dimovebuntur, quàm quid minimum legis naturalis, utpotè ab æterna & incommutabili veritate profectæ, immutetur. 2. Eandem legem magna ex parte in mentibus non solum Gentilium, sed & Judæorum, veluti oblitteratam restituit, explanavit, perfecitque. Nam Gentilibus etiam Philosophis, Judæis quoque satis erat, si modus imponeretur appetitui vindictæ, voluptatis, & cupiditatis. Philosophus, inquit Tertullianus, non abstinet à toto, sed à tanto; Christus verò omnem consensum superbiæ, carnis illecebris, & cupiditati damnavit: *Ego autem vobis dico, diligite inimicos vestros, benefacite his, qui oderunt vos. Attendite, ne justitiam faciatis coram hominibus, ut videamini ab eis: non potestis Deo servire & mammonæ; ideo dico vobis, ne solliciti sitis, quid manducetis. Væ vobis divitibus, quia habetis consolationem vestram. Væ vobis, qui ridetis. Hinc dilectionis mandatum alioquin vetus, 1. Joan. 2. (cùm ad legem naturalem pertineat) propter novam explicationem dicitur novum. Joan. 13. de hujusmodi interpretationibus sic loquitur Legislator noster: Qui solverit unum de mandatis istis minimis, (minimis, inquam, quia talia videntur mundanis hominibus, & propter perfectionem duntaxat consulenda; cùm sint mandata gravissima) minimus vocabitur in regno cælorum, hoc est vilissimus, &, ut expouunt S. Chrysostomus & Theophylactus, nullus, & indignus regno cælorum: ait enim Christus: Nisi abundaverit justitia vestra plusquam Scribarum & Pharisæorum, non intrabitis in regnum cælorum. At deinceps explicat, quid ultra præstare debeant ejus discipuli, nempe comprimendos esse omnes iræ*

iræ & concupiscentiæ motus, & terrenorum affectus. Multas insuper leges tulit de Baptismo, de Eucharista, de Matrimonio & aliis Sacramentis.

§. V.

Christus est Judex.

Probatur ex Scriptura, Joan. 5. v. 22. *Neque enim Pater judicat quenquam, sed omne judicium dedit Filio, ut omnes honorificent Filium, sicut honorificant Patrem.* Et v. 27. *Potestatem dedit ei judicium facere, quia Filius hominis est;* Hoc est, quia homo factus est, & eatenus hominum Salvator, Pastor, Rex, & legislator; Salvatoris enim est optemperantes sibi in gloriam adducere, contemptores excludere; Pastoris oves ab hædis segregare; Regis rationem à subditis exigere, & jus unicuique dicere; Legislatoris denique, transgressores pœna afficere, obedientes præmio donare. *Forma illa erit Judex, inquit Sanctus Augustinus, qua stetit sub Judice; illa judicabit, quæ judicata est: judicata est inique, judicabit justè.*

Dices 1. Joan. 12. sic loquitur Christus: *Si quis audierit verba mea, & non custodierit: ego non judico eum; non enim veni ut judicem mundum, sed ut salvificem mundum.* Et cap. 8. de Patre ait: *Est qui quærat & judicet.* Ergo non Christus, sed Pater omnium est Judex.

Distinguo antecedens: non judico in primo adventu, Concedo; *non enim venit judicaturus, sed judicandus;* in secundo adventu, Nego antecedens. Sanctus Augustinus libr. de Trinitate cap. 13. alia ratione textus laudatos conciliat; *Secundum quod Deus est, judicat, hoc est ex potestate divina,*

non humana; & tamen ipse homo judicaturus est sicut Dominus gloriæ crucifixus est. Itaque utrumque dici potest, & Filius hominis judicabit, scilicet potestate sibi delegata, & non Filius hominis judicabit, potestate primaria & principali, ut verum sit, quod ait Joan. 12. Ego non judico. Nam secundum id quod in judicio non forma Dei, sed forma Filii hominis apparebit, nec ipse Pater judicabit; secundum enim hoc dictum est, Pater non judicat quenquam . . . Patrem non videbit in judicio mortuorum, sed omnes Filium, quia Filius hominis est, ut possit ab impiis videri, cum & illi videbunt, in quem pupugerunt.

Dices 2. Joan. 3. legitur: Qui non credit, jam judicatus est: Ergo Christus non est Judex Infidelium; & ita docent Lactantius, sanctus Augustinus & alii Patres.

Distinguo antecedens: jam judicatus est, tum per legem, cui manifestè contradicit; tum per judicium discretionis, quo omnes reum illum facile pronuntiant, Concedo: hoc sensu ait Christus Joan. 12. Qui spernit me, & non accipit verba mea, habet qui judicet eum, sermo quem locutus sum, ille judicabit eum in novissimo die. Jam judicatus est per sententiam Judicis, judicio condemnationis, Nego antecedens; licet enim reus nulla tergiversatione crimen excusare possit, omnesque illum judicent dignum morte; nihilominus fitti debet coram Judice excepturus damnationis sententiam. Stabunt ergo ante tribunal Christi etiam Infideles, & infantes, qui sine baptismo decesserunt, non quidem ut vita æterna indigni declarentur; de iis enim dubitare fas non est, cum non pertineant ad Corpus Christi, quod est Ecclesia; sed ut damnationis judicium

cium subeant, fulminantemque Judicis vocem audiant : *Discedite à me maledicti.* Matth. 25.

Q. 1. *Christus estne iudex Angelorum?*

R. Omnes quoque Angeli ante Christi tribunal stabunt judicandi : Beati quidem, ut ministerii sui erga homines fideliter expleti, gloriam accidentalem publicè reportent: perduelles verò, licèt per crucem jam sint devicti, & cum suo Principe judicati, Joan. 16. v. 11. attamen rudentibus inferni detracti, in iudicium condemnationis reservantur, 2. Petri cap. 2. v. 4. scabellum sub pedibus Christi triumphantis subternendi insultantibus Justis, quos hætenus fuerant persecuti; scriptum est enim Sap. 5. *Tunc stabunt iusti in magna constantia adversus eos, qui se angustiaverunt.* Et prima ad Corinthios cap. 6. v. 3. *Nescitis quoniam Angelos iudicabimus?*

Q. 2. *Christus in iudicio videbitur ne etiam à reprobis in forma gloriosæ?*

R. Videbitur, Marc. 13. v. 26. *Tunc videbunt Filium hominis venientem in nubibus cum virtute multa & gloria,* Luc. 21. v. 27. *cum potestate magna & maiestate.* Et in Symbolo Nicæno, *Iterum venturus est cum gloria iudicare vivos & mortuos.* Idque videtur congruum tribus de causis. Primo, quia mediator, ut duas inter se dissidentes personas conciliet, hanc modo induit, modo alteram. Atqui Christus mediator noster in priori suo adventu nobis per omnia assimilatus est absque peccato, causam nostram agens apud Patrem. Ergo in posteriori partes Dei acturus, totus in Deum mutatus apparebit. Secundò, quia Christus nondum exaltatus est in mente Infidelium, adhuc contemnitur à reprobis propter humile vitæ institutum, quod

quod mortalis amplexus est. Oportet ergo ante ipsum jam sublimem, jam gloria circumdatum adducantur palpitantes, & ignibus liquecentes, ait Tertullianus, ut Redemptorem suum, qui tanta pro eis fecit & pertulit, agnoscant, exprobrantem audiant; & coram illo genuflectentes, ut scriptum est Philipp. 2. vers. 10. honorem, quem hactenus negaverant, palam & cunctis circumstantibus pendant. Quanta autem hæc futura sit illis pœna, exprimit Christus Luc. 23. vers. 30. his verbis: *Tunc incipient dicere montibus, cadite super nos; & collibus, operite nos.* Tertio, quia peccatores, qui arctiora Evangelii præcepta pro libidine interpretantes, & moribus sæculi accommodantes, vitam electorum æstimabant insaniam, convincendi sunt rerum eventu, vanam non fuisse iustorum spem. Hæc sunt spectacula Christianorum continuò imaginanda, inquit Tertullianus. Vide caput ultimum de spectaculis, ubi extremi iudicii apparatus vividis pingit coloribus; & memento verbi Domini Luc. 21. vers. 36. *Vigilate itaque omni tempore orantes, ut digni habeamini . . . stare ante Filium hominis.*

§. VI.

Christus est perfectus Dei & hominum Mediator.

Probatur, tum ex Scriptura, 1. Tim. cap. 2. *Unus mediator Dei & hominum homo Christus Jesus, qui dedit redemptionem semetipsum pro omnibus;* tum ex ratione; ille enim est perfectus Mediator, qui partium dissidentium naturas in se conjunctas habet, & omnia agit necessaria ad illas secum invicem conciliandas. Atqui talis est
Christus

Christus Dominus : *idcirco Mediator*, inquit sanctus Fulgentius cap. 12. lib. de Fide ad Petrum: *quia idem Deus atque homo verus, habens unam cum Patre divinitatis naturam, & humanitatis unam cum Matre substantiam.* Et sanctus Augustinus lib. 10. Confessionum capite 12. *Mediator inter Deum & homines oportebat, ut haberet aliquid simile Deo, aliquid simile hominibus.* Deinde omnia præstitit, quæ erant perfecti Mediatoris: fuit Dei interpretis apud homines, Joan. 1. v. 18. Conciliarius, Isa. 9. v. 3. advocatus apud Patrem, 1. Joan. 2. v. 1. sponsores se obtulit, & plenè satisfecit, ut diximus. Ergo est perfectus Mediator tum quoad substantiam, quod negant, qui duas in Christo naturas non admittunt; tum quoad operationem, quod ex parte rejiciunt Sociniani, quibus Christus est dumtaxat mediator, ex quo Dei extitit internuntius & interpretis.

Q. I. *Secundum quam naturam Christus est Mediator?*

R. Primò non est mediator secundum naturam humanam, quatenus intelligitur à Deo præcisa; quia per illam non potuit condignam, hoc est infinitam, exhibere satisfactionem: neque secundum naturam divinam; quia natura divina non potest satisfaciendo subjici. Est contra quosdam Lutheranos, quorum alii contendunt Christum esse Mediatorem penes naturam humanam, alii penes naturam divinam. Ergo Christus ante Incarnationem non fuit Mediator, nisi improprie, quatenus Verbum in sententia Veterum apparuit sanctis Patriarchis, ut Patris voluntatem ipsis declararet; eo sensu dicitur Gal. 3. v. 18. *lex ordinata in manu Mediatoris; quanquam*
verba

verba illa ad literam exponenda sint de Moyse, qui improprie fuit mediator, in quantum Dei interpres.

R. Secundò, Christus non est Mediator secundum utramque naturam simul. Est contra Calvinum. Probatur, quia natura divina non potest obire munera Mediatoris; puta supplicare, sacrificium offerre, &c.

R. Tertiò, itaque Christus est Deus & hominum Mediator, quatenus Homo Deus, ita tamen ut per naturam humanam Verbo subsistentem omnibus Mediatoris officiis perfunctus sit. Responsio patet ex præcedentibus; namque homo est nomen concretum significans subjectum & formam, seu Verbum ut terminans naturam humanam. Atqui hic homo medius est inter Deum & homines; per subsistentiam enim habet quid simile Deo, & per naturam humanam aliquid simile hominibus: per naturam humanam preces fudit, obediens fuit usque ad mortem, quæ fuit meriti infiniti propter subsistentiam divinam. Ergo persona divina fuit principium *quod* mediationis Christi, & natura humana principium *quo*. Unde S. Augustinus tractatu 72. in Joan. ait. *Mediator Dei & hominum, non in quantum Deus, sed in quantum homo est Christus Iesus.*

Q. 2. *Esse mediatorem, estne ita Christi proprium, ut nulli creaturæ convenire possit?*

R. Solus Christus potuit esse perfecte & proprie Mediator; quia solus partium dissidentium naturas conjunctas habet, solus quoque potuit obire omnia mediatoris officia, puta offerre pretium offensæ æquivalens. Improprie tamen & imper-

imperfectè alii possunt esse mediatores, quia nonnulla mediatoris mûnera præstare possunt, v. g. pro aliis apud Deum intercedere, ejusque voluntatem declarare. Nobis ergo unus est propriè mediator, nempe Christus Jesus, plures verò imperfecti & ministeriales, Christi nomine & meritis agentes, puta Pastores, Angeli, & quicunque pro nobis apud Deum intercedunt. Unde Theologi hic differere solent de cultu & invocatione Sanctorum, ac de veneratione sanctarum Imaginum : quem morem sequemur, priusquam attingamus Tractatum de Gratia, quæ est effectus Incarnationis, & tanquam spiritus vitæ, quem Christus, hominum Caput, diffundit in membra sua. Sit
itaque

**AP.**



APPENDIX

DE CULTU ET INVOCATIONE SANCTORUM,

Ac

De veneratione Reliquiarum & sanctarum
Imaginum.



CAPUT PRIMUM.

Texitur Catalogus Hæreticorum, qui in hac
parte à vero recesserunt.

Primò ex schola Simonis Magi prodierunt Gno-
stici, qui Platoniorum vestigiis inhærentes,
docuerunt administrationem Universi Ange-
lis, quos illi Philosophi Genios & inferiores De-
os vocabant, esse demandatam, ac proinde vota
nostra & sacrificia ad eos dirigenda. Hunc erro-
rem carpit Apostolus, Col. 2. v. 18. *Nemo vos se-
ducatur, volens in humilitate & Religione Angelorum,
quæ non vidit ambulans, frustra inflatus sensu carnis
sue, (id est scientia ex proprio cerebro conficta)
& non tenens Caput, scilicet Christum, ex quo to-
tius corpus . . . constructum crescit. Quæ posteriora
verba, non tenens Caput, manifestè demonstrant il-
los Hæreticos à Christo Domino suos discipulos
avertisse ; & ita sanctus Chrysostomus interpre-
tatur. Sunt quidam, inquit, qui dicunt non posse per
Chri-*

Christum adduci, sed per Angelos. Hunc superstitionis cultum damnavit Concilium Laodicenum in Phrygia, Can. 34. & contra hunc statuit Can. 51. legitimam Sanctorum Martyrum venerationem. Unde patet ignorantia, vel potius mala fides Novatorum, qui hoc Apostoli textu Sanctorum cultum proscribi contendunt. Sed ad obstruendum os loquentium iniqua, audiendus est Theodoretus, qui tum in hunc locum, tum lib. 3. hæreticarum Fabularum cap. 4. sic scribit: *Illi (Simon & ejus discipuli) hoc consulebant, utique humilitate utentes: dicentes universorum Deum nec cerni nec comprehendere, nec ad eum posse perveniri; & oportere per Angelos divinam sibi benevolentiam conciliare. Quocirca Synodus, quæ convenit Laodiceæ, quæ est Phrygiæ Metropolis, lege prohibuit, ne precarentur Angelos, & in bodieman usque diem licet videre apud illos & eorum finitimos oratoria sancti Michaelis.* Sanctus quoque Epiphanius de hæresi Simonis ait ipsum docere, *non posse salvari aliquem, nisi sacrificia Patri universorum per eos principatus & Potestates obtulerit.* A qua impietate quantum abhorreat Ecclesia Catholica nemo non videt.

Secundo, Manichæi tertio sæculo omnem Sanctorum cultum respuerunt, objeceruntque Catholicis, teste Sancto Augustino, quod pro diis Gentium Martyres invexissent. Agnoscebant ergo illi Hæretici sua ætate cultum Sanctorum in Ecclesia Catholica celebrem fuisse. Manichæorum errorem amplexus est quarto sæculo in Oriente Eunomius Arianus, & Vigilantius in Occidente, contra quem scripsit Sanctus Hieronymus.

Tertio, signum Crucis, quod à Catholicis manuum agitatione exprimi solet, deriserunt iidem

Manichæi, ex sancto Augustino lib. 6. contra Faustum, & alii recentiores Manichæi in Galliis, apud Pitæum in Historia Aquitanica.

Quarto, Amalarius nono sæculo refert lib. de Officiis Ecclesiasticis cap. 14. quorundam errorem statim extinctum, qui veram Christi Crucem ita honorandam censebant, ut reliquas ad ejus similitudinem efformatas rejicerent. Alii paulò post eruperunt, qui duce Claudio Taurinensi Episcopo, tam veram, quàm cæteras cruces conculcarent. Hujus impietatis in Oriente socii extiterunt Pauliciani à quodam Paulo sic nuncupati, veterum Manichæorum propago. Hos secuti sunt in Occidente undecimo sæculo Henriciani seu Petrobrussiani; duodecimo wiclefistæ.

Quintò, Reliquiarum sanctarum hostes extitere quarto sæculo in Oriente Eunomius Ariannus; in Occidente Vigilantius, qui, teste sancto Hieronymo, Catholicos per contemptum Cinerarios vocabat, imò & idololatrias.

Sextò, sacras Imagines impugnarunt, primò Judæi ex peculiari suæ legis instituto. Deinde Mahumetani, quorum secta prodiit septimo sæculo. Ex Christianis Manichæi, teste Tharasio Episcopo Constantinopolitano, actione quarta Concilii septimi. Sed præ cæteris Leo Isaurus Imperator, à quodam Judæo deceptus, anno 730. publico edicto tanto furore in sacras Imagines debacchatus est, ut Iconomachorum Princeps merito habeatur. Impietatem paternam Constantinus Copronymus toto conatu profecutus est, Episcopos ex diversis Provinciis num. 338. Constantinopoli congregavit, jussitque ab iis abrogari imagines Anno 754. Legatos insuper misit
ad

ad Pipinum Francorum Regem, ut eum in sceleris societatem petraheret. Verum Pipinus in conventu hac de causa Gentiliaci habito anno 767. Imperatorem per eosdem Legatos ab errore revocare conatus est, frustra tamen; nam præconceptum in Imagines odium Copronymus non deposuit, filium quoque, nomine Leonem, pertinaciæ suæ simul & imperii hæredem reliquit.

Leoni Isauro obstiterunt, in Oriente Sancti Joannes Damascenus, & Germanus Patriarcha Constantinopolitanus; in Occidente Gregorius II. in Synodo Romana, & Gregorius III. in Concilio 93. Episcoporum anno 732. ex Anastasio in ejus vita. Stephanus IV. quoque damnavit anno 769. conciliabulum Iconomachorum Constantinopoli jussu Copronymi coactum ex eodem Anastasio.

Tandem Constantinus pius Imperator, cum Irene matre, collapsum in Oriente Imaginum cultum restituere curavit; ipso agente septimum generale Concilium anno 787. inchoatum est Constantinopoli, & absolutum Nicææ, unde dictum est Nicænum secundum. Præfuit Adrianus I. per suos legatos. In hoc Concilio duo sancita sunt: primum, Imagines Christi & Sanctorum collocari posse in Templis: secundum, eas licitè coli. *Definimus, inquit Patres, cum omni cura & diligentia venerandas sanctas Imagines ad modum & formam venerandæ Crucis, coloribus aut alia quavis materia paratas dedicandas esse, in Templis Dei collocandas & honorandas, ut scilicet per hanc Imaginum picturam inspectionem omnes, qui contemplantur, ad prototyporum memoriam veniant, illisque salutatio-*

nem & honorariam adorationem exhibeant, non secundum fidem nostram, veram latrariam, quæ solum Deo competit, sed quemadmodum venerandæ & vivificantis Crucis typo, & sanctis Evangeliiis, & Reliquiis sanctis, & oblationibus tribuimus, luminaria reverenter accendimus Imaginem enim honor in prototypum resultat, & qui adorat Imaginem, adorat quoque descriptum argumentum.

Septimi Concilii acta in Gallias allata multis ex capitibus impugnata & damnata fuere. Primò, quia vitio Interpretis verba Constantini Cyprii Episcopi actione tertia sic legebant, ut constat ex libro tertio Carolino, cap. 17. *Suscipio & amplector honorabiliter sanctas & venerandas Imagines secundum servitium adorationis, quod Trinitati emitto*: cum habeatur in textu originali, *adorationem verò, quæ sit secundum latrariam, soli Trinitati emitto*. Secundò, quia in illis actis nomina quædam Gallis insolita, & honorificentiora Imaginibus ascripta erant. Tertiò, quia certi venerationis ritus imaginibus decernebantur, quos augustiores nostri censebant. Propterea prodiit famosum opus sub Caroli Magni nomine in quatuor libros distinctum, qui Carolini libri nuncupantur. In hoc autem opere, præter cultum latrariæ, quem Galli imaginibus à Concilio delatum existimabant, arguuntur, 1. nomina adorationis, religionis, servitii, imò & venerationis, quibus exprimitur cultus Imaginum: 2. luminaria, thimiamata, oscula, salutationes in cultu Imaginum à Concilio invecæ: 3. comparationes Imaginum à Patribus Nicænis institutæ cum Cruce Domini, Reliquiis Sanctorum, vasis sacris, & Speciebus Eucharisticis: 4. virtus sanctificandi, quam

quam Patres Nicæni Imaginibus tribuere videbantur.

Carolus selecta hujus operis capita misit ad Adrianum, qui nondum Synodum Nicænam confirmaverat, omnia ejus judicio subjiciens. Summus Pontifex in responsione sua ad Carolum, quæ habetur tomo septimo Conciliorum, laudat ejus fidem & doctrinam, quamvis non ea omnia amplecteretur à Patribus Nicænis definita circa cultum Imaginum; quæ tamen Adrianus testatur se probare pro Ecclesiæ Romanæ consuetudine. Sed quod mirum est, non notat, nec arguit interpretis lapsum, ex quo tamen Caroli animus offensus fuerat. Quare cum circa illud tempus Francofordiense Concilium celebraretur in causa Felicis definientis Christum esse Filium Dei adoptivum; Carolus ad illud transmitti curavit acta Concilii Nicæni in scitia Interpretis adulterata, de quibus Patres Francofordienses, præsentibus Legatis Summi Pontificis, sic habent Canone secundo: *Allata est in medium quæstio de nova Græcorum Synodo, quam de adorandis Imaginibus Constantinopoli fecerunt, (inchoata enim est Constantinopoli illa Synodus) in qua scriptum habetur, ut qui Imaginibus Sanctorum ita ut Deificæ Trinitati servitium aut adorationem non impenderent, anathema judicarentur, qui supra sanctissimi Patres omnimodis adorationem & servitium renuentes contempserunt, atque consentientes damnaverunt.* Non audiendæ hic Novatorum conjecturæ contra expressissima Concilii verba, quasi verisimile non sit Episcopos ex universo ferè Occidente congregatos, non percepisse genuinum Concilii Nicæni sensum, maximè præsentibus

summi Pontificis Legatis : unde concludunt Imagines à Patribus Francofordiensibus prorsus fuisse rejectas. Fortè enim Legati non sunt auditi reclamantes : vel ideo non reclamarunt, quia non habebant acta sana, sicut nec ipse Adrianus videtur tunc temporis habuisse ; cum enim in citata sua epistola ad Carolum Magnum scribat verba Constantini Cyprii benignè esse accipienda, supponit ipsum ea revera protulisse, quod tamem falsum est. Nec mirum quod in Galliis Concilium Nicænum tam citò receptum non fuerit ; cum illud Adrianus nondum confirmasset, tum ex sua epistola ad Carolum, tum ex epistola Hincmari Remensis ad Hincmarum Laudunensem.

Ludovicus pius, Caroli filius, & in imperio successor, acceptis litteris Michaelis Balbi Imperatoris Constantinopolitani, in quibus se Catholicum simulans, testabatur se abstulisse à conspectu vulgi quasdam Imagines, superstitioni magis obnoxias, retinuisse verò ad recordationem eas, quæ in sublimioribus Ecclesiæ locis positæ erant ; plures Episcopos Parisiis congregavit, qui variis sanctorum Patrum sententiis collectis, statuerunt, propter amorem Sanctorum, imagines in Ecclesia honorificè servandas esse, non tamen colendas, ut *Romæ ac potissimum in Græcia fiebat*. Hanc autem collationem Ludovicus ad Eugenium II. per Jeremiam Senonensem & Jonam Aurelianensem misit cum epistola ad eundem summum Pontificem scripta, quæ habetur tomo septimo Conciliorum. Bellarminus & alii benemulti, contra fidem antiquissimorum mancriptorum, & Auctorum noni sæculi, contendunt hanc

hanc Parisiensem Synodum esse confictam ab Heterodoxis, cum illorum opera, acta ejus in lucem non prodierint, nisi sexto-decimo exeunte sæculo. Sed præterquam quod illa Synodus insistat iis, quæ Carolus tradiderat in suis libris Carolinis, Jonas Aurelianensis & Theodemirus Abbas Dungalus, qui præ cæteris insurrexerunt contra Claudium Taurinensem sub id tempus Imagines & Cruces confringentem, eandem tenuerunt viam mediam inter Iconomachos, Imaginum contemptores ac confractores, & Græcos simul, & Italos, impendentes Imaginibus cultum nimis effusum (ut ipsis videbatur) juxta gentis suæ morem & doctrinam in libris Carolinis & conventu Parisiensi explicatam; docueruntque 1. Imagines non esse confringendas: 2. in Templis esse collocandas, & honorificè servandas ob memoriam & amorem Sanctorum; & ad hoc probandum, laudant, sicut Synodus Parisiensis, epistolas Sancti Gregorii ad Januarium & Secundinum, in quibus Sanctus Pontifex præcipit honorari sanctas Imagines, ut patebit ex dicendis. Et hæc contra Claudium Taurinensem & cæteros schismaticos Iconomachos. Contra Græcos verò & Italos, salva tamen pace & unitate, cum hæc quæstio disciplinam spectet, sic scribit Jonas tomo quarto Bibliothecæ: *Illi, qui nimio & indiscreto amore ob honorem Sanctorum, eorum Imaginibus supplicant, nescio an temerè idololatras sint vocandi; videntur sanè ab hac superstitione, adhibito rationis moderamine, revocandi potius, quàm idololatras nuncupandi.* Dungalus quoque eodem tomo quarto Bibliothecæ, postquam Claudium Taurinensem reprehendit, quòd assereret simi-

liter esse idololatrias, qui idola adorant, & qui Imagines Christi & Sanctorum ejus pingunt & venerantur pro amore & honore Salvatoris & electorum ejus, quos & ipsos, licet longè inferius, diligunt tamen & honorant; negat cum Concilio Parisiensi Imagines esse in Templis ob ullum Religionis cultum, sed ob memoriam Sanctorum. Nimirum Scriptores illius sæculi duo spectabant. Primum, Deum solum esse propriè Religionis objectum, ac proinde illi soli exhibendum religiosum cultum, quod expendemus capite sequenti. Secundum: Imagines non esse propter materiam retinendas & honorandas, sed solum propter memoriam: proptereaque non ferebat eas comparari Reliquiis Sanctorum & vasis sacris, quæ aliquid sanctitatis hauriunt, illæ ex anima sancta, cujus fuerunt organa & instrumenta; ista ex corpore Christi, quod in ipsis fuit repositum. Atqui inde deducebant, nec luminaria esse accendenda, nec thimiamata incendenda Imaginibus Sanctorum, sicut Reliquiis eorum. Hoc argumentum fusè profequitur Carolus in citato opere, exemplis adductis picturarum, in quarum altera repræsentatur Mater Dei a fello vesta, altera autem Venus, quæ mutata inscriptione evadet imago beatæ Virginis: ex quibus concludit materiam non spectari in Imaginibus sicut in sacris Reliquiis; cum imago a felli, Veneris, & beatæ Virginis sint ejusdem materiæ, ac proinde luminaria non esse accendenda coram Imaginibus Sanctorum, sicut coram eorum Reliquiis; eas tamen honorificè servandas, sed duntaxat ob eorum memoriam, amorem & honorem.

Walfri-

Walfridus quoque Strabo eodem sæculo, lib. de rebus Ecclesiasticis, c. 8. damnat Græcos & Romanos mores, quibus spiritualis cultus Imaginibustribuebatur; concluditque contra Iconomachos: *Cum itaque, inquit, talis sit Christiani perfectio sensus, non sunt omnimodis honesti & moderati Imaginum honores abjiciendi.* Similia tradit Agobardus Lugdunensis; & Flodoardus lib. 6. Hist. refert Hincmarum Remensem scripsisse librum flagitantibus Episcopis, qualiter Imagines Salvatoris, & Sanctorum venerandæ sint.

Ex his sequitur primò, libros Carolinos & Conventum Parisiensem fideliter exponere, quæ esset Gallorum mens circa Imagines. Secundò, Gallos tunc temporis non dissensisse à Græcis & Italis in dogmate, sed in quibusdam duntaxat circumstantiis, quæ sensim sine sensu apud illos obtinuerunt. Tertiò, Gallos in Claudio Taurinensi expugnasse Novatores hujus temporis, & à sua cummunione exclusisse; cum se discipulos ejusdem Claudii profiteantur. Non modò ergo illis non patrocinantur libri Carolini, Conventus Parisiensis, & alii novi sæculi Scriptores, ut ipsis contra adversentur. Agobardus quidem stimulatus falsa Michaelis Balbi narratione, plebem apud Orientales superstitiosam & idololatram fieri occasione Imaginum, scripsit, satius non pingi Imagines. Sed Dallæus Novatorum nostrorum Pseudopastor illo testimonio uti non potest ad confringendas Imagines, cum in Ecclesia Romana hujusmodi non existat abusus, nisi fortè apud paucos incuria Pastorum.

Iconomachorum errorem ubique proscriptum duodecimo sæculo renovarunt Valdenses,

Petrobrussiani, Henriciani, & Albigenfes; decimo quarto sæculo Hieronymus de Prago in Concilio Constantienſi damnatus & crematus; & decimo ſexto ſæculo Lutherani & Calviniani amplexi ſunt inſuper impietatem Manichæorum, Vigilantii, & aliorum hujusmodi Hæreticorum, circa cultum Sanctorum & Reliquiarum, imo & pretioſiſſimæ Crucis Domini, adeo ut ſectas eorum dixerim ſentinam, in quam omnium hæreſeum fordes confluunt. Quòd ſi præcedentium Hæreticorum traditionem prætendant; indeque gloriantur, gloria illa vertitur in confuſionem ipſorum; cùm impietates illæ, ubi prodierunt, continuo fuerint proſcriptæ ab Eccleſia: cui reſiſtere inſolentiſſimæ eſt inſaniæ, ait Sanctus Auguſtinus.

CAPUT II.

Exponitur Eccleſiæ doctrina circa cultum Sanctorum.

Primò, Sancti digni ſunt honore; quia honor definitur, teſtificatio excellentiæ alicujus: ergo qui excellentiam aliquam præſeferunt, digni ſunt hujusmodi teſtificatione. Atqui ſanctitas, quæ in Sanctis refulget, eſt eximia excellentia: ergo Sancti revera digni ſunt honore & veneratione.

Secundò, Sanctis licitè & non eſtè honos deferri poteſt. Hæc propoſitio ex præcedenti neceſſariò ſequitur; ſicut enim rectè vituperari poteſt, qui vituperio eſt dignus: ſic colere licet eum, qui cultu cognoscitur dignus. Nec deſunt in

in Scripturis exempla cultus Sanctis delati. Josue c. 5. v. 14. cecidit pronus in terram coram Angelo, adorans eum. Apoc. 19. v. 10. & 22. v. 9. Sanctus Joannes cecidit ad pedes Angeli, ut adoraret eum, id est, veneraretur; adoratio enim sumitur aliquando latius pro quacunque honoris exhibitione, quo sensu legitur 3. Reg. cap. 1. Bethsabée adorasse Regem: & Abraham Gen. 23. adorasse populum terræ: aliquando strictius pro cultu supremo, qui latria dicitur, ut Matth. 4. *Dominum Deum tuum adorabis.* Angelus quidem respuit honorem à Sancto Joanne sibi delatum, non ut sacrilegum & illicitum, absit enim, ut suspicemur in eo peccasse aut errasse Evangelistam: sed pro sua modestia & observantia in tantum virum, etsi natura minorem, dignitate tamen Apostolatus, sanctitate & gloria martyrii sibi non imparem, fortè etiam majorem.

Veritatem his duabus propositionibus contentam non inficiantur nostri Novatores; sic enim scribit Molinæus: *Qu'il honorent les Saints, & les proposent pour exemple, mais qu'ils ne les invoquent pas.* Et Rex Angliæ in sua responsione ad Cardinalem Perroneum: *Sa Majesté vénere les Martyrs & autres Saints regnans maintenant avec Jésus Christ, & ne doute point qu'ils ne prient pour les necessitez de l'Eglise, & croit fermement que leurs prieres ne sont point inutiles.* Dallæus quoque in sua Apologia: *Cette Rome même, dont nous nous plaignons, est pour la plupart d'accord avec nous: car bien qu'elle rende de grands honneurs à diverses creatures: si est-ce qu'elle a toujours connu qu'il y a une certaine espece de service qui ne doit, qui ne peut être rendu à autre qu'à Dieu; c'est ce qu'elle appelle communément l'adoration de latrie,*

latrie, pour la distinguer d' avec les autres qu' elle croit pouvoir deferre à ce qui n' est pas Dieu. *Vulgus ergo Calvinistarum definat Catholicos infectari tanquam idololatrias, propter cultum Sanctorum; nec eo prætextu schismate à nobis separentur. At, inquit, nimis effusus est ille cultus. Hoc superest expendendum. Itaque*

Q. 1. Qualis cultus licitè potest exhiberi Sanctis?

R. Talis, qui respondeat eorum excellentiæ, quæ est cultus motivum & ratio: ergo diversus esse debet cultus & honor pro diversitate excellentiæ, ut observat sanctus Thomas 2. 2. quæst. 104. ad 3.

Q. Quotuplex distinguitur excellentia?

R. Duplex, alia increata Dei propria, quatenus est rerum omnium primum principium & supremus Dominus; juxta illud Malachiæ 1. Si ergo Pater ego sum, ubi est honor meus? & si Dominus ego sum, ubi est timor meus? nempe reverentialis. Alia creata & participata, quæ in creaturis inesse potest.

Excellentia creata duplex est. Alia exurgit ex donis naturalibus, puta scientia, industria, potestate, qua nonnulli in Republica præcellunt. Alia ex donis supernaturalibus efflorescit, v. g. ex gratia sanctificante, qua homines amici Dei, filii ejus adoptivi & hæredes constituuntur. Et hæc rursus duplex est: alia communis est omnibus Sanctis, propter gratiam sanctificantem: alia singularis, & propria beatæ Virgini, propter dignitatem Matris Dei & affinitatem cum Verbo incarnato, qua supra ceteras creaturas eminet.

Debe-

Debetur excellentiæ increatæ latria, quæ est omnimoda servitus, ut dictum est, creatæ verò dulia, quæ est etiam aliqualis servitus, juxta illud Gal. 5. *Per Charitatem spiritus servite invicem.* Et Rom. 12. *honore invicem prævenientes.* De utroque cultu disertè sanctus Augustinus lib. 20. c. 21. contra Faustum Manichæum. *Colimus Martyres, inquit, eo cultu charitatis & societatis, quo & in hac vita coluntur sancti homines Dei ... at illo cultu, qui Græcè latria dicitur, Latine uno verbo dici non potest, cum sit quædam propriè divinitati debita servitus, nec colimus, nec colendum docemus, nisi unum Deum.* Cum autem ad illum cultum pertineat oblatio sacrificii, unde idololatria dicitur eorum, qui hoc idolis exhibent, nullo modo tale aliquid offerimus, aut offerendum præcipimus, vel cuiquam Martyri, vel cuiquam animæ sanctæ, vel cuiquam Angelo: & quisquis in hunc errorem delabitur, corripitur per sanam doctrinam, sive ut corrigatur, sive ut caveatur. Quo autem cultu, quove fructu Martyres honorentur, eodem c. describit Sanctus Doctor. *Populus Christianus, inquit, memorias Martyrum religiosa solemnitate celebrat, & ad excitandam imitationem, & ut meritis eorum consocietur, atque orationibus adjuvetur; ita tamen, ut nulli Martyrum, sed ipsi Deo Martyrum, quamvis in memorias Martyrum, constituamus altaria. Quis enim Antistitum in locis Sanctorum corporum assistens altari, aliquando dixit: Offerimus tibi Petre, aut Paule, aut Cypriane?* Hactenus Sanctus Augustinus demonstrans contra Manichæorum criminationes, nihil in cultu Sanctorum idololatriam sapere.

Idem præstat sanctus Doctor libro octavo de Civitate Dei cap. 26. contra Paganos; qui similiter exprobrabant Catholicis quasi cultum
Ido-

Idolorum in cultum Martyrum convertissent. Sed, inquit, hoc videtur dolere (*Trismegistus*) quod memoriae Martyrum nostrorum templis eorum delubrique succederent, ut videlicet qui hæc legunt animo à nobis averso atque perverso, putent à Paganis deos cultos fuisse in templis, à nobis autem coli mortuos in sepulchris. Et cap. 27. nec tamen nos eisdem Martyribus templa, sacerdotia, sacra & sacrificia constituimus. Quis enim audivit aliquando *Fidelium* stantem Sacerdotem ad Dei honorem cultumque constructum dicere in precibus; Offero tibi sacrificium, *Petre, Paule, vel Cypriane?* quæcunque igitur adbibentur Religiosorum obsequia in Martyrum locis, ornamenta sunt memoriarum, non sacra vel sacrificia mortuorum tanquam deorum. Quicumque etiam epulas suas eò deferunt sanctificari ibi eas volunt per merita Martyrum in nomine Domini Martyrum. Et lib. 22. cap. 8. refert Reliquias Sanctorum honorificè circumgestari solitas, flores & vestimenta ex earum contactu virtutem hausisse; peregrinationes ad Sanctorum memorias fuisse susceptas, ibique plura miracula patrata. Ex quibus patet qua fronte, quave impudentia Novatorum Pseudoministri sectatorum suorum auribus ingerere audeant, Ecclesiam Catholicam posterioribus sæculis à primæva sua integritate defecisse, & in apertam idololatriam circa cultum Sanctorum miserè fuisse prolapsam. Quid enim Ecclesia in honorem Sanctorum nunc frequentat, quod prioribus sæculis non observaverit?

Enimverò Pseudoreformati Catholici obijciunt Basilicas in honorem Sanctorum extructas, Fidelium votis ornatas & lucupletatas, aras erectas,

etas, & in iis Reliquias Sanctorum conditas, & data occasione honorificè circumgestatas; sacrificia oblata cum Sanctorum commemoratione & invocatione; dies festos institutos & religiosè celebratos; peregrinationes susceptas, quasi virtus divina sit alicui loco alligata. Atqui hæc omnia Sanctus Augustinus in allatis textibus non solum testatur fuisse in usu prioribus sæculis, sed etiam tanquam sincera Christianæ pietatis officia laudat, vindicatque contra Gentilium & Manichæorum, ac consequenter Calvinistarum obtreptiones.

Quæ S. Augustinus in unum colligit, eadem sparsim referunt alii Patres ipso etiam antiquiores; Eusebius lib. 4. de vita Constantini; Sancti Chrysostomus, Ambrosius, Augustinus meminerunt Basilicæ in honorem Apostolorum à Constantino constructæ. De votis sic scribit idem Eusebius lib. 13. cap. 7. *Præparationis Evangel.* *Nos veræ pietatis milites Dei amicos honorantes ad monumenta illorum accedimus, vota que illis tanquam viris sanctis facimus, quorum intercessione ad Deum non parum juvari profitemur.* Theodoretus quoque lib. 8. ad Græcos: *Piè, inquit, fideliterque precatos ea maxime consequi, quæ desiderant, testantur illa, quæ votorum rei persolvunt; nam alii oculorum, alii verò pedum, alii manuum simulacra appendunt ex argento aurove confecta.* Festa in honorem Martyrum instituta testatur Ecclesia Smyrnenfis sæculo secundo apud Eusebium lib. 4. Hist. Origenes sæculo tertio, hom. 3. in diversa Evangelii loca, Concilium Laodicense Can. 51. de peregrinationibus religionis causa. Hieronymus epist. 17. ait: *Longum est nunc ab Ascensu Domini usque ad præ-*

præsentem diem per singulas ætates currere, qui Episcoporum venerunt Ierosolymam, putantes se minis religionis habere . . . nisi in illis Christum adorassent locis, de quibus primum Evangelium de patibulo coruscaverat. Et S. Chrysostomus hom. 16. in secundam ad Corinth. Nemo est, inquit, qui peregrinationem unquam inire sustineat, ut Imperatorum aulas videat: contra multi Imperatores peregrè profecti sunt, ut hoc spectaculo fruerentur; sanctorum enim Martyrum templa futuri iudicii vestigia & signa exhibent, dum dæmones flagris cæduntur, homines torquentur & liberantur. Nec virtus Dei magis alligari censenda est cineribus Apostolorum Petri & Pauli & aliorum Sanctorum, quàm umbræ & semicinctiis eorum, ad quæ Fideles recurrebant causa sanitatis consequendæ, Act. 5. & 19.

Objiciunt primò Pseudoreformati: Illa revera sunt idololatræ, qui creaturam religione colunt; solus enim Deus Religione colitur; atqui Catholici Sanctos religione colunt; ergo Catholici revera sunt idololatræ.

Respondeo 1. Ecclesiam nunquam definiisse Sanctos esse religiose colendos; sed meram esse Scholæ quæstionem, an cultus, qui eis exhibetur, pertineat ad religionem, an ad aliam virtutem; ac proinde Novatores eo capite schisma facere non debuerunt.

Respondeo 2. Distinguendo majorem. Illi sunt idololatræ, qui creaturam colunt religione propriè dicta, qua religamur primo principio & ultimo fini, Concedo: religione impropriè dicta, qua propter Deum honoramus res & personas sacras, v. g. Tempia, Ministros Deo consecratos,
viros

viros sanctitate conspicuos, & ideo viva Christi membra, Nego majorem; nam ex capite primo Jacobi: *Religio munda & immaculata apud Deum & Patrem, hæc est, visitare pupillos & viduas.* Vide S. Augustinum lib. 10. de Civitate Dei cap. 1. ubi hanc distinctionem fusè exponit.

Objiciunt 2. Quatuor primis sæculis Ecclesia non erigebat templa & aras Martyribus, nec in Sacrificio eos invocabat, ex S. Augustino lib. 22. de Civitate Dei cap. 10. Nos, inquit, *Martyribus nostris non templa fabricamus, nec ibi erigimus altaria, in quibus Martyribus sacrificemus; nec ibi à Sacerdote, qui sacrificat, invocantur.* Cum ergo nunc Ecclesia Romana Sanctis ædificet templa, in quibus construit altaria, & eos in Sacrificio invocet, palàm est in idololatriam corruisse, nec Fideles saluti posse consulere, nisi ab illa recesserint.

Distinguo antecedens: non erigebat templa & aras Martyribus ut eis sacrificaret, ut eos invocaret tanquam summum bonum, Concedo; invocare enim, ad mentem Sancti Augustini in Psalmos 30. 74. 85. & alibi, passim est Deum vocare in se; non erigebat templa & aras Martyribus in eorum memoriam, Nego antecedens. Cum ergo templum & ara ordinentur ad Sacrificium, quod soli Deo offerre licet, soli Deo ædificari possunt, nec alteri nunc ædificat, nec sacrificat Ecclesia. Sacerdos enim stans ad altare non dicit, *Offero tibi, Virgo Maria, &c. sed, Communicantes & memoriam venerantes inprimis gloriosæ semper Virginis Mariæ, &c. Hanc igitur oblationem servitutis nostræ . . . tibi offerimus pro his.* Nec idè precamur Sanctos, ut corda nostra possideant, sed ut apud Deum intercedant, quatenus

dignum ejus habitaculum efficiamur, expulso omni terreno affectu. Vulgò tamen dicuntur templa, aræ, Missæ Sanctorum, quorum specialis fit commemoratio. *Sanctorum Martyrum templa*, inquiebat supra sanctus Chrysostomus, *futura judicii vestigia & signa exhibent*. Sed propriè loquendo templa Dei sunt; quia illi soli Sacrificium offertur. *Nos Martyribus nostris non templa sicut Diis, sed memorias sicut hominibus mortuis ædificamus. Deo quippe, non ipsis sacrificat* (Sacerdos) *quamvis in memoriam sacrificet eorum, quia Dei Sacerdos est, non illorum*, Augustinus cit. cap. 10. lib. 22. de Civit.

Objiciunt 3. Apostolus Rom. 1. reprehendit Gentiles, quòd creaturæ servierint potius, quàm Creatori: & 2. Cor. 7. monet Christianos, ne fiant servi hominum: atqui cultus, quem Ecclesia Romana exhibet Sanctis, est dulia, hoc est vera servitus & soli Deo debita, ut advertit Sanctus Augustinus libro secundo Quæstionum super Exodum, num. 94. ubi expendens quod in illo libro legitur cap. 23. *Si servieris diis eorum, erunt tibi in offendiculum*, notat in textu Græco pro verbo *servire*, haberi *δουλῶν*, non *λατρεύων* subditque: *unde intelligitur, quia & dulia debetur Deo tanquam Domino; latria vero nonnisi tanquam Deo*. Ergo cultus ille est omnino improbandus, & prorsus rejiciendus, maximè cum plerique ex Catholicis in eo creaturæ potius serviant, quàm Creatori, ad quem in precibus suis vix attendunt, sed sua vota ferè omnia ad Sanctos dirigunt.

Respondeo primò ad majorem, Gentiles fuisse duplici ex capite reprehensione dignos: 1. quia creaturæ tanquam Creatori & ejus loco servie-

ferviebant, nempe cultu latriæ; 2. quia vel dæmones & homines in impietate defunctos, vel creaturas inanimes, ut solem & stellas colebant, in quibus etiamsi sit quædam excellentia, nostrum tamen non meretur cultum; quia, ut notat Sanctus Thomas, homo non debet subjici dæmonibus, nec hominibus damnatis & à Deo rejectis, nec creaturis irrationalibus ad ejus usum conditis. Colimus quidem Imagines inanimatas, sed cultu relativo duntaxat, hoc est, non propter earum materiam, sed propter similitudinem, quam habent cum exemplari: unde non res ipsa, sed prototypus in imagine honoratur. Sed de imaginibus postea. Textus autem primæ ad Corinthios non est ad propositum; nam Apostolus eo loco solum prohibet, ne Christiani liberi fiant mancipia Infidelium sine necessitate; præcipit verò his, qui ex conditione sua sunt servi, ut serviant dominis suis. *Servi, obedite dominis carnalibus . . . sicut Christo, non ad oculum servientes.* Eph. 6. v. 5. Col. 3. v. 22. Tit. 2. v. 9. & 1. Petri 2. v. 18. *Servi subditi esote in omni timore dominis, non tantum bonis & modestis, sed etiam discolis.* Unde

Respondeo secundò distinguendo minorem. Cultus, quem Ecclesia Romana exhibet Sanctis, est dulia seu servitus aliqua, Concedo: omnimoda & soli Deo debita, Nego minorem. Itaque velint nolint adversarii, est aliqua servitus creaturæ debita; nam famuli & subditi servire debent dominis suis, ex mox laudatis Scripturæ textibus, *Homo namque*, ait S. Thomas 2. 2. qu. 103. art. 3. *participat quandam similitudinem divini dominii, secundum quod habet particularem potestatem super aliquem hominem. Et ideo dulia, quæ debitam servitutem*

*exhibet homini dominanti, alia virtus est à latría. Porro dulia propriè dicitur inferioris ad superiorem, latè verò cujuslibet etiam superioris ad quemlibet observantia dignum, propter excellentiam, quæ in eo est; & hoc posteriori modo cultus Sanctorum dicitur dulia. Cum autem ex dictis diversa sit excellentia; alia incommunicabilis; qualis est excellentia Creatoris, propter quam cultus latríæ statuitur à S. Augustino ita creatoris proprius, ut nulli creaturæ communicari possit sine idololatría: alia communicabilis, qualis est excellentia dominii, quam superiores participant, ita tamen ut sit suprema & plenaria in Deo: hinc idem S. Doctor vult duliám deberi Deo tanquam Domino. Sed quemadmodum alia dulia in humanis debetur Regi, alia ejus Ministro: quia non eadem est in utroque excellentia & potestas: sic dulia, quæ exhibetur Domino increato, & omnipotenti; differt à dulia, quæ Ministris ejus competit: illa est omnimoda, hæc admodum limitata, sicut & eorum excellentia, quæ est honoris & cultus motivum ac mensura. Quare si excellentia refulgeat ex naturalibus Dei donis, qualis est potestas dominorum temporalium, debetur ei cultus civilis, & quidem distinctus secundum distinctos potestatis gradus: Regi tanquam præcellenti, inquit S. Petrus epist. 1. cap. 2. *ducibus tanquam ab eo missis*. Si ex donis supernaturalibus, & eminentioribus, qualis est sanctitas, respondet cultus Religiosus, (ex Sancto Augustino, citato libro vigesimo contra Faustum,) & longe perfectior, ut docet Sanctus Gregorius Nyssenus oratione in Sanctum Theodorum: *Cui Regum, inquit, talis honos exhibetur? Quis ex his, qui**

qui supra modum inter homines excellere nisi sunt, tali memoria celebratur? Quod si quis ex rudioribus creaturæ in his serviant potius quàm Creatori, ut contendunt adversarii, tales ab Ecclesia corriguntur, ubi ei innotuerint, nedum ab illa approbentur: nam ex Sancto Hieronymo epist. ad Riperium; *honoramus servos, ut honor servorum redundet ad Dominum.* Imò cultus, quem Ecclesia exhibet sanctis, continua est laus Dei & gratiarum actio pro beneficiis illis collatis per Jesum Christum Dominum nostrum, ut videre est in Officio Sanctorum.

Licet autem Sanctorum honos ad Deum referatur, attamen non proficiscitur ex eadem virtute, qua Deus colitur; quia, ut jam dictum est, diverso nititur motivo, nempe eorum excellentia, quæ infinitè distat ab excellentia increata, propter quam Deus colitur.

Nec dicas Deum & proximum eadem charitatis virtute diligere: nam idem est in Deo & proximo diligendi motivum, scilicet, infinita bonitas, quæ Deo inest, & cujus communicationem optamus proximo. Cum ergo infinita Dei bonitas, propter quam illum diligimus, sit ratio tota, cur proximum charitate diligamus, sequitur eandem specie charitatem ad Deum & proximum se extendere, quemadmodum eadem fidei virtute credimus Deum & omnia mysteria; quia in his nitimur uno motivo, nimirum veracitate Dei revelantis.

Quòd si proximum diligeremus propter dotes & virtutes ipsi proprias, puta propter scientiam, beneficentiam, morum suavitatem, tunc diversus esset specie amor; quia diversa esset amandi ratio,

sicut & diversus honos, qui ipsi impenderetur propter hujusmodi excellentias: verum amor ille non esset charitatis, sed alterius virtutis moralis. Unde patet proximum rariùs charitate diligi; cum plerique non divina bonitate, sed aliis rationibus ad illum diligendum moveantur. Sed de charitate postea, tom. 3.

Objiciunt 4. Ecclesia Romana cultum Sanctorum cum divino prorsus confundit, sacrificia in eorum honorem peragit, thymiama ipsis incendit, templa sic fulgent eorum stemmatibus, statuis, & luminibus coram eis accensis, ut non Deo; sed homini defuncto constructa videantur: atqui priusquam ejusmodi honores Sanctis concedantur, præcedere debet canonizatio, ut vocant, quæ speciem habet apotheosis Gentilium: ergo, inquirunt, justo & prudenti zelo hujusmodi cultum proscripsimus, ducti exemplo Ezechiae religiosissimi Principis, qui 4. Reg. c. 18. confregit serpentem æneum, licet jussu Dei erectum; quia filij Israel ipsi adolebant incensum.

Nego antecedens: nam honos generatim ex tribus actionibus efflorescit. Prima est intellectus, qui apprehendit excellentiam personæ. Secunda voluntatis, quæ se demittit & subjicit. Tertia corporis, puta laudes, capitis detectio aut inclinatio, munerum exhibitio, quibus exprimitur interior animi sensus & affectus. Prima actio per se cultum non constituit; dæmones enim cognoscunt Deum, nec eum colunt: requiritur tamen tanquam aliquid prævium ad honorem, quomodo enim prudenter eum coles, quem nescis honore dignum? Sine tertia etiam honos absolutè consistere potest; nam Spiritus incorporei in cælo Deum adorant
supre-

supremo latriæ cultu sine ullis signis corporeis, quæ necessaria sunt duntaxat, ut exterius testemur quod mente gerimus. Superest ergo ut collocetur honos in secunda actione, id est in voluntatis demissione & subjectione, ac proinde verus honos sine amore stare nequit. *Pietas*, inquit S. Augustinus in Psalm. 77. *cultus Dei est, nec colitur ille nisi amando; hoc enim colitur, quod amatur. Unde quia Deus rebus omnibus major & melior invenitur, plus omnibus diligendus est ut colatur.*

Jam verò si à genere descendamus ad species honoris, quæ sunt latria & dulia, statim elucebit eas infinito intervallo à se invicem distare, planeque distingui in Ecclesia Romana. Namque in cultu latriæ primò mens concipit Deum ut rerum omnium atque adeo Sanctorum primum principium, supremum Dominum & ultimum finem: ac eo titulo voluntas secundo loco se suæque omnia ei totaliter subjicit & devovet: in quo actu supremus cultus, qui à S. Augustino dicitur interius cordis sacrificium, essentialiter consistit. Tertiò corpus hujusce intimi sensus profert signa exteriora, erumpit in laudes infinitæ Dei excellentiæ & majestatis, templa & aras illi extruit, & Sacrificia offert, quæ sunt determinata latriæ signa. Adhibet etiam prostrationes, thymiamata, lumina, &c. quæ licèt per se signa sint latriæ & duliæ communia, cùm promiscuè usurpentur ad testandam reverentiam tum erga principes, tum erga res sacras; determinantur tamen ad latriam per prædictos actus mentis & voluntatis.

Quantum autem à latria distet Sanctorum cultus, patet expendenti actiones, ex quibus inte-

gratur ille honos. Namque 1. intellectus Sanctos repræsentat, non ut rerum auctores, sed ut Dei servos præstantioribus ejus donis cumulos, & eo feliciores, quo firmiùs ei adhærent & perfectiùs famulantur. Hinc 2. voluntas eo motivo mota & determinata se demittit, eisque propter Deum quodammodo se subjicit Christiana charitate. 3. denique, corpus hujusce reverentiæ sic limitatæ dat signa, non ad latræm determinatæ, quale est Sacrificium, absit; sed quæ sunt omni honori, etiam civili, communia, ut genuflexiones, incensum, lumina, statuæ & picturæ, quæ ad Sanctorum imitationem provocant, sicut & laudes eorum meritis respondentes. Quid in iis idololatriam sapit? nonne iisdem signis testamur nostram reverentiam erga eos, qui in Republica dignitate præcellunt?

Adversarii ergo temerè nituntur exemplo Ezechie ad abolendum cultum Sanctorum; ideo enim religiosissimus Princeps serpentem æneum confregit; quia filii Israel divinos honores illi deferebant. At proferre non possunt vel unum è Catholicis, ne quidem rudiores excipio, qui latræ cultum mox descriptum ad Sanctos transferat.

Ecclesia quidem Romana sacrificia offert Deo in honorem Sanctorum, quatenus sunt gratiarum actiones ob beneficia eis collata. Aliquando etiam compellat beatam Virginem, ut Matrem misericordiæ, vitam, spem nostram, sed eo sensu, ut jam pridem explicuit Guillelmus Parisiensis, quo crucem, quin & amicum, qui solus nostri curam gerit, spem nostram unicam dicimus, nempe quia salus & vita à Christo

sto per crucem & beatam Virginem suo modo promanant.

Cum periculum sit, ne plebs falsa pietatis specie delusa hypocritas & fanaticos tanquam viros sanctos colat, Ecclesia semper cavit, ut ex S. Cypriano discimus, ne quis publicè pro sancto haberetur, nisi prævisset ejus examen & iudicium. Ab undecimo quidem sæculo majori solemnitate id præstat, cum prius hoc ipso quis declararetur Sanctus, quo ejus reliquiæ in altari recondebantur. Sed in illo ritu, quem Canonizationem vocant, nulla est honoris testificatio, quæ in aliis Sanctorum solemnitatibus à primis sæculis usurpata non fuerit. Frustra dicunt adversarii apotheoseos similitudinem referre; nam in apotheosi heroes Gentilium inter Deos numerabantur, eisque divini honores decernebantur: in Canonizatione verò Sancti declarantur fideles Dei famuli, & eo titulo veneratione digni. Quamquam si in vera religione vitandum sit quidquid erat in usu apud Gentiles, nec Sacerdotes, nec templa, nec Sacrificia, nec Sacramenta habere liceat; hæc enim extabant apud Gentiles.

Denique si qui abusus in cultu Sanctorum irrepperint, sicut in aliis divinis institutis contingere potest instigante dæmone, eos prorsus aboleri cupit Ecclesia, ut testantur Tridentini Patres sess. 25. *Tantaque circa hæc diligentia, inquit, & cura ab Episcopis adhibeatur, ut nihil inordinatum, aut præposterè & tumultuariè accommodatum, nihil profanum, nihilque inhonestum appareat, cum domum Dei deceat sanctitudo.*

Nec dicant adversarii tollendum esse quidquid potest esse abusus occasio; nihil enim tam

sanctum, quo non abutantur perditii homines. Prohibenda esset Dominicæ diei requies, quæ est plurimum criminum occasio; abolenda Dominica cœnæ; quia multi indignè ad eam accedunt: revocandæ essent leges, ut cessaret prævaricatio.

CAPUT III.

An, & quomodo Sancti sint invocandi?

Monemus iterum invocationem dupliciter sumi: primò latè, pro qualibet oratione: secundo strictè, pro desiderio boni, quo frui quis exoptat. Invocatio priori modo sumpta dirigitur ad eum, qui potest vel largiri exoptatum bonum, vel illud ab alio sua intercessione nobis obtinere: posteriori verò modo accepta tendit ad ipsum bonum expetitum. *Quid enim est invocare*, inquit S. August. in Psal. 52. *nisi vocare in se?* Qui ergo invocatur Deum, ut dives fiat, Deum non invocatur: hoc invocatur, quod vult ad se venire. Nam cum dicitur, Deus, da mihi divitias, non vis ut ipse Deus veniat ad te, sed vis ut divitiæ veniant ad te. In Psalm. 85. *Invocas quidquid amas, invocas quidquid in te vocas.* Porro si Deum propterea invocas, ut veniat ad te pecunia, Deum tibi adiutorem ponis cupiditatum. Et in Psal. 55. *Quidam Dominum sibi invocare videbantur, & petebant eum de hæreditatibus, de cæteris bonis temporalibus.* Et quid de illis Scriptura dicit? *Deum non invocaverunt.* De invocatione hoc posteriori modo sumpta nulla potest esse questio; cum certum sit apud omnes Deum solum esse summum bonum, quo frui liceat: ac proinde

inde ipsum solum sic esse invocandum : quo sensu scribit S. Aug. lib. 22. de civit. Dei cap. 10. *nec ibi à Sacerdote, qui sacrificat, invocantur Martyres.* Non invocantur, sed rogantur, ut ipse explicat tractatu 84. in Joan. *Ideo quippe ad ipsam mensam, non sic eos (Martyres) commemoramus, quemadmodum alios, qui in pace requiescunt, ut etiam pro eis oremus, sed magis ut ipsi pro nobis orent.* Et in Psalm. 85. *Omnes Martyres, qui cum illo (Christo) sunt, interpellant pro nobis, non transeunt interpellationes eorum, nisi transeat gemitus noster.*

Quæritur ergo duntaxat an, & quomodo orandi sint Sancti ?

R. Primò, invocatio Sanctorum necessaria non est, sive necessitate medii, sive necessitate præcepti Divini, aut Ecclesiastici, saltem quoad omnes.

Prima pars probatur, tum ex dictis capite primo contra Gnosticos, qui definiebant Angelos esse administratores universi, & nonnisi per eos accessum patere ad Deum : tum ex Sanctis Patribus, qui passim docent, ad Deum promerendum suffragatore non opus esse, sed pure : quemadmodum ad Regem terrenum nonnisi per tribunos acceditur. Ita Auctor commentariorum in epistolam ad Romanos apud S. Ambrosium ; & S. Chrysostomus hom. de profectu Evangelii.

Secunda pars, quæ est de necessitate præcepti, probatur ; quia neque in Scriptura, neque in Traditione extat ullum præceptum invocandi Sanctos, nec aliud è fidelibus exigit Concilium Tridentinum, quam ut credant *Sanctos una cum Christo regnantes orationes suas pro hominibus Deo*

Deo offerre ; bonum atque utile esse suppliciter eos invocare, sess. 25.

Dixi : *saltem quoad omnes ;* propter eos, qui ad Horas Canonicas tenentur, in quibus invocantur Sancti ; raro tamen : nam in hujusmodi publicis precibus, orationes, quæ collectæ dicuntur, semper ad Deum diriguntur, & ceteræ officii partes continent vel laudes Dei, vel Sanctorum historias. Nedum ergo cultus, quem Ecclesia Romana tribuit Sanctis, mentes à Deo avocet ; quin contra in illum erigat atque inflammet.

Controvertitur itaque solum Catholicos inter & Novatores ; utrum liceat invocare Sanctos. Heterodoxi contendunt hujusmodi invocationem pugnare cum verbo Dei, adversarique honori unius Mediatoris Dei & hominum Jesu Christi, & omnino esse superstitiosam. Contra hunc errorem, ad propositam quæstionem

R. Secundò honestum & utile est Sanctos in cœlis regnantes invocare. Ita definiit Concilium Tridentinum sessione 25.

Probatur 1. ex Scriptura Gen. 48. Jacob Angelum invocat super filiis Joseph. *Angelus, inquit, qui eruit me de cunctis malis benedicat pueris istis, & invocetur super eos nomen meum, nomina quoque patrum meorum, Job. 5. Eliphaz ex vulgata sententia sic Jobum alloquitur : Voca ergo, si est qui tibi respondeat ; & ad aliquem Sanctorum convertere.*

Respondent adversarii, ibi sermonem esse de Angelis, qui ad nos mittuntur & curam nostri gerunt, ac proinde preces nostras percipere possunt. At homines mortui nihil amplius noverunt. Eccl. 9. *Sive nobiles fuerint filii ejus, sive ignobiles,*

non

non intelliget homo mortuus, Job. 14. Ergo vanum est & superstitiosum mortuos invocare.

Contra 1. fateantur saltem adversarii, sine injuria Mediatoris, & sine superstitione Angelos posse invocari, quod tamen negant contra expressissimum Scripturæ testimonium, Angeli non sunt semper unicuique præsentés: Etsi adsint, secreta cordium ac proinde vota & orationes Fidelium ipsis naturaliter non patent; & tamen perhibentur Tob. 12. v. 12. & Apoc. 8. v. 3. orationes Sanctorum ad Deum deferre. Si ergo Deus Angelis, quæ remota sunt, revelat: & quæ secreta, referat, quidni & Beatis? Et ita docent S. Hieronymus contra Vigilantium, S. Gregorius lib. 2. Moral. cap. 13. sanctus Augustinus lib. de cura pro mortuis, & lib. 22. de Civitate Dei. Nam in æterna beatitudine *patebunt*, inquit, *cogitationes nostræ invicem nobis: tunc enim implebitur quod Apostolus ait: Nolite ante tempus judicare donec veniat Dominus, & illuminet abscondita tenebrarum, & manifestet cogitationes cordis.* Mortui itaque infinita naturæ vi non cognoscunt quæ nos circumstant; sed Deus Sanctis cum Christo regnantibus (de iis enim solis sermo est) illa patefacit. Quamquam ex Scripturis demonstrari possit Sanctos qui sub priori testamento post mortem in cælum non recipiebantur, à Deo didicisse, quæ fiebant in Terris. Nam 2. Paralip. 21. v. 12. Elias post discessum corripuit Joram Regem Judæ, datis ad eum litteris 2. Malach. 15. Jeremias & Onias orant pro Judæis persecutionem patientibus. Luc. 16. Abraham audivit gemitus divitis epulonis. Pro animabus vero in purgatorio detentis orationes fundimus, ex sancto Augustino capite

capite præcedenti laudato : sed non legimus ququam illas invocasse. 3. etiam daremus Beatos non audire preces nostras ; hac enim de re nihil definiit Ecclesia : attamen nec frustraneæ, nec superstitiosæ essent, ut probat Hugo Victorinus ; quia satis est quòd audiantur à Deo, apud quem sterilia esse non possunt mutuæ unionis & charitatis officia, quibus & nos in terris militantes Beatis gratulamur, supplicamusque ; & hi vicissim pro nobis solliciti intercedunt. Namque si *Apostoli & Martyres*, inquit sanctus Hieronymus contra Vigilantium, *adhuc in corpore constituti possunt orare pro cæteris, quando adhuc pro se debent esse solliciti, quanto magis post coronas, victorias & triumphos ?* Et ante eum Origenes homil. 31. in num. *Quis dubitat, quòd Sancti quique orationibus nos juvent ?* Ne quidem ipsi adversarii, saltem omnes, ut constat ex cap. præced. in dubium id revocare audeant ; cùm expresse S. Petrus scribat epist. 2. cap. 1. *Dabo operam & frequenter habere vos post obitum meum, ut horum memoriam faciatis.*

Probatur 2. ex Patribus. Origenes in Lamento : *Incipiam, inquit, me gentibus prosternere, & deprecari universos ut mihi non audenti petere Deum, propter nimietatem peccati, succurrant.* Capite præcedenti luculentum locum protulimus ex Eusebio Cæsariensi, pag. 250. Sanctus Cyrillus Hierosolymitanus. Cat. 5. *Cùm hoc sacrificium offerimus, facimus mentionem eorum, qui ante nos obdormierunt : ut Deus orationibus illorum suscipiat preces nostras.* Sanctus Hieronymus totus est in hoc argumento contra Vigilantium. Sanctus Ambrosius lib. de Viduis : *Obsecrandi sunt Angeli, qui nobis in præsidium dati sunt ; Martyres obsecrandi, &c.* S. Basilus

lius hom. de 40. Martyribus : *Qui aliqua premitur angustia, ad hos confugiat : qui rursus letatur, hos oret.* S. Augustinus tract. 84. in Joan. *Ideo quippe ad ipsam mensam non sic eos (Martyres) commemoramus, quemadmodum alios, qui in pace requiescunt, ut etiam pro eis oremus, sed magis ut ipsi pro nobis orent.* Si ergo Beati invocari non possunt sine injuria Mediatoris & sine idololatria, Ecclesia Christiana nunquam fuit vera Ecclesia, cum ex tot Episcoporum testimonio, Sanctos à primis sæculis palam & publicè invocaverit.

Probatur 3. ratione. Honestum & utile est recurrere ad preces Justorum, qui in terris versantur : hoc mutuæ charitatis officium acceptum est Deo, & gratiam Capitis nostri commendat, nedum destruat. *Obsecro vos, inquit Apostolus Rom. 15. ut adjuvetis me in orationibus vestris ad Deum. Jac. 5. Orate pro invicem, ut salvemini ; multum enim valet deprecatio justis assidua.* Jobi cap. ult. Deus amicos Jobi ad ejus preces confugere jubet, ut peccati veniam consequantur. Unde Theodoretus cap. 16. Hist. scribit : *Sanctorum deprecatio est commune morborum remedium.* Et Rufinus præfat. in Vitas Patrum, *Quis dubitet mundum precibus stare Sanctorum ?* Ipsimet adversarii fratrum suorum suffragia ambiunt, nec propterea existimant se in creatura fiduciam ponere, aut Mediatorem injuria afficere. Ergo à fortiori bonum & utile est invocare Beatos, quorum oratio multis capitibus longè ad impetrandum efficacior est : 1. quia post mortem omni peccati labe deterfa, & cupiditate prorsus eradicata, majori fervent charitate, toti in Deum, qui charitas est, immutati. 2. quia divini consilii jam conscii, ea duntaxat petunt.

tunt, quæ nobis sunt utilia, & quæ Deus vult concedere per Christum Dominum nostrum. 3. quia, cum propter Evangelium hic fuerint exosi, abjecti & depressi, Christus vult eos post mortem honorari, & in mundo celebres fieri propter virtutes, quas per ipsos, quin & per illorum cineres operatur, ut constat ex dictis capite præcedenti. Frustra igitur garriunt Novatores, Sanctos plenam in seipsis laborum mercedem percipere : nec fingendum partem aliquam ad nos derivari; maximè cum solis Christi meritis nitamur. Namque pertinet ad accidentalem Sanctorum gloriam, ut ubi dejecti sunt propter Christum, ibi per Christum exaltentur, & quidem in laudem gratiæ ejus, quæ & Sanctos ad intercedendum movet, & nobis eorum intercessionibus applicatur.

Ex his patet responsio ad alteram quæstionis partem, quomodo Sancti sunt invocandi. Nempe invocandi sunt tum ut Dei amici, quos honorari vult, & idcirco beneficia illorum patrocínio largiri : tum ut præcipua Christi Capitis nostri membra, quæ per communicationem & motionem ejus Spiritus nos commiserantur. Absit enim ut credamus ullum è Sanctis vel Beatam Virginem, Deo esse erga nos propensiolem : posse aut velle quidquam contra ejus voluntatem : nec Christi merita operari, cum pro nobis intercedit. Si quis autem Catholicorum sic sentire reperiatur, per Pastores corrigendus est; quia, ut scribit sanctus Augustinus in Psal. 108. *Oratio, quæ non fit per Christum, non solum non potest delere peccata, sed etiam ipsa fit in peccatum.* Et sanctus Chrysostomus : *Nullum sit medium inter nos & Christum; quodd si medium aliquod intercesserit, protinus perimus.*

Hic

Hic est unus verusque Mediator noster & Advocatus, pro quo nullus interpellat (ait Augustinus Lib. 2. contra Parmenianum) sed ipse pro omnibus, aliquando quidem per membra corporis sui, quæ pro se invicem sollicita sunt.

Ut itaque accepta sit oratio sive Sanctorum pro nobis, sive nostra pro invicem, fiat necesse est Spiritu Christi, & Deo inspirante; ac proinde Sancti precibus suis non flectunt Dei voluntatem, quemadmodum suffragator animum hominis irati immutat: sed exequuntur duntaxat quæ Deus ad preces eorum facere decrevit, ut docet sanctus Augustinus in illud Psalmi 105. *Si non Moyses electus ejus stetisset in confractione. Non ita dixit stetisse in confractione, inquit, quasi ut frangeret iram Dei: sed in confractione, id est, in plaga, qua illi erant feriendi, nisi objecisset seipsum pro eis: ubi demonstratum est intercessio Sanctorum quantum pro aliis valeat.* Et S. Gregorius Lib. 9. Moral. cap. 9. ut conciliet hunc Jacobi textum cap. 9. *Deus cujus iræ nemo resistere potest, cum alio textu Exodi 32. Dimitte me ut irascatur furor meus; sic scribit: Quid est servo dicere, dimitte me, nisi deprecandi ausum præbere? Omnes enim Sancti, qui iræ Dei obviant, ab ipso accipiunt, ut contra impetum percussione ejus opponantur: atque, ut ita dixerim, cum ipso erigunt se contra ipsum, eosque divina vis sibi opponit secum. Portat ergo contradictionem deprecantium, quam aspirat, & velut nolenti opponitur quod ab ipso, ut fiat, imperatur Iræ Dei igitur & resisti valet, quando ipse, qui irascitur, opitulatur: & resisti omnino non valet, quando se & ad ulciscendum excitat, & ipse precem, quæ ei funditur, non aspirat.*

Nonnulla objiciunt Novatores. 1. Christus præscribens orandi modum Matth. 6. nihil de invocatione Sanctorum tradidit. 2. Apostolus

D. Habert Theolog. Tom. II. T Rom.

Rom. 10. ait: *Quomodo invocabunt, in quem non crediderunt?* quibus verbis expofit invocationem Sanctorum, cum in ipfos credere non liceat.

3. Sanctus Chryfoftomus in caput fecundum ad Coloff. *Neque enim eam facile Deus annuit, cum alii pro nobis orant, ut cum ipfemet oramus, etiamfi plurimis malis pleniffimi.* Ergo frustra contra Dei verbum Sancti invocantur. Certè qui hanc conclufionem tam infulfam, tamque abfurdam eliciunt, victos fe demonftrant. Namque 1. ex Oratione Dominica æquè liceret concludere, neque Chriflum invocandum, neque fuffragia viventium exponenda, quia in hac orandi formula Chriflus nihil tradidit de hujufmodi invocationibus. Quid ita? quia expofuit duntaxat quæ effent petenda, non verò quomodo pati deberent.

2. Apoftolus agit de infidelibus, qui, cum de Chrifto nihil audierint, non poffunt illum invocare ad falutem. Sed quid ad rem præfentem?

3. Sanctus Chryfoftomus reprehendit peccatores, qui minimè de fua falute folliciti, Sanctorum precibus innituntur: quare non ipfam Sanctorum invocationem perstringit, fed abufum eorum, qui in patrocinio Sanctorum requiefcunt, ut liberiùs fuis cupiditatibus indulgeant. Nobis præfertim opponunt verba Apoftoli Col. 2. Concilii Laodiceni, & Theodoret: fed ea expofuimus initio capitis primi.

CAPUT IV.

An & quomodo Sanctorum Reliquiæ funt venerandæ?

1. Primò, dogma Catholicum eft, Sanctorum reliquias effe venerandas, ita concilium Tri-

Tridentinum definiit Sess. 25. his verbis: *Affirmantes Sanctorum reliquiis venerationem atque honorem non deberi; vel eas aliaque sacra monumenta à Fidelibus inutiliter honorari, atque eorum opis impetrandæ causa Sanctorum memorias frustra frequentari, omnino damnandos esse, prout jam pridem eos damnavit, & nunc etiam damnat Ecclesia.*

Probatur hæc definitio primò ex Scriptura, in qua Reliquiarum honos commendatur crebris etiam miraculis. Moyses Exod. 13. v. 18. ossa Joseph honorificè transtulit, dicunturque prophetasse, Eccli. 49. v. 19. Aque Jordanis pallium Eliæ reverentes dividuntur, 4. Reg. cap. 2. v. 8. mortuus suscitatur contactu cadaveris Elisæi, 4. Regum cap. 13. v. 2. Multi sanantur per sudaria & semicinctia Apostoli, Act. 19. v. 11.

Probatur 2. ex constanti Ecclesiæ Traditione, cujus tres locupletissimos testes ex benemulis proferimus. Sanctus Chrysostomus Homil. 16. in secundam ad Corinthios sic scribit: *Sepulchra servorum Crucifixi Regis aulis splendidiora sunt accedentium studio. Nam & is, qui purpura indutus est, ad illa sepulchra se confert, ut ea amplectatur; abjectoque fastu supplex stans Sanctos deprecatur. Atque id non Romæ solum fieri quispiam viderit, sed etiam Constantinopoli. Nam & hic quoque Constantinum Magnum filius ingenti honore se affecturum existimavit, si eum in piscatoris vestibulo deponeret. Quodque sunt Imperatoribus in palatiis, janitores; id in tumultu piscatoribus sunt Imperatores. Tum describit virtutes plurimas, quas Deus per Sanctorum Reliquias operatur. Sanctus Hieronymus sic Vigilantium sacrarum Reliquiarum contemptorem insectatur Libro adversus illum Hæreticum. *Malè facit ergo Romanus**

nus Episcopus, qui super mortuorum hominum Petri & Pauli secundum nos ossa veneranda, secundum te vilem pulvisculum, offert Domino sacrificia, & tumulos eorum Christi arbitratur altaria! Et non solum unius urbis, sed totius orbis errant Episcopi (nota morem universalis Ecclesiæ sæculo quarto) qui cauponem Vigilantium contemnentes, ingrediuntur basilicas mortuorum, in quibus pulvis vilissimus, & favilla nescio quæ jacet lintamine convoluta, ut polluta omnia polluat (nempe secundum errorem Vigilantii) O portentum in terras ultimas deportandum! Si sanctus Doctor contra Vigilantium sic invehitur, an non potiori jure in Calvinum & sectatores ejus excandesceret, qui post Fidem moribus totius orbis per duodecim sæcula ab ætate sancti Hieronymi confirmatam, ea inhumanitate in Sanctorum tumulos & cineres debacchati sunt, quam ipsi etiam Barbari exhorrent? Tertius testis ejusdem Traditionis adducitur S. August. Lib. 20. contra Faustum, & Lib. 8. & 22. de Civ. Dei capite secundo citatis, pag. 247. 248. & 249.

Quodd autem hæc Traditio ab Apostolis emanarit, probatur ex hac sancti Augustini regula Lib. 4. contra Donat. cap. 24. *Quod universa tenet Ecclesia, nec Conciliis institutum, sed semper retentum est, non nisi auctoritate Apostolica traditum rectissime creditur.* Atqui honos sacris Reliquiis semper est delatus, etiam ante omnis Concilii celebrationem. Namque ex Eusebio Lib. 7. Hist. cap. 19. Cathedra sancti Jacobi Apostoli & Episcopi Jerosolymitani à Christianis religiosè servata est usque ad illud tempus, quo suam Historiam scribebat. Ossa Sancti Ignatii, Apostolorum coævi, Roma Antiochiam honorificè sunt deportata, & in ca-
psa

psa reposita sicut thesaurus inappretiabilis, in-
quiunt acta ab ejus discipulis conscripta. Id-
ipsum testatur Epistola Ecclesiæ Smyrnen-
sis de ossibus sancti Polycarpi, sancti Joannis Evangeli-
stæ discipuli, apud Eusebium Lib. 4. Hist. c. 15.
*Nos, inquit, postmodum esse combusta pretiosissimis gem-
mis chariora, ubi decebat, condidimus: quo etiam in loco,
præstante Domino, solemnes agemus celebresque conven-
tus, maxime quidem in die Passionis ejus.*

Objiciunt 1. Heterodoxi: Matth. 23. Judæi
à Christo Domino culpantur, quod Prophetarum
monumenta adornarent: Ergo.

Nego anteced. Nam præterquam quod nul-
lus ex Antiquioribus hunc locum sic interpreta-
tus est, legenti patet Christum non arguere sepul-
chrorum constructionem, sed Judæorum impieta-
tem, qua ab initio persecuti sunt Prophetas: pa-
tres eos occiderunt, filii fingunt se detestari hanc
impietatem, extruentes honorifica monumenta;
cùm ipsi interim insectentur Prophetas, qui eos
corripiunt, & ita per generationes singulas usque
ad Joannem Baptistam & ipsummet Messiam, quos
crudeliter enecarunt. Nonne etiam nunc Con-
cionatores idem argumentum contra peccatores
contorquent; eos, qui olim ab impiis persecu-
tionem passi sunt, laudant & colunt ut Sanctos,
& ipsi non advertunt se similiter calumniari viros
pios, qui à nepotibus suis beati & Sancti celebra-
buntur?

Objiciunt 2. Honor non tribuitur nisi pro-
pter excellentiam: atqui nulla est excellentia in
ossibus & cineribus mortuorum. Ergo.

Distinguo minorem. Nulla est excellentia
absoluta, Concedo, relativa, Nego minorem.

Itaque nec Sanctorum ossa, nec vestimenta propter se præcisè veneramur, sed propter Sanctos, quibus suo modo inservierunt. Unde patet responsio ad alteram quæstionis partem, quomodo Reliquiæ Sanctorum sunt honorandæ. Itaque

R. 2. Sanctorum Reliquiæ non sunt honorandæ cultu absoluto, sed relativo duntaxat.

Prima pars probatur, tum quia in Reliquiis nulla est excellentia absoluta: tum quia ex dictis creatura rationalis non debet charitate subjici rebus inanimatis.

Secunda pars sequitur ex prima, nempe in Reliquiis non est excellentia absoluta, sed relativa tantum; quatenus habent relationem moralem ad Sanctos, moraliterque ad illos suo modo pertinent: ergo debetur illis veneratio duntaxat relativa, hoc est, quæ sic ad illas terminetur, ut non in illis sistat, sed ad Sanctos transeat: quemadmodum propter Regem honorantur Ministri ejus.

Ex his duo colliges. Primum Reliquias plus vel minus honorandas, secundum majorem vel minorem excellentiam personæ, quam respiciunt: v. gr. plus honoris deferendum Cruci, in qua passus est Christus Dominus, quam cruci, cui affixus est sanctus Petrus. Secundum, cultum Reliquiarum inferiorem esse cultu Sanctorum, quos illæ respiciunt; quia excellentia illa relativa, quæ Reliquiis competit, longè distat ab excellentia absoluta, quæ in Sanctis effulget, ut patet exemplo Ministrorum Regis, qui, cum in se non contineant totam excellentiam & majestatem regiam, non eodem honore, quo Rex ipse afficiuntur. Unde concludimus contra nonnullos Theologos,

Cru-

Crucem, five veram, five pictam, non esse colendam cultu supremo.

Quod de Reliquiis diximus, idem dicendum de Imaginibus, nimirum illas non debere honorari cultu absoluto, nec eodem, quo earum prototypa.

CAPUT V.

Utrum Crux Domini sit honoranda ?

Respondeo: Crux, five vera, in qua passus est Dominus, five picta & sculpta, five manuum agitatione expressa, colenda est cultu relativo, juxta mox dicta c. præcedenti. Tres responsionis sunt partes.

Prima, quæ est de vera Cruce, probatur auctoritate & usu universalis Ecclesiæ, quæ ab anno 326. quo diligentia Helenæ Constantini matris Crux inventa est, Deo conatum piissimæ Reginæ adjuvante non sine miraculis, hoc salutis nostræ instrumentum singulari honore ubique profecuta est. Rem, prout gesta est, narrant Scriptores sæculi quarti. Sanctus Cyrillus Jerosolymitanus, qui potuit esse hujusce celebris inventionis testis oculatus, in Epistola ad Constantinum Imperatorem, & Catech. 4. & 43. refert Christianos ex omnibus mundi partibus ad adorandam Crucem Jerosolymam confluere solitos, & cum erogatis in singulos hujus pretiosi ligni partibus plenus esset orbis, lignum tamen ipsum integrum semper perstitisse. Sanctus Ambrosius in Oratione Theodosii Magni addit, Helenam crucem in capite Regum levasse, ut Crux Christi in Regibus adoraretur. Sanctus Paulinus Epistola II. ad

Severum Sulpicium, in qua testatur Ecclesiam instituisse festum in memoriam Crucis per Helenam mirabiliter inventæ. Idem Severus Sulpicius Lib. 2. sacrae Historiæ. Ruffinus Lib. 1. Historiæ. Theodoretus Lib. 1. Hist. cap. 18. Socrates Lib. 1. cap. 13. & Sozomenus Libro 2. cap. 1. Unde subit mirari Novatorum frontem, qui hanc Historiam ut meram fabulam explodunt; tum quia Eusebius Helenæ gesta recensens Lib. 3. de vita Constantini, hujusce rei non meminit: tum quia Scriptores, qui eam referunt, secum invicem non concordant. Sed præterquam quod Eusebius id commemorat in Chronico, quid potest silentium unius contra omnium testimonium? illud quidem variat in levibus circumstantiis, sed in rei summa constantissimum est.

Objiciunt 1. indecorum est & omnino probrosum, si filius honoret patibulum, in quo pater interiit.

Respondeo hanc esse Gentilium & Judæorum impietatem, quibus Crux Christi, ut erat nocentis patibulum, sit & scandalum & stultitia: ipsi autem vocatis Judæis & Gentilibus, Dei virtus, 1. Corinth. 1. vers. 24. trophæum Christi victoris, cathedra docentis, tribunal Judicis, ex quo *expolians Principatus & Potestates, traduxit confidenter, palam triumphans illos in semetipso*, 2. Col. vers. 15.

Objiciunt 2. Si crucem colere licet, quia sacrum Christi Corpus tetigit: colendus quoque asinus, quo Christus vectus est; colendum os Judæ proditoris, cui Christus osculum impresit. Falsum consequens, ergo & antecedens.

Nego

Nego majorem ; namque illud est discriminis inter inanima , & sensu rationeque prædita , quòd hæc non honorentur , nisi propter dignitatem & excellentiam , quæ in ipsis insit : illa verò honorari possint propter aliquam ad alia honore digna habitudinem.

Secunda pars , quæ est de Imaginibus Crucis , constat ex universali Ecclesiæ usu ; nam ex S. Chrysostomo Hom. 61. Tom. 6. Imperatores Crucis effigiem adhibebant ad præsidium & honorem in suis diadematibus , vestibus , & armis ; cæteris verò ubique ex Theodoro Serm. 6. contra Græcos : *Græci , Romani , ac Barbari crucifixum profitentur Deum , Crucisque signum venerantur.* Et sancto Augustino Serm. 88. aliàs 18. de verbis Domini cap. 8. *Quia ipse honoraturus erat fideles suos in fine hujus sæculi , prius honoravit Crucem in hoc sæculo , ut terrarum Principes credentes probiberent aliquem nocentem crucifigi , & quod cum magna insultatione Judæi Domino procurarunt , magna fiducia servi ejus etiam Reges in fronte nunc portant.* Prohibuerunt etiam lege prima , Cod. de Sacrosanctis Ecclesiis , ne Crux in pavimento conculcanda inscriberetur , quod Synodus Trullana Can. 73. sub anathemate interdixit. Quin & ipsi Iconomachi honores veræ Cruci aliisque dependi solitos illibatè servaverunt , ex Nicephoro Constantinopolitano in Breviario , & S. Joanne Damasceno Lib. 2. de Imaginibus.

Dices : Ergo clavi quoque honorandi sunt , cum eorum similitudinem gerant , quibus Dominus confixus est.

Distinguo sequelam. Clavi de industria effecti ad repræsentandum aliquem è clavis , quibus

confixus est Dominus, Concedo; quia cum ad illum habeant habitudinem, quandam excellentiam relativam fortiuntur: Clavi casu, aut de industria ad usum profanum formati, Nego sequelam; neque enim honoramus cruces fabricatas ad sustentandum ruinosum ædificium, aut quaslibet imagines; nisi pictæ sint in memoriam alicujus dignitate & sanctitate conspiciui.

Tertia pars, quæ est de signo Crucis manuum agitatione expresso, probatur. Illius signi usus laudabilis est, quem Ecclesia ab exordio semper probavit, & quem Deus multis miraculis commendavit. Atqui talis est usus signi Crucis: Ergo.

Minor probatur ex Tertulliano, qui Lib. de Corona milit. cap 3. sic habet: *Ad omnem progressum, ad omnem aditum & exitum, ad lavacra, ad mensas, quocumque nos conversatio exercet, frontem Crucis signaculo terimus. Harum & aliarum hujusmodi disciplinarum si legem exoptules, Scripturarum nullam invenies; Traditio tibi prætendetur auctrix, consuetudo conservatrix: Fides observatrix.* En usus universaliter receptus secundo sæculo; nam Tertullianus scribebat ineunte tertio. Quodd autem mos ille non prodierit ex Schola Montani, ut fingunt Novatores, demonstramus ex Origene, Tertulliani coævo, qui Hom. 6. in Gen. & 6. & in Exod. asserit signum Crucis habere vim fugandi dæmones. Ex S. Gregorio Nazianzeno, Oratione tertia, ubi refert ipsum Julianum Apostatam tertium, signo Crucis fugasse dæmones. Ex S. Cypriano, qui Epist. 58. sic scribit: *Muniatur frons, ut signum Dei incolumè servetur.* Ex S. Athanasio, qui in Vita S. Antonii narrat sanctum Anachoretam solitum

tum armari signo Crucis adversus insidias & as-
sus us dæmonum. Ex sancto Basilio Seleuciensi,
qu. Lib. 1. de Vita sanctæ Theclæ scribit sanctam
Viergem signo Crucis ignem extinxisse. Et san-
cto Basilio Cæsariensi, qui Lib. de Spiritu Sancto
cap. 27. sic habet de Traditione: *Dogmata & in-*
stitutæ, quæ in Ecclesia prædicantur, quædam habemus
ex doctrina scripta, quædam rursus ex Apostolorum Tra-
ditione . . . quæ unutraque parem vim habent ad pieta-
tem . . . ut quod primum est & vulgatissimum primo loco
commemorem, ut signo crucis eos, qui spem collocarunt
in Christum, signemus; quis scripto docuit? Ergo usus
signi Crucis ex Schola non Montani, sed Aposto-
lorum prodiit. Eundem usum S. Augustinus vin-
dicat contra Manichæos illum deridentes, Lib. 6.
contra Faustum.

CAPUT VI.

Utrùm Imagines pingere aut honorare liceat?

R. Primò; in veteri lege Deus Imaginum usum
prohibuit; sed prohibitio illa fuit juris
positivi, duntaxat, non naturalis, ac proinde
rescindi potuit, & de facto abrogata est promul-
gato Evangelio.

Prima pars probatur. Exodi 20. v. 4. *Non fa-*
cies tibi sculptile, neque omnem similitudinem, quæ in cæ-
lo est desuper, & quæ in terra deorsum, nec eorum, quæ
sunt in aquis sub terra, non adorabis ea, neque coles.
Idem habetur Levit. 26. v. 1. & Deut. 4. v. 15.
Hinc Pictores & Statuarii à Republica Judæorum
arcebantur, teste Philone & Origene Lib. 4. con-
tra Celsum. Unde Tertullianus Lib. 4. contra
Marcionem cap. 2. concludit, Moysen & Eliam
cum

cum Christo in mente colloquentes agnitos fuisse à Petro in spiritu, non ex imaginum Fide. *Neque enim, inquit, imagines eorum vel statuas populus habuisset & similitudines, lege prohibente.*

Secunda pars, nempe prohibitionem illam fuisse juris positivi, probatur 1. quia Deus ei derogavit; namque Num. 21. vers. 8. ipse iussit erigi serpentis æneam figuram; sed *extraordinario præcepto*, inquit Tertullianus Lib. de Idololatria cap. 5. *imitare Moysen, ne facias adversus legem simulacrum aliquod, nisi & tibi Dens jusserit.* Exodi 25. vers. 8. Deus ex utraque parte oculi duo Cherubim fieri imperavit. 3. Reg. 6. vers. 29. Salomon omnes parietes templi per circuitum sculpsit variis cælaturis, & fecit in eis Cherubim, & quidem Deo inspirantes, cum templum sic ornatum majestate sua impleverit, 3. Regum cap. 8. quocirca Josephus contra Appionem, Salomonem temerè peccati arguit. Probatur 2. quia Imago non est res per se mala, sed planè indifferens, quam sicut in usum pravum, sic & in bonum convertere possumus; juvat enim ad conservandam gratam memoriam virorum illustrium, qui de nobis & de patria bene meriti sunt; provocatque ad imitandum eorum virtutes. Id concedant adversarii necesse est, cum plures apud se retineant Imagines etiam Christi Domini, & Sanctorum, qui in Scripturis laudantur; nec propterea arbitrantur se peccare in legem sive naturalem, sive divinam. Ut quid ergo nobis opponunt præcepta legis Mosaicæ, quam ipsi non observant, namque consentiunt per Christum fuisse abrogatam? Deus Imagines
Judæis

Judæis in idololatriam propensis interdixit, non Christianis.

R. Secundò. Itaque in Lege nova nullum extat præceptum pingendi aut non pingendi Imagines, hac enim de re altum silentium sive in Evangelio, sive in Epistolis Apostolorum; sed Christus illam, utpotè indifferentem per se, determinandam reliquit Ecclesiæ prout viderit, spectatis circumstantiis; periculosam aut utilem Fidelium saluti.

R. Tertiò, primis Ecclesiæ sæculis fuit aliquis Imaginum usus, sed rarior, & alicubi interdictus. Tres sunt partes.

Prima pars probatur. Eusebius Lib. 7. Hist. cap. 18. testatur se vidisse Christi statuam, quam mulier à profluvio sanguinis per ipsum liberata, ut Evangelistæ referunt, in memoriam accepti beneficii erexerat. Addit Philostorgius Arianus Lib. 7. c. 3. 1. illam statuam æneam in templum fuisse translata, ubi honore competenti afficiebatur. 2. Regnante Juliano Apostata, Gentilium furore, per urbem, circumligatis ad pedes funibus, tractam & confractam, dolentibus Christianis. Pietatem autem mulieris comprobavit Deus ingenti prodigio; nam planta, quæ crescere solebat ad pedes illius statuæ, statim atque attigerat vestis æneæ fimbriam, evadebat remedium præsentissimum ad omne genus morborum, tum ex iisdem Scriptoribus, tum ex Nicephoro Lib. 6. cap. 15. Sophronio Lib. 5. cap. 20. Idem Eusebius ibidem commemorat pictas effigies Christi Domini & Apostolorum Petri & Pauli, quas ad suam usque ætatem servatas se vidisse asserit. Deinde secundo sæculo adeo communis & antiquus

mos

mos erat sculpendi Christum in calicibus sub specie Pastoris ovem errantem in ovile reportantis, ut inde Catholici argumentum eruerint contra Tertullianum ex errore Montanistarum negantem lapsis post Baptismum peccatorum veniam. *Ovis propriè Christianus* (inquebant Catholici apud Tertullianum Lib. de Pudicitia cap. 7.) & *grex Domini Ecclesiæ populus*, & *Pastor bonus Christus*, & *ideo Christianus in ove intelligendus, qui ab Ecclesiæ grege erraverit*. Denique ex Concilio Eliberitano anno 305. colligitur Imagines in templis antea pingi solitas; nisi enim id factitatum vidisset, minimè prohibuisset Can. 36. his verbis concepto: *Placuit picturas in Ecclesia esse non debere, nec quod colitur, aut adoratur, ut parietibus depingatur*.

Secunda pars, nempe quòd usus Imaginum ea ætate fuerit rarior, probatur 1. auctoritate Scriptorum illius ævi. Sanctus Clemens Alexandrinus Lib. 5. Stromatum sic scribit: *Moyfes multis ante sæculis apertè Legem sanxit, nullum oportere sculptile vel pictam imaginem*. In eodem argumento sunt Tertullianus Lib. de Spectaculis cap. 23. & Origenes Lib. 7. contra Celsum, concluduntque artem pingendi Christianis ut & Judæis interdictam: ille Libro de Idololatria, & contra Hermogenem cap. 10. hic Libro quarto contra Celsum. Probatum 2. ratione, quæ Veteres movere debuit ne imagines pingerent, nimirum colligenda erat Ecclesia Christiana ex Judæis & Gentilibus, juxta illud Ephes. 2. *Medium parietem maceriæ solvens, inimicitias in carne sua . . . ut duos condat in seinetipso . . . & reconciliet ambos in uno corpore*. Atqui Apostoli hinc Judæos à Religione Christiana maxime deterruissent; si contra Legem ipsis præscriptam

ptam Imagines colendas proposuissent. Quot labores & pugnas sustinuerunt, ut Neophytos à cæremonialibus præceptis avellerent? Quis credet eos sine contradictione perfecisse id, quod longè difficillimum erat, nempe Judæos contra præscriptum veteris Legis adduxisse ad cultum Imaginum, hac enim de re nulla tunc temporis extitit controversia. Superest ergo ut dicamus Apostolos, sicut ad tempus indulserunt Judæis servare nonnulla veteris Legis, qualis est abstinencia à suffocato & sanguine, & ab Idolotyis; sic de Imaginibus pingendis aut colendis prorsus siluisse. Inde Gentiles à cultu Idolorum ubique recepto erant revocandi: evidens autem periculum erat, ne homines adorare soliti simulacra, simili latria colerent Imagines Christi & Sanctorum. Eo animo affectos fuisse Gnosticos notant sanctus Irenæus Lib. 1. capit. 24. & sanctus Epiphanius Libr. de Hæresibus: jaëtabant illi se habere Imagines Christi à Pilati exemplari desumptas, quas summopere occultabant, & Gentilium more venerabantur.

Tertia pars, scilicet usum Imaginum temporibus illis periculosis alicubi fuisse interdictum, patet tum ex citato Canone Concilii Eliberitani, tum ex Epistola Eusebii Cæsariensis ad Constantiam, in Concilio septimo act. 6. admissa, in qua negat ille se votis ejus, quibus peteret Christi Imaginem, satisfacere posse, cum Christus constet duplici natura, divina scilicet, quæ omnibus ignota est, & humana, quæ ex mortuis & inanimatis coloribus non possit adumbrari, tota jam in deitatis gloriam absorpta: tum ex Epistola sancti Epiphanii ad Joannem Jerosolymitanum, in qua

qua narrat se, cùm iter faceret per ejus diœcesim, commotum fuisse, quòd in quodam oratorio Imaginem Christi, vel alicujus Sancti, in velo expanso depictam vidisset: addit se velum lacerasse; rogatque Joannem, ut vigilet contra hunc usum, quem contra Scripturæ auctoritatem pugnare contendit. Hanc integram Epistolam refert sanctus Hieronymus Epistola 101. Eam tamen supposititiam putat S. Joannes Damascenus. Iconomachi in Concilio septimo aët. 6. duo alia loca ex sancto Epiphanio protulerunt, in quibus sanctus Doctor scribit se multis egisse cum Chorepiscopis suis, ne Imagines inducerent sive in Ecclesias & Sanctorum cœmeteria, sive in domum communem: *sed, inquit, non sum receptus ab his, neque audire vocem meam paululum passi sunt.* Hæc duo loca tanquam spuria explodunt Catholici; Dallæus verò Calvinista contendit cum Iconomachis esse genuina: quod si ei concedatur, fateatur necesse est, 1. Sanctum Doctorem sectæ ipsius adversari, utpotè quæ Imagines in domos communes inducat, societatemque habeat cum Lutheranis, qui Imagines in Ecclesiis retinent. 2. Sententiam sancti Epiphanii illa ætate fuisse singularem, nec proinde præferendam contrariæ, quæ erat tum communis inter Episcopos.

R. Itaque quartò. Imaginum usus communis esse cœpit, Ecclesia in libertatem vindicata, hoc est à quarto sæculo usque ad præsens tempus.

Probatur multis Patrum testimoniis. In Oriente sanctus Basilius Oratione in sanctum Barlaam Martyrem, ait gaudere se, quòd Pictores felicius penicillo suo, quàm ipsemet Oratione
manum

manum Martyris pro Christo combustam expref-
 ferint. Frater ejus Gregorius Nyffenus, Oratio-
 ne de Filii & Spiritus Sancti Divinitate ; dicit se
 moveri ad lacrymas , dum confpicit Isaac in pi-
 ctura stantem sub gladio Patris. Et Oratione in
 S. Theodorum , laudat Pictorem , qui labores fan-
 cti Martyris oculis exhibet. Sanctus Chryso-
 stomus Hom. 45. ad populum, testatur, neminem ef-
 se , qui non ambiat sancti Meletii imaginem.
 Theodoretus in Religiosa Historia refert effigiem
 sancti Simeonis Stilicæ ubique haberi ad præsi-
 dium. In Occidente verò sanctus Ambrosius E-
 pist. 53. meminit picturæ sancti Pauli Apostoli.
 S. Paulinus & Severus Sulpitius suas basilicas pi-
 cturis exornaverant, ex Epistola duodecima ejus-
 dem Paulini. Prudentius in Hymno S. Cassiani sic
 canit : *Stetit obvia, picta imago Martyris*, & quidem
 in altari. S. Augustinus Serm. 94. de diversis,
 nunc 316. *Dulcissima est, inquit, hæc pictura, ubi vi-*
detis sanctum Stephanum lapidari. Et Libro de Mo-
 ribus Ecclesiæ cap. 75. conqueritur abusus irre-
 pisse in Imaginum venerationem. S. Gregorius
 Epistola ad Serenum Massiliensem , reprehendit
 illum, quòd Imagines evertisset, quod à nullo ex
 antecessoribus Episcopis factum asserit ; docet-
 que corrigendum abusum (notent Novatores) si
 quis irrepperit ; sed non delendas Imagines pictas,
 non ad adorationem, scilicet absolutam ; sed ad
 memoriam, & recordationem. Quòd autem non
 neget cultum relativum, patet ex Epist. 5. Lib. 7.
 ad Januarium Episcopum Calaritanum, in qua mo-
 net illum, ut auferat ex Synagoga Judæorum ab-
 latas imagines Crucis & beatæ Virginis. *His, in-*
quit, hortamur affatibus, ut sublata exinde cum qua di-
D. Habert Theolog. Tom. II.

gnum est veneratione (nota) imagine atque cruce debeatis quod violenter ablatum est reformare. Et Epistola 53. ad Secundum, significat se ad eum mittere Imagines Salvatoris, & beatæ Mariæ, & Apostolorum. Scimus, inquit, quia tu imaginem Salvatoris nostri ideo non petis, ut quasi Deum colas, sed ob recollectionem Filii Dei in ejus amore recalescas . . . sollicitè fraternitas tua admoneat, ut ex visione rei gestæ ardorem compunctionis percipiant, & in adorationem solius Omnipotentis Sanctæ Trinitatis humiliter prosternantur. Vult itaque S. Doctor non hærendum Imagini, sed asurgendum ad ejus exemplar; namque ex S. Aug. Lib. 3. de Doctrina Christiana cap. 7. & 8. Signum utiliter institutum, pro re ipsa sequi, cui significandæ institutum est, carnalis est servitus . . . sub signo enim servit, qui veneratur aliquam rem significantem, nesciens quid significet. Qui verò veneratur utile signum divinitus institutum, cujus vim significationemque intelligit, non hoc veneratur quod videtur & transit; sed illud potius quò talia cuncta referenda sunt. Ubi S. Augustinus signis exterioribus venerationem concedit & denegat: concedit relativam, denegat absolutam. Imò in relativa ad illius mentem potius res significata honoratur, quàm signum; quia signum aut imago propter se præcisè non spectatur. Hinc colligitur quo sensu sanctus Gregorius in Epistola ad Serenum, & alii Patres quandoque dicant Imagines esse ad memoriam duntaxat, nempe honorificam.

Porrò ex ardenti studio, quo Catholici tum in Oriente, tum in Occidente, pro Sanctis Imaginibus octavo sæculo, & deinceps usque ad hodiernam diem pugnarunt, perspicuum est earum usum à septimo sæculo, quo ineunte obiit S. Gregorius,

gorius, sicut prius in Ecclesia permansisse. Communem usum illum asseruerunt duo Concilia generalia, scilicet Nicænum secundum, quod est primum generale contra veteres Iconomachos, anno 787. ejus definitionem supra cap. 1. retulimus: & Concilium Tridentinum, quod anno 1563. contra recentiores sanxit his verbis Sess. 25. *Imagines porro Christi, Deiparæ Virginis, & aliorum Sanctorum in templis præsertim habendas & retinendas, eisque debitum honorem & venerationem impertiendam; non quod credatur inesse aliqua in iis divinitas, vel virtus, propter quam colendæ sint: vel quod ab eis sit aliquid petendum, vel quod fiducia in Imaginibus sit figenda, veluti olim fiebat à Gentibus, quæ in idolis spem suam collocabant; sed quoniam bonos, qui eis exhibetur, refertur ad prototypa, quæ illæ repræsentant: ita ut per Imágenes quas osculamur, & coram quibus caput aperimus & procumbimus, Christum adoremus, & Sanctos, quorum illæ similitudinem gerunt, veneremur.* Singula Concilii verba sunt ponderanda. 1. De Imaginibus Christi & Sanctorum duntaxat loquitur, nihil verò de Imaginibus Sanctissimæ Trinitatis statuit. 2. Imágenes generatim appellat, non distinguens inter statuas & picturas, sicut Patres Nicæni Act. 2. & 4. & in definitione solius picturæ mentionem faciunt, sicut Patres Concilii octavi generalis, Can. 3. Attamen eadem est utriusque Imaginis ratio, nisi quod statua magis afficiat, ut notat S. Aug Serm. 2. in Psal. 113. *Quodam modo extorquet, inquit, figura ista membrorum, ut animas videns in sensibus corporis, arbitretur sentire corpus, quod sui simillimum videt.* Hinc prioribus sæculis rarior fuit statuarum usus, quàm picturarum; refertque Goardus Græcos communiter non habere in templis, nisi pictas

Imagines. 3. Non sunt colendæ Imagines propter aliquam virtutem, quæ in ipsis sit, nec proinde in iis fiducia est collocanda; nam beneficia, quæ orantes coram sacris Imaginibus aut Reliquiis consequuntur, non procedunt ex ipsis Imaginibus aut Reliquiis, quasi ex signis sacramentalibus per se efficacibus, sed ex Deo, qui ubi & quomodo vult, Sanctorum memoriam editis miraculis celebrem reddit. Unde Christus Luc. 8. ubi mulier sanata refertur ex contactu vestimenti ejus, ait: *Novi virtutem de me exisse*, non de vestimento meo. 4. Sic præscribit honorem Imaginibus impertiendum, ut non definiat, an sit religiosus, necne. 5. Docet, non Imaginibus adhærendum; indecens enim est creaturam rationalem rebus inanimis servire, sed per Imagines Christum adorandum, & Sanctos venerandos.

Dogma itaque Ecclesiæ in his duobus duntaxat positum est, nempe quod fas sit Imagines Christi, Deiparæ, & Sanctorum habere & convenienti honore prosequi. Primum concedunt Novatores, & probatum manet; secundum verò negant; sic enim habetur in eorum Catechismo: *Dieu veut-il toujours défendre de faire aucune Image? Non, mais il défend de faire aucune Image pour ou figurer Dieu, ou pour l'adorer. Quelle forme d'adoration est-elle ici condamnée? C'est de se prosterner devant une Image pour faire son oraison; de fléchir les genoux devant icelle, ou faire quelque autre signe de reverence, comme si Dieu se demontroit là à nous.* Dallæus tamen olim Calvinistarum Pseudo-Minister, in suo Opere de Imaginibus, concedit eis, sicut omnibus Religionis instrumentis, aliquod honoris signum; cogiturque fateri, Catholicos non esse in hac parte idolo-

idololatrias; sed contendit Imagines in Templis non esse exponendas venerationi Fidelium, propter idololatriæ periculum. Ergo sine causa Novatores sciderunt Ecclesiæ unitatem propter Imagines: cum ejus dogma nihil contineat erroneum, nec necessitatem cuiquam imponat colendi Imagines, modò eas non contemnat, credatque fas esse & utile illas retinere & venerari.

Probatur autem hæc Ecclesiæ definitio, 1. ex Scripturis, quæ præcipiunt adorare res Deo sacras. Psal. 98. habetur de Arca, super quam Deus inter alas Cherubim sedere dicebatur: *Adorate scabellum pedum ejus*, Hebraicè, *Incurvate vos*. Si autem Deus in Arca adoratur, quidni Christus in Cruce?

Probatur 2. ex Traditione. Primis sæculis Christiani ex Tertulliano Apolog. 13. Crucicolæ à Paganis vocabantur. *Flechte genu*, inquit Lactantius, *Signumque Crucis venerabile adora*. S. Hieronymus in vita sanctæ Paulæ scribit, quòd *prostrata ante Crucem, quasi pendentem Dominum cerneret, adorabat*. Vide quæ supra retulimus de cultu Crucis, de statua Christi ærea, quam Christiani quarto sæculo in Templum cum honore detulerunt. Sanctus Hieronymus Epist. 17. ad Marcellam, ex veneratione, qua Judæi sanctuarium prosequabantur, concludit sepulchrum Domini Christianis esse venerabile. Sanctus Augustinus Lib. 22. de Civit. Dei cap. 8. tradit, particulas è terra sancta allatas magna in reverentia haberi; & tract. 47. in Joan. adorari vestigia Christi in monte, ex quo ascendit in cælum: Libro quoque tertio de Trinitate cap. 20. ait de sacris signis, inter quæ reponit serpentem æneum: *Hæc honorem tanquam religiosa*

religiosa possunt habere. Qui veneratur utile signum, inquit citato Libro de Doctrina Christiana, non hoc veneratur, quod videtur, sed illud, quo talia cuncta referenda sunt. Luculenta sancti Gregorii testimonia jam protulimus. Synodus Trullana septimo sæculo, Imagines appellat Venerabiles, Can. 82. Denique octavo sæculo & deinceps totus orbis Christianus honorem sanctarum Imaginum contra Iconomachos vindicavit.

Probatur 3. ratione. Honor ex tribus actibus efflorescit, ut jam dictum est. 1. Intellectus apprehendit excellentiam objecti. 2. Voluntas amore fertur in objectum propter ejus excellentiam. 3. Corpus profert exteriora signa intimi hujusce animi sensus. Atqui adversarii nullum ex hisce actibus in honore, quo Ecclesia Romana sacras Imagines afficit, vituperare possunt: primò namque mens nostra, sicut & Adversariorum, nullam tribuit Imaginibus divinitatem seu virtutem divinam, sed meram concipit similitudinem personæ nobis charissimæ atque ideo æstimandam. Enimverò sicut intellectus sine errore figuram dæmonis aut hominis flagitiosi repræsentat uti contemnendam & execrandam; sic absque falsitate judicat effigiem optimi Principis, aut viri singularis meriti esse magni faciendam. Secundò, intellectus judicio respondere debet voluntatis vel propensio & amor, si pictura exhibeat personam dilectam; vel aversio & odium, si impiam. Hinc tertio erumpunt exteriora corporis signa, osculamur imaginem, & quidquid habitudinem habet ad personam charissimam. Sic adversarii caput aperiunt ante Eucharistiam, quamvis credant esse meram Christi figuram; illamque reverenter

reter inclinati, alicubi etiam genibus flexis accipiunt: similibus signis venerationem suam testantur erga Regem coram ejus imagine; nam ex sancto Ambrosio in Psal. 118. *Qui imaginem Imperatoris coronat, utique illum honorat, cujus imaginem coronavit; qui statuum contempserit Imperatoris, Imperatori utique fecisse injuriam videtur.* Quia nonnisi ex præconcepto contemptu & odio personæ effigies ejus abjicitur, laceratur, conculcatur. Viderint ergo Novatores quomodo iram Christi sustinebunt, cujus Imagines fœdè traxerunt, fregerunt, & etiam nunc ubi prævalent, ejusmodi contumeliis afficiunt?

Nec dicant Adversarii, Catholicos Imagines Christi & Sanctorum in idola convertisse, sicut Judæi serpentem æneum; nec magis excusandos, quàm Gentiles, qui idololatriæ crimen non effugerunt, quamvis non crederent Idola sua esse Deos, sed Deorum imagines; sic enim mentem suam explicant apud Origenem Lib. 7. contra Celsum, & apud sanctum Augustinum sermone secundo in Psalm. 113. Hæc, inquam, non dicant, 1. quia Idolum est falsi Numinis imago, ac proinde Imagines nostræ Idola dici non possunt, nec simulacra à simulando, cum nihil falsi repræsentent, quanquam à Veteribus nonnunquam simulacra ab assimulando vocentur, 2. quia nisi Gentiles Idola Deos promiscuè putaverint, mentiuntur Prophetæ, Isaias c. 46. Baruch 6. Habacuc 2. Nonnulli quidem inter eos eruditi opinabantur Idola esse Deorum domicilia, virtutemque divinam illis insidere, ac propterea esse adoranda, ex sancto Augustino Serm. 2. in Psal. 113. Alii adhuc subtiliores, & ut loquitur sanctus Au-

gustinus, purgationis Religionis, sentiebant Idola esse signa duntaxat rei, quam colere tenerentur, nempe, secundum alios, Cereris, hoc est terræ, Neptuni seu maris, &c. secundum alios verò, Numinum, quæ illis corporibus regendis præsent. Verum hi postremi non erant omnino innoxii, tum quia simulacris sacrificabant, tum quia in superstitiosis ritibus cum multitudine errante circa Idola communicabant, quod à Catholicis prorsus alienum esse nemo non videt. 3. Quia unum & idem erat apud Judæos incensum ponere & sacrificare, ut patet ex Libro quarto Regum cap. 17. v. 11. & cap. 23. v. 5. ac proinde serpentem æneum, cui adolebant incensum, in Idolum abominandum converterant; & idcirco Ezechias justo zelo illum confregit, sicut & alia Idola. Apud Christianos verò thus in varios usus, etiam profanos usurpatur: ejus suffitu honorantur res Deo sacræ, Sacerdotes, Principes, & defunctorum corpora.

Dices: saltem Ecclesia non debuit definire tanquam ex fide credendum Imagines esse retinendas & venerandas; illud enim fide divina credi non potest, quod Deus non revelavit: atqui Deus non revelavit Imagines esse retinendas & venerandas, cum ex dictis illud sit meræ disciplinæ, nihilque Christus de Imaginibus præscripserit, & quæcumque de iis habentur in veteri Testamento, Christianos non spectent: Ergo.

Distinguo primam propositionem. Ecclesia non debuit definire tanquam ex fide credendum quoad usum & factum, hoc est, actu & de facto Imagines proponendas esse venerationi Fidelium, Concedo: quoad jus exponendi ipsas Imagines quando

quando & ubi judicaverit, Nego. Duplex itaque fieri potest quæstio circa Sanctorum Imagines. Prima, quæ est in materia fidei, utrum Legi Divinæ repugnet pingere & venerari Sanctorum Imagines? Cum autem hac de re esset controversia Catholicos inter & Heterodoxos, Ecclesia illam diremit, & pro suo jure definiit credendum fide divina non repugnare Legi Divinæ pingere & venerari Sanctorum Imagines; ipsius enim est interpretari Legem Divinam, Fidelesque docere quid per illam liceat, quidve interdicitur. Altera verò quæstio, utrum spectatis omnibus circumstantiis expediat Sanctorum Imagines in Templis venerationi Fidelium exponere, pertinet ad disciplinam duntaxat. Unde

Ad confirmationem, concessa majore, distinguo minorem. Deus non revelavit, Imagines esse retinendas & venerandas, positivè præcipiendo illas retineri, & in Templis collocari, Concedo: non revelavit fas esse eas retinere & in Templis collocare, subdistinguo: non revelavit speciatim, Concedo: generatim, quatenus revelavit Legem veterem, cujus illud erat præceptum Exod. 20. *Non facies tibi . . . omnem similitudinem*, promulgato Evangelio non obligare, Nego minorem: sic generatim revelavit Christianos jam non teneri abstinere à suffocato & sanguine, Legemque hac de re ab Apostolis sancitam Aët. 15. non esse inter præcepta divina numerandam, quibus nunquam derogari licet. Expositis verò Imaginibus Christi & Sanctorum venerationem deberi, manifestè colligitur ex Scriptura, in qua frequenter præcipitur re-

verentia erga res Deo dicatas, & ad Religionem pertinentes.

Instabis: S. Clemens Lib. 5. Stromatum, Tertullianus de Idololatria cap. 23. & alii probant Lege Divina prohiberi Christianis omnem Imaginem; Ergo.

Distinguo antecedens. Lege Divina prohibetur omnis Imago, ubi periculum idololatriæ instat, sicut prioribus Ecclesiæ sæculis, quibus scribebant illi Patres, Concedo; hæc enim prohibitio continetur in primo Decalogi præcepto, quia, ut dictum est, idololatria & occasio ejus proxima Jure naturali prohibetur; ubi remotum est idololatriæ periculum; Nego antecedens. Addo Patres citatos præsertim esse intelligendos de Imaginibus sanctissimæ Trinitatis, ut patet ex eorum lectione.

Q. 2. *Estne improbandus usus Imaginum sanctissimæ Trinitatis?*

R. Primò, Ecclesiæ nihil in hanc rem statuit.

R. Secundò, nullus fuit usus hujusmodi Imaginum usque ad nonum sæculum. De primo, secundo & tertio sæculo testes sunt Patres laudati Clemens Alexandrinus & Tertullianus. De quarto & quinto S. Augustinus in Psal. 113. floruit enim in utroque. De octavo Concilium septimum; namque actione septima eorum calumniam refellit, qui dicerent Christianos Imaginibus Deum circumscribere. *Christiani, inquit, invisibilis & incomprehensibilis Imaginem nunquam fecerunt, (intellige, paucis exceptis, ut sancto Paulino Epist. 12. ad Severum) sed secundum quam caro factum est, ea quæ humanæ dispensationis ejus sunt, pingunt.* Non rejicit tamen usum exprimendi Spiritum Sanctum

ctum sub forma Columbæ; quia in ea specie apparuit. Neque etiam in usu erant nono sæculo, ut constat ex Scriptoribus illius ævi, imò eas rejiciunt Henricus à Gandavo decimo tertio sæculo, Durandus decimo quarto; narratque Aventinus Lib. 7. suorum Annalium, Joannem XXII. voluisse exuri quosdam, qui Patrem sub specie fœnis effinxerant, utpotè qui viderentur impegisse in errorem Antropomorphitarum. Eas quoque postmodum reprobarunt Tostatus & alii.

R. Tertiò, Usus illarum Imaginum per se non est malus; 1. quia sensim sine sensu, Ecclesia minimè refragante, obtinuit, 2. quia Deus in forma humana apparuit, Gen. 3. v. 8. Exod. 33. v. 23. Dan. 7. v. 9. Cùm ergo Angeli rectè pingantur in forma humana, quia in ea visi sunt, ex Concilio septimo, quidni & Deus? 3. Idem licet Pictori, quod Scripturæ, quæ Deum sæpius pingit cum membris humanis: ea ratione Veteres etiam Christum pinxerunt sub agni specie, quia Scripturæ sic illum nobis exhibent; Synodus tamen Trullana septimo sæculo hunc morem improbavit Can. 82. 4. Romæ in Tribunali Inquisitionis anno 1690. proscripta est hæc propositio: *Dei Patris simulacrum nefas est Christiano in Templo collocare.*

R. Quartò, omnes concedunt usum illum respectu rudiorum non esse sine aliquo periculo, saltem remoto; quod Patres Tridentini indicant Sess. 25. his verbis: *Quod si aliquando historias & narrationes sacre Scripturæ, cum id indoctæ plebi expediet, figurari contigerit; doceatur populus, non propterea divinitatem figurari, quasi corporeis oculis conspici, vel coloribus aut figuris exprimi possit.*

Q. 3. *Quomodo colendæ sunt Imagines?*

R. Jam diximus non colendas, nisi cultu respectivo majori vel minori, pro dignitate exemplaris. Sed in quo præcisè consistat ille cultus, & quomodo in praxi sit exhibendus, non conveniunt inter se Theologi; quia non eodem modo ab eis concipitur Imaginum ad sua exemplaria habitudo, ex qua nascitur omnis earum excellentia & cultus.

Alii volunt, Imaginem esse signum duntaxat institutum in memoriam prototypi: unde inferunt non deberi Imagini nisi cultum exteriorem, hoc est, cultum, qui coram Imagine, v. g. Christi, ita exhibeatur, ut non ad imaginem, sed ad ipsum exemplar terminetur.

Refellitur hæc sententia, quia ex sanctis Patribus & Conciliis sacræ Imagines honorandæ sunt cultu proprio, sicut templa, vasa sacra, & alia religiosa instrumenta, id est, inferiore eo, quo earum exemplaria afficiuntur: v. g. Crux & Imago Christi non est veneranda eo latræ cultu, quo ipse Christus adoratur. Atqui exterior ille cultus i. non est propriè Imaginis, licèt coram ea pendatur; quia voluntatis affectus, in quo diximus honorem essentialiter consistere, nullatenus ad Imaginem inclinatur, sed ad ejus exemplar: ut videre est in exemplo ejus, qui, ne è memoria excidat se ex præcepto teneri recitari v. g. canticum *Te Deum laudamus*, antequam cubile petat, calculum vel aliud signum in patenti cubiculi loco collocat; quo postea viso prædictam orationem genibus flexis fundens, non censetur venerari calculum; cùm in eo nullam excellentiam apprehendat, nec voluntas ejus ad illum

lum inclinetur ; sed totus cultus ejus , five interior, five exterior, ad Deum unicè dirigatur. 2. Cultus ille exterior coram imagine Christi , aut sanctissimæ Trinitatis , est supremus & latria ; quia in illo apprehenditur infinita Dei excellentia , & voluntas plenè & omnimodè se demittit. At Concilia honorem longè inferiorem tribuunt Imaginibus , ac proinde distinctum , & ipsis proprium, quamvis relativum, qui & dependitur vasis sacris.

Nec dicas, Gallicanos Præsules capite primo laudatos docuisse octavo & nono sæculo sacras Imagines retinendas ad memoriam duntaxat, non ad cultum ; nec comparandas vasis sacris : Nam ibidem demonstravimus illos statuisse Imagines honorificè habendas , & in Templis collocandas. Non eis itaque omnem honorem negarunt , sed eum solùm , quem Græci illis tribuebant, qui nimius ipsis videbatur, salva tamen charitate & pace. Non tulerunt etiam Imagines cum sacris vasis omnimodè componi, sed ex parte tantum ; nam in sacris vasis duo sunt attendenda : primum , quòd contactu corporis Christi sanctificata sint : secundum, quòd habitudinem habeant ad Deum utpotè ad ejus cultum destinata. Priori respectu distant ab Imaginibus , posteriori cum illis conveniunt.

Alii Theologi in Imaginibus exemplaria apprehendunt , ita ut Christus v. g. in Cruce vel in alia effigie , sit simul cum illa figura , totale adorationis objectum ; quemadmodum Rex purpura circumdatus non duplicem venerationem terminat , alteram , quæ in personam ejus tendat, alteram, quæ vestem ejus spectet. Unde in
hac

hac sententia inde planè honos exhibetur Imagini, qui exemplari, quia ipsummet exemplar in Imagine apprehenditur, ac proinde Crux & alia Christi effigies cultu latriæ, respectivo tamen, veneranda est.

Refellitur hæc sententia iisdem momentis, quibus præcedens; quia juxta illum explicandi modum, non Imago, quæ non attenditur, sicut nec purpura Regis in allato exemplo, sed ipsum exemplar honoratur. Atqui Imagines sunt honorandæ cultu proprio & inferiori. Adde, quòd ille venerationis modus est periculosus, & Hæreticis nostram Religionem blasphemandi ansam præbet, Idololatris verò suam superstitionem excusandi; quidni enim Idolis sacrificarent tanquam Divinitatis imaginibus, si tales Imagines hoc explicandi modo merentur cultum latriæ?

Alii denique, quorum sententiam ut verior, Conciliis magis conformem, & in praxi tutiorem amplectimur, docent Imaginem Christi, vel alicujus Sancti, concipiendam ut ejus similitudinem expressam, atque ideo nobis pretiosam; quia hæc similitudinis relatio & habitudo est quædam excellentia à prototypo derivata, propter quam omnes homines sensu quodammodo à natura indito, amicorum imagines solent charas habere, diligere, osculari, & in honoratiori loco collocare. Sed cum excellentia tanta non sit in imagine, quanta in prototypo, honor, qui excellentiæ respondere debet, æqualis utrique tribui non potest, sicut nec vasa sacra propter habitudinem, quam habent ad Deum, pari cum Deo veneratione afficimus.

Ita

Ita Patres Nicæni, qui actione prima, secunda, & tertia, semper distinguunt inter adorationem Imaginis & exemplaris: cùmque actione sexta Iconomachi Christianis exprobrarent, quòd eandem Deo & Imaginibus adorationem deferrent, Synodus exclamat: *O stoliditatem! Christiani quippe adorationem, quæ in Spiritu & veritate est, neque Imaginibus, neque figuræ divinæ Crucis impertiti sunt, adorationem, quæ per fidem est, nisi soli Deo offerunt.* Quod idem repetit actione septima in definitione Fidei, quam supra exscripsimus. Ergo cultum Imaginum crucis & Christi confundere non licet cum cultu, qui Deo exhibetur, quandoquidem Ecclesia utrumque sollicitè distinguit.



Tracta-



Tractatus DE G R A T I A CHRISTI.

Hic Tractatus cum præcedenti ita connexus est, ut sub uno & eodem titulo de Incarnatione & Gratia differendum videretur, enimverò Incarnatio se habet ad gratiam, sicut causa ad effectum, fons ad rivum; namque ex dictis Filius Dei incarnatus factus est nobis justitia & sapientia, quatenus promeritus est nobis omnia gratiarum genera, quas tanquam vivificum Ecclesiæ Caput in eam, quæ est corpus ejus, continuo influit. Ordo igitur doctrinæ postulat, ut expensis quæ Incarnationem spectant, exponamus quinam sint fructus ejus, hoc est, quàm pretiosa, quàm magnifica, quàmque necessaria sint gratiarum dona, quæ ex illo mysterio emanant.

CA.

CAPUT PRIMUM.

De varia Christi Gratiæ acceptione.

Q. 1. *Cur Gratia sic dicitur?*

R. Quia gratis datur ; est enim donum gratuitum, nec rependitur ut merces aut debitum. Si gratia, inquit Apostolus Rom. II. *jam non ex operibus ; alioquin gratia jam non est gratia.*

Q. 2. *Quotuplici modo Gratia sumitur?*

R. Triplici. 1. Latè, pro dono naturali gratis concesso, qualis est creatio aut conservatio, quam non promeruimus. In hac acceptione Angeli dicuntur in Concilio generali VI. gratia immortales. 2. Strictiùs pro dono supernaturali ad salutem æternam ordinato independentem à meritis Christi concesso. Talis fuit in nostra sententia gratia Angelorum & primi parentis in statu innocentiae ; talis quoque gratia Christi, quam diximus ipsum non promeruisse. 3. Strictissimè pro dono supernaturali post lapsum primorum parentum collato meritis Christi.

Gratiam 3. modo duntaxat hinc accipimus juxta SS. Patrum mentem, ac præsertim sancti Augustini Epistola 177. alias 95. in qua sic scribit : *Illam gratiam, qua creati sumus homines, etiam si ita appellandam non immeritò intelligimus, mirum est tamen si ita appellatam in ullis legitimis Prophecticis, Evangelicis, Apostolicisque Litteris legimus. Hanc Apostolica Doctrina gratiam isto nomine appellat, qua salvamur & justificamur Fide Christi.* Gratiam sic acceptam Pelagius, à quo Pelagiani & Semipelagiani, necessariam negavit V. ineunte sæculo, propterea que accusatus in Concilio Diospo-

litano Patres fefellit, justamque damnationem vitavit per subdolam Confessionem. Ibi quippe professus est gratiæ necessitatem, sed in prima acceptione. Nimirum per gratiam intelligebat verisipellis hæreticus creationem & conservationem, sine quibus nec sumus, nec quidquam possumus.

Q. 3. *Quid est gratia Christi?*

R. Est donum Dei gratuitum, supernaturale, homini lapsò concessum per merita Christi Domini in ordine ad vitam æternam.

Dicitur 1. *donum gratuitum*; ut ostendatur non rependi præcedentibus operibus; sed gratis dari: alioquin Gratia jam non esset gratia. Rom. 11.

Dices: De fide est, justum bonis operibus mereri augmentum gratiæ; sic enim definiit Concilium Tridentinum Sess. 6. Can. 32. Atqui illud augmentum, licet rependatur bonis operibus, est vera gratia: ergo vera gratia potest habere rationem remunerationis & mercedis.

Respondeo concessa majore, de qua ubi de Merito, distingo minorem. Illud augmentum est vera gratia, etiamsi rependatur bonis operibus ex gratia elicitis, Concedo: sine gratia elicitis: Nego minorem.

Distinguo similiter consequens. Vera gratia potest habere rationem remunerationis & mercedis, si reddatur operibus ex gratia elicitis, Concedo; tanta enim est Dei erga omnes homines bonitas, ut eorum velit esse merita, quæ sunt ipsius dona, inquiunt Tridentini Patres Sess. 6. cap. 16. fecus, Nego consequentiam. Apostolus autem loquitur de operibus viribus naturæ elicitis, quibus si debeatur retributio, gratia non erit gratia, sed merces. Porro si quis ad amici gratiam

gratiam refert, quod ex ejus bonis lucratus est, etiamsi lucrum illud sit fructus propriæ industriæ; multò magis meritoria justì opera tribuenda sunt Christo, cùm justus ab eo non solum habeat potestatem benè operandi, sed & industriam; non enim sine efficaci ejus auxilio benè uteretur gratia jam accepta; Deus quippe *in vobis operatur & velle & perficere*, ait Apostolus Philipp. 2. vers. 13.

Dicitur 2. *Supernaturale*, ut Gratia Christi distinguatur à donis naturalibus, qualis est creatio, conservatio, sanitas corporalis, &c. Cùm autem *supernaturale* diversimodè dicatur, & plerumque Clerici hoc nomine nihil nisi confusè percipiant doceantve, ubi in Catechesibus ipsis incumbit exponere dona Dei supernaturalia; operæ pretium est explicare quomodo *supernaturale* hic accipiat, & quid præcisè significet. Quamobrem

Observandum 1. *supernaturale* duobus modis posse sumi, 1. improprie, pro eo quòd superat aliquam, non omnem naturam creatam, quomodo intuitivè videre substantiam spiritalem est supra conditionem hominis mortalis, non Angeli, 2. proprie, pro eo, quod excedit omnem naturam creatam & creabilem. Et hoc posteriori modo Gratia est supernaturalis.

Observandum 2. *supernaturale* in hac posteriori acceptione esse duplicis generis. Aliud est *supernaturale* duntaxat quoad modum; aliud quoad entitatem simul & modum. *Supernaturale* quoad modum tantum, est donum naturale quoad modum tantum, est donum naturale collatum modo supernaturali, hoc est, excedente vires cujusque naturæ creatæ; ut resurrectio Laza-

ri, fröndes ex arida Aaronis virga subitò erumpentes in amygdalas. Vita quippe Lazaro red-dita, & amygdalæ, sunt quid secundum entitatem naturalem, sed modus stupendus, quo illi effectus prodire, est omninò supernaturalis, & excedens vires cujusque naturæ creatæ. Supernaturale verò quoad entitatem, est donum elevans & ordinans creaturam ad Deum, ut in se est, illamque constituens in esse divino. Hinc Theologi definiunt illud esse propriè supernaturale quoad entitatem, quod ad Deum disponit, ut est Auctor gloriæ, id est, ut in se spectatus, & per visionem intuitivam possidendus: naturale verò, quod spectat Deum ut Auctorem naturæ, hoc est, quatenus relucet in operibus suis (scilicet creaturis) & per eas abstractivè duntaxat est cognoscendus. Verùm hæc brevius dicta sunt, quàm ut clarè & distinctè percipiatur, quid sit supernaturale quoad entitatem. Quapropter

Observandum est 3. ex dictis, ubi de visione beatifica, triplicem à sancto Thoma distingui rerum ordinem. In primo ordine sunt res corporeæ, quæ constant ex materia physica & corporea, ut animal. In secundo sunt substantiæ spirituales creatæ, quæ quidem abstrahunt à materia physica & corporea; sed componuntur ex potentia, quæ dicitur materia metaphysica, & ex actu seu forma. Sic Angelus est substantia incorporea & immaterialis; sed non est sine potentia, siue objectiva ad accipiendum esse, si spectatur ut possibilis, siue subjectiva ad accipiendam novam perfectionem, putà sapientiam, cognitionem, &c. Unde Angelus sapiens, intelligens, sanctus, est aliquid compositum ex natura Angelica & sapientia,

tia, cognitione, & gratia sanctificante. In tertio ordine solus Deus reperitur, qui, utpotè ens à se, est actus purissimus, summè necessarius & sine ulla compositione, infinitè perfectus in omni genere perfectionis, ita ut intellectio, sapientia, & cæteræ perfectiones sint ipsius esse, aptiùsque Deus dicatur intellectio, quàm intelligens; sapientia, bonitas, & sanctitas, quàm sapiens, bonus & sanctus.

Porro cùm operari sequatur esse, ea, quæ sunt primi ordinis, non possunt operari, quæ pertinent ad secundum ordinem; nec ista, quæ pertinent ad tertium, v. g. animal irrationale, utpote ex materia corporea concretum non potest operari, quæ sunt propria Angeli, putà cognoscere spiritalia, sicut nec Angelus potest per propriæ naturæ vires attingere ea, quæ sunt divina, nempe Deum cognoscere intuitivè & sicut in se est.

Ergo gratia est donum supernaturale, tum quoad modum, tum quoad entitatem; quia transcendit omnem creaturarum ordinem & virtutem, hominemque sive Angelum Deiformem reddit, ut loquitur sanctus Thomas 1. part. quæst 12. art. 5. ad 3. ubi sic scribit: *Dispositio ad formam ignis non potest esse naturalis, nisi habenti formam ignis. Unde lumen gloriæ non potest esse naturale creaturæ, nisi creatura esset naturæ divinæ, quod est impossibile; per hoc enim lumen fit creatura Deiformis.* Idem quoque dicendum de Gratia, quæ est semen gloriæ, & dispositio ad illam.

Dicitur 3. homini lapsò concessum, ut ostendatur hanc gratiam esse maximè gratuitam; siquidem donum, quod indulgetur inimico, magis gratuitum est, quàm quod tribuitur non inimico, ut

notat Apostolus Rom. 5. his verbis : *Commendat autem charitatem suam Deus in nobis ; quoniam cum adhuc peccatores essemus . . . reconciliati sumus Deo per mortem Filii ejus.*

Dicitur 4. *meritis Christi*, ut distinguatur gratia hujus status à gratia Angelorum , & status innocentiae , quæ in nostra sententia independenter à meritis Christi fuit concessa : homini autem lapso Deus *benedixit in omni benedictione spiritali in cælestibus in Christo*, Ephes. 1. vers. 3.

Oritur hîc difficultas , utrùm gratia fundata in meritis Christi sit quid dignius gratia Angelorum, & statu innocentiae ?

R. Physicè non est quid dignius, cum idem sit utriusque objectum & finis. Imò sanctus Augustinus Lib. de Prædest. Sanctorum cap. 13. docet gratiam Christo concessam, quam diximus ipsum non promeruisse, ejusdem esse naturæ cum ea, quam in membra sua diffundit. *Ea gratia*, inquit, *fit ab initio fidei suæ quisque Christianus , qua gratia ab initio ille factus est Christus.*

Moraliter tamen Gratia, quam Christi meritis consequimur, longè est dignior ; quia nos jungit Christo, ut membra capiti, compingitque in unum cum illo corpus, quo fit ut justos, præfertim electos, Deus speciali favore prosequatur tanquam Filii sui naturalis membra, efficacioribus auxiliis illos adjuvet, orationes illorum benignius audiat. Unde Christus Joan. 17. vers. 16. sic Patrem alloquitur : *Dilectio , qua dilexisti me , in ipsis sit ; & ego in ipsis.* Addunt nonnulli Theologi bona justorum opera majoris esse meriti, utpote quæ ex membris Christi procedant ; quia dignitas personæ confert ad valorem boni operis. Sed quid-

quidquid sit de illa sententia, saltem negari non potest, quin sit singulare Gratiae Christi privilegium, quodd in justificatione applicet satisfactionem ejus infinitam. Hinc 1. Petri cap. 1. Gratia vocatur aspersio sanguinis Christi, & Apoc. 1. Fideles dicuntur lavari in sanguine Christi.

Dicitur 5. *in ordine ad vitam æternam*; quia, ut diximus, Gratia est semen gloriæ, quatenus hominem ad illam elevat, movet ac disponit. Hinc Joan. 4. dicitur *fons aquæ salientis in vitam æternam*.

CAPUT II.

De Divisione Gratiae Christi.

Gratia Christi generatim dividitur in exteriorem, qualis est Evangelii prædicatio, Incarnatio, Sacramentorum institutio: & in interiorem, putà fidem, gratiam sanctificantem, &c. De interiore duntaxat hîc agimus. Gratia autem interior dividitur in gratiam gratis datam, & gratiam gratum facientem, de quibus separatim dicendum.

§. Prior.

De Gratia gratis data.

Q. I. *Quid est Gratia gratis data?*

R. Est gratia, quæ primariò datur ad aliorum salutem, ut donum linguarum, potestas conficiendi Sacramenta; in eoque differt à gratia gratum faciente, quodd hæc posterior primariò ordinetur ad salutem accipientis, illumque Deo conjungat.

Dixi, *primariò*; quia si quis gratia gratis data rectè utatur, v. g. Sacramenta piè administret, gratia gratis data ipsi *secundariò* prodest ad salutem; quemadmodum gratia gratum faciens, puta fides, quæ per dilectionem operatur, *secundariò* proximum ad pietatem incitat, juxta illud Matth. 5. *Videant opera vestra bona, & glorificent Patrem vestrum, qui in cælis est.*

Q. 2. *Quare gratia gratis data sic dicitur, cum gratia gratum faciens etiam gratis detur, alioquin non esset gratia?*

R. Quia nomen generis solet tribui speciei ignobiliori, sic bruta simpliciter vocantur animalia, & eo nomine distinguuntur ab homine, qui, quamvis sit & ipse animal; non sine contumelia tamen appellaretur animal; quia præterquam quod est animal, ratione præcellit, propter quam specialiter denominatur homo. Similiter cum gratia gratum faciens sit nobilissima gratiæ species; nomen speciale sortitur, cæteræ verò ignobiliores genericum gratiæ nomen retinent, simpliciterque dicuntur gratiæ gratis datæ.

Dices: Bonum illud majus est, quod ad plures se extendit: atqui gratia gratis data ad plures se extendit, quàm gratia gratum faciens, hæc quippe ordinatur duntaxat ad salutem recipientis: illa verò ad bonum commune Christianæ societatis. Ergo.

Distinguo majorem. Bonum majus est, quod ad plures se extendit, si comparetur cum bono ejusdem generis, Concedo: v. g. lumen Solis, quod latius diffunditur, majus est bonum, quàm bonum candelæ. Si comparetur cum bono superioris ordinis, nego majorem. Namque lumen Solis,

Solis, etsi per totum aerem diffusum, non est majus bonum sapientiâ, quæ solam sapientis mentem illustrat. Porro gratia gratis data & gratia gratum faciens sunt dona diversi ordinis; quia, ut jam diximus, per gratiam gratum facientem homo tendit ad Deum, eique conjungitur: per gratiam autem gratis datam proximum disponit ad percipiendam gratiam gratum facientem. Deinde homo gratia gratis data rectè non utitur sine auxilio gratiæ gratum facientis: *Multi dicent mihi in illa die, ait Christus Matth. 7. Domine, Domine, nonne in nomine tuo prophetavimus, & in nomine tuo dæmonia ejecimus, & in nomine tuo virtutes multas fecimus? & tunc confitebor illis, quia nunquam novi vos: discedite à me, qui operamini iniquitatem?*

Q. 3. Quot sunt gratiæ gratis datæ?

R. Novem ab Apostolo numerantur 1. Cor. 12. his verbis: *Alii quidem per Spiritum datur sermo sapientiæ: alii autem sermo scientiæ alteri fides . . . alii gratia sanitarum . . . alii operatio virtutum: alii prophetia: alii discretio spirituum: alii genera linguarum: alii interpretatio sermonum.*

Q. 4. Quid hic intelligitur nomine fidei?

R. Non intelligitur Fides Theologica, quæ pertinet ad gratiam gratum facientem; sed accipitur ab Apostolo, vel pro dono explicandi mysteria Fidei, vel pro fiducia divinitus immissa ad patrandam miracula, juxta illud Matth. 17. vers. 19. *Si habueritis fidem, sicut granum synapis, dicetis monti huic, transi hinc illuc, & transibit; nam sine hoc speciali fiduciæ dono temerè quis se accingeret ad patrandam miracula. Petrus v. gr. Deum tentasset, cum claudio dixit Act. 3. In nomine Jesu Christi Nazareni surge & ambula.*

Q. 5. *Hæc gratiarum gratis datarum divisio estne conveniens & legitima?*

R. Affirmat sanctus Thomas, & probat 1. 2. quæst. 111. art. 4. quia homo cooperatur saluti alterius, illamque ad Deum reducit, quatenus exterius illum docet, persuadetque. Atqui tria ad hoc requiruntur; namque Magister debet 1. plenè & perfectè cognoscere quæ docet; 2. probare & confirmare: 3. audiri & percipi à discipulis.

Ad primum tria sunt necessaria. Primum, necesse est, noverit principia disciplinæ, ad quam discipulos instituere intendit. Secundum, ex iisdem principiis conclusiones deducat. Tertium, quæ docet, exemplis illustret. Per fidem autem intelligit mysteria Fidei, quæ sunt principia Disciplinæ Christianæ: per sapientiam, ex hujusmodi principiis elicit conclusiones; per scientiam denique doctrinam suam illustrat exemplis rerum naturalium, quæ sunt objecta scientiæ.

Ad secundum, cum Minister Evangelii doceat quæ rationem superant, illa probare & confirmare nequit, nisi per opera divinæ virtuti propria, ut miracula, quæ quadruplicis generis recenset Apostolus pro diversitate circumstantiarum, in quibus potest esse Verbi Divini Minister. Vel enim ex auditoribus aliqui infirmitate corporis laborant, & per gratiam sanitatum illos ad credendum promptius inducit. Vel si omnes ab ægitudine corporali liberi sint: saltem in aliqua versantur indigentia, à qua si per gratiam virtutum, seu miraculorum illos liberaverit, facilè in suam sententiam adducet, quemadmodum Christus Joan. 6. multiplicatione panum Judæos sibi

sibi conciliavit. Quòd si horum non se offerat occasio, fidem auditoribus faciet, vel prophetico spiritu, vel discretionem spirituum, seu manifestatione secretorum cordis; divinatio enim, & humani cordis penetratio sunt signa divinitatis.

Ad tertium, ut Magister percipiatur ab auditoribus: juvant dona linguarum, & interpretatio sermonum, ut per se patet. Ergo legitima est & conveniens gratiarum gratis datarum divisio.

Dices: Sine hujusmodi gratuitis donis Evangelium nunc in Ecclesia annuntiatur & confirmatur, ergo non sunt necessaria.

Nego absolute antecedens. Namque ad confirmandos præsertim Infideles, adducere necesse est prophetias & miracula olim à Christo, & ejus discipulis edita; cum enim idem Evangelium hodie prædicetur, quod temporibus Apostolorum, pristina miracula utpotè indubitata, & in commendationem Doctrinæ Christianæ patrata, prædicationi hodiernæ fidem astruunt. *Tenet me in Ecclesia Catholica Fides miraculis inchoata*, aiebat olim sanctus Augustinus. Quanquam nec in Ecclesia hodie defunt nova miracula; etsi rariora & minus necessaria; Deus enim, qui dives est in misericordia, ad excitandam nostram socordiam identidem suscitavit viros tum sanctitate insignes, tum gratia virtutum potentes, ut legitur de sanctis Bernardo, & Vincentio Ferrerio, Francisco Xaverio, & aliis benemultis. Adde quod præter exteriora ejusmodi divina signa, non inferiores gratiæ gratis datæ in Ecclesia constanter permanent. Nam potestas conficiendi Sacramenta est insignis gratia virtutum: singulare

singulare etiam Ecclesiæ Catholicæ privilegium infallibiliter explicandi mysteria Fidei, sacram Scripturam interpretandi, vera à falsis discernendi, reduci debet ad Fidem, interpretationem sermonum, & discretionem spirituum. Porro donum linguarum videtur nunc superfluum, cum jam Ecclesia per universum orbem diffusa loquatur lingua omnium gentium, & ab iis intelligatur.

Q. 6. *Gratiæ gratis datæ suntne habitus?*

R. 1. Fides sumpta pro plena mysteriorum cognitione, sapientia, scientia, donum linguarum, & interpretatio sermonum videntur esse habitus; nam signum habitus est, quòd eo utimur quando volumus: atqui illæ gratiæ ita se habent: Ergo.

R. 2. Reliquæ gratiæ non sunt habitus, sed divinæ operationes transitoriae: quia Apostoli iis non utebantur ad nutum; nam Matth. 17. non potuerunt curare lunaticum, Daniel cap. 2. Deum enixè orat antequam prophetet. Hinc sanctus Hieronymus in cap. 25. Ezech. sic scribit: *Si semper in Prophetis esset sermo Dei, & jube in pectore eorum haberet hospitium, nunquam tam crebrò Ezechiel poneret: Factus est sermo Domini ad me dicens.*

Et hæc de gratiis gratis datis sufficiant. Nec totos nos incumbere oportet elucidandis iis, quæ ad gratiam gratum facientem pertinent. Quare sit

§. Posterior.

De Nomine & Divisione Gratiae gratum facientis.

Q. 1. *Quare gratia gratum faciens sic dicitur?*

R. Quia

R. Quia eò tendit, ut Deo perfectè serviamus, eique totaliter adhæreamus, quod ipsi longè est gratissimum.

Q. 2. *Quotuplex est gratia gratum faciens?*

R. Duplex, nempe habitualis, & actualis.

Q. 3. *Quid est gratia habitualis?*

R. Est gratia animæ permanentè inhærens per modum habitus, hominemque disponens ad vitam æternam, ut gratia sanctificans.

Q. 4. *Quid est gratia actualis?*

R. Est illustratio, seu cogitatio supernaturalis in intellectu, & pia affectio similiter supernaturalis in voluntate.

Dices: Gratia, ex dictis, est gratuitum Dei donum supernaturale; atqui illustratio, seu cogitatio, & pia affectio non sunt Dei dona, sed actus ab homine elicit: ergo non sunt Dei gratia.

Nego minorem, cujus confirmationem distinguo: sunt actus ab homine supernaturaliter elicit, Concedo: naturaliter elicit, Nego. Sicut ergo visio beatifica, & amor beatificus, licet sint actus ab intellectu, & voluntate Beatorum elicit, nihilominus sunt Dei dona; quia non producuntur ab intellectu & voluntate naturaliter operantibus, sed supernaturaliter à Deo elevatis. Sic sancta cogitatio, & pia affectio sunt gratiæ actuales: quia ab intellectu & voluntate naturalibus viribus non procedunt, sed impressione & motione divina, eaque supernaturali.

Q. 5. *Quotuplex est gratia habitualis?*

R. Triplex, nimirum gratia sanctificans, seu justificans, qua homo fit justus formaliter; virtutes infusæ; & dona Spiritus Sancti, quibus homo disponitur ad actus supernaturales.

Q. 6.

Q. 6. *Quotuplex est gratia actualis?*

R. Triplex. Prima dicitur operans, præveniens, & excitans. Secunda adjuvans, cooperans & concomitans. Tertia subsequens. Ita Patres Tridentini Sess. 6. cap. 16. his verbis: *Cum . . . ille ipse Christus Jesus tanquam Caput in membra, & tanquam vitis in palmites, in ipsos justificatos jugiter virtutem influat, quæ virtus bona eorum opera semper antecedit, & comitatur, & subsequitur.* De prima gratia loquitur Regius Vates Psal. 58. v. 11. *Misericordia ejus præveniet me.* De secunda Psalm. 93. v. 18. *Misericordia tua, Domine adjuvabat me.* De tertia Psalm. 22. v. 6. *Misericordia tua subsequetur me.* Ergo revera existunt tres illæ gratiarum species.

Q. 7. *Quid est gratia operans, seu excitans & præveniens?*

R. Omittis variis Theologorum sententiis, rectè describitur, supernaturalis à Deo immixta sancta cogitatio, & indeliberata voluntatis motio seu affectio, qua homo vel à Deo averfus, vel in bono torpens excitatur.

Q. 8. *Quid est gratia adjuvans seu cooperans & concomitans?*

R. Est supernaturale auxilium seu actualis Dei influxus, quo roborata voluntas liberè consentit gratiæ excitanti.

Ergo gratia adjuvans realiter distinguitur à gratia excitante, actus enim liber realiter differt ab actu necessario & indeliberato. Atqui gratia excitans est actus indeliberatus, & antecedens liberum voluntatis consensum, adjuvans verò est ipse liber voluntatis consensus, non quidem prout est à voluntate, sed prout est à Deo influente, & efficiente illum consensum.

Q. 9.

Q. 9. *Quid est gratia subsequens?*

R. Est supernaturale Dei auxilium, quo firmatur voluntas in bono proposito, & adjuvatur, ut illud ad executionem perducatur. Deus v. g. inspiravit affectum jejunandi; est gratia præveniens & excitans seu operans; voluntas liberè consentit inspirationi divinæ, & jejunare proponit: est gratia adjuvans & cooperans seu concomitans. Sed uberiori indiget auxilio, ut actu & de facto jejundet; quia in executione major occurrit difficultas, quam si homo superaverit, erit gratia subsequens. Ita ferè sanctus Bernardus Lib. de Gratia & libero arbitrio cap. 14. *Deus immittendo bonam cogitationem, inquit, nos prævenit: immutando etiam malam voluntatem, sibi per consensum jungit: ministrando & consensui facultatem, foris per apertum opus nostrum internus opifex innotescit. Et infra: Liberum excitat arbitrium, cum seminat cogitatum: sanat, cum immutat affectum: roborat, ut perducatur ad actum: servat, ne sentiat defectum.*

Gratia actualis sive excitans, sive adjuvans, sive subsequens, subdividitur in sufficientem, & efficacem, de qua divisione nostra ætate valdè celebri propter arduas circa eam ortas controversias, separatim tractandum erit.

Q. 1. *Ad quid tam varia gratiarum supellex?*

R. Cum homo per gratiam gratum facientem transeat in esse quoddam divinum, ita ut in justificatione dicatur regenerari, ad Tit. c. 3. v. 5. ex Deo nasci, Joan. 1. v. 13. 1. Joan. 3. v. 9. fieri nova creatura, & novus homo; necessitas, connexio, & subordinatio gratiarum, quæ requiruntur ad formandum supernaturalem & divinum illum statum, explicandæ sunt exemplo eorum,

rum , in quibus consistit naturalis vita cujusque animalis.

Igitur in vivente , putà homine , tria sunt attendenda , scilicet natura , potentiæ naturales , & actus inde emanantes. 1. quidem natura , quæ est radix , & primum principium omnium proprietatum , & motuum , quæ sunt in homine. 2. Facultates naturales, v. g. intellectus, voluntas , potentia visiva , motrix , &c. homo quippe , quantumcunque natura sua rationalis , non ratiocinatur , nec intelligit nisi per intellectum ; non amat nisi per voluntatem ; non videt nisi per oculum seu facultatem visivam ; 3. Sequuntur actus & operationes , ad quas natura humana per potentias sibi congenitas tendit , tanquam ad ultimam sui perfectionem. Ad operationem autem necesse est , ut objectum potentiæ applicetur , eamque moveat : intellectus v. g. cognitionem non eliciet , nisi objectum cognoscibile sit ei præsens , saltem per sui speciem : nec voluntas amabit , nisi objectum amabile illi innotescat , illamque afficiat : nec oculus , quamvis perfectè sanus , percipiet colores , nisi lumine illustretur. Denique frustra hæc adfuerint , nisi Deus insuper concurrat , vel promoveat , ut docent etiam Philosophi. In hac descriptione vitæ naturalis cernere licet veluti in expressa tabella recensitarum gratiarum seriem , & omnem vitæ supernaturalis œconomiam. Naturæ respondet gratia sanctificans , prima radix vitæ supernaturalis ; potentiis naturalibus virtutes infusæ , & dona Spiritus Sancti ; actibus vitalibus motiones divinæ , seu gratiæ actuales ; Deus enim non solum posse , sed & velle & perficere in

in nobis operatur, Philipp. 2. Per gratiam prævenientem seu operantem objectum animæ supernaturaliter repræsentat, illamque ad cognoscendum & amandum movet: per cooperantem illam adjuvat, corroboratque, ne propria infirmitate deficiat: per subsequentem in bono proposito firmat contra difficultates, quæ in executione occurrunt.

Dices: Homini gratia sanctificante, & virtutibus infusis instructo nihil ad operandum deest, quàm concursus Dei generalis: ergo gratiæ actuales non sunt necessariae.

Probatur antecedens. Eadem est proportio inter virtutes infusas, & actus supernaturales, ad quos ordinantur, quæ inter potentias naturales, & actus ejusdem ordinis: ergo sicut homo præter intellectum non indiget nisi concursu generali ad agnoscendum quæ sunt obvia, & ad discendum à Magistro quæ sunt remotiora: ita justus cum virtutibus infusis, quas diximus se habere per modum potentiarum, & cum generali Dei concursu poterit absque gratia actuali apprehendere quæ ultrò menti se objiciunt, v. gr. Deum esse colendum, jus cuique servandum; & à Pastore discere quæ sunt abstractiora, ut mysteria nostræ Religionis.

Nego antecedens, & ad ejus confirmationem Respondeo I. negari posse antecedens; quia cum virtutes supernaturales sint naturæ humanæ adventitiæ, & quodammodo extraneæ, anima non est æquè propensa in earum actus, ac in actus potentiarum naturalium, quæ sunt ipsi congenitæ. Quemadmodum enim radix sylvestris succum suum in ramos sylvestres sibi connaturales trans-

mitteret, ita ut furculus frugifer trunco insertus sine alimento arefceret, nisi Hortulanus illos refecare curaret; sic anima per peccatum carnalis effecta, sese totam in sensus effundit, adeo ut ratio quamvis ipsi congenita, torpeat, sterilisque marcescat: quanto magis virtutes infusæ ipsi aliunde insertæ, & minimè naturales, nisi Pater cœlestis, quem Christus inducit tanquam Agricolam, Joan. 15. terrenos affectus amputet, divinis suis illustrationibus & motionibus animæ vires ad spiritualia transferat, & virtutes infusas in actum reducat? Hinc est quòd homini lapso semper difficile sit supernaturaliter operari etiam in iis, quæ sensibus sunt delectabilia, & rationi consentanea, ut opitulari optimo parenti, providere alendæ familiæ; & gratia, nisi sit efficax, nunquam habeat effectum propter inordinatum animæ impetum ad sensibilia.

Respondeo 2. distinguendo consequens: Justus cum generali Dei concursus poterit apprehendere supernaturalia modo naturali, Concedo: modo supernaturali, Nego consequentiam. Atque ut pateat solutio,

Advertes unum & idem objectum posse tripliciter apprehendi & concupisci: 1. lumine sensuum, & appetitu sensitivo: 2. lumine rationis, & appetitu rationali, 3. lumine & affectu supernaturali. Canis v. g. obsonium sensu percipit, & concupiscit appetitu sensitivo: homo idem obsonium insuper cognoscit lumine rationis, & ita ejus cognitio simul est sensitiva & rationalis, ac consequenter illud rationabiliter appetere potest. Justus si sicut oportet, operetur, illud idem obsonium supernaturali lumine apprehendit, & simul
Chri-

Christiano affectu appetit, sicque in eo reperitur cognitio & appetitio sensitiva, rationalis, & supernaturalis.

Primus agendi modus proprius est naturæ pecorinæ, & vitium in homine. Secundus est saltem sterilis & degener. Tertius est proprius Filiorum Dei, juxta illud Apostoli Rom. 8. *Quicumque . . . Spiritu Dei aguntur, ii sunt Filii Dei.* Videndum ergo quo quisque ducatur spiritu, an pecorino, an humano, an divino; Porro sicut pecus sine lumine corporeo videre non potest, nec homo sine lumine rationali intelligere, ita nec justus, sine lumine supernaturali, hoc est, gratia actuali, supernaturaliter credere, & diligere. Præceptor in catechesibus suis potest sensus auditorum afficere, & eorum mentibus suadere mysteria nostra esse credibilia: sed nisi Deus actuale Fidei lumen interiùs infundat, auditores actu non credent nisi persuasionem humanam & prorsus sterili. Ergo gratia actualis non solum peccatoribus, sed etiam justis est absolutè necessaria, continuòque à Deo petenda, exemplo illius justì, qui in eodem Psalmo plusquam vices sic Deum precatur: *Da mihi intellectum, & vivam; in via tua vivifica me.*

Hæc Gratia divisio & explicatio ordinem nobis præscribit, quem in hoc Tractatu servare debemus. Agendum nempe 1. de gratia habituali, & de ejus speciebus, scilicet de sanctificante, & justificante; de virtutibus infusis, & de donis Spiritus Sancti. 2. De gratia actuali, & de illis, quæ ad eam spectant. Sed quia ingredimur viam salebrofam, in qua varii errorum scopuli occurrunt, operæ pretium est referre, quinam præcipui

errores myſterium gratiæ impugnarint; nam ex S. Hieronymo, Epiſtola ad Cteſiphontem, errores damnantur, cùm deteguntur: quod præcipuè verum eſt, quando de iis Eccleſia tulit iudicium, quod in noſtra Hiſtoria non prætermitemus, ut ex illa Clerici conſtantem Eccleſiæ Traditionem colligant: ita duce Eccleſia, & *velificante Sancto Spiritu*, ut loquitur Tertullianus, *inter hos ſcopulos navigabit Fides noſtra, tuta ſi cauta, ſecura ſi attonita.*

CAPUT III.

Referuntur præcipui errores contra Gratiam
Chriſti.

§. I.

De antiquioribus Gratia Chriſti hoſtibus.

Primò, Judæi præſumentes de ſua juſtitia, quæ in lege eſt, rejecerunt Gratiam Chriſti tanquam inutilem. Contra hunc capitalem errorem acriter pugnarunt Apoſtoli, maximè ſanctus Paulus in Epiſtola ad Romanos, & ad Galatas.

Secundò, Origenes ex falſo principio, quod ex Platonicis hauſerat, nempe animas fuiſſe creatas ante unionem cum corporibus; prædeſtinationem quorundam referebat non ad Chriſti merita, ſed ad bona opera, quæ præceſſerant animarum unionem. Hinc ſanctus Hieronymus Epiſtol. ad Cteſiphontem, errorem Pelagii vocat ramuſculum Origenis. Sed ramuſculus ille in magnam arborem excrevit, quæ ramos ſuos in Oriente, & Occidente latè produxit, & ex ejus radice ortæ ſunt variæ hæreſes.

Unde

Unde Pelagius vulgò cenfetur primus , qui Christi Gratiam apertè impugnavit.

§. II.

De Pelagianis.

Pelagius , natione Scotus , professione Monachus , anno 403. secundùm S. Prosperum , vel 405. secundùm alios , docuit inter cætèra ,
1. Adamum fuisse conditum mortalem , & lapsu suo posteris nocuisse non propagatione , sed malo duntaxat exemplo ; nec proinde infantes , qui sine Baptismo decedunt , privari vita æterna.
2. Gratiam ad singulos actus non esse necessariam , & per opera naturalia nos illam promereri.
3. Ignorantiam & oblivionem non subiacere peccato , quoniam non eveniunt secundùm voluntatem , sed secundùm necessitatem. Hi & alii ejus errores proscripti sunt primùm Synodo Carthaginensi anno 412. in ejus Discipulo Cælestio : deinde anno 415. in ipso , imò ab ipso Pelagio damnati sunt in Synodo Diospolitana , quam S. Hieronymus miserrimam appellat ; quia delusa est subdola Pelagii professione , qua confessus est absolutam gratiæ necessitatem , sed alio sensu , quàm Catholici ; nomine enim gratiæ intelligebat creationem , conservationem , Evangelii prædicationem , & , secundùm S. Augustinum , interiores etiam mentis illustrationes. Cùmque sua impia dogmata disseminare pergeret , damnata est rursus Carthag. anno 416. in Concilio Milevitano , eodem anno cui adfuit sanctus Augustinus.
3. In Concilio Carthaginensi , in quo federunt 214. Episcopi anno 417. & à summis Pontificibus In-

nocentio I. & Zofimo : & sic per totum orbem hæresis proscripta est, ex S. Augustino Lib. de peccato originali cap. 17. Objecerunt Pelagiani, quoddam controversia tanti momenti non fuisset discussa in Concilio Oecumenico ; quibus reponit sanctus Augustinus Lib. 4. ad Bonifacium capite ultimo, his verbis : *Quasi nulla hæresis aliquando nisi Synodi congregatione damnata sit, cum potius rarissimæ inveniantur, propter quas damnandas talis necessitas extiterit. Verum istorum superbia hanc etiam captare gloriam intelligitur, ut propter illos Orientis & Occidentis Synodus congregaretur. Orbem quippe Catholicum, quem (Domino eis resistente) pervertere nequeunt, saltem commovere conantur.*

Inter Pelagii discipulos, celebres extitere Cœlestius ejusdem cum eo patriæ & professionis, ex S. Augustino Lib. de gestis Pelagii cap. 33. quem S. Hieronymus Epist. ad Ctesiphontem, facit totius exercitus ducem, ita ut Pelagiani ab ipso Cœlestiani dicerentur : & Julianus Episcopus Capuanus, ex Gennadio, vel Celanensis aut Celianensis, ex Beda, præfatione in Cantica vel potius Eclanensis sub Metropoli Beneventana, ut in Gennadio, & Beda, legendum esse censent eruditi. Hinc novæ opinionis magis auctor, quam Pelagianæ jam profligatæ sectator, docuit hominem sine gratia posse quidem orare, bonum velle, sed nullatenus operari posse, ex S. Augustino Lib. 2. ad Bonifacium c. 8. Hinc idem sanctus Doctor nominatim contra Julianum acuit calamum.

§. III.

De Semipelagianis.

Cum sanctus Augustinus Pelagianos ubique pro-

proscriptos infectaretur, nonnulli scriptis ejus commoti sunt, ac præ cæteris Monachi Adu-
mentini in Africa, quasi liberum arbitrium per
gratiam destrui doceret; sed Libris editis de gra-
tia & libero arbitrio, & de correptione & gratia,
quos misit ad Valentinum in Monasterio Adu-
mentino Præfectum, illos faciliè placavit.

Longè difficilior fuit compescere Mönachos
Massilienses in Gallia, qui ex posteriori Libro de
correptione & gratia scandalum passi, novum
bellum instaurarunt eo periculosius, quodd essent
viri pietate & doctrina insignes, ex S. Prospero
Epist. ad S. Augustinum. Hi in articulis præci-
pui à Pelagio dissidebant, nam cum Catholicis
confitebantur peccatum originale & gratiæ ne-
cessitatem non solum ad benè operandum, sed
etiam ad credendum. Sed audire non poterant,
1. voluntates humanas à Deo præveniri: 2. perse-
verantiam esse speciale Dei donum, quod qui-
busdam justis denegatur. Hæc fusiùs explicata, pro-
bata leguntur Tractatu de Incarnatione, ubi de
merito Christi.

Præterquam quodd errores Semipelagianorum
damnati fuerunt in Pelagio, contra illos expressè
scripserunt sanctus Augustinus Libris de dono
perseverantiæ, & de prædestinatione Sanctorum,
S. Prosper, S. Leo, & alii benemulti, ac tandem
pronuntiavit Concilium Arausicanum secundum
anno 539. sub Felice IV. Sic enim habet Can. 3.
*Si quis dixerit ad invocationem humanam gratiam Dei
posse conferri, non autem ipsam gratiam facere ut invoce-
tur à nobis, contradicit Iſaiæ Prophetæ. Et Can. 5.
Si quis sicut augmentum, ita etiam initium Fidei ipsum-
que credulitatis affectum, non per gratiæ donum, sed nobis*

naturaliter inesse dicit, Apostolicis dogmatibus adversarius reperitur. Et Can. 7. Si quis per naturæ vigorem bonum aliquod, quod ad salutem pertinet vitæ æternæ, cogitare ut expedit, aut eligere posse confirmat absque illuminatione & inspiratione Spiritus Sancti, hæretico fallitur spiritu.

Quæ hætenus contra Pelagianos & Semipelagianos fuerant definita, Concilium Tridentinum constabilivit tribus Canonibus Sessionis 6. Sic enim habet Can. 1. *Si quis dixerit hominem suis operibus, quæ vel per humanæ naturæ, vel per legis doctrinam fiant, absque divina per Jesum Christum gratia posse justificari coram Deo, anathema sit. Can. 2. Si quis dixerit ad hoc solam divinam gratiam per Jesum Christum dari, ut facilius homo justè vivere . . . possit . . . anathema sit. Et Can. 3. Si quis dixerit, sine præveniente Spiritus Sancti inspiratione, atque ejus adjutorio, hominem credere, sperare, diligere, aut pœnitere posse sicut oportet, ut ei justificationis gratia conferatur; anathema est.*

§ IV.

De Prædestinatianis.

Prædestinatiani ab impio dogmate sic dicti, ex scriptis sancti Augustini malè intellectis docuerunt adversus Semipelagianos. 1. Deum prædestinare ad damnationem æternam, quæ est mors secunda; & ad peccatum, quod est mors prima. 2. Liberum hominis arbitrium post Adami peccatum fuisse extinctum. 3. Deum non velle salvare nisi electos. 4. Christum mortuum esse duntaxat pro illorum salute,

Quæstio movetur in Scholis, num revera extiterint Prædestinatiani. Sed sive extiterint, sive non

non extiterint, fatis est ad nostrum institutum, quodd doctrina sancto Augustino & gratiæ efficacis defensoribus falsò adscripta, in se damnata fuerit ut impia, sicut revera damnata est, 1. in Concilio Arelatensi tertio, in quo Lucidus hanc impietatem retractare coactus est. Ejus retractionem integram refert Hincmarus Lib. de Prædestinat. cap. 1. 2. In Concilio Arausicano secundo cap. 25. his verbis: *Hoc etiam secundum Fidem Catholicam credimus, quodd accepta per Baptismum gratia, omnes baptizati, Christo auxiliante & cooperante, quæ ad salutem animæ pertinent, possint & debeant si fideliter laborare voluerint, adimplere. Aliquos verò ad malum divina potestate prædestinatos esse, non solum non credimus; sed etiam si sint qui tantum malum credere velint, cum omni detestatione illis anathema dicimus.*

Objiciunt contra Concilium Arelatense, 1. illud esse supposititium, 2. fuisse conflatum ex Semipelagianis, qui ut malè affecti contra S. Augustinum, genuinos ejus discipulos damnarunt.

Sed temerè id dicitur, tum quia nullus hactenus illud Concilium in dubium revocaverat. Hincmarus ejus meminit, & ut diximus, retractionem Lucidi integram refert; tum quia magni viri in illo Concilio federunt, ut Pragmatius Augustodunensis, & si credimus Baronio, Claudius Bizantinus. Aduit quidem Faustus Regiensis, cujus opus de Gratia & libero arbitrio tanquam Semipelagianismum redolens reprobavit Gelasius summus Pontifex: sed præterquam quodd Concilium Arelatense non subscripsit illi operi, solum ejus Epistolæ ad Lucidum, quæ est Catholica, credendum est Faustum ante mortem errores revocasse, cum in Ecclesia Regiensi colatur ut San-

ctus die 17. Januarii, nomenque ejus retinuerit Martyrologium Gallicanum.

Gothescalcus Monachus nono sæculo accusatus est restauratæ Prædestinarianæ hæresis. Coævus habuit defensores, & etiam nunc plures illum laudant quasi strenuum doctrinæ sancti Augustini Vindicem adversus calumnias, quibus Semi Pelagiani S. Doctorem uti Prædestinatum infamare non erubuerant. Nihilominus Rabanus Moguntinus, & Hincmarus Rhemensis Gothescalcum tanquam gyrovagum & corruptis moribus Monachum pinxerunt, ejusque personam & doctrinam damnarunt; ille in Concilio Moguntino, iste in Concilio Carisiaco, ubi Gothescalcus virgis cæsus, Sacerdotii honore spoliatus & in carcere conclusus est, donec sententiam suam retractaret, in qua usque ad mortem permansit. Quidquid sit de Gothescalco, recensiti Prædestinatianorum errores proscripti sunt in Conciliis Moguntino, Carisiaco, Valentino, ac tandem in Tullensi, ad quod convenerunt Episcopi ex duodecim Provinciis. Concilium quidem Valentinum reprobatur Carisiacos Canones, sed verbo tenus propter similitudines quasdam, quæ Episcopos inter utriusque Concilii interceserant; nam legenti patebit omnes ejusdem fuisse sententiæ circa quatuor capitula Prædestinatianorum.

§. V.

De Lutheranis & Calvinianis.

Lutherani & Calviniani Prædestinatianorum impietatem non solum amplexi sunt, sed & por-

portentosos hæcenusque inauditos errores addidere. 1. Peccatum originale esse ipsammet concupiscentiam, quæ cum in Baptizatis remaneat, statuunt.

2. Peccatum in Baptismo, seu in justificatione non deleri.

3. Omnia opera Justorum esse peccata, ut constat ex catechesi Calvinistarum pro Dominica XIX. ubi sic habetur : *Encore que nos œuvres ayent belle apparence par dehors, si sontelles mauvaises, parce que le cœur est pervers, lequel Dieu regarde.* Et in lectione sequenti pro Dominica vigesima, Magister sic interrogat discipulum : *Comment nos bonnes œuvres ne sont elles par dignes d'être acceptées, puisqu'elles procedent du Saint-Esprit ?* Respondet discipulus : *Non pas, à cause qu'il ya toujours quelques infirmités de notre chair mêlées parmi, dont elles sont souillées.*

4. Deum peccatorem justificare per meram condonationem, & non imputationem, eo ferè modò, quo Princeps gratia sua reum absolvit, & eximit à pœna capitali, quam promeritus est.

5. Veram hominis justitiam, seu formam justificantem non esse aliquid creatum animæ inhærens, quo tanquam formali nitore reddatur sancta, grata Deo : sed esse, vel secundum Osiandrum Lutheranum, justitiam Dei essentialem, qua formaliter est justus : vel justitiam & merita Christi Domini, secundum Calvinum, Lib. 1. Instit. cap. 7. parag. 2. ubi sic scribit : *Nos justificationem simpliciter interpretamur acceptionem, qua nos Deus in gratiam receptos pro justis habet, eamque in peccatorum remissione, ac justitiæ Christi imputatione positam esse dicimus, ut pro justis in Christo censeamur,*
qui

qui in nobis non sumus. Et Lutherus in caput secundum Epistolæ ad Galatas : *Ergo fide apprehensus & inhabitans Christus est justitia Christiana, propter quam Deus nos reputat justos, & donat vitam æternam.* Hinc apud ipsos vulgare effatum, *sola Fides est quæ justificat.* Ita Calvinus in antidoto ad Concili Tridentini canonem 11. Sess. 6. Ut autem definiant quæ sit illa Fides,

Triplicem Fidem distinguunt, scilicet Historicam, qua credimus vera, quæ enarrantur in Scripturis, & de qua loquitur Apostolus Hebr. 11. *Fide intelligimus aptata esse sæcula verbo Dei* : Fidem miraculorum, de qua 1. Corinth. 13. *Si habuero omnem Fidem, ita ut montes transferam* ; Et Fidem promissionum, qua confidimus Deo nobis specialiter promittenti remissionem peccatorum. Porro hæretici hanc solam postremam fidem justificare contendunt.

Fides autem illa, ut justificet, debet secundum illos esse adeo certa, ut nullus sit justus, nisi certò credat, & apud se statuatur se esse justum, seu peccata sibi non imputari. Quin Calvinus & ejus sectatores ulterius progrediuntur ; volunt quippe justificatum non solum debere pro certo tenere se esse justum, sed etiam prædestinatum : sicque Fides justificans sit apud ipsos Fides, qua certò credimus nos esse prædestinatos. *Verè fidelis non est,* ait Calvinus Lib. 3. Instit. cap. 2. §. 16. *nisi qui divinæ erga se benevolentiae promissionibus fretus, indubitatam salutis expectationem præsumit.*

Jam verò ex eo principio concludunt, 1. omnes homines æqualiter esse justos ; cum omnium justitia sit Christi obedientia fide apprehensa
2. Justos non peccare, hoc est peccatum eis non
impu-

imputari, quamdiu illam fiduciam habent. 3. Neminem à justitia recedere, nisi amittendo Fidem, ac proinde omne peccatum habere infidelitatem conjunctam, sive per quodlibet peccatum Fidem amitti. Unde Lutherus Lib. de capt. Babyl. ait : *Nulla peccata possunt damnare, nisi sola infidelitas.* 4. Omnia peccata prædestinatorum quantumcunque atrocia, esse venialia ; reproborum etsi videantur levia, esse tamen mortalia. 5. Justitiam nunquam posse amitti secundum Calvinistas ; proindeque qui post fidem & justificationem ad peccata redeunt ex diffidentia, eos nec veram fidem, nec veram unquam habuisse justitiam. 6. Sacramenta in eo tantum prodesse, quod fidem excitent, quatenus sunt pignora promissionis divinæ nobis factæ ; & verba Sacramentorum non esse consecratoria, sed concionalia ; quia sola concio apta est ad fidem excitandam. 7. Solis prædestinatis Sacramenta prodesse, juxta Calvinistas ; quia soli habent certitudinem & fiduciam, quod sint prædestinati. Cum autem difficile sit habere talem fiduciam, quæ omnem dubitationem excludat, docent illam esse Dei donum. Hinc in Catechismo pro Dominica 18. ubi de Fide justificante sermo est, de ea sic interrogat Magister ; *La pouvons-nous avoir de nous-mêmes ?* Respondet discipulus : *L'Ecriture nous enseigne que c'est un don singulier de Dieu. Comment ? R. Parce que notre entendement est trop debile, & nos desirs trop enclins à desiance ou fiance perverse de nous ; ou des creatures ; mais le Saint-Esprit nous illumine pour nous faire capables d'entendre, ce qui autrement nous seroit incomprebensible, & nous fortifie en certitude, scellant & imprimant les promesses de salut en nos cœurs.*

Quòd

Quodd si illis objicias, Fidem qualemcunque esse actum à nobis elicitum, ac proinde juxta eorum doctrinam concupiscentia infectum, & minùs idoneum ad justificandum.

Respondebunt : Fidem justificantem duobus modis spectari posse. 1. Ut opus ab humana voluntate profectum, & hoc modo concedunt eam non justificare propter rationem allatam. 1. Ut organum, seu instrumentum, quo justitia sive Dei sive Christi apprehenditur, & hoc sensu est instrumentaliter, non verò meritoriè justificans : quemadmodum manus, qua pauper eleemosynam à divite recipit, dici non debet, nec potest causa meritoria eleemosynæ.

Porro etiam si Fides justificet in hæreticorum sententia ; vera tamen Fides non est sine operibus. Scio, inquit Lutherus in caput 15. Geneseos, *bas virtutes esse insignia Dei dona. Scio fidem sine his donis non existere : sed nunc nobis quæstio est quid cujusque propriam sit : tenes manu varia semina, non quæro ergo, quæ quibus conjuncta sint, sed quæ cujusque propria virtus sit. Hic apertè dico, quid faciat sola Fides, non cum quibus virtutibus conjuncta sit. Eandem sententiam sequuntur Calvinistæ in suo Cathéchismo pro Dominica vigesima, ubi Magister sic interrogat : *Pouvons nous croire pour etre justifiez, sans faire bonnes œuvres ?* Respondet discipulus : *Il est impossible ; car croire en Jesus Christ, c'est le recevoir tel qu'il se donne à nous. Or il nous promet de nous regenerer par son Esprit ; pour nous faire vivre saintement. La Foi donc ne nous rend pas nonchalans à bonnes œuvres ?*
ait*

ait Magister ; & respondet discipulus : *Il en est ainsi.*

Ergo in sententia Heterodoxorum justificatio non est sine mutatione ; cum fiat per actum Fidei , quæ in justificato bona opera producit. Verum illa mutatio non est essentialis , nec intrinseca justificationi , sed quid merè consequens : *Sola Fides necessaria est ut justus finis* , ait Lutherus in caput secundum Epistolæ ad Galat. *Cætera omnia liberrima , neque præcepta amplius , neque prohibita. Si conscientia dicitur , peccasti : Responde , Peccavi. Ergo Deus puniet , & damnabit ; non. At lex hoc dicit : sed nihil mihi cum lege. Quare ? quia habeo libertatem.* Et in argumento ejusdem Epistolæ : *Summa ars & sapientia Christiana est nescire legem , ignorare præcepta , & totam justitiam activam* , Luthero concordat Calvinus Libro 3. Institut. capite 19.

Hos omnes & singulos errores Concilium Tridentinum anathemate percellit, Sess. 5. Can. 5. & Sess. 6. viginti duobus canonibus omnino consulendis.

§. VI.

De Bajo.

Michael Bajus, Academiæ Lovaniensis Doctor & Decanus, redux ex Concilio Tridentino, ad quod missus fuerat à Philippo secundo Hispaniarum rege, 78. propositiones evulgavit, quarum 2. sic se habet : *Nullum est peccatum ex sua natura veniale ; sed omne peccatum meretur æternam pœnam.* 21. *Humanæ naturæ sublimatio & exaltatio in consortium divinæ naturæ debita fuit integritati primæ conditionis , & proinde naturalis dicenda est , & non super-*

supernaturalis. Ex qua propositione sequitur 54. *Deus non potuisset ab initio talem creare hominem, qualis nunc nascitur.* 25. *Omnia opera infidelium sunt peccata.* 35. *Omne quod agit peccator vel servus peccati peccatum est.* Cui propositioni respondet. 16. *Non est vera legis obedientia sine charitate;* & 40. *in omnibus suis actibus peccator servit dominanti cupiditati.* Ex quibus principiis eruuntur tres sequentes propositiones, scilicet 53. quæ sic jacet: *Definitiva hæc sententia, Deum homini nihil impossibile præcepisse, falsò attribuitur Augustino, cum Pelagii sit.* Et 65. *Sola violentia repugnat hominis libertati naturali.* Et 66. *Homo peccat etiam damnabiliter in eo quod necessariò facit.* Damnatæ hujusmodi propositiones à Pio V. anno 1567. & à Greg. XIII. anno. 1579. revocavit Bajus anno 1580. Sed errorum ejus scintillæ in Jansenio ejusdem Academiæ Doctore, & postmodum Episcopo Iprensi, in majus incendium exarserunt, cui ut se opposeret Urbanus VIII. iterum damnavit Baji propositiones, confirmavitque Bullas Pii V. & Gregorii XIII. Sed receptæ non sunt in Galliis: anno quidem 1644. delatæ sunt ad sacram Facultatem Parisiensem ab ejus Syndico, qui hoc unum obtinere potuit, nempe ut Baccalaureis non liceret propugnare in suis thesibus propositiones in Bullis proscriptas.

Dices: pro quinquagesima quarta Baji propositione, nullus sub Deo justo miser esse potest sine sua culpa: atqui si homo talis crearetur, qualis nunc nascitur, sine sua culpa esset miserrimus. Namque 1. morti, & innumeris corporis ærumnis subjaceret. 2. Legem naturalem implere non posset, nec proinde peccata vitare propter ignorantiam & concupiscentiam, quæ sine gratia

gratia moralem peccandi necessitatem inducunt.
3. Careret fine debito, qui non potest esse nisi supernaturalis & intuitiva Dei visio : Ergo.

Confirmatur ex S. Augustino, qui Lib. 4. contra Jul. c. 16. & ultimo, colligit ex miseriis, quibus obnoxii homines nascuntur, necessariò præcessisse aliquod peccatum : sic enim alloquitur Julianum, qui negabat peccatum originale. *Parvulos intueri, quot & quanta mala patientur, in quibus vanitatibus, cruciatibus, erroribus, terroribus crescant. Deinde jam grandes, etiam Deo servientes tentat error ut decipiat, tentat labor aut dolor ut frangat, tentat libido ut accendat, tentat mœror ut sternat, tentat typhus ut extollat . . . Quid igitur restat, nisi ut causa istorum malorum sit aut iniquitas, vel impotentia Dei, aut pœna primi veterisque peccati ? Sed quia nec injustus, nec impotens est Deus, restat quod non vis, sed cogeris confiteri, quodd grave jugum super filios Adam à die exitus de ventre matris eorum usque in diem sepulturæ in matrem omnium non fuisset, nisi delicti originalis meritum præcessisset.*

Distinguo majorem. Sine culpa nemo miser esse potest miseria propriè dicta, quæ habet rationem pœnæ, Concedo : omnis enim pœna, si iusta sit, necessariò supponit culpam : miseria impropriè dicta, quæ est naturalis defectus, Nego majorem ; nam ex S. Augustino Lib. 3. de lib. arbitrio c. 23. *Deus sapientissimè belluas peccati incapaces variis doloribus obnoxias quotidie producit.* Distinguo similiter minorem, homo est miserrimus miseria impropriè dicta, & quæ sequitur naturæ ejus conditionem, quemadmodum rubigo sequitur naturam ferri, Concedo ; propriè dicta, & quæ sit pœna præcedentis culpæ, Nego minorem.

D. Habert Theolog. Tom. II.

Z

Ad

Ad id autem quod obijcitur de concupiscentia, & de ultimo fine,

Respondeo 2. distinguendo, ex concupiscentia nascitur moralis impotentia implendi Legem, & vitandi peccata, si gratia desit; nascitur, inquam, in hoc statu, in quo natura per peccatum vulnerata est in naturalibus, Concedo: in illo statu possibili, in quo nec natura esset corrupta, nec concupiscentia ita arderet, nec deessent auxilia naturalia, quibus homo suum finem consequi posset, Nego. Si enim aliqui nunc sunt à natura minùs propensi in incontinentiam, quidni & tunc, ita providente Deo, possent homines minùs molestam ac violentam concupiscentiam pati, cùm præsertim nec peccati supplicium foret, nec dæmon aliquis importunis tentationibus ingrueret?

Nec dicas hanc responsionem pugnare contra Summorum Pontificum Constitutiones; cùm enim damnarunt hanc propositionem: *Non potuisset Deus ab initio creare hominem, qualis nunc nascitur*, definierunt duntaxat, hominem potuisse creari sine gratia supernaturali cum ignorantia, concupiscentia, & aliis miseriis, abstrahentes ab illa difficultate, num in illo statu possibili concupiscentia accenderetur sicut in isto.

Respondeo 2. quoad defectum ordinationis ad finem supernaturalem, non una est Theologorum sententia; alii enim admittunt statum naturæ puræ ita possibilem, ut perpetuus esse non possit, contenduntque hominem sine gratia & cum concupiscentia creatum, aliquando transferendum ad statum supernaturalem, cui visio Dei intuitiva responderet tanquam necessarius hominis finis.

finis. Alii, & quidem melius, & magis ad mentem Summorum Pontificum, ut nobis videtur, perpetuum illum statum possibilem asserunt: tum quia vita æterna non minùs est indebita quàm gratia: tum quia sublimatio naturæ humanæ ad gloriam non potest esse nisi per gratiam: si itaque prior est debita, ergo & posterior, quod tamen pugnat contra Constitutiones Pii V. & Gregorii XIII.

Instabis: S. Augustinus Serm. 294. aliàs 140. de verbis Apostoli scribit, inauditum esse in Ecclesia, & à mente Fidelium extirpandum errorem eorum, qui statuunt vitam beatam præter regnum Cælorum. *Venturus Dominus, inquit, & judicaturus de vivis & mortuis, duas partes factururus est, dexteram & sinistram Nullus relictus est medius locus, ubi ponere queas infantes . . . ecce in dextera Regnum Cælorum est, percipite, inquit, Regnum. Qui ibi non est, in sinistra est. Quid erit in sinistra? - Ite in ignem æternum.* Ergo non est medium, in quo quiescere liceat.

Distinguo consequens: non est medium in hoc statu, Concedo: in statu possibili, Nego consequentiam. Enimverò sanctus Doctor eò loci refellit Pelagianos, qui negabant peccatum originale, statuebantque parvulos sine Baptismo decedentes excludendos quidem à Regno Cælorum, non verò à vita æterna, quam mediam fingebant inter Regnum Cælorum & damnationem. Illud verò fictitium esse & Catholicæ Fidei repugnans luculenter demonstrat ex Scripturis, quas illi hæretici admittebant. Quòd autem S. Augustinus in statu naturæ puræ possibili agnoverit mediam vitam, Regnum Cælorum inter & supplicium;

cium ; patet ex libris , quos scripsit contra Manichæos , qui etiam peccatum originale negabant , asserentes hominem ab initio fuisse conditum , qualis hodie nascitur , scilicet obnoxium corporis miseriis , & effrænis concupiscentiæ motibus. Unde arguebant Deum non esse rerum omnium Auctorem ; quia ex eodem fonte fluere non potest bonum & malum , spiritus & caro , ratio , & , quæ rationi adversatur , concupiscentia. Sanctus autem Augustinus ex Scripturis illos refellere non poterat , quemadmodum Pelagianos : utpotè qui rejecerunt Scripturas veteris Testamenti , in quibus commemoratur , Deum fecisse hominem rectum , & implevisse cor ejus sapientia & intelligentia , ex quo sequitur cæcitatem & inordinationem , quæ hodie in illo cernuntur , esse pœnam præcedentis peccati. Quid igitur consilii capiet sanctus Doctor ad evertendam Manichæorum impietatem , qua definiebant duo esse rerum principia ? Ex eorum hypothese quamvis falsa argumentatur , probatque Deum esse laudandum , nec admittendum aliud rerum principium , etiamsi ignorantia & concupiscentia essent hominis primordia naturalia. Verba illius sunt Libr. 3. de lib. arbitrio cap. 20. *Si ergo altera (anima) talis esse cœpit , non solum ante peccatum , sed ante omnem vitam suam , qualis alia post vitam culpabilem facta est , non parvum bonum habet , unde Conditori suo gratias agat non solum quòd anima est , qua natura jam omne corpus præcedit , sed etiam quòd facultatem habet , ut adjuvante Creatore seipsam excolat , & pio studio possit omnes acquirere & capere virtutes , per quas & à difficultate cruciante , & ab ignorantia excæcante liberetur. Quòd si ita est , non erit nascentibus animis ignorantia & difficultas (id est*

est concupiscentia) *supplicium peccati ; sed proficiendi admonitio, & perfectionis exordium.* Et cap. 22. *Ignorantia & difficultas, si naturalis est, inde incipit anima proficere, & ad cognitionem & requiem, donec in ea perficiatur vita beata, promoveri.* Quodd autem beata illa vita sit quid medium inter supplicium & regnum cœlorum, patet ex capite 23. ejusdem Libri, ubi agens de miseriis corporis & cruciatibus, quibus vexantur parvuli, & ex hac vita decedunt, sic scribit: *Metuendum non est, ne vita media esse potuerit inter rectè factum, atque peccatum, & sententia Judicis media esse non possit inter præmium & supplicium.* Ne autem dicant Adversarii, sanctum Augustinum retractasse, quod junior scripserat in Libris de libero arbitrio, obstant quæ habentur Lib. 1. Retractionum capite 9. & capite 11. Lib. de dono perseverantiæ, quem sub finem vitæ suæ edidit, sic scripsit: *Etiam si verum esset, quod dicunt Pelagiani, ignorantiam & difficultatem, sine quibus nullus homo nascitur, primordia, non supplicia esse naturæ; vincerentur tamen Manichæi, qui volunt duas, boni scilicet & mali, coæternas esse naturas; nempe quia Deus non esset culpandus, sed laudandus.*

Atque ex his patet responsio ad confirmationem ex auctoritate sancti Augustini supra allatam contra possibilitatem naturæ puræ, nimirum sanctum Doctorem scribere contra Pelagianos non de statu possibili, sicut contra Manichæos; sed de statu existente, in quo homines nascuntur in speciali ea rectitudine, in qua natura humana fuerat condita, contenditque illam mutationem non potuisse fieri vel sine Dei iniquitate aut impotentia, quod dicere aut cogitare summum nefas; vel sine peccato præcedente, quod nostra Religio docet.

Urgebis : ille finis non potest dici ultimus, quo obtento appetitus non quiescit : atqui appetitus hominis quiescere non potest in cognitione Dei abstractiva, quarumcunque perfecta supponatur ; visis enim effectibus naturaliter appetimus videre causam. Unde sanctus Thomas Libro 3. contra Gentes capite 50. sic scribit : *Felicitas substantiarum separatarum non est in illa cognitione, qua Deum per suas substantias cognoscunt, cum earum desiderium eas ducat usque ad Dei substantiam.* Ergo homo in statu naturæ puræ careret fine ultimo, ac proinde status ille nequit esse perpetuus.

Nego minorem, cujus confirmationem distinguo, visis affectibus appetimus videre causam appetitu elicitu, Concedo : appetitu innato, Nego : Appetitus innatus dicitur, qui à natura statim oritur nulla præsupposita rationis inquisitione, ut appetitus scientiæ, & beatitudinis in communi, ad quas homo necessariò fertur statim atque seipsum sentit. Appetitus verò elicitus is est, qui ex concursu quarundam circumstantiarum excitatur & determinatur, ut appetitus videndæ causæ effectuum, quos miramur, sciendi artem medicam parentis exemplo & suasionem, fruendi voluptatibus tanquam summo bono ex carnis titillatione.

Innatus appetitus, cum sit à Deo movente creaturas ad fines suos, non potest quin sit rectus, & rei possibilis saltem in genere ; quia Deus nihil facit frustra. Hinc ex innato homini appetitu scientiæ & beatitudinis, certò colligimus scientiam & beatitudinem in communi absolutè ipsi esse possibilem. Sed appetitus elicitus plerumque est inordinatus, & rei impossibilis, ut in primis paren-

parentibus appetitus pomi vetiti, & scientiæ boni & mali, quam serpens promiserat. Quare etiamsi homo in statu naturæ puræ appeteret videre primam causam ex admiratione ordinis universi, elicitus ille appetitus esset frustraneus, utpotè rei in illo statu impossibilis.

Porro nisi homo sit ordinatus ad finem supernaturalem, appetitus ejus innatus quiescit obtenta sua ultima naturali perfectione, quam diximus consistere in perfectissima Dei cognitione abstractiva, & virtutum moralium possessione exclusis omnibus corporis ærumnis. Nec elicitus appetitus videndæ primæ causæ magis illum cruciaret in illo possibili, quàm in nostro statu nugatorius appetitus unionis hypostaticæ, aut visionis Dei comprehensivæ, utpotè qui sit rei impossibilis, & indignus homine sapiente.

Dixi: *nisi sit ordinatus ad finem supernaturalem*: nam si id cognoscat, non poterit in alio quiescere juxta illud sancti Augustini. *Fecisti nos ad te, & inquietum est cor nostrum, donec requiescat in te.* Idem dicendum de substantiis separatis à materia, seu de Angelis, de quibus sanctus Thomas in objectione laudatus. Veritas nostræ responsionis elucescet familiari illius exemplo, cui cum jure hæreditario debeatur regia dignitas, ab ea excluditur sive sua culpa, sive æmulorum injustitia. Hic quippe quantumcunque divitiis cumulatus, & aliis honoribus amplificatus, sortem suam ægrè feret, in qua alter, qui ad illud dignitatis fastigium natus non est, felicem se arbitraretur. Unde parvulos sine Baptismo vita functos angi necesse est, etiam in falsa hypothese quorundam modernorum, quòd omnibus naturalibus donis sint perfecti.

§. VII.

De Jansenio.

Cùm Jansenius ex Doctore Lovaniensi, Episcopus Iprensis, anno 1638. diem extremum clausisset, anno sequenti Liber ab ipso exaratus typis mandatus est sub hoc titulo: *Augustinus Cornelii Jansenii*, quasi in illo opere exponatur genuina sancti Augustini doctrina à recentioribus non satis intellecta, & antiquioribus Patribus, maximè Græcis, incognita; ait enim Lib. de Hæresi Pelagiana cap. 4. aliquid Patribus maximè Græcis, ex pulvere subtilissimi erroris Semipelagianorum adhæsisse. Unde effatum est apud ejus sectatores in quæstionibus de Gratia, minimè esse consulendos Patres Augustino antiquiores. Quam sententiam mutuari videntur à Lutheranis, & Calvinistis. Melancthon quippe in Apologia Confessionis, ait de sententia Lutheri circa Gratiam & liberum arbitrium, *tota Augustini est*; & in Epistolam ad Galat. *Augustinus alicubi dixit argutiùs, multa Lutherus diligentius*. Calvinus quoque Lib. 2. Instit. cap. 2. §. 4. sic habet: *Tametsi Græci præ aliis, atque inter eos singulariter Chrysostomus in extollenda humanæ voluntatis facultate modum exceßerint, veteres tamen omnes, excepto Augustino, sic hac in re aut variant, aut vacillant, aut perplexè loquuntur, ut certi ferè nihil ex eorum scriptis referre liceat*. Sed refelluntur ex testimonio ipsiusmet sancti Doctoris, qui Lib. de dono perseverantiæ cap. 23. sic scribit: *Prædestinationis hujus fidem, quæ contra novos hæreticos (Semipelagianos) nova sollicitudine nunc defenditur,*
nunquam

nunquam Ecclesia Christi non habuit. Quin & ipsimet Semipelagiani confitebantur se in antiquis nihil invenisse, quod faveret suo novo dogmati, ut observavimus in Tractatu de Incarnatione, ubi de Christi sanguine fuso pro omnibus.

Prodiit Jansenii Liber communi Catholicorum offensione; cumque multa in illo sparsim scripta reprehenderentur, Theologi Parisienses illa in quinque Propositiones collegerunt, quas Clerus Gallicanus ad Innocentium X. detulit. Quam autem fideliter ex eodem Libro excerptæ fuerint, patebit ex sequenti schemate sic disposito, ut in prima columna cernantur famosæ illæ Propositiones, & in altera ex opposito legantur ipsiusmet Jansenii textus ex benè multis selecti.

PROPOSITIONES

ex Libro Jansenii
excerptæ.

I.

Aliqua Dei præcepta hominibus justis volentibus & conantibus secundum præsentia, quas habent vires, sunt impossibilia, deest quoque illis gratia, qua possibilia fiant.

esse præcepta quædam, qua hominibus, non tantum infidelibus excæcatis, induratis; sed fidelibus quoque, & justis, volentibus & conantibus, secundum præsentia quas habent vires, sunt impossibilia; deesse quoque gratiam, qua possibilia fiant.

JANSENII

Textus.

I.

Lib. 3. de Gratia Salvatoris cap. 13. sic legitur longè post medium: *Hæc igitur omnia plenissimè, planissimèque demonstrant nihil esse in S. Augustini doctrina certius ac fundatius,*

II.

Interiori gratiæ in statu naturæ lapsæ nunquam resistitur.

II.

Lib. 2. cap. 25. *Hæc est vera ratio, cur nulla omnino medicinalis gratia Christi effectu suo careat: sed omnino efficit, ut voluntas velit, & aliquid operetur.* Et cap. 27. *Nilil verius dici potest, quàm quòd omnia, quæ hætenus protulimus de gratia efficaci, Augustinus dixerit & intellexerit; cujus rei causa est quòd nullam agnovit aliam ætUALEM Christi gratiam, nec agnoscere potuerit.*

III.

Ad merendum & demerendum in statu naturæ lapsæ, non requiritur in homine libertas à necessitate; sed sufficit libertas à coactione.

III.

Lib. 8. de Gratia Christi Salvatoris cap. 20. sic scribit Jansenius: *Respondetur quamdiu hic vivimus, sive in infidelitate ante gratiam, sive jam sub gratia, indifferentiam ad contraria semper inesse libero arbitrio; sed non eo modo, quo isti Scholastici putant, quos supra diximus, qui quocunque modo arbitrium, sive gratiæ, sive peccati delectationibus imbuatur, semper existimant cum utraque ejus dispositione posse fieri, ut utrumlibet velit sive bonum sive malum.* Quo autem sensu accipiat illam indifferentiam ad contrarium, mentem suam aperit in decursu capitis, ubi sic habet: *Quia quantumcunque ad peccandum peccati voluptate trabatur, manet in arbitrio illa saltem naturalis flexibilitas, seu capacitas, qua scilicet vel per concupiscentiam, vel per gratiam flecti potest, quamvis per utramque necessariò determinetur.* Et cap. 21. objicit sibi, Calvinum non negasse istam gratiæ & liberi arbitrii concordiam, utpotè qui doceat hominem gratiæ

gratiæ obsequi voluntariè. Tum respondet: *Non omnia, quæ hæretici docent, sunt hæretica . . . quodd si qua in re Calvinus cum Augustino, & antiquis Patribus senserit, non propter Calvinum Augustino indignandum, sed propter Augustinum Calvino potius gratulandum. Sed arguit Calvinum, quodd in ejusmodi voluntario, quamvis necessario, non agnoverit liberum arbitrium, boni, & mali electionem, consentiendi potestatem, quæ revera cum necessitate non consistunt. Unde patet Jansenium à Calvino differre duntaxat in modo loquendi. Lib. 4. de Statu Naturæ lapsæ cap. 20. & sequentibus, ubi sic objicit tum sanctum Augustinum sic definiientem, peccatum est voluntas retinendi vel consequendi quod justitia vetat, unde liberum est abstinere, tum propositionem à summis Pontificibus in Bajo damnatam; homo peccat etiam damnabiliter in eo, quod necessariò facit. Respondet: hæc intelligenda esse de peccato, quod non est pæna peccati, quale fuit peccatum primi parentis, ad quod cum se liberè determinaverit, necessitas inde consequens censetur libera.*

IV.

IV.

Semipelagiani admittebant prævenientis gratiæ interioris necessitatem ad singulos actus, etiam ad initium Fidei: & in hoc errant hæretici, quodd vellent eam gratiam talem esse, cui posset humana voluntas resistere, vel obtemperare.

Janfenius L. 2. c. 12. de Gratia Christi Salvatoris, sic scribit: Memoria recolendum est quodd alio loco latissimè tradidimus, Semipelagianos ad illud initium Fidei, orationes, desideria, aliosque similes actus, quos hominis in potestate remansisse sen-

Propo-

Propositionis duæ *tiebant, veræ, internæ, æ*
 sunt partes. Prima est *ctualisque gratiæ adjutorium*
 historica, & ad factum *statuisse necessarium, & hoc*
 pertinet, nempe quod *ipsum sanctum Augustinum,*
 Semipelagiani admise *quando cum Semipelagianis*
 rint prævenientis gra- *errabat, admisisse, istam*
 tiæ interioris necessita- *verò suam gratiam sentie-*
 tem, etiam ad initium *bant non semper otiosam*
 Fidei. Secunda est dog- *præbere potestatem . . .*
 matica, scilicet hæresim *sed ita dare credendi fa-*
 esse, si doceatur huma- *cultatem, ut homo pro ar-*
 nam voluntatem posse *bitrii sui libertate, gratia*
 in hoc statu resistere, *juvante crederet. Lib. 3.*
 vel obtemperare gratiæ. *c. i. post medium: Est*

adjutorium, quod Massi-
lienses ad credendum necessarium esse, atque ita suffi-
cere statuerunt, ut cum eo credere posset homo, si
vellet: qui tamen tanquam hæretici proscripti sunt,
non aliam sanè ob causam, nisi quia tale auxilium bo-
mini sufficere putarent.

V.

Semipelagianum est dice-
re, Christum pro omnibus
omnino hominibus mortuum
esse, aut sanguinem fudis-
se; sed mortuus est dunta-
xat pro salute prædestinato-
rum.

Duæ quoque hujus
 propositionis sunt par-
 tes. Prima, quod Se-
 mipelagianum sit dicere,

V.

Lib. 3. de Gratia Chri-
 sti Salvatoris c. 21. sic
 habetur: *Illa extensio tam*
vaga modernorum Scripto-
rum non ex alio capite, quàm
ex ista generali & indiffe-
rente voluntate Dei erga sa-
lutem omnium, & ex illa
sufficientis gratiæ omnibus
conferendæ præparatione flu-
xit, quorum utrumque Au-
 Chri-

Christum pro omnibus omnino hominibus mortuum esse. Secunda quòd mortuus sit duntaxat pro salute prædestinatorum.

Augustinus, Prosper, Fulgentius, & antiqua Ecclesia vetulæ machinam à Semipelagianis introductam repudiavit. Verbis autem immediate præcedentibus definit Christum non esse mor-

tuum pro aliorum salute, quàm prædestinatorum: Nullo modo, inquit, *principiis ejus (Augustini) consentaneum est, ut Christus Dominus vel pro infidelium in infidelitate morientium, vel pro justorum non perseverantium æterna salute* (nota tamen æternæ salutis; non enim negat pro reprobis mortuum quoad gratias temporales) *mortuus esse, sanguinem fudisse, seipsum redemptionem dedisse, Patrem orasse sentiatur. Scivit enim quo quisque jam ab æterno prædestinatus erat, scivit hoc decretum, neque illius pretii oblatione mutandum esse, nec seipsum velle mutare. Ex quo factum est ut juxta sanctissimum Doctorem, non magis Patrem pro æterna liberatione ipsorum, quàm pro diaboli deprecatus fuerit. Sed si quid pro illis rogavit Patrem, pro temporalibus quibusdam justitiæ effectibus rogavit, & pro eisdem obtinendis obtulit pretium, fuditque sanguinem suum.*

Prædictas quinque Propositiones Innocentius X. auditis partibus pro & contra contendentibus, damnavit anno 1653. Primam, ut temerariam, blasphemam, hæreticam, & jam anathemate damnatam. Secundam, & tertiam ut hæreticas. Quartam, ut falsam & hæreticam. Quintam, ut falsam, temerariam, & scandalosam quoad primam ejus partem: & ut impiam, blasphemam, contumeliosam, divinæ voluntati derogantem, & hæreticam quoad secundam ejus partem.

Jansenii Defensores professi sunt, se acquiesce-

re iudicio Sedis Apostolicæ, sed verbo tenus, & hæreticorum more, qui, ut advertit Tertull. l. de præscript. c. 26. *Aliam Fidei regulam disseminant inter domesticos, aliam in publicum proferunt; aliud designant in aperto, aliud in foro.* Ariani v. g. post definitionem Concilii Nicæni dixerunt cum Catholicis, Filium Dei esse Patri per omnia similem, sed hæretico sensu. Pelagius in Concilio Diospolitano, ne à communione Ecclesiæ excinderetur, confessus est subdola mente gratiam ad singulos actus esse necessariam. Nestorius eodem spiritu hæretico scripsit ad Alexandrum Hierapolitanum, *non duas, sed unam personam facimus.* Sic Jansenii Defensores post Sedis Apostolicæ iudicium, evulgarunt se propugnasse duntaxat doctrinam S. Augustini, quam Jansenius veraciter explicat contra Molinistarum errores, ac damnatas quinque Propositiones semper se damnassee, & iterum damnare. Sed quo sensu?

Exposuerunt in libello de triplici sensu, quem Innocentio X. post latam Constitutionem obtulere. In illo autem libello declarant, 1. se admittere gratiam sufficientem in Justis, qui non perseverant, si per gratiam sufficientem intelligatur, vel gratia habitualis, vel gratia actualis remota, quæ totum habet effectum, ad quem datur à Deo. 2. Gratia interiori in hoc statu resisti, quatenus Justus dum cadit, resistit inclinationi gratia tum habitualis tum actualis remotæ, cum Dei offensa ejusmodi gratiis repugnet. 3. Hominem constitutum sive sub gratia, sive sub concupiscentia, posse dissentire vel consentire; quia habet voluntatem essentialiter electivam. 4. Christum pro omnium salute mortuum, quatenus naturam humanam

nam omnibus hominibus communem gerebat; pretium pro omnibus salvandis sufficiens obtulit, & pro omnibus hominum generibus, conditionibusque mortuus est, quamvis sanguinem suum non obtulerit pro singulis cujusque generis.

Refelluntur 1. Quia extra motam controversiam excurrunt. Quis enim ex Catholicis unquam asseruit Justum carere gratia habituali, aut peccatum eidem gratiæ habituali, vel etiam actuali non repugnare? Quis in dubium revocavit, num homo sive sub gratia, sive sub concupiscentia constitutus, retineat humanam voluntatem? num Christus gesserit naturam humanam omnibus hominibus communem, pretium obtulerit sufficiens pro salvandis omnibus & singulis hominibus, cum insuper sufficiat pro liberandis omnibus dæmonibus? Num denique aliquos ex quolibet hominum genere, putà ex Judæis & Gentilibus, ex adultis & parvulis salvaverit, adeo ut necessum fuerit interpellare Sedem Apostolicam, ut definiret quid sentiendum esset in his, quæ in confesso sunt apud omnes, doctos & indoctos?

Refelluntur, 2. Quia juxta Jansenii defensores, æquè ac Catholicos falsæ sunt istæ propositiones, nec omnino ferendæ. 1. *Homo per gratiam habitualem sanatus potest implere Dei mandata*: quia ex S. Augustino sic se habet Justus sine lumine supernaturali ad bene operandum, sicut oculus perfectè sanus sine lumine corporali ad videndum. 2. *Homo sola voluntate sibi innata potest concupiscentiam effrænem cohibere, gravi tentationi resistere, & ea quæ legis sunt perficere.* Homo operari potest ultra gratiam & motionem divinam. Atqui in sensu à Defensoribus Jansenii allato veræ & tolerandæ sunt ejusmodi propo-

propositiones ; dicunt enim mandata Dei esse possibilia homini justo per gratiam habitualement , vel per gratiam actualem , quæ à Deo non datur ad operandum : hominem sine gratia posse resistere ingruenti concupiscentiæ , & ea quæ legis sunt perficere ; quia habet voluntatem , quæ est facultas essentialiter electiva , resisteretque & operaretur , si vellet. Nec satis est ipsis hujusmodi sophismata & æquivocationes fabricasse ; sed volunt insuper Summum Pontificem iis usum fuisse in sua Constitutione , & eo sensu ab omnium mente & loquendi more alieno intelligendas esse ejus definitiones.

Nec dicant, se loqui in suo libello de potentia remota , quam habet homo sive per voluntatem sibi innatam , & ad contraria flexibilem , sive per gratiam habitualement , sive per actualem remotam. Is enim falsò dicitur habere potentiam remotam , qui caret mediis , quibus ad terminum pervenire possit : v. g. falsò diceretur quis per primum scalæ gradum remotè posse ultimum attingere , si desint gradus intermedii , per quos successivè attingere possit. Porro in eorum sententia mandata Dei sunt remotè possibilia , etiamsi desit gratia , per quam proximè possibilia fiant.

Meritò itaque Innocentius X. anno 1654. in generali Inquisitionis Congregatione damnavit libellum de triplici sensu , & librum Jansenii proscript.

Clerus Gallicanus acceptum Sedis Apostolicæ decretum , & auctoritate regia munitum promulgare parabat , cum Defensores Jansenii opposuerunt decreta è Tribunali Inquisitionis emanantia , nullius esse auctoritatis in Gallia. Præsules Gallicani morem gessere , rogaveruntque summum Pontifi-

Pontificem, ut, quod supererat controversiæ ea forma & solemnitate definiret, quam postulabant isti. Annuit Alexander VII. successor Innocentii X. ediditque Constitutionem anno 1656. cujus hæc verba sunt ponderanda: *Licet ea quæ Apostolicis Constitutionibus abundè fuerunt definita, novæ declarationis accessione non indigeant; quia tamen aliqui publicæ tranquillitatis perturbatores illa in dubium revocare, vel subdolis interpretationibus labefactare non verentur.* Et infra: *Cum autem sicut accepimus, nonnulli iniquitatis filii prædictas quinque Propositiones in Libro Jansenii prædicto non reperiri; sed fide & pro arbitrio compositas esse, vel etiam sensu ab eodem intento damnatas non esse, asserere magno cum Christi fidelium scandalo non reformidant.* Nos præallatam Innocentii prædecessoris nostri declarationem, constitutionem, ac definitionem harum serie confirmamus, approbamus, & innovamus, & quinque illas propositiones ex libro præmemorati Cornelii Jansenii excerptas, ac in sensu ab eodem Cornelio Jansenio intento damnatas fuisse declaramus ac definimus, ac uti tales iterum damnamus, ac eundem librum sæpè dicti C. Jansenii, cui titulus est: Augustinus, omnesque alios tam manuscriptos, quàm typis editos, & si quos forsan edi contigerit, in quibus ejusdem prædicti C. Jansenii doctrina ut supra damnata defenditur, vel astringitur, aut defendetur & astringetur, damnamus iterum atque prohibemus. Quid ultra ad continendos animos in unitate ejusdem fidei desiderari poterat?

Verùm Defensores Jansenii relicta quæstione juris ad quæstionem facti excurrerunt, novaque lite Ecclesiam laceffivere. In qua sanè lite non videntur audiendi, nisi priùs acquiescant iis, quæ definita sunt circa quæstionem

D. Habert Theolog. Tom. II. A a juris,

juris , palámque confiteantur se recedere à subdolis interpretationibus , quibus , ut verbis Alexandri VII. utamur , Constitutionem Innocentii X. labefactare non sunt veriti , apertéque damnent (quod hætenus non præstiteré) prædictas quinque propositiones eo sensu , quo damnatæ sunt à summis Pontificibus Innocentio X. & Alexandro VII. & receptæ eorum Constitutiones ab Ecclesia Gallicana , ne falsis eorum interpretationibus quæstio juris cum quæstione facti recurrat.

Quæstio autem juris est , an quinque Propositiones eo sensu , quo damnatæ sunt , sint reverà falsæ : quæstio verò facti , utrùm eædem Propositiones fideliter excerptæ sint ex Libro Jansenii , & in eo reperiantur.

Negarunt Defensores Jansenii , contententes in hac quæstione non esse opus judice , sed sanis oculis , quibus Librum evolvere liceret : Ecclesiam in quæstionibus facti dirimendis falli posse , ac proinde Fideles in hac parte non teneri illi obtemperare , nisi religioso silentio.

Refelluntur 1. quia ad illum Judicem recurrere necesse est , ejusque judicio standum , quem ipsemet Jansenius appellavit , & cujus judicio adhærere se professus est : atqui Jansenius Summum Pontificem Libri sui , & doctrinæ in eo contentæ Judicem appellavit , illudque religiosi sui animi & obedientiæ testimonium posteris reliquit , quo in extremis positus , professus est se esse obedientem filium illius Ecclesiæ , in cujus sinu fide enutritus est , nec ab ejus judicio velle unquam recedere. Prolato igitur Sedis Apostolicæ judicio , terminata est Jansenii causa ; frustra jam
Adver-

Adversarii patrociniū ejus suscipiunt, quin potius illum sibi exprobrantem audiant: Quid æmulamini pro me? Doctrina, quam in Libro meo tradidi, jam non est mea; quia nec Sedis Apostolicæ: pareo ejus judicio; cum ipsa respuo & damno Librum, & excogitatas à vobis verborum meorum interpretationes: si me præeuntem sequi non vultis, causam non meam, sed vestram, & me Judice iniquam agitis.

Refelluntur 2. etiam in hypothefi, quòd Ecclesia in elucidandis quæstionibus facti, non sit infallibilis auctoritatis, cum ad revincendos Adversarios ingredi hanc juris quæstionem necesse non sit. 1. quia prudentiæ virtus non nititur principiis omnimodè, &, ut ajunt, metaphysicè, sed moraliter duntaxat certis, quemadmodum dicemus ubi de Conscientia. Hinc omnium judicio peccarent contra prudentiam simul & debitam obedientiam, qui docenti Parocho, & præcipientibus parentibus aut dominis non acquiescerent eo prætextu, quòd falli aut fallere possent. *Delicata satis*, (inquit S. Bern. Lib. de Præcept. & Disp. cap. 10.) *imò nimis molesta est hujusmodi obedientia*, quam immediatè ante descripsit, scilicet, *malè suspicare de omni præcepto, cujus causa latuerit; nec unquam libenter obedire, nisi cum audire contigerit, quod fortè libuerit; aut quod non aliter licere seu expedire monstraverit, vel aperta ratio, vel indubitata auctoritas.* 2. Quia si assensus est denegandus, ubi deest infallibilis auctoritas, ruit absolutè hominum societas; nec enim audiendi sunt Magistri & Superiores, nec credendum amicis consodalibusve, nec consilium capiendum à sapientibus, nec judicia in tribunalibus ferenda sub hominum te-

stimonio, nulla quippe in his omnibus infallibilis auctoritas. Quæ cum absurdissimè inferantur, perspicuum est ad assensum non requiri omnimodam certitudinem, sed sufficere moralem, qua spectatis circumstantiis judicamus eum, qui loquitur, nec falli, nec fallere, quamvis absolute utrumque contingere possit. Hæc longè certiora sunt, si de iudicio Ecclesiæ agatur; nam ex ipsomet Petro Aurelio, cujus testimonium non est levis ponderis apud Adversarios; *Consensus Ecclesiæ, etiamsi Dei verbo non contineatur, certitudinem habet omni humana maiorem; adeo ut illi obstrepere sit erroneum.* Hæc Pagina 76. Pagina verò 33. *Quis unquam hæreticorum Concilia Episcopalia (sive unius provinciæ) hoc solo nomine elusit, quòd diceret non esse infallibilis auctoritatis? Non quærebatur in iis temporibus quænam Episcoporum Concilia essent errori obnoxia, omnes omnia venerabantur, ut Pastorum vocem, quibus dictum est Lucæ 10. Qui vos audit, me audit. Et Matth. 18. ubi agitur de quæstione facti: Si autem Ecclesiam non audierit, sit tibi sicut Ethnicus & Publicanus.* Sic Paulus Samosatenus in Concilio particulari, nempe Antiocheno, ob hæresim depositus, ubique pro hæretico habitus est: Sic Pelagium & Cælestium à Zosimo Summo Pontifice damnatos, cuncti Fideles averfati sunt. Sic sanctus Gregorius tria Capitula, hoc est, Libros Theodori Mopsuesteni, Epistolam Ibæ, & Theodreti scripta in Concilio generali quinto proscripta rejecit: sic enim habet Epistola 24. Lib. 1. *Quintum quoque Concilium pariter veneror, in quo Epistola, quæ Ibæ dicitur, erroris plena damnatur . . . cunctas, quas præfata veneranda Concilia personas respiciunt, respuo . . . quia dum universi sunt consensu consti-*

constituta, se, & non illa destruit, quisquis præsūmit aut solvere quos ligant, aut religare quos solvunt.

Opponunt Adversarii: obedire non licet, cū evidens est, judicium esse falsum, & mandatum injustum; nam ex S. Bernardo Lib. de Præcept. & Disp. c. 9. *De hujusmodi nec præceptor expectandus; nec prohibitor auscultandus est*: atqui nobis evidens est, inquit, falsò & injustè errores tribui Jansenio quinque memoratis propositionibus expressos: Ergo.

R. 1. Si Defensores Jansenii præsentem controversiam ad S. Bernardi judicium referunt, fateantur necesse est saltem in rebus dubiis Superiorum mandato, quamvis absolutè fallibili, esse obtemperandum; nam eò loci sic scribit: *Sed homines, inquit, facile falli in Dei voluntate de rebus dubiis percipienda, & in præcipienda fallere possunt. Sed enim quid hoc refert tua qui conscius non es, præsertim cū teneas de Scripturis, quia labia Sacerdotis custodiunt scientiam & legem ex ore ejus requirunt? Requirunt, dixerim, legem; non quam vel authentica ulla Scriptura tradiderit, vel manifesta ratio probaverit. De hujusmodi quippe nec præceptor expectandus, nec prohibitor auscultandus: sed quod ita latere aut obscurum esse dignoscitur, ut in dubium venire possit, utrumque Deus sic aut aliter fortè velit si non de labiis custodientibus scientiam, & ex ore Angeli Domini Exercituum certum reddatur, à quo denique divina potiùs consilia requiruntur, quàm ab illo, cui credita est dispensatio mysteriorum Dei? Ipsum proinde, quem pro Deo habemus, tanquam Deum in his, quæ apertè non sunt contra Deum, audire debemus.*

R. 2. Distinguendo minorem, evidens est falsa persuasione, transeat: vera persuasione, cui inniti possint & debeant, Nego minorem. Enimverò quis non expertus est se aliquando delusum falsa evidentiæ specie, & pro certo habuisse, quod posteaprehendit esse omnino dubium, aut etiam falsum? huic deceptioni præsertim obnoxii sunt, 1. qui de eruditione sua nimis præsumunt, 2. qui minùs ratione, quàm amore, aut alio quovis affectu in objectum feruntur, ut patet in litigio; cuilibet enim litiganti causa apparet aded evidenter justa, ut Judicis sententiam votis contrariam facilè iniquam pronuntiaret nisi obstaret illud Eccli. 8. *Non judices contra Judicem; quia secundum quod justum est, judicat.* Hinc vulgaria effata, *nemo in propria causa judex. Quod volumus, sanctum est & justum.* Cùm ergo causam Jansenii defensores ejus fecerint suam, prudentia & æquitas exigunt, ut vana evidentiæ larva deposita pareant Ecclesiæ judicio tanquam certo & indubitato, ac se contineant intra limites religiosi silentii, quemadmodum præscribit Clemens XI. in sua Constitutione anno 1705.

Confirmatur. Quævis evidentiæ sive absoluta sive respectiva non repetitur, nisi vel ex objecto, vel ex modo, quo objectum potentiæ applicatur, vel ex potentia apprehensiva melius in uno disposita, quàm in alio, vel denique ex spiritu privato, qualem Calviniani inesse fingunt in prædestinatis: atqui Defensores Jansenii evidentiæ respectivam, qua sibi blandiuntur, ex nullo horum repetere possunt. Non ex objecto, nempe ex Libro Jansenii, utpote qui omnium oculis æqualiter exhibeatur. Non ex modo, quo
hi

hi objectum, hoc est, Librum Jansenii apprehendunt, & legunt; cum memorati Summi Pontifices, Antistites & Theologi sæpius expenderint rationes & momenta, quibus Defensores Jansenii evidentiam sibi comparare jactitant, iisdemque planè mediis, quibus illi Librum Jansenii contuiti sint, nec deprehenderint, quod illi se evidenter videre affirmant. Non ex potentia apprehensiva, quæ in Jansenii Defensoribus melius sit disposita, quàm in cæteris; insolentissimæ enim esset superbiæ, si Adversarii se præsumerent ingenii acumine omnes antecellere, qui sunt, & qui extitere à quinquaginta annis, & ampliùs, nimirum quinque Summos Pontifices, insignes quosque Antistites, qui per illud tempus, tum in Gallia, tum alibi floruerunt, & celeberrimas Theologiæ Academias, inter quas Parisiensem appellare licet, qui nec viderunt, nec etiamnum vident in præfato Libro, quod Adversarii evidenter se deprehendere contendunt. Non denique ex spiritu privato, quo Defensores Jansenii interiùs, & sine mediis exterioribus divinitus edoceantur; hæc enim propria est Calvinistarum insania, à qua illi non minus quàm cæteri abhorrent. Agnoscant ergo se delusos fuisse falsa evidentiæ imagine, & in duas cæcitatæ species, quas notat Tertullianus, incurrisse, scilicet viderunt quæ non sunt, & non viderunt quæ sunt.

Quod addunt de Molinistarum novitate ad præsentem controversiam non pertinet; namque datur medium inter Jansenistarum (ut vocant) errorem, & Molinistarum opiniones; adeò ut liceat esse Catholicum, nec propterea Molinistam. Quanquam longè dispar est causa Jan-

senistarum & Molinistarum ; quia doctrina Molinæ, quantumcunque sua novitate Jansenistas offendat, ab Ecclesia tamen hæctenus damnata non est. Hinc est, quòd cùm in hoc capite errores duntaxat ab Ecclesia proscriptos colligere proposuerimus, de Molinistis sub speciali titulo nobis tractandum non fuit, ne videremur illos reponere in eorum numero, quos Ecclesia non tolerat, ac prævenire judicium Sedis Apostolicæ ; quæ licèt in famosis Congregationibus *de Auxiliis* sub Clemente VIII. & Paulo V. habitis, Librum de concordia gratiæ cum libero arbitrio, à Ludovico Molina editum anno 1588. examini subjecerit ; de eo tamen nondum sententiam suam protulit. Quare contra criminationes, quibus Defensores Jansenii Molinistas onerant, suos errores obvelare incautisque propinare conantur, quasi is necessariò sit Molinista, hoc est in eorum mente, Semipelagianus, qui Jansenianus non fuerit, monendi sunt Clerici quid ipsimet Molinistæ communiter improbent, quidve ad controversias Scholæ duntaxat pertinere arbitrentur.

Rejiciunt imprimis sequentes Propositiones ad Clerum Gallicanum delatas anno 1700. Primam, *axioma illud Theologicum, facienti quod in se est, Deus non denegat gratiam, non solum verissimum est . . . verum etiam per illud significatur obligatio, quam Deus habet dandi gratiam facienti . . . quod in se est viribus naturæ.* Secundam, *quia tamen opera viribus solius naturæ elicitæ omnino sterilia sunt, atque incapacia merendi dona intrinsecè & Theologicè supernaturalia : ideo dicimus obligationem, quam Deus habet, conferendi gratiam facienti quod est in se viribus naturæ . . . non oriri ex bonitate*

bonitate talium operum, aut ex ullo merito sive condigno, sive congruo . . . sed ex pacto inter Christum fidejussorem nostrum, & Patrem inito, ad gratiam hominibus conferendam propter Christi merita, respiciendo ea opera naturalia, ut purum terminum, non ut meritum ullum, aut rigorosam conditionem. Contra quas propositiones Clerus Gallicanus sic pronuntiavit: Hæ duæ propositiones, qua parte causam discernendi inter justos & non justos, in opera merè naturalia referunt, Semipelagianismum instaurant mutatis tantum vocibus. Pactum autem, quod inter Deum & Christum assertitur, commentum est temerarium, erroneum, nec solum tacente, sed etiam adversante Scriptura, & Sanctorum Patrum Traditione prolatum.

Enimverò Semipelagiani non quærebant prævium in homine meritum, sed causam duntaxat, cur Deus è duobus sive infantibus, sive adultis æquè indignis alterum eligeret, & alterum rejiceret. In hac autem dispensatione acceptio personarum ipsis videbatur injusta, nisi aliqua subesset causa, in parvulis nempe prævisus rectus gratiæ usus, si ad ætatem adultam pervenirent; in adultis verò initialis quidam voluntatis conatus; quibus Deus determinaretur ad gratiam illis conferendam, spretis aliis, qui eandem gratiam vel collatam neglecturi essent, vel paratam non exoptarent. Quòd autem prævia illa voluntatis affectio non haberet apud Semipelagianos rationem alicujus meriti, patet ex Epistola Hilarii referentis ad sanctum Augustinum, Semipelagianos solitos dicere ægrum non ideo mereri sanitatem, quia opem Medici postulavit.

Ergo juxta Catholicam doctrinam, quam sancti Augustinus, Prosper, & Hilarius contra Se-

mipelagianos propugnabant, causa, cur unus præ alio eligatur, repetenda non est ex homine naturalibus viribus faciente quod in se est, sed ex sola Dei misericordia, dicente Apostolo 1. Cor. 4. *Quis te discernit? quid habes, quod non accepisti?* Illud ipsum agnoscunt Molinistæ, paucis fortè exceptis, quorum privatus error omnibus imputari non debet.

Scio apud Molinam Lib. de Concordia q. 14. art. 13. disp. 2. legi has propositiones: 1. *Faciendi quod in se est per naturæ vires Deus non denegat gratiam.* 2. *Id obtinuit nobis Christus ob sua merita, atque inter leges, quas tam ipse, quàm Pater æternus statuerunt, ut quoties ex nostris viribus naturalibus conaremur facere quod in nobis est, præsto nobis essent auxilia gratiæ, quibus ea, ut oportet, salutem efficeremus, ut ea ratione, dum essemus in vita, semper in manu liberi arbitrii nostri posita esset salus nostra.* Sed Molinæ sectatores multis probare conantur, censuram Cleri Gallicani non cadere in hujusmodi propositiones, utpotè à Molina prolatas in sensu veterum Scholasticorum, eoque Catholico. Cum autem hæc quæstio facti jam pridem delata sit ad Sedem Apostolicam ejus judicium religioso silentio præstolabimur.

Ad Scholæ verò controversias referunt, quæ docet Molina de scientia media, de conditionatis Dei decretis, & de modo, quo in statu naturæ lapsæ gratia operatur; contenduntque in hujusmodi quæstionibus, quæ ad fidem non pertinent, non minùs sibi liberum esse, quàm Thomistis & aliis, habere privatas opiniones, nec propterea debere hostiliter exagitari, oblocutionibus & dictariis diffamari ab iis, qui contra sentiunt:

tiunt : quemadmodum Thomistæ ac Scotistæ non se mutuò dilacerant propter oppositas plerumque sententias.

Quam Molinistæ ab aliis exigunt observantiam & justitiam, hanc illis exhibuimus in Tractatu de Attributis, ubi tractantes de Scientia, de Decretis divinis, & de Gratia efficaci, ita communem Theologorum sententiam propugnauimus, ut cum Molinistis contra sentientibus honorificè & peramanter, sicut Theologum decet, egerimus. Sed eandem vicem iis rependant, quos noverint opinioni suæ adversos : non eos propterea veluti Ecclesiæ hostes insectentur, non de hæresi Janseniana suspectos reddant ; sed solliciti sint & ipsi servare unitatem spiritus in vinculo pacis. Denique omnes audiamus Apostolum Jacobum gravissimis his verbis monentem cap. 3. *Si zelum amarum habetis, & contentiones sint inter vos, nolite gloriari (tanquam strenui veritatis defensores) . . . non enim ista sapientia de sursum descendens ; sed terrena, animalis, diabolica. Terrenam & animaleam dicit ; quia oritur ex privatis studiis, ex dominandi libidine, & ex carnali cupiditate ; manifesta enim sunt opera carnis, inquit Apostolus Gal. 5. quæ sunt . . . inimicitia, contentiones, æmulationes, iræ, rixæ, dissensiones, sectæ, invidia. Diabolicam quoque sanctus Jacobus vocat hujusmodi sapientiam. Quis enim auctor, nisi Diabolus tot dissidiorum intestinorum, quæ Matris Ecclesiæ viscera fœdè & crudeliter dilacerant, filios ejus contra se invicem armant, suspiciones malas, & detractiones injustas generant cum magno fidelium scandalo ? Quæ autem de sursum sit sapientia declarat idem Apostolus sub-*
se-

sequentibus verbis *Quæ autem de sursum est sapientia* (qualis est vera Theologia) *primum quidem pudica est, deinde pacifica, modesta, suadibilis, bonis consentiens, plena misericordia.* Pudicam asserit, scilicet Fidei puritate, & charitatis integritate; pacificam, non contentiosam: modestam, hoc est non elatam, sed demissam & humilem: suadibilem, id est morigeram, & facile obsequentem: bonis consentientem, hoc est, bonis aliorum operibus congaudentem; cum contra, sapientia terrena, & animalis ægrè ferat rem Christianam aliorum manibus feliciter promoveri.

Hæc breviter præmittenda duximus in limine hujus Tractatus, ut quos ad sacram Theologiam initiamus, solliciti sint servare charitatem omni scientia supereminentem, caveantque ne gratiæ notionem quærentes, unionem amittant.

Pacem nunc habemus ab hæreticis singulari Dei misericordia penitus prostratis, expurgata est Pastorum vigilantia & fortitudine morum doctrina, quid superest, nisi ut arma nostra convertamus in vitia, quæ liberius videntur grassata, dum Ecclesiæ Ministri, propter præteritas discordias aliò ferè intenderent? Nostrum sit itaque officium & studium Sanctuarii ruinas reparare, jacentes peccatores erigere, & omnes Catholicos superædificare supra fundamentum positum, quod est Christus Jesus.

C A P U T I V.

De Gratia habituali.

Habemus ex dictis capite secundo, gratiam habitualement esse supernaturale Dei donum animæ

mæ permanenter inhærens per modum habitus: gratiam verò actuale[m] esse actum transeuntem. Donum autem illud permanens triplex est, scilicet gratia sanctificans, virtutes infusæ, & dona Spiritus Sancti, de quibus hîc sigillatim tractandum.

§. I.

*De nomine, existentia, & essentia Gratiæ
sanctificantis.*

Q. 1. *Quenam sunt nomina Gratiæ sanctificantis?*

R. Vocatur 1. Gratia sanctificans; quia effectus ejus formalis est sanctum efficere subiectum, cui inhæret, sicut calor inhærens corpori reddit illud formaliter calidum. 2. Gratia justificans; quia sicut calor expellit frigus, ita gratia formaliter expellit peccatum, & inclinât ad omne opus bonum; justum enim dicimus eum, qui habitualiter dispositus est ad legem implendam. 3. Adoptio: quia effectus ejus formalis est facere Filios Dei adoptivos, juxta illud Rom. 8. *Accepistis spiritum adoptionis filiorum, in quo clamamus: Abba (Pater.)* Ob eandem rationem dicitur 1. Joan. 3. v. 9. semen Dei, quatenus per illam nascuntur Filii Dei, & consortes divinæ illius naturæ. 4. Pignus hereditatis. Ephes. 1. vers. 14. est enim titulus jus tribuens ad gloriam cœlestem. Si . . . filii & heredes: heredes quidem Dei, cohæredes autem Christi. Roman. 8. vers. 17.

Q. 2. *Existitne Gratia sanctificans?*

R. De Fide est, existere, Rom. 5. v. 1. *Justificati ergo ex fide, pacem habeamus ad Deum per Dominum nostrum*

nostrum Jesum Christum. 1. Corinth. 6. vers. 11. *Abluti estis . . . sanctificati estis . . . justificati estis in nomine Domini nostri Jesu Christi, & in Spiritu Dei nostri.* Atqui hæc sanctificatio, seu justificatio non fit nisi per gratiam sanctificantem, quæ ex Concilio Tridentino Sess. 6. cap. 7. est unica causa formalis justitiæ nostræ.

Q. 3. *Gratia sanctificans estne aliquid intrinsecè inhærens?*

R. Negant Lutherani & Calvinistæ, docentque gratiam justificantem esse extrinsecum Dei favorem condonantis peccata, & imputantis justitiam, vel qua Deus ipse justus est, secundum Osiandrum & nonnullos Lutheranos, vel ipsam Christi justitiam secundum Lutherum & Calvinum. Magister Sententiarum aliqua ex parte ad hunc errorem accessit, quatenus scilicet docuit charitatem esse ipsummet Spiritum Sanctum; quamquam sanctus Thomas 2. 2. q. 23. art. 2. illum benignè interpretatur de charitate principiativè sumpta, ita ut Spiritus Sanctus dicatur principium dilectionis independenter ab habitu charitatis, quem habitum idem Magister non videtur admisisse propter illud 1. Joan. 4. v. 8. *Deus charitas est.* Contra Lutheranorum & Calvinistarum errores extat Canon 11. Sess. 6. Concilii Tridentini, his verbis conceptus: *Si quis dixerit homines justificari, vel sola imputatione justitiæ Christi, vel sola peccatorum remissione, exclusa gratia & charitate, quæ in cordibus eorum per Spiritum Sanctum diffundatur, atque illis inhæreat; aut etiam gratiam, qua justificamur, esse tantum favorem Dei; anathema sit.*

Respondeo itaque. De Fide est gratiam sanctificantem esse quid creatum intrinsecè inhærens.

Pro-

Probatur 1. ex Scriptura Rom. 5. v. 5. *Charitas Dei diffusa est in cordibus nostris per Spiritum Sanctum.* Si per Spiritum Sanctum, ergo ab ipso distinguitur, sicut effectus à causa, fructus ab arbore, *fructus . . . Spiritus est charitas*, Gal. 5. sed magis directè confoditur Novatorum error Roman. 5. ubi sic scribit Apostolus. *Sicut per unius delictum in omnes homines in condemnationem: sic & per unius justitiam in omnes homines in justificationem vitæ.* *Sicut enim per unius . . . inobedientiam peccatores constituti sunt multi: ita & per unius obeditionem justi constituentur multi.* Atqui non sumus constituti formaliter peccatores per solam extrinsecam imputationem peccati primi parentis: sed per maculam interiorem, & per peccatum intrinsecè inhærens, fatentibus adversariis: ergo neque sumus formaliter justi per imputationem justitiæ, sive Dei, sive Christi, sed per veram justitiam peccatum formaliter expellentem, & intrinsecè inhærentem. Nihil clarius illo textu.

Probatur 2. ex Traditione.

Sanctus Chrysostomus exponens illud Ephes. 1. *Gratificavit nos in dilecto Filio suo*, sic habet: *hoc est non solum liberavit à peccatis, sed etiam fecit amabiles. Quomodo enim si quis acceptum aliquem scabiosum, & peste ac morbo, senioque ac paupertate infectum, statim formosum fecerit juvenem, omnes homines pulchritudine vincentem, & postea purpura induerit, & omni ornatu ornaverit; ita nostram instruxit, & ornavit animam, pulchramque fecit, desiderabilem, amabilem; cupiunt enim Angeli talem aspicere animam. Ita etiam nos fecit gratissimos, & sibi desiderabiles; concupiscet enim, inquit: Rex pulchritudinem tuam.*

San-

Sanctus Ambrosius Lib. de initiandis cap. 7. sic alloquitur baptizatum: *Accepisti vestimenta candida, ut sint indicium, quod exueris involucrum peccati, indueris innocentiae casta velamina.*

S. Augustinus Lib. de Spiritu & Littera c. 3. sic habet: *Charitas Dei dicta est diffundi in cordibus nostris, non qua nos ipse diligit, sed qua nos facit dilectores suos, sicut justitia Dei, qua iusti ejus munere effici-mur, & Domini salus, qua nos salvos facit, & Fides Domini nostri Jesu Christi, qua nos fideles facit. Et Enchyridii cap. 52. Quemadmodum in illo (Christo) vera mors facta est, sic in nobis vera remissio peccatorum, & quemadmodum in illo vera resurrectio, ita in nobis vera justificatio.*

Probatur 3. ratione duplici. Prima, per justificationem non solum homo desinit esse malus, seu peccator, sed etiam fit bonus & justus: atqui homo non fit bonus & justus per solam remissionem peccatorum, sicut nec albus per solam expulsionem nigredinis: neque per denominationem extrinsecam, seu imputationem justitiæ alienæ, *justum, & fortem & bonum omnino virum ob opera laudamus*, inquit Aristoteles Lib. 1. Ethicorum cap. 12. Secunda, si gratia sanctificans est ipsa-met justitia Christi per Fidem apprehensa, & imputata, parvuli non justificantur per Baptismum; quia per Fidem justitiam Christi non apprehendunt, nec sibi applicant, utpote qui sint incapaces eliciendi ullius actus. Nec dicant Adversarii justitiam Christi parvulis applicari per divinam electionem, sive promissionem; quia apud ipsos sola Fides justificat, & Sacramenta eatenus profunt, quatenus Fidem excitant, & sigillant.

Q. 4. *Gratia sanctificans estne quid permanenter animæ inhærens?*

R. Certum est inhærerere permanenter.

Probatur I. ex Scriptura, Joan. 14. vers. 17. *Apud vos manebit (Spiritus Sanctus) & in vobis erit.* v. 16. *aliud Paraclitum dabit vobis, ut maneat vobiscum in æternum,* v. 23. *Ad eum veniemus, & mansiorem apud eum faciemus.* Joan. 4. v. 16. *Qui manet in charitate, in Deo manet, & Deus in eo.* I. Cor. 6. *An nescitis, quoniam membra vestra templum sunt Spiritus Sancti, qui in vobis est, quem habetis à Deo, & non estis vestri?* Atqui mansio & inhabitatio significant aliquid permanens. Deus autem, cum accedit, aut recedit, non mutat locum, utpote qui sit ubique, & omnem locum repleat, contineatque: sed dicitur, accedere, cum novo modo alicubi operatur; recedere verò, cum desinit operari, quamvis semper præsentissimus adsit. Sic dicimus redire spiritum hominis, qui deliquium passus fuerat, cum solitas operationes repetit. Deus ergo venit ad peccatorem, à quo recedere non potuit, quando illum excitat, & transeunter in illo operatur sanctam cogitationem, & pium voluntatis affectum, manet autem in justo quamdiu per continuum influxum gratiam sanctificantem in illo conservat, & per illam non solum assimilatur sibi in moribus & virtutibus divinis, sed etiam consortem facit naturæ divinæ, ejusdem secum animi, desiderii & affectus. Justus quoque per charitatem in Deo manet; quia gratia sanctificans seu charitas ipsum avellit à terrenis cupiditatibus, omnes ejus potentias, sensus, appetitus, amores, cogitationes, intentiones ad Deum trahit, ut nonnisi Deum &

D. Habert Theolog. Tom. II. B b divi-

divina cogitet, intendat, suspiret, nec nisi in illo quiescat.

Probatur 2. ex Decretis Summorum Pontificum & Conciliorum Generalium. Innocentius III. Cap. *Majores*, tit. de Baptismo, refert oppositas Theologorum sententias circa Baptismum parvulorum: alii contendebant in parvulis originale quidem peccatum remitti, sed *Fidem aut charitatem aliasque virtutes non infundi*: alii contra asseriebant *dimitti peccatum, & virtutes infundi habentibus illas quoad habitum, non quoad usum*. Cui posteriori sententiæ videtur adhærere Summus Pontifex. Sed clariùs Concilium Viennense Clem. de Summa Trinit. & Fide Catholica, sic enim statuit: *Quantum ad effectum Baptismi in parvulis, reperiuntur quidam Doctores Theologi opiniones contrarias habuisse. Quibusdam ex ipsis dicentibus per virtutem Baptismi parvulis quidem culpam remitti, sed gratiam non conferri: aliis è contra asserentibus quod & culpa eisdem in Baptismo remittitur, & virtutes ac gratia informans infunduntur quoad habitum*. Nos opinionem secundam, tanquam probabiliorem, & dictis Sanctorum, ac Doctorum modernorum Theologiæ magis consonam & concordem, sacro approbante Concilio, duximus deligendam.

Denique Concilium Tridentinum Sessione 5. in decreto de peccato originali, sub anathemate absolutè definit. 1. Parvulos veraciter baptizari in remissionem peccatorum, *ut in eis regeneratione mundetur, quod generatione contraxerunt*. 2. In eisdem non solum tegi, aut non imputari, sed etiam tolli totum id, quod veram & propriam peccati rationem habet. 3. Quod novum (induentes hominem) *innocentes, immaculati, puri, innoxii,*

noxii, ac Deo dilecti effecti sunt, hæredes quidem Dei, cohæredes autem Christi. Quæ cum sine gratia sanctificante stare nequeant, manifestum est Concilium definiisse per Baptismum gratiam sanctificantem parvulis infundi quoad habitum; nam omnis actus sunt incapaces.

Confirmatur. Parvuli, qui ad ætatem adultam perveniunt, per gratiam Baptismalem, quæ supponitur in ipsis permanere, non aliter sunt justi & sancti, quàm alii adulti, qui per Sacramentum pœnitentiæ Deo reconciliantur; Ergo gratia sanctificans est in adultis æquè ac in parvulis aliquid permanens per modum habitus. Et ita refellitur sententia quorundam Theologorum, ut Vasquesii, qui docent hominem justificari per justiciam actualem, seu per actus supernaturales virtutum, præsertim charitatis.

Q. 5. *Utrum sit de Fide gratiam sanctificantem esse quid permanens?*

R. 1. Non fuisse ut dogma Fidei receptum ante Concilium Tridentinum, ut patet ex cit. Cap. *Majores*, & Concilio Viennensi, ubi non proscribitur opposita sententia.

R. 2. Post Concilium Tridentinum Theologi variè opinantur. Soto Lib. 2. de Natura & Gratia cap. 17. & sequentibus, Melchior Canus Lib. 7. de Locis Theologicis cap. 2. & alii, fatentur id non sine ingenti temeritate posse negari; sed contendunt non esse contra Fidem. Bellarminus Lib. 1. de Gratia & libero arbitrio cap. 3. Suarez Lib. 6. de Gratia, cap. 3. num. 6. & alii affirmant veritatem hanc esse definitam de Fide à Concilio Tridentino, quibus consentit Cathechis-

mus Romanus, qui sic habet ubi de Baptismo. *Est autem gratia, quemadmodum Tridentina Synodus ab omnibus credendum, pœna anathematis proposita, decrevit, non solum per quam peccatorum fit remissio: sed divina qualitas animæ inhærens.* Alii docent responsionem nostram ex verbis Concilii elici tanquam conclusionem; ac proinde oppositam sententiam esse erroneam; sed negant esse expressè definitam, & Fide divina credendam.

Cartesiani Philosophi, qui non admittunt accidentia realiter distincta à substantiis, sive materialibus, sive spiritualibus, tutos se putant à censuris Concilii Tridentini; quia agnoscunt divinas impressiones & modificationes in anima justæ permanentes per modum habitus, qui tamen non sit qualitas, aut alia entitas realiter distincta: non enim credibile est, inquit, Tridentinos Patres voluisse exagitare & definire quæstionem Philosophicam prorsus inutilem in materia, de qua agebatur. Nimirum proscribendum susceperant Novatorum errorem; quo justificationem reponebant in extremo Dei favore, & statuendum dogma Catholicum, nempe justificationem perfici per interiorem spiritus immutationem & renovationem: atqui illa renovatio perfectius & divinius perficitur per modificationem & impressionem Spiritus Sancti inhabitantis, quam per qualitatem realiter distinctam. Sed præterquam quòd illa modificatio valdè improprie à Patribus Tridentinis inhærens diceretur, cum non sit quid distinctum ab anima; satis est ad nostrum institutum, quòd illa Cartesianorum sententia negans formas accidentales à substantia realiter distinctas non semel fuerit rejecta, ut principiis Fidei dis-

sen-

sentanea, à celeberrimis Academiis Lovaniensi anno 1662. Parisiensi anno 1624. 1671. 1691-1693. & 1705.

Q. 6. *Gratia sanctificans estne quid realiter à charitate distinctum?*

R. Affirmat S. Thomas, & ejus Schola; quia sicut virtus naturalis hominem in esse naturali perfectum, ita virtus supernaturalis eundem in esse supernaturali constitutum supponit: atqui charitas est virtus supernaturalis, gratia verò sanctificans constituit hominem in esse divino, & supernaturali: ergo charitas præsupponit gratiam sanctificantem, tanquam novam naturam, secundum quam homo dicitur regenerari, nasci Filius Dei, ac proinde gratia sanctificans realiter distinguitur à charitate. Illud ipsum videtur agnoscere Concilium Viennense citata Clementina de Summa Trinitate, ubi ait in Baptismo conferri gratiam informantem, & virtutes. Concilium quoque Tridentinum Sess. 6. cap. 7. distinguit gratiam sanctificantem à virtutibus; docet enim ibidem justificationem fieri per susceptionem gratiæ & donorum.

Contra negant Magister Sententiarum, sanctus Bonaventura, Scotus, Durandus, & alii, gratiam sanctificantem à charitate realiter distingui; quia in Scripturis omnes effectus gratiæ sanctificantis tribuuntur charitati. Charitas expellit peccatum, Luc. 7. *Remittuntur ei peccata multa, quoniam dilexit multum.* Hominem reddit Deo gratum, Joan. 14. *Qui diligit me, diligitur à Patre meo, & ego diligam eum.* Consortem efficit divinæ naturæ, ac proinde Filium Dei adoptivum & hæredem, 1. Joan. 4. *Qui manet in charitate, in Deo ma-*

net, & Deus in eo. Et Jac. I. v. 12. *Accipiet coronam vitæ, quam repromisit Deus diligentibus se.* Denique charitas est radix omnium bonorum operum. I. Cor. 13. *Charitas patiens est, benigna est, &c.*

Facilis est responsio ad argumenta posterioris sententiæ, scilicet gratiæ sanctificantis effectus ideo tribui charitati, quia perfecta charitas est ultima dispositio ad gratiam sanctificantem, ita ut ab ea separari nequeat; eadem quippe solent dici de proxima dispositione, quæ dicuntur de forma, quam introducit, v. g. de summo calore æquè dicitur ac de igne, quod comburat, inflammet, &c. Sed hanc controversiam Scholæ dirimendam relinquimus; quia ad salutem fidelium nihil interest scire, an gratia sanctificans & charitas realiter distinguantur, modò noverint dona illa simul in justificatione conferri.

Q. 7. *Quomodo definitur Gratia sanctificans?*

R. Ex præmissis responsionibus erui debet ejus definitio in hunc modum. Gratia sanctificans est supernaturale Dei donum intrinsecus inherens per modum habitus, quo homo formaliter redditur Sanctus, justus, Deo gratus, Filius Dei adoptivus, & hæres vitæ æternæ.

Dicitur 1. *Supernaturale Dei donum*: ut significetur gratiam sanctificantem non esse ipsummet Spiritum Sanctum, sed ab ipso emanare tanquam effectum à causa.

Dicitur 2. *Intrinsecè inherens*, contra Lutheranos & Calvinistas asserentes gratiam justificantem fuisse extrinsecum Dei favorem, quo peccata condonat, & imputat justitiam seu merita Christi.

Dicitur 3. *per modum habitus*, quo significatur gratiam sanctificantem esse quid permanens.

Dici-

Dicitur 4. *quo homo formaliter redditur justus*; sic enim Concilium Tridentinum de justificatione loquitur Sess. 6. cap. 7. *Non est sola peccatorum remissio, sed & sanctificatio, & renovatio interioris hominis per voluntariam susceptionem gratiæ & donorum. Unde homo ex injusto fit justus, ex inimico amicus, ut sit hæres secundum spem vitæ æternæ. Et infra: Demum unica formalis causa (justificationis) est justitia Dei, non qua ipse justus est, sed qua nos justos facit: qua videlicet à Deo donati renovamur spiritu mentis nostræ; & non modò reputamur, sed verè justî nominamur, & sumus, justitiam in nobis recipientes.*

At inquires, quomodo merum accidens tantæ efficaciciæ esse potest, ut omnia peccata quantumlibet atrocita statim deleat, & ex impio justum & sanctum efficiat?

R. Quamvis illud sit omni admiratione dignissimum, pluribus tamen exemplis suadet esse possibile. Namque modicum fermentum totam massam prorsus immutat, ignis præeunte calore poros ferri frigidi ingrediens, nativum ejus frigus formaliter expellit, ipsumque ferrum candens & ignitum reddit. Sed, quod ad propositum maximè confert, lumine Fidei mentem Hæretici, vel etiam Athei innumeris erroribus implicatam subeunte, mox ignorantia tenebræ fugiunt, & cuncti errores evanescunt. Quidni gratia sanctificans corda, in quibus diffunditur, similiter immutet & renovet, peccata, quibus non minùs contraria est, quàm frigori calor, statim expellat, voluntatemque sic ad Deum convertat, & erga divinam ejus legem afficiat, ut homo omne malum summè aversetur, & ad omnia, quæ Dei sunt, totus propendeat?

Quodd autem gratia sanctificans cor hominis sic immutet, paginæ utriusque Testamenti apertè testantur. Jeremiæ 31. vers. 33. *Dabo legem meam in visceribus eorum, & in corde eorum scribam eam.* Ezech. 11. vers. 19. *Dabo eis cor novum, & spiritum novum tribuam in visceribus eorum: & auferam cor lapideum de carne eorum, & dabo eis cor carneum; ut in præceptis meis ambulent.* Nihil luculentius prophetico illo testimonio pro interiori pœnitentis renovatione, à Concilio Tridentino definita. Aufertur ab eo cor lapideum, id est durum, intractabile, & inexorabile: simulque confertur cor novum, carneum, molle, flexibile, & obsequens ad Dei nutum. Jam opus non est, sicut prius. proluxa & molesta argumentationum congerie ad suadendum mundi contemptum, carnis afflictationes, & alia Evangelii præcepta, ad primam vel Pastoris vocem, vel Evangelii lectionem statim acquiescit repugnante licet concupiscentia; divina enim illa præcepta in corde gerit inscripta non atramento, sed Spiritu Dei; non characteribus inanimis, sed vitalibus affectibus; experiturque, quàm verum sit illud Apostoli, 1. ad Timoth. cap. 1. *Lex justo non est posita*, quia etsi lege teneatur, illa tamen non premitur, non urgetur, non refrænatur; sed ei condelectatur secundum interiorem hominem.

Non inferiora testimonia ex novo Testamento proferuntur in confirmationem doctrinæ Concilii Tridentini, unum aut alterum ex benemultis seligimus. 1. Joan. 3. vers. 9. *Omnis qui natus est ex Deo, peccatum non facit; quoniam semen ipsius in eo manet, & non potest peccare (nisi degenerem se præbeat) quoniam ex Deo natus est.* Gratiam

tiam sanctificantem vocat Apostolus semen Dei, ut meminerimus ejus infusionem speciem habere divinæ cujusdam generationis, & nos per illam fieri consortes divinæ naturæ, ut docet Apostolorum Princeps secundæ Epistolæ cap. 1. ubi de Christo loquens sic habet: *Per quem maxima & pretiosa nobis promissa donavit, ut per hæc efficiamini divinæ consortes naturæ.* Non quidem essentialiter (quod solis tribus personis Sanctissimæ Trinitatis convenit,) neque hypostaticè, (quod humanitati Christi proprium est,) sed per gratiam sanctificantem, utpote quæ veram amicitiam inter Deum & creaturam constituat: amicitia autem perfectissima, & maximè spiritualis ac divina postulat intimam Dei præsentiam in homine; ita ut si per impossibile Deus non esset ubique, præsens tamen fieret animæ gratia informatæ: præsens, inquam, non sicut dominus præsens est in domo, quam inhabitat; sed sicut anima in corpore, quod vivificat, seclusis tamen imperfectionibus; non enim Deus adest ut forma informans, aut pars componens, sed ut principium vitæ supernaturalis, animam movens & elevans ad statum, qui transcendit omnem ordinem etiam Angelicum, & quemlibet etiam possibilem. Unde meritò S. Petrus asserit gratiam sanctificantem esse donum pretiosum, & omnium maximum.

Atque ex hac explicatione facilè intelliguntur reliquæ definitionis partes, quibus dicitur gratiam sanctificantem formaliter reddere sanctum Deo gratum, Filium Dei adoptivum, & hæredem vitæ æternæ. Namque

1. Sanctitas est immunitas ab omni labe peccati, & plena, firmaque adhæsiō cultui divino:

atqui gratia ex dictis per se formaliter excludit peccatum, inclinatur hominem ad omnia, quæ Deo sunt placita: ergo sanctum formaliter reddit eum, cui confertur.

2. Quomodo non gratus esset Deo, qui divinæ ejus voluntati in omnibus est consentiens? *Non enim justus, nisi qui gaudet justis*, ut dicitur 1. Eth. cap. 8. Justus autem Dominus, & justitiam dilexit: ergo diligit & gratos habet quotquot novit voluntati suæ conformes; in hoc quippe justitia adæquatè consistit. Unde S. Hieronymus in cap. 10. Danielis ait: *Omnis sanctus in se habens animæ pulchritudinem, à Domino amatur.*

Nec dicas, gratiam actualem esse gratiam gratum facientem, ac proinde non esse proprium gratiæ sanctificantis, hominem reddere Deo gratum; nam gratia actualis gratum efficit secundum quid duntaxat; quatenus nempe est principium boni operis, quod cum Deo acceptum sit, ratione illius peccator dicitur Deo gratus, quamvis secundum suam personam displiceat, & sit objectum odii divini. Sed cum per gratiam sanctificantem homo à labe peccati sit purus, & divinæ voluntati in omnibus consentiens, per illam persona ejus simpliciter & absolutè efficitur Deo grata, juxta illud Sapient. 7. *Per nationes in animas sanctas se transfert, (Sapientia) amicos Dei, & Prophetas constituit.* Hinc,

3. Per gratiam sanctificantem homo fit Filius Dei adoptivus, non denominatione extrinseca & morali tantum; quemadmodum in civibus persona extranea ad succedendum in hæreditate assumpta, dicitur pro Filio adoptata. Namque ex
lau-

laudato capite 3. 1. Joan. Gratia sanctificans est semen Dei, quo homo fit confors naturæ divinæ, eo, quo diximus modo, Christo Filio Dei naturali conjungitur tanquam membrum capiti, eodem vivens Spiritu: *Videte*, inquit dilectus Discipulus, primæ Epist. cap. 3. vers. 1. *qualem charitatem nobis dedit Pater, ut Filii Dei nominemur, & simus.* Unde,

Ultimò sequitur quodd gratia sanctificans hominem constituat hæredem vitæ æternæ. Nam ex Apostolo Rom. 8. *Si . . . Filii, & hæredes; hæredes quidem Dei, cohæredes autem Christi*, hoc est, ejusdem gloriæ cum Christo participes. Liceat ergo absolutum à peccatis compellare verbis S. Leonis Serm. 1. de Nativit. *Agnosce, o Christiane, dignitatem tuam, & divinæ confors factus naturæ; noli in veterem vilitatem degeneri conversatione redire. Memento cujus capitis & corporis sis membrum.*

Verùm, proh dolor! quod hæresis Ecclesiæ eripere non potuit, ignorantia neglectum, & quodammodo inutile reddit. Quis enim æstimat, quod ignorat, aut expetit quod non æstimat? Atqui vulgus fidelium, ne dicam Pastorum, justificationem non aliter apprehendit, quàm Lutherani & Calviniani, nempe ut meram peccatorum condonationem: nulla peccatoribus cura aut cogitatio de interiori spiritus renovatione, unum à Deo precantur, scilicet peccatorum veniam, quia illud à Pastoribus non sunt edocti.

Nec dicant Pastores quæ hætenus explicata sunt, sublimiora esse, quàm ut à plebe percipi possint. Namque in hoc positi sunt, ut evangelizent investigabiles Dei divitias in justificatione impii, quas præparavit in laudem gloriæ gratiæ suæ,

suæ , assiduis precibus sibi & subditis obtineant spiritum sapientiæ , & revelationis in agnitione hujus mysterii , quod est summa Doctrinæ Christianæ , & sublimis gloria , quam Ecclesia habet in Christo Jesu. Hinc Apostoli toti sunt in suis Epistolis ut tam admirabile Dei donum Fidelibus commendent , refrient , & inculcent. Hujus rei gratia Gentium Apostolus scribit ad Ephesios cap. 1. se non cessare in orationibus suis memoriam eorum facere , ut *Deus* , inquit , *Domini nostri Jesu Christi Pater gloriæ det vobis Spiritum sapientiæ & revelationis in agnitione ejus : illuminatos oculos cordis vestri , ut sciatis , quæ sit spes vocationis ejus , & quæ divitiæ gloriæ hæreditatis ejus in Sanctis , & quæ sit supereminens magnitudo virtutis ejus in nos , qui credimus secundam operationem potentiæ virtutis ejus , quam operatus est in Christo , suscitans illum à mortuis , & constituens ad dexteram suam in Cœlestibus.* Magnifica sunt illa Apostoli verba in laudem gratiæ sanctificantis , & omnino ponderanda. Optat Discipulis Spiritum sapientiæ , id est , ampliorem sapientiam , qua mysterium gratiæ sanctificantis magis quotidie ac magis ipsis patefiat ; illuminatos quoque oculos cordis , ut perfectius in dies cognoscant , quæ & quanta sint bona , ad quæ vocati sunt ; & quæ sit supereminens magnitudo virtutis ejus , id est , quanta potentia usus fuerit Deus , ut à statu peccati ad justitiam traducerentur. Tanta , inquit , potentia usus est Deus in nobis sic spiritualiter suscitandis & immutandis , quanta usus est in Christo corporaliter à morte resuscitando , & ad dexteram suam evehendo. Similia jam scripserat ad Romanos cap. 6. & repetit in Epistola ad Coloss. cap. 3. Non ergo Apo-

Apostoli credentibus promittebant nudam peccatorum veniam & condonationem, sed veram spiritus immutationem, qua in novam vitam translati, expoliato veteri homine, viderentur tanquam ex mortuis viventes. Expendamus jam quæ Novatores contra hanc Apostolicam doctrinam solent opponere.

Objic. 1. 1. Cor. 1. v. 30. Christus dicitur factus nobis *sapientia à Deo, & justitia, & sanctificatio*. Et Rom. 5. v. 19. *Per unius obeditionem, justii constituentur multi*: Ergo justificatio peccatoris perficitur per imputationem justitiæ Christi absque interiori peccatoris immutatione.

Distinguo anteced. Christus factus est nobis justitia efficienter & meritoriè, Concedo: formaliter & per solam imputationem, Nego ant. Solutio evidens est in ipso textu cap. 5. ad Rom. Ibi enim Apostolus confert Adamum cum Christo, docetque, quòd sicut per primi inobedientiam peccatores constituti sunt multi; ita per secundi obedientiam justii constituentur multi. Atqui inobedientia Adami non est causa formalis, sed efficiens peccati originalis posterorum, fatentibus ipsis Adversariis, qui cum Catholicis agnoscunt (quamvis sensu hæretico) peccatum originale inesse cuique proprium. Ergo in mente Apostoli obediencia Christi non est justitia nostra formalis, sed est causa efficiens & meritoria, cur justitia à Deo nobis infundatur, & inhæreat.

Instant. Atqui justitia Christi est causa formalis justificationis nostræ. Ratio enim, propter quam Deus diligit justum, est sanè causa formalis justificationis ejus, quemadmodum causa formalis, propter quam proximum ex charitate diligimus,

gimus, est bonitas divina in eo relucens. Atqui ratio, propter quam Deus diligit Justum, est Christi justitia & meritum. Ergo causa formalis justificationis nostræ est justitia & meritum Christi.

Confirmatur; sicut absurdè diceretur Deum parvulos nondum renatos odisse propter Adamum, cum peccatum originale in ipsis existens sit motivum & ratio formalis odii divini, ita pariter si in Justis admitteretur gratia sanctificans, tanquam ratio formalis divini amoris, abusivè dicerentur à Deo diligi in Christo, vel propter Christum.

Nego subsumptum. Ad primam ejus confirmationem, respondeo negando majorem; quia aliud non est motivum, quo Deus creaturas diligit, quàm ejus bonitas infinitè sui communicativa; ac proinde gratia sanctificans est effectus seu terminus divini amoris, non verò causa. Homines quidem bonum supponunt in iis, quos diligunt: Deus contra amando homines, ex malis bonos efficit. Dilexit nos in Christo ante mundi constitutionem; quia per Christum Mediatorem nostrum voluit nos ad se adducere. Qua bonitate peccatores in tempore per Christi merita prævenit, ut justi fiant, eadem bonitate justos efficit, & eatenus novo & longè excellentiori modo illos diligit; quia nova & longè excellentiora dona in ipsis producit & conservat, nempe gratiam sanctificantem cum ejus appendicibus. Ergo gratia sanctificans, licèt sit formalis causa justificationis, motivum tamen non est divini amoris, sed effectus & terminus.

Respondeo ad secundam confirmationem negando paritatem; quia latum est discrimen inter
odium

odium divinum (si tamen datur propriè in Deo) & amorem divinum: Adamum quoque inter & Christum Dominum. Odium quippe divinum, malum culpæ, quod est ejus objectum, non facit, sed supponit: amor verò divinus bonum circa quod versatur, efficit, non supponit. Deinde Adamus non est caput posterorum, eo singulari modo, quo Christus est Caput renatorum; quamvis enim parvuli ex origine per Adami inobedientiam corrupta, trahant peccati maculam; Adamus tamen jam sanctus & beatus, illam directè non impertit; quemadmodum Christus, qui factus est nobis sanctificatio & justitia, sanctitatem influit. Unde Deus parvulos nondum renatos odit, non propter Adamum præcisè, sed propter peccatum originale in ipsis existens. Contra verò renatos diligit in Christo, & propter Christum, qui per gratiam sanctificantem & communicationem sui Spiritus in ipsis vivit & operatur, ut impleatur quod Patrem rogaverat pridie passionis, Joan. 17. v. 21. & 26. *ut omnes unum sint, sicut tu Pater in me, & ego in te, ut & ipsi in nobis unum sint; ut credat mundus, quia tu me misisti; (hoc est, tam illustri exemplo vitæ sanctioris mundum ad me trahant,) & . . . dilectio, qua dilexisti me, in ipsis sit, & ego in ipsis, utpotè unum totum conficientibus conflatum ex capite & membris.*

Objiciunt 2. illud Psalmi 31. *Beati, quorum remissæ sunt iniquitates, & quorum testata sunt peccata: Beatus vir, cui non imputavit Dominus peccatum.* Ergo peccata in justificatione non delentur; sed teguntur duntaxat per Christi justitiam credentibus imputatam.

Respon-

Respondeo 1. opponendo alios Scripturæ textus luce clariores, Psal. 50. *Lavabis me, & super nivem dealbabor*, nulla sanè macula in homine sic dealbato. Isaïæ 44. *Delevi ut nubem iniquitates tuas*. Rom. 8. *Nilil ergo nunc damnationi est iis, qui sunt in Christo Jesu*. 1. Cor. 6. *Hæc quidem fuistis, sed abluti estis, sed sanctificati estis*. Ephes. 5. dicitur Christus seipsum tradidisse, *ut exhiberet ipse sibi gloriosam Ecclesiam, non habentem maculam, aut rugam*.

Respondeo 2. peccata in justificatione teguntur, quomodo dicimus tegi colorem album, cum superinducto colore nigro, evanescit albus. Ita hunc Psalmi locum interpretati sunt sancti Patres. S. Augustinus Enarr. in Psal. 31. scribit: *Ne sic intelligas, quod dixit peccata cooperta, quasi ibi sint & vivant*. Quæst. 108. in Exodum, dicit fieri confessionem peccatorum, *ut per gratiam aboleantur, hoc est, tegantur*. Et Lib. 1. contra duas Epistolas Pelagii cap. 13. *Dicimus Baptismum auferre crimina, non radere*. Enimverò quis beatum dixerit hypocritam, qui oculis hominum abscondit cordis malitiam? nam oculis Dei omnia sunt pervia & manifesta? Peccata ergo tegi nequeunt, nisi prorsus aboleantur.

Psalmus autem tres gradus in justificatione distinguit. 1. Deus peccata remittit, cum jam propitius prævenit peccatorem, & præteritam offensam condonat. 2. Peccata tegit, cum iustitiam & charitatem superinducit tanquam formam peccatis oppositam, & eorum expultricem. 3. Peccata non imputat, cum insuper reatum pænæ temporalis expungit, ut in Baptismo. Unde S. Basilius in hunc Psalmi locum scribit, plus esse peccata tegere quàm remittere, & non imputare, quàm

quàm tegere. Quanquam plures Interpretes existimant tria illa verba esse prorsus synonyma.

Instant ex Apostolo Gal. 3. v. 27. *Quicumque ... in Christo baptizati estis, Christum induistis*: Ergo iustitia Christi per Fidem apprehensa, circumdamur tanquam vestimento, quo teguntur corporis maculæ & deformitates.

Nego consequentiam & paritatem. Qui enim vestem assumit, non exuit maculas & deformitates corporis, sed tegit. At ex eodem Apostolo Col. 3. v. 9. qui induit Christum, exuit veterem hominem, adeò ut nihil in eo remaneat peccati & damnationis; *expoliantes vos, inquit, veterem hominem cum actibus suis, & induentes novum. Nihil ergo nunc damnationis est iis, qui sunt in Christo Jesu.* Rom. 8. & cap. 6. v. 2. & 4. *Mortui sumus peccato . . . ut quomodo Christus surrexit à mortuis per gloriam Patris, ita & nos in novitate vitæ ambulemus.* Atqui Christus resurgens corruptionem carnis, & mortalitatem non texit per indumentum gloriæ; sed prorsus deposuit. Ergo pariter ad mentem Apostoli ita Christum in Baptismo induimus, ut omnem peccati maculam exuamus. Porro Apostolus justificationem pingit sub metaphora indumenti, ut ostendat eum, qui exit ex fonte baptismali, vel ex tribunali pœnitentiæ, sicut interiùs vivit Spiritu Christi, ita debere Christum ad vivum exhibere in exteriori conversatione: quemadmodum speciem Regis referret, qui regia veste esset indutus.

Objici possunt varii Scripturæ textus pro sententia quorundam Catholicorum, qui formam justificationis in actibus reponunt, Rom. 2. v. 13. *Factores Legis justificabuntur.* Jac. 2. *Videtis quoniam*
D. Habert Theolog. Tom. II. C c ex

ex operibus justificatur homo. 1. Joan. 3. *Qui facit justitiam, justus est.* Et quidem juxta omnium hominum mentem, apud quos justum esse, nihil aliud est, quàm benè operari. Ergo formalis justificatio reponenda est potius in actibus supernaturalibus virtutum, præsertim charitatis, quàm in gratia habituali.

Nego consequens, namque ex laudatis textibus colligi tantùm potest, quod homo bonis operibus vel disponitur ad justificationem, vel meretur in justitia augeri, vel probat se esse justum, juxta illud Jac. 2. v. 18. *Ego ostendam illi ex operibus fidem meam.*

§. II.

De Virtutibus infusis.

Justificatio dupliciter spectari potest, vel secundùm essentiam, vel secundùm partes integrales. De illa priori modo sumpta tractavimus in præcedenti Paragrapho, ubi ex mente Concilii Tridentini totam ejus essentiam reposuimus in gratia habituali sanctificante: hinc expendimus partes ejus integrales, nempe virtutes infusas, quæ ad perfectionem ejus integram pertinent.

Enimverò modus operandi sequitur modum essendi: atqui gratia sanctificans constituit hominem in esse divino: ergo operationes divinas gratiam sanctificantem consequi necesse est. Porro quemadmodum natura, putà hominis, ita est principium operationum sibi consentanearum, nempe rationalium, ut eas exercere non possit, nisi per potentias sibi congenitas, intellectum scilicet & voluntatem; sic gratia sanctificans, quæ
accedit

accedit homini velut nova natura, comites individuas habet virtutes infusas, per quas veluti per supernaturales potentias supernaturaliter operatur. Sunt quidem & ipsæ singularia Dei dona, & gratiæ habituales; quia permanentes inhærent, justificationemque integraliter perficiunt: sed insuper fortiuntur nomen virtutis, quia ad bene operandum proximè disponunt. Quid est enim virtus ad mentem sancti Augustini Lib. 2. de lib. arbitrio c. 18. & sancti Thomæ 1. 2. quæst. 55. art. 4. nisi *qualitas mentis, qua rectè vivitur, qua nulus malè utitur, quam Deus in nobis sine nobis operatur?* Verùm quia virtus infusa non uno modo accipitur, nec in qualibet acceptione ad justificationem pertinet.

Q. 1. *Quotuplex est virtutis infusæ acceptio?*

R. Duplex: alia dicitur infusa quoad modum duntaxat: alia infusa quoad entitatem.

Q. 2. *Quid est virtus infusa quoad modum?*

R. Est virtus à Deo animæ indita, quamvis à stium frequentatione naturaliter acquiri possit, ut dona linguarum & notitia Scripturarum, quæ per infusionem in Apostolis extitere, licet studio & labore illa utcumque comparare potuissent. Virtutes autem ejusmodi sic divinitus concessæ, non magis specie ab acquisitis differunt, quàm vita defuncto Lazaro restituta differt à vita, quam prius à parentibus hauserat.

Porrò de virtutibus sic infusis hîc non est sermo. Constat enim apud omnes Theologos, illas in justificatione non infundi; alioquin habitus vitiosi, ex longa peccandi consuetudine contracti, virtutibusque acquisitis formaliter oppositi, per justificationem prorsus deleberentur, quod vel ipsa

experientia falsum evincit. De solis itaque virtutibus quoad entitatem infusis hîc agitur.

Q. 3. *Quid est virtus infusa quoad entitatem?*

R. Est virtus entitativè supernaturalis, & à solo Deo producibilis, ut charitas.

Q. 4. *Quare virtus per se infusa est entitativè supernaturalis?*

R. Quia fertur in objectum lumine & motivo supernaturali, tenditque in Deum possidendum ut in se est.

Q. 5. *Virtus per se infusa differtne essentialiter à virtute acquisita, v. g. temperantia infusa à temperantia acquisita?*

R. Prorsus differt; quia secundum omnes Philosophos, actus & habitus essentiam suam desumunt ab objecto formali, seu motivo, quo tendunt in objectum materiale. Hinc justitia, misericordia, & gratitudo, licèt versentur circa idem objectum materiale, putà pecuniam, sunt tamen diversæ speciei virtutes, quia diverso motivo pecuniam spectant, justitia ut debitam, misericordia ut aptam ad sublevandum proximum, gratitudo ut munus antidorale: atqui virtutes per se infusæ, ut temperantia, tendunt in objectum materiale, motivo longè diverso à motivo virtutum acquisitarum, putà temperantiæ, castitatis; nam temperantia acquisita refrænât voluptatem carnalem, quia dedecet naturam rationalem: infusa verò, quia indigna est Filio Dei, membro Christi, retardatque anhelantem ad divinum consortium. Ergo virtutes infusæ & acquisitæ, quamvis versentur circa idem objectum materiale, essentialiter differunt.

Confir-

Confirmatur, simulque elucidatur nostra responsio. In homine justo triplicis generis lumen distinguitur. 1. Lumen sensuum, quod movet passiones putà amoris, gaudii, tristitiæ, &c. 2. Lumen rationis, quod præest liberis voluntatis affectibus, scilicet amoris, gaudii, tristitiæ, &c. 3. Supernaturale lumen Fidei, quo reguntur similes animi affectus: atqui in omnium sententia motus amoris, gaudii, tristitiæ, spectati ut passionibus appetitus sensitivi, essentialiter differunt à similibus motibus appetitus rationis, propter diversum modum tendendi in objectum materiale utrique appetitui commune: Ergo à fortiori iidem motus appetitus rationalis solo rationis lumine impetrati, specie distinguuntur à similibus actibus virtutum infusarum; cum posteriores illi actus supernaturali lumine, & longè sublimiori motivo eliciantur.

Ergo sicut mores brutorum induit, qui non ratione, sed carnali sensu ducitur: sic Christianus à nobilitate filiorum Dei degenerat, & ad vilitatem pristinæ conversationis relabitur, qui sine supernaturali lumine ducem rationem sequitur. Hinc illa Apostolica exprobratio justis quibusdam: *Nonne carnales estis, & secundum hominem ambulatis?* 1. Corinth. 3. Justus quippe transcendit humanam conditionem, sicut homo pecorinam, ut non suo, sed Spiritu Christi inhabitante regatur, juxta illud Rom. 8. *Quicumque Spiritu Dei aguntur, ii sunt filii Dei.*

Q. 6. *Quare virtus per se infusa, est à solo Deo producibilis?*

R. Quia est donum supernaturale & divinum; quemadmodum enim solus ignis ignitum reddere

potest, inquit S. Thomas, ita solus Deus in ordine supernaturali & divino constituere.

Dices: De fide est, hominem justum bonis operibus crescere in justitia: atqui incrementum illud est nova productio gratiæ sanctificantis & virtutum infusarum: Ergo.

Distinguo majorem, Justus potest crescere meritorie, & ut causa moralis, Concedo: crescere ut causa physica, ita ut per actus suos supernaturales physice producat illud augmentum gratiæ sanctificantis & virtutum infusarum, Nego maj.

Instas: actus naturales sæpius repetiti in sententia plurium Philosophorum physice generant habitum acquisitum: Ergo à pari actus supernaturales physice producant habitum supernaturalem.

Nego consequentiam & paritatem. Ratio disparitatis est, quod habitus acquisiti sint formæ proportionatæ potentiis animæ, & ex illis naturaliter educantur ab agente naturali: habitus vero infusi ordinem cujusque naturæ creatæ excedant, proptereaque dicantur supernaturales, quia anima, ut eorum sit susceptiva, debet divinitus elevari & corroborari. Justus autem bonis suis actibus meretur, ut Deus det . . . *secundum divitias gloriæ suæ, virtute corroborari per Spiritum ejus in interiorem hominem*, Ephes. 3. v. 16.

Q. 7. *Quomodo dividuntur virtutes infusæ?*

R. Dividuntur in Theologicas & Morales.

Q. 8. *Quid est Virtus Theologica?*

R. Est virtus infusa, quæ habet Deum pro objecto materiali primario, & aliquod ejus attributum pro formali. Vocatur autem Theologica, à nomine Græco Θεος, Latine Deus, quia

quâ versatur circa Deum, & est regula divini cultus.

Ergo sunt tres virtutes Theologicæ, his verbis ab Apostolo notatæ, 1. Corinth. 13. v. 13. *Nunc autem manent Fides, Spes, Charitas, tria hæc: major autem horum est Charitas.* Namque totuplex est virtus Theologica, quotuplex est virtus, quæ erga Deum rectè disponit, nosque illi immediatè conjungit: atqui triplex est ejusmodi virtus. Cum enim in hac vita per Fidem ambulemus, & non per speciem, 1. Fide credimus Deum, & cætera, quæ nobis revelavit; quia verax est, nec falli nec fallere potest. 2. Spe confidimus nos Deum tanquam ultimum nostrum finem & beatitudinem consecuturos, tentationesque superaturos; quia est Omnipotens & infinitè misericors. 3. Charitate Deum super omnia diligimus, & proximum sicut nosmetipsos propter illum; quia est summè bonus & infinitè amabilis. Ergo tres sunt revera virtutes Theologicæ.

Q. 9. *Quid est virtus infusa moralis?*

R. Est virtus supernaturalis, quæ Deum non habet pro objecto, definiri que potest, virtus infusa, quæ in mediocritate consistens, versatur circa bonum creatum motivo supernaturali.

Q. 10. *Quare virtus moralis infusa in mediocritate consistit?*

R. Quia objectum ejus est bonum finitum utpotè creatum, ac proinde potest esse excessus in illius prosecutione, v. gr. potest quis esse in cultu divino superstitiosus; nimis abstinere à cibo; nimis se dejicere. Virtutes verò Theologicæ, cum pro objecto habeant bonum infinitum, non pugnant nisi contra defectum, qui sæpissimè con-

tingit; ideoque nobis semper cum Ecclesia con-
geminare incumbit, *da nobis fidei, spei, & caritatis
augmentum.* Et cum Apostolis Luc. 17. *Adauge
nobis fidem*; quis enim tantam Fidem adhibet Deo,
aut tam firmam spem in illo reponit, quantam
meretur, & exigunt harum virtutum motiva?
Notum est sancti Bernardi effatum, modus dili-
gendi Deum, est amare sine modo.

Q. 11. *Cur Virtutes Theologicæ non dicuntur mora-
les, cum longè perfectiori modo mores dirigant?*

R. Sunt quidem morales; sed proprium no-
men sibi vindicant tanquam nobilissimæ virtutum
species, quemadmodum homo, licet sit ipse ani-
mal; quia tamen habet aliquid præstantius, spe-
ciali nomine insignitur.

Q. 12. *Quotuplex est virtus moralis?*

R. Generatim dividitur in quatuor virtutes car-
dinales, scilicet, prudentiam, iustitiam, fortitu-
dinem, & temperantiam.

Q. 13. *Quare quatuor illæ virtutes dicuntur cardi-
nales?*

R. Quia sunt præcipuæ virtutes inter mora-
les, & tanquam cardines, quibus cæteræ inni-
tuntur.

Primò, namque virtus in vitium vertitur, nisi
dirigatur recta ratione, quæ est necessaria mo-
rum regula. Atqui prudentia est ipsamet recta
ratio; definitur enim ab Aristotele, recta ratio
agendorum: Ergo omnis virtus prudentiæ inni-
titur.

Dices: Fides est Christiano certa morum re-
gula: Ergo mores Christiani non innituntur pru-
dentiæ.

Distin-

Distinguo anteced. Est regula generalis per prudentiam infusam applicanda particularibus casibus, Concedo: Est regula particularis in praxi à prudentia independens, Nego antec. Itaque etiam si fidelis in Lege Domini apprime edoctus, noverit quid Evangelium præcipiat, aut prohibeat, egregie differat de dilectione Dei & proximi, de contemptu rerum temporalium, de patientia, & de singulis gradibus humilitatis; nihilominus nisi sit vir prudens & bonus, tanta scientiæ suppellex in illo prorsus inanis est, & ad praxim inutilis. Quid ita? Quia inordinati affectus iudicium ejus corrumpunt in casibus particularibus, judicat humilitatem in iis circumstantiis fore ignaviam, ad zelum rectitudinis pertinere, si honorem sibi debitum vindicet, si impios deprimat, adeo ut nunquam occasio sese offerat (ut opinatur) ad praxim redigendi, quæ alios sublimiter docet. Hinc luctuosa S. Bernardi querimonia Lib. 2. de Consider. cap. 1. *Nempe sic se habent mortalium corda, quod scimus, cum necesse non est, in necessitate nescimus*, nimirum quando nata occasione præceptum urget.

Ex quibus S. Thomas post Philosophum concludit, scientiam quidem remanere in peccatoribus; idem de fide dicito: prudentiam verò minimè; quia peccatores in praxi judicant prout affecti sunt, hoc est malè.

Prudentiæ autem subserviunt, 1. cura & sollicitudo rerum divinarum contra negligentiam. 2. docilitas contra temeritatem & præsumptionem, quæ saniora consilia nec requirit, nec datis acquiescit. 3. circumspectio, quæ est atten-

ta consideratio circumstantiarum contra animi levitatem & considerationem.

Secundò cùm justitiæ officium sit omnibus reddere debitum, *Cui tributum, tributum . . . cui honorem, honorem*, inquit Apostolus Rom. 13. sub illa militant Religio, pietas, observantia, gratitudo, liberalitas, veracitas, affabilitas, eutrapelia; harum quippe virtutum officia alios ita spectant, ut omnino omitti non possint sine illorum offensione, ac proinde quandam habent rationem debiti.

Tertiò, fortitudo, quæ animam firmat in periculis, labore, & quibuslibet adversis, sub se continet patientiam, perseverantiam sive constantiam, magnanimitatem, quæ inclinat ad actus excellentes & heroicos, arduos quidem, sed animo generoso consentaneos. Unde fortitudo definitur à S. Augustino Lib. de Moribus Eccles. cap. 15. amor omnia propter Deum faciliè perferens.

Quartò, temperantia, quæ moderatur delectationes sensibiles, maximè gustus & venereorum (utpotè quæ vehementiùs contra rationem nitantur) complectitur abstinentiam, sobrietatem, castitatem, pudicitiam, quæ averfatur quodlibet incontinentiæ signum in verbis, tactibus, & aliis corporis motibus: verecundiam, quæ est timor & averfio cujuscunque turpitudinis; honestatem, quæ servat morum candorem & venustatem; mansuetudinem & clementiam, quæ cohibent iræ impetum, & vindictæ appetitum; humilitatem seu modestiam, qua quis verissima sui cognitione sibi vilescens reprimit motus animi in magna tendentis; studiositatem, quæ refrænât inordinatam sciendi libidinem.

Q. 14. *Omnes recensitæ virtutes infunduntur in justificatione?*

R. 1. Constat apud omnes Catholicos infundi fidem, spem, & charitatem; Quin multi Theologi ut Vega Lib. 7. cap. 24. in Concil. Trid. Suarez Libr. 3. de Gratia cap. 8. & alii docent, illud esse dogma Fidei in Concil. Trid. definitum.

Probatur 1. ex Scriptura Rom. 5. v. 5. *Charitas diffusa est in cordibus nostris per Spiritum Sanctum, qui datus est nobis.* Ergo & fides simul, & spes. Fides quidem, quia charitas, seu amor Dei non potest esse sine prælucente cognitione: *per fidem autem ambulamus, & non per speciem*, 2. Cor. 5. Spes quoque, quia sine spe divini auxilii charitas non tendit in amplexus Sponsi summè dilecti. Hinc Apostolus 1. Cor. cap. 13. concludit in hæc verba: *Nunc autem manent fides, spes, charitas: tria hæc.* In quibus autem manent? non in infidelibus, ut patet, neque in peccatoribus, qui charitate carent. Ergo in iustis.

Probatur 2. ex Concil. Trid. Sess. 6. cap. 7. ubi sic habet: *Hanc dispositionem . . . justificatio ipsa consequitur: quæ non est sola peccatorum remissio, sed & sanctificatio & renovatio interioris hominis per voluntariam susceptionem gratiæ & donorum.* Quæ autem sunt illa dona, nisi fides, spes & charitas? *Hæc enim, inquit S. Augustinus Enchir. cap. 4. maximè, imo verò sola Religione sequenda sunt.* Unde Tridentini Patres citato capite sic inferunt: *In . . . justificatione cum remissione peccatorum hæc omnia simul infusa accipit homo per Jesum Christum, cui inferitur, fidem, spem & charitatem.* Ac tandem Canone 11. definiunt: *Si quis dixerit, homines justificari . . . sola peccatorum remissione, exclusa gratia & charitate, quæ in cordibus*

cordibus eorum per Spiritum Sanctum diffundatur, atque illis inhæreat . . . anathema sit.

Probatur 3. ratione; quia ad suavem Dei providentiam pertinet tribuere causis secundis principium intrinsecum, suis operationibus proportionatum; sic v. g. naturam pecorinam, quæ est prima radix sensationum, instruxit sensibus, per quos proximè elicit operationes animales seu sensationes, naturæ rationali dedit intellectum & voluntatem, quæ sunt principia proxima actuum humanorum. Atqui gratia sanctificans est quædam natura supernaturalis, si ita loqui fas est, seu divinus perfectionis gradus, non solum naturam pecorinam & rationalem, sed quamcumque creabilem excedens, quæ essentialiter ordinatur ad operationes sibi consentaneas, hoc est supernaturales & divinas, cum modus operandi sequatur modum essendi: Ergo debentur illi virtutes infusæ tanquam potentiæ similiter supernaturales & divinæ. Atque hac ratione Theologi communiter in prima parte agnoscunt in Beatis lumen gloriæ per modum habitus, quo intellectus eorum intrinsecè perficitur ad eliciendam connaturaliori modo visionem Dei intuitivam. Unde,

Confirmatur nostra responsio. Gratia sanctificans est ejusdem naturæ & essentiæ, sive in patria, sive in via: per illam Beati æquè ac viatores formaliter constituuntur sancti, amici Dei, & consortes divinæ ejus gratiæ: actus ad quos naturaliter & primariò tendit in utroque statu, sunt Dei cognitio & amor; quid enim amicitia connaturalius quàm amare, & in cognitione amati deliciarî? Atqui Beati in cognitione & amore Dei non deliciantur, nisi mediantibus habitibus luminis

luminis gloriæ & charitatis, ergo nec iusti viatores, nisi mediantibus habitibus fidei, spei, & charitatis, juxta illud Apostoli Rom. 1. *Iustus . . . ex fide vivit*, radicaliter quidem & habitualiter ex gratia sanctificante; actualiter verò ex fide, non mortua, implicat enim animam vivere per aliquid mortuum; sed ex fide viva, quæ per dilectionem operatur. Fidei & charitati spes in nobis adjungitur; quia non ambulamus per speciem, ad quam ultimò tendit gratia sanctificans; sed eam expectamus in spe, quæ viva esse nequit, quin admixtum gemitum habeat, teste eodem Apostolo Rom. 8. *Nos ipsi primitias spiritus habentes . . . intra nos gemimus adoptionem filiorum Dei expectantes . . . spe enim salvi facti sumus.* Et infra: *Spiritus* (qui datus est nobis) *postulat pro nobis gemitibus inenarrabilibus.* Ex quibus patet fidem, spem, & charitatem nunquam separari à gratia sanctificante in viatoribus iustis, vitamque novam, quam peccatores in Sacramento percipiunt, in actibus harum virtutum maximè consistere.

R. 2. Cùm Concilium Tridentinum, & alia præcedentia nihil expressè statuerint circa virtutes morales, controversia est inter Theologos, utrùm revera in justificatione infundantur. Nilominus communior, & longè probabilior est affirmans sententia sancti Thomæ 1. 2. qu. 63. art. 3. & quæst. 65. art. 3. & totius ejus Scholæ. Illam quoque amplexi sunt Richardus, S. Bonaventura, Vega, Lib. 7. in Conc. Trident. cap. 24. Catechismus Romanus, qui inter effectus Baptismi numerat *nobilissimum omnium virtutum comitatum, quæ in anima simul cum gratia infunduntur.* Favet etiam S. Augustinus, qui in Psalmo 83. sic de virtutibus
cardi-

cardinalibus loquitur : *Illæ virtutes nunc in valle plorationis per gratiam Dei donantur nobis.* Idipsum suadet ratio mox allata in confirmationem præcedentis responsionis. Namque gratia sanctificans est principium radicale & remotum omnium bonorum, constituit hominem formaliter justum, quatenus paratum illum reddit ad implendam totam Legem, quæ præcipit de actibus omnium virtutum, ut dicitur 5. Ethic. cap. 1. Ergo gratiæ sanctificanti veluti novæ naturæ, debent respondere habitus omnium virtutum, tanquam potentiæ supernaturales & principia proxima actuum supernaturalium, qui ipsi competunt : quemadmodum naturæ rationali respondent potentiæ rationales, intellectus scilicet & voluntas, quæ sunt principia proxima actuum rationalium, ad quos inclinat.

Dices 1. Qui habet habitum virtutis, promptè & delectabiliter operatur ea, quæ sunt virtutis. Atqui experientia constat peccatores post perceptum pœnitentiæ Sacramentum, in quo peccata per infusionem gratiæ sanctificantis remissa sunt, easdem pati difficultates, quas ante justificationem, circa materias virtutum, sive Theologicarum, sive moralium : ergo nullæ virtutes in justificatione infunduntur, sed acquiri debent studio & labore.

Respondeo 1. hujusmodi experientiam non esse universalem. Plurimi quippe, etsi post conversionem tentationibus etiam gravibus pulsantur ; mente tamen condelectantur Legi Dei & ad divina piè se affectos sentiunt. Hujusce mutationis unus ex benemultis testis sit Augustinus, qui de se sic scribit Lib. 9. Confess. cap. 1. *Quàm suave*

suave mihi subito factum est carere suavitatibus nugarum, & quas amittere metus fuerat, jam dimittere gaudium erat! Ejiciebas enim eas à me, vera tu & summa suavitatis, ejiciebas, & intrabas pro eis, omni voluptate dulcior. Quare ex quorundam experientia rectius concluderetur illos posuisse obicem gratiæ, nec rem Sacramenti percepisse.

Respondeo 2. concessa majore, distinguendo min. Peccatores post conversionem patiuntur easdem difficultates propter impedimenta externa, putà vitia prius contracta, quæ, quamvis per infusionem gratiæ sanctificantis lethale vulnus accipiant, ut loquitur S. Thomas, nihilominus per virtutes infusas non tolluntur, quemadmodum per acquisitas, utpotè quæ illis non sunt contraria sicut istis, Concedo: Easdem patiuntur difficultates ex ipsamet voluntate malè affecta erga Deum, & objecta virtutum moralium, Nego min. alioquin non essent conversi; nam vera conversio nequit esse sine odio peccati, & amore justitiæ, in quibus consistit rectitudo voluntatis & essentia virtutis. Esto, contra illam rectitudinem pugnent caro & vitia contraria, quæ officium virtutis reddunt difficile; quemadmodum, inquit S. Thomas, somnolentia, qua gravatur Philosophus, impedit usum habitus qui in ipso est, & injucundum efficit.

Instas: ex venerabili Beda, Sancti magis humilantur de virtutibus, quas non habent, quàm de virtutibus, quas habent, gloriantur: Ergo non omnes virtutes in justificatione infunduntur.

Distinguo anteced. Quas non habent quoad actum; quia nonnunquam propter difficultates & exteriora impedimenta venialiter peccant, Concedo:

cedo : quas non habent quoad habitum , Nego antec. Quis enim dixerit virum sanctum non habere habitum Religionis aut charitatis , ex eo quòd præ infirmitate , oratio ejus sit aliquando tepida , aut duriusculum verbum in proximum protulerit ?

Dices 2. Saltem prudentia in justificatione non infunditur , cùm ea careant pueri , idiotæ , & plures mulierculæ : Ergo.

Distinguo antec. Prudentia , quæ unicuique ad salutem minimè sit necessaria , Concedo : prudentia cuique ad salutem necessaria , Nego antec. Verum quidem est non quemlibet justum pollere ea excellenti prudentia , qua possit sibi & aliis in omnibus consulere sine sapientium auxilio. Sed quivis puer aut idiota , si verè sit justus , habet illas prudentiæ partes , sine quibus mores dirigi nequeunt , nempe curam & sollicitudinem rerum divinarum , ne in negotio salutis negligentia subrepat : docilitatem , qua de se ipso non præsumens , consilium à sapientioribus inquit & suscipit : circumspeditionem , qua operis aggrediendi circumstantias perpendit , ne quid leviter & inconsideratè moliatur.

Dicat ergo justificatus à peccatis : *Gaudens gaudebo in Domino , & exultabit anima mea in Deo meo ; quia induit me vestimentis salutis , & indumento justitiæ circumdedit me , quasi sponsum decoratum corona , & quasi sponsam ornatam monilibus suis.* Isa. 61. v. 10. Non abjiciat per peccatum tantam Dei gratiam ; sed sicut prius exhibuerat membra sua servire iniquitati : ita nunc exhibeat illa servire justitiæ in sanctificationem , ut docet Apostolus Rom. 6.

Cæterum

Cæterum non minùs absurdè quæreret aliquis, quando & quoties justus ex virtutibus infusis maximè Theologicis operari debeat, quàm si interrogaret, quando & quoties homo ratione uti teneatur. Cuique enim perspicuum est, quòd homo secundùm naturalia spectatus semper & ubique rationabiliter agere debeat, hoc est, mores suos ad normam rationis componere, & ad honestum finem uti facultatibus inferioribus. Cùm autem Justus per Fidem, spem, & charitatem Christo sit insertus, ut loquitur Concilium Tridentinum, & lumen Fidei sit in ipso superadditum lumini rationis, quemadmodum ipsa ratio in homine superaddita est lumini sensuum: rectus ordo postulat, ut Justus justè & supernaturaliter vivat, & ex Fidei imperio rationem, sensus, & omnes facultates suas dirigat ad finem, quem Fides demonstrat, spes appetit, & charitas apprehendit. Unde mirum videri debet, quomodo homini Christiano excidere potuerit hæc propositio, primùm damnata ab Alexandro septimo, deinde à Clero Gallicano. *Homo nullo unquam vitæ suæ tempore tenetur elicere actum Fidei, spei, & charitatis, ex vi Præceptorum divinorum ad eas virtutes pertinentium.* Nam ex S. Augustino supra laudato, *hæc maximè, imò sola, in Religione sequenda sunt.*

§. III.

De Donis Spiritus Sancti.

Q. I. *Quid est donum Spiritus Sancti?*

R. Est habitus supernaturalis, quo homo disponitur ad accipiendas extraordinarias

Spiritus Sancti motiones ad propriam salutem.

Dicitur 1. *habitus supernaturalis*. 1. Quia permanenter inhæret, ut habetur Isaïæ 11. *Requiescet super eum Spiritus . . . sapientiæ*, &c. Nam requies permanentiam significat. 2. Ut distinguatur à virtutibus; quamvis enim ratio generica virtutis conveniat donis, cum ipsa faciant bonum habentem se & opus ejus optimum; nihilominus non solent dici virtutes simpliciter, sed dona; quia virtus pressius sumpta, regitur prudentia in actionibus ordinariis & mediocribus: donum verò supra prudentiam inclinat ad actus excellentes, heroicos & divinos per inspirationem & monitionem Spiritus Sancti. Unde virtus infusa substat prudentiæ infusæ, donum verò Spiritui Sancto, tanquam proprio motori.

Dicitur 2. *ad recipiendas extraordinarias Spiritus Sancti motiones*, quia ex S. Thom. 1. 2. q. 68. art. 1. *Omne quod movetur, necesse est proportionatum esse motori . . . quanto igitur movens est altior, tanto necesse est quod mobile perfectiori dispositione ei proportionetur; sicut videmus quod perfectiùs oportet esse discipulum dispositum ad hoc, quod altiore doctrinam capiat à Doctore. Manifestum est autem, quod virtutes humanæ perficiunt hominem, secundum quod homo natus est moveri per rationem in his, quæ interiùs est vel exteriùs agit: oportet igitur inesse homini altiores perfectiones, secundum quas sit dispositus ad hoc quod divinitus moveatur. Et istæ perfectiones vocantur dona.*

Dicitur 3. *ad propriam salutem*, ut significetur donum Spiritus Sancti pertinere ad gratiam gratum facientem, & distingui à gratiis gratis datis, quæ, ut observavimus, dantur ad aliorum salutem. Hinc sapientia & scientia, quæ numerantur

tur inter gratias gratis datas, dicuntur sermo sapientiæ & scientiæ, quia sunt ad alios erudiendos in lege divina: sapientia verò & scientia sumptæ pro donis Spiritus Sancti, perficiunt habentem se in ordine ad divina: per sapientiam ad illa suaviùs & excellentiùs contemplanda moveatur; & per scientiam ad temporalia extraordinario modo contemnenda.

Q. 2. *Nunquid necessaria est Spiritus Sancti motio, ut habitus virtutum infusarum in actum prorumpant?*

R. Procul dubio necessaria est; quia homo habitibus infusis uti non potest sine supernaturali illustratione seu cogitatione, & sine pia voluntatis affectione, quæ sunt motiones Spiritus Sancti, sed longè dispares à motionibus ad usum donorum requisitis. Nam priores motiones sunt ordinariæ, & ad humanum agendi modum attemperatæ: posteriores contra excedunt communem agendi rationem, tenduntque ad actus heroicos. Unde actus illi non ita frequentes sunt in Justis ac virtutum actus, v. g. oratio, ad quam Justos divinitus moveri necesse est, frequens est & assidua, sublimis verò contemplatio rarior & brevior.

Q. 3. *Suntne admittenda dona à virtutibus distincta?*

R. Negari non potest, quin homines aliquando extraordinariè à Spiritu Sancto moveantur; harum quippe motionum plura habentur exempla, tum in Scripturis, tum in Traditione Ecclesiastica. Samson instinctu divino columnas cœnaculi concussit, Jud. 16. Salomon judicium tulit, 3. Reg. cap. 3. Eleazarus elephanti se supposuit, 1. Mach. 6. Simeon venit in templum,

Luc. 2. Sancta Apollonia sponte in rogam exiliit, ex S. Dionysio Alexandrino apud Eusebium Lib. 6. Hist. c. 4. Rationem affert S. Thomas 1. 2. q. 68. art. 4. *quia sicut . . . vires appetitivæ natæ sunt moveri per imperium rationis: ita omnes vires humanæ natæ sunt moveri per instinctum Dei sicut à quadam superiori potentia.* Quin & ipse Aristoteles ejusmodi divinas inspirationes agnovit Libro 7. Moral. cap. 18. ejusque testimonium laudat S. Thomas art. 1. his verbis: *Philosophus etiam dicit . . . quoddam his qui moventur per instinctum divinum, non expedit consiliari secundum rationem humanam: sed quoddam sequantur interiorem instinctum; quia moventur à meliori principio quàm sit ratio humana.*

Sed controversia est in Schola, num dona sint habitus à virtutibus distincti. Negant Scotus, & alii non pauci, contenduntque esse actus eximios virtutum infusarum. S. verò Thomas 1. 2. q. 6. art. 8. & alii communiter, quibus subscribimus, docent dona esse habitus à virtutibus distinctos. 1. Quia in Scripturis exprimuntur ut aliquid permanens, Isaïæ cap. 11. *Requiescet super eum Spiritus Domini.* Joan. 14. *Ad eum veniemus, & mansionem apud eum faciemus.* Unde S. Gregorius Lib. 2. Moral. cap. 14. *In illis donis, sine quibus ad vitam perveniri non potest, Spiritus Sanctus in electis omnibus semper manet, sed in aliis non semper manet.* Quia dona altiori & nobiliori modo versantur circa materiam virtutum, quàm ipsæ virtutes. Ergo sicut liberalitas & magnificentia, quæ versantur circa idem objectum, putà pecuniam erogandam, sunt diversi habitus, quia diversimodè largitionem respiciunt, liberalitas ut mediocre, magnificentia ut splendidam & magnificam, quan-

quando decet: similiter dona & virtutes distingui debent; cum dona disponant ad actus sublimiores, virtutes contra ad actus mediocres.

Q. 4. *Dona suntne habitus præstantiores virtutibus?*

Distinguendum cum S. Thoma. Si dona conferantur cum virtutibus Theologicis, sunt inferiora; quia per virtutes Theologicas anima Deo conjungitur; per dona verò disponitur duntaxat ad suscipiendam Spiritus Sancti motionem: atqui multò præstantius est conjungi Deo, quàm disponi ad ejus inspirationem, quæ est consecrarium quoddam, & velut appendix divinæ illius unionis. Sed si dona conferantur cum aliis virtutibus, five intellectualibus, five moralibus, præstantiora sunt; quia disponunt ad motionem extraordinariam Spiritus Sancti, quæ superior est motione rationis, ad quam disponunt virtutes morales. *Manifestum quippe est, inquit sanctus Doctor, quòd ad altiorem motorem oportet majori perfectione mobile esse dispositum.*

Q. 5. *Quot sunt dona Spiritus Sancti?*

R. Septem numerantur, Isaïæ 11. his verbis: *Requiescet super eum Spiritus Domini, Spiritus sapientiæ & intellectus, Spiritus consilii & fortitudinis, Spiritus scientiæ & pietatis, & replebit eum Spiritus timoris Domini.* Ex his donis quatuor, scilicet sapientia, intelligentia, scientia, & prudentia, seu consilium, perficiunt rationem; tria verò voluntatem, nempe pietas, fortitudo, & timor.

Q. 6. *Quomodo probatur septenarius ille donorum numerus?*

R. Probatur 1. ipsa Prophetæ enumeratio-
ne. 2. Auctoritate Sanctorum Patrum, S. Ambrosii Lib. 5. de Spiritu Sancto cap. 2. Hiero-

nymi in caput 11. Isaïæ, Augustini Lib. 2. de Doctrina Christi: cap. 7. S. Gregorii Lib. 1. Moral. cap. 28. 3. Consensu Theologorum & totius Ecclesiæ, quæ illum numerum hætenus retinuit. Calvinus exsufflat & ridet illam auctoritatem; quia in Hebræo pietas & timor pro reverentia sumuntur, & eodem nomine exprimuntur. Sed lugenda ejus vanitas & præsumptio, qua se oculatorem credit septuaginta Interpretibus, & S. Hieronymo, qui idem nomen in textu Hebræo repetitum, duo significare interpretati sunt, nimirum pietatem & timorem reverentialem: quemadmodum apud Latinos timor significat & metum, & reverentiam. 4. Probatur ratione, quia dona ex dictis idem cum virtutibus habent objectum materiale, sed disponunt ad actus sublimiores circa illud eliciendos. Ergo tot admittenda sunt dona, quot numerantur virtutes: atqui præter virtutes Theologicas, quæ præsupponunt dona tanquam sui radices, septem numerantur virtutes, quatuor intellectuales, quæ disponunt ad actus bonos, scilicet intelligentia, sapientia, scientia, & prudentia; tres in voluntate, nimirum justitia, fortitudo & temperantia. Ergo totidem admittenda sunt dona ejusmodi virtutes perficientia.

Q. 7. *Quomodo se habet quodlibet donum ad virtutem cui respondet?*

R. Satisfiet quæstioni, si conferatur actus cujuslibet doni cum actibus virtutis, ipsi agnatæ. Itaque

Primò, actus virtutis intelligentiæ, quæ vulgò dicitur habitus principiorum, est cognitio primorum principiorum, v. gr. *Quod tibi non vis fieri,*

fieri, alteri ne feceris ; totum est majus sua parte. In Religione autem Christiana prima principia, sunt propositiones Fidei, ex quibus deduci, & ad quas reduci oportet omnem supernaturalem fidelium cognitionem quantumcumque sublimem; alioquin abjicienda est tamquam à spiritu erroris immissa, qui aliquando se transfigurat in Angelum lucis. Porro per prudentiam judicamus Deum hoc aut illud dixisse, per Fidei virtutem & actu de facto idipsum judicantes credimus. En actus virtutis Fidei. Nonnunquam autem fidelis, etiam idiota, instinctu Spiritus Sancti ea infirmitate credit, & tanta luce percipit mysterium revelatum, v. g. Filium Dei esse incarnatum, ut sibi videatur hactenus non credidisse sicut oportet. En actus doni intelligentiæ.

Secundò, per virtutem sapientiæ ratio gratiâ Dei adjuta, de rebus divinis, tanquam de altissimis causis, & ex iis de creatis rectè judicat. Per donum verò sapientiæ justus aliquando non rationis ductu, sed Spiritus Sancti instinctu movetur ad sublimiorem cœlestium contemplationem, quam sanctus Augustinus testatur se fuisse expertum, Lib. 10. Conf. cap. 40. *Aliquando, inquit Deum alloquens, intromittis me in affectum multum inusitatum introrsus, ad nescio quam dulcedinem ; quæ si perficiatur in me, nescio quid erit, quod vita ista non erit, sed recido, &c.* Quia brevis est & admodum rara illa beatæ vitæ prælibatio.

Tertiò, virtus scientiæ ad hoc disponit, ut ratio de temporalibus rectè judicet, nimirum non esse æstimanda aut appetenda, nisi quatenus deservire possunt ad æternam beatitudinem consequendam. At per donum scientiæ Justus ulte-

rius judicat illa esse abjicienda (quantum fieri potest) veluti onera & impedimenta, quæ retardant animam ad Deum anhelantem. Verum quia vitæ necessitas cogit servire hujusmodi vanitatibus, donum scientiæ tantum abest ut inflet, quemadmodum scientia Philosophorum, quin justum de-jicit, & secundum S. Augustinum, naturaliter parit donum lacrymarum.

Quartò, virtutis prudentiæ proprium est in dubiis consulere secundum rectam rationem: Spiritus autem Sanctus nonnunquam Justis inspirat consilia, quæ communem agendi rationem, & humanam prudentiam superant; & ideo à prudentibus sæculi temeraria & stulta facillè judicantur. *Animalis homo*, inquit Apostolus 1. Cor. 2. *non percipit ea, quæ sunt Spiritus Dei; stultitia enim est illi.*

Quintò, per justitiæ virtutem justus disponitur ad reddendum cuique debitum; *cui vèstigal, vèstigal: cui timorem, timorem; cui honorem, honorem*, Rom. 13. Per donum autem pietatis fit promptè à Spiritu Sancto mobilis ad extraordinariam reverentiam, qua Deo personis & rebus sacris pauperibus, & omnibus hominibus, quatenus ad Christum pertinent, longè ultrà debitum exhibet quod justitia, religio, & misericordia præscribunt.

Sextò, virtus fortitudinis Justum in periculis, juxta dictamen rationis & communes prudentiæ regulas, firmat contra inordinatos timoris & audaciæ motus. Per donum verò fortitudinis disponitur ad heroicos actus, instinctu divino eliciendos, ut videre est in laudatis exemplis Samsonis, Rafiæ 2. Machab. 14 & Apolloniæ.

Septi-

Septimò , per virtutem temperantiæ Justus moderatè utitur rebus delectabilibus. Per donum verò timoris reverentialis erga Deum , omnes delectationes , quantum potest , abjicit vitæ austerioris studio , ut animam castam & puram conservet Deo suo , qui Exodi 20. *est Dominus fortis , zelotes , & Jac. cap. 4. ad invidiam concupiscit.*

Cæterum Theologi hîc monent , heroica illa opera , præsertim quæ quarto & sexto dono tribuuntur , non esse ambienda sine speciali Spiritus Sancti instinctu , qui præsumitur in iis , quos Scriptura laudat , & Ecclesia commendat ; alioquin nec Samson , nec Rasisas , nec Apollonia à gravi peccato excusari possent. Quare animarum Rectores , sicut non debent agere , nisi secundum rectæ rationis & prudentiæ regulas , ita nec alijs consulere. Justi quidem sunt semper dispositi ad omnem Spiritus Sancti motum ; sed supra rationem non moventur nisi extraordinariè , contra rationem verò nunquam.

Q. 7. *Dona suntne habitus distincti à duodecim fructibus Spiritus Sancti , de quibus Galat. 5. & ab octo beatitudinibus , quæ laudantur Matth. cap. 5.*

Respondet S. Thomas , fructus & beatitudines esse ipsosmet actus virtutum & donorum. Namque fructus nomine , intelligitur bonum labore & studio intentum , & comparatum , v. g. ampla messis est fructus agricolæ. Si bonum illud sit ingens , dicitur beatitudo , sive inchoata , sive perfecta ; quia ejus possessio valdè delectat , & operantis desiderium quiescere facit. Si autem bonum sit exiguum aut mediocre , dicitur simpliciter fructus , non verò beatitudo ; neque enim mercenarium dixeris beatum , ex eo quòd

exiguam mercedem consecutus sit. Atqui bonum quod intenditur ex habitibus laudabilibus, sunt actus boni & laudabiles, v. g. cognitio rerum naturalium est bonum Philosophi, & fructus habitus quem studio comparavit. Ergo actus habituum infusorum sunt delectabiles Justorum fructus, *timor Domini delectabit cor*, Eccli. 1. *Iustitiæ Domini rectæ lætificantes corda*, Psal. 17. Et S. Augustinus Serm. 368. aliàs Hom. 37. de actu amoris ex toto corde ait: *Cum ad istam felicem perfectionem veneris, omnes concupiscentias hujus mundi tanquam stercora computabis, cum Propheta poteris dicere: Mibi adhærere Deo bonum est*, quemadmodum parvulus ablactatus experientia cibi solidioris & suavioris lac nutricis fastidit. Quin & intimus dolor de peccatis est delectabilis pœnitentiæ fructus, juxta illud Lib. de vera & falsa pœnitentia apud sanctum Augustinum. *Sic pœnitens de peccatis doleat, ut de dolore suo gaudeat.*

Ergo charitas, castitas, & aliæ virtutes, quas numerat Apostolus cit. cap. 5. Gal. non sumuntur pro habitibus, sed pro actibus, patetque ex ejus contextu; ibi enim opponit opera spiritus operibus carnis: *Manifesta sunt, inquit, opera carnis, quæ sunt fornicatio, immunditia, &c.* Tum subjungit de operibus bonis, *fructus autem spiritus est charitas, gaudium, &c.* Maluit autem dicere fructus, quàm opus, ut intelligeremus in illis actibus secundum se spectatis, nullum inesse laborem, aut tristitiam, quemadmodum carnales falsò arbitrantur, sed meram delectationem & pacem. *Crucem quidem vident, sed non etiam unctionem*, ait S. Bernardus Serm. 1. de Dedic. Vident carnis afflictationes, sensuum mortificationes; sed non vident Sancti Spiritus

Spiritus consolationes. Deinde Apostolus actus illos vocat fructus, non Justorum, sed Spiritus Sancti; quia licet Justi ad illos actus vitaliter & liberè concurrant, Spiritus tamen Sanctus illorum est auctor. *Deus est enim qui operatur in vobis & velle, & perficere pro bona voluntate.* Philip. 2.

Porro sicut Apostolus non omnia carnis opera cit. cap. numerat, sed quædam notiora duntaxat; sic non omnes fructus Spiritus; sed nobiliores comprehendit in duodenario illo numero: omnes enim actus cujuslibet habitus infusi, sive sit virtus, sive sit donum, est fructus Spiritus.

Attamen fructus omnes non dicuntur beatitudines, sed soli actus donorum; quia ex dictis nomine beatitudinis intelligitur bonum insigne, in cujus possessione animus quiescit; vel plenè & perfectè, si beatitudo sit perfectæ, ut visio Dei intuitiva, quæ est operatio hominis præstantissima, ultima ejus perfectio: vel imperfectè, si beatitudo sit solum inchoata, quæ in hac vita exurgit ex actibus præstantioribus: operatio quippe præstantior magis perficit, & ampliùs delectat. Atqui ex dictis actus donorum sunt præstantiores actibus virtutum, utpote qui procedant à nobiliori motore: Ergo beatitudines sunt propriè actus donorum.

Q. 8. *Quomodo octo beatitudines conveniunt cuilibet dono?*

R. Alii aliter explicant. Secundum sanctum Augustinum Lib. 1. de Serm. Domini in monte, prima beatitudo tribuitur timori Domini; quo Justus ob Dei reverentiam seipsum deprimat, honores, & omnia temporalia contemnit. *Rectè hic intelliguntur pauperes spiritu, humiles & timentes Deum;*
nec

nec aliunde omnino incipere oportuit beatitudinem ; si quidem perventura est ad summam sapientiam : initium autem sapientiæ est timor Domini , quemadmodum & è contrariò , initium omnis peccati superbia scribitur . Superbi autem appetunt & diligunt regna terrarum . Beati autem pauperes spiritu , quoniam ipsorum est regnum cælorum . cap. 2.

Secunda beatitudo tribuitur pietati. Namque mites sunt qui cedunt improbitatibus, & non resistunt malo, sed vincunt in bono malum (scilicet propter Dei timorem & reverentiam.) Rixentur ergo immites, & dimicent pro terrenis & temporalibus rebus. Beati mites, quoniam ipsi hæreditate possidebunt terram, de qua pelli non possunt, cap. 3. & cap. 9. Inde venit (pauper spiritu) ad divinarum Scripturarum cognitionem, ubi oportet esse mitem pietate; ne etiam id, quod imperitis videtur absurdum, vituperare audeat mitibus hæreditas data est, tamquam testamentum patris per pietatem quærentibus.

Tertia convenit scientiæ. In hoc gradu, in quo scientia est, lugetur amissio summi boni quia inhæretur extremis, cap. 9. & cap. 8. Scientia congruit lugentibus, qui cognoverunt in Scripturis, quibus malis teneantur.

Quarta congruit dono fortitudinis. In quarto gradu, inquit sanctus Doctor; labor est, ubi vehementer incumbitur, ut sese animus avellat ab eis, quibus pestifera dulcedine innexus est. Hic ergo esurit & sititur iustitia, & multum necessaria est fortitudo; quia non relinquitur sine dolore, quod cum delectatione retinetur.

Quinta est effectus salutaris consilii. Hoc enim unum remedium est evadendi de istis malis, ut dimittamus, sicut nobis dñmitti volumus; & adjuvemus in quo possumus alios, sicut & nos cupimus adjuvari.

Sexta

Sexta respondet dono intellectus, quo sublimius res divinæ apprehenduntur. *Quemadmodum enim lumen hoc videri non potest, nisi oculis mundis; ita nec Deus, nisi mundum sit illud, quo videri potest . . . mundis corde data est facultas videndi Deum, tanquam purum oculum ad intelligenda æterna gerentibus.*

Septima tribuitur dono sapientiæ. *Pacificis Dei similitudo tanquam perfectè sapientibus, formatisque ad Imaginem Dei . . . Pacifici autem in semetipsis sunt, qui omnes animi sui motus componentes, & subjicientes rationi, id est menti & spiritui, carnalesque concupiscentias habentes edomitas, fiunt regnum Dei, in quo ita sunt ordinata omnia, ut id quod in homine præcipuum est & excellens, hoc imperet, cæteris non reluctantibus, quæ sunt nobis bestiisque communia.*

In octava beatitudine septem dona concurrunt; aded ut non sit novus perfectionis gradus, sed probatio & declaratio præcedentium. *Septem sunt ergo (ait S. Augustinus cap. 9.) quæ perficiunt; nam octava clarificat, & quod perfectum est, demonstrat.* Enimverò omnes, tam pauperes, & humiles spiritu, quàm mites & alii, malè audiunt apud iniquos, linguis eorum proscinduntur, persecutionibus exagitantur; sed beati si in iis tribulationibus gloriantur; quia ipsorum est regnum cælorum.

Q. 9. *Omnia dona infunduntur in justificatione?*

Affirmans S. Thomæ sententia in Schola est communior, probaturque; quia in justificatione homo inseritur Christo tanquam membrum capiti, ut Spiritu ejus vivat & regatur; *Si quis Spiritum Christi non habet, hic non est ejus, Rom. 8. vers. 9.* Ergo Justus debet disponi ad excipiendoas omnes motiones Spiritus Sancti: disponitur autem ad ordi-

ordinarias per habitus virtutum, ad extraordinarias verò per dona, ut patet ex dictis: Ergo sicut in justificatione infunduntur habitus virtutum, ita & habitus donorum. *In ordine ad finem ultimum supernaturalem*, inquit S. Thomas art. 2. quæst. 68. *ad quem ratio movet secundum quod aliquantulum & imperfectè informata per virtutes Theologicas, non sufficit ipsa motio rationis, nisi desuper adsit instinctus & motio Spiritus Sancti secundum illud. Rom. 8. Qui Spiritu Dei aguntur, hi Filii Dei sunt. Et ideo ad illum finem consequendum necessarium est homini habere donum Spiritus Sancti.*

In his enucleandis, quæ Schola vix attingit, diutius immorati sumus; quia operæ pretium est, ut Clerici plenè noverint, & frequenter doceant, quàm pretiosa & maxima dona conjuncta sint cum peccatorum remissione: quàm divina adjumenta habeant justificati à peccato, ut relapsum caveant, & in bonis operibus abundant: denique quid in peccatore prærequiratur, ut ad tot ac tanta dona recipienda dispositus censeatur.

§. IV.

De dispositionibus ad justificationem.

Q. *Suntne necessariae dispositiones ad justificationem?*

R. 1. Nulla requiritur in parvulis, ut constet ex universali Ecclesiæ Traditione, quæ parvulos, quamvis rationis impotes, hætenus baptizavit in remissionem peccati originalis; unde Concilium Tridentinum Sess. 7. Can. 13. dicit anathema iis, qui docuerint parvulos, cum ad annos discretionis pervenerint, esse rebaptizandos.

dos. Enimverò si inobedientia primi hominis potuit illis nocere, à fortiori obedientia secundi hominis, qui factus est nobis iustitia à Deo, illis proderit.

R. 2. Constat tum apud Catholicos, tum apud Pseudo-Reformatos, adultum non justificari sine prævia sua dispositione, quæcumque tandem illa sit; nam Scripturæ spem veniæ non præbent, nisi peccatoribus dispositis, Ezechiel 18. *Si . . . impius egerit pœnitentiam . . . vita vivet.* Act. 2. Apostolus Petrus, Judæis, prædicatione sua conterritis, ait: *Pœnitentiam agite, & baptizetur unusquisque vestrum.* Act. 8. Philippus Eunuchò Baptismum efflagitanti respondet: *Si credis ex toto corde, licet,* nimirum te baptizari. Tritum est S. Augustini effatum. *Qui fecit te sine te, non justificat te sine te.* Nec alia ratio afferri potest, cur Deus, qui vult omnes homines salvos fieri, aliis veniam concedat, pluribus deneget; quàm, quòd illi gratiæ qua sese disponant, consentiant: hi resistent.

Sed gravis existit controversia Catholicos inter & Heterodoxos, quæ sit necessaria dispositio ad justificationem? Hi quippe unicam agnoscunt, nempe fidem non qualemcumque, sed qua peccator certò credat se esse prædestinatum, & sibi speciatim applicari promissiones peccatoribus generatim factas. *Sola Fides necessaria est, ut iusti simus,* ait Lutherus in cap. 2. ad Galat. ubi invehitur in Theologos, quos Sophistas vocat: eò quòd doceant fidem justificare per charitatem, à qua informatur, scribitque illam distinctionem Fidei informis & formatæ esse fanaticam & pestilentem. In caput tamen 15. Genes. agnoscit fidem
justi-

justificantem non esse sine bonis operibus. Scio, inquit, *bas virtutes esse insignia Dei dona. Scio fidem sine his donis non existere; sed nunc nobis quæstio est, quid cujusque proprium sit hic apertè dico quod faciat sola Fides, non cum quibus virtutibus conjuncta sit.* Vult nimirum omnia opera, quæ ex illis virtutibus procedunt, esse infecta peccato originali, quod contendit esse ipsammet concupiscentiam, quæ manet in renatis. Hinc in sermone de novo Testamento impiè suggillat bonorum operum merita. Ego, inquit, dico tibi quod angusta est via: oportet te fieri tenuem, si vis per eam venire. Cæterum qui operibus onerati sunt, sicut conchilibus onustos videmus Jacobi peregrinos, ii non poterunt penetrare.

Calvinus à Luthero non dissentit; sic enim scribit in antidoto Concili Tridentini ad Can. 11. Sess. 6. *Sola Fides est, quæ justificat. Fides tamen, quæ justificat, non est sola; sicut calor Solis est, qui terram calefacit, ipse tamen calor non est solus in Sole, sed cum splendore.*

Calvinistæ Magistri errorem profitentur in suo Catechismo pro Dominica vigesima, ubi Pseudominister sic interrogat Discipulum: *Pouvons nous croire pour etre justifiez, sans faire de bonnes œuvres?* Respondet Discipulus: *Il est impossible. Car croire en Jhesus Christ, c'est le recevoir tel qu'il se donne à nous: or il nous promet de nous regenerer par son Esprit, pour nous faire vivre saintement.* Reponit Magister: *La foy donc ne nous rend pas nonchalans à bonnes œuvres?* Respondet Discipulus: *Il en est ainsi.* Ita illi, qui saltem in hac parte carnales Catholicos pudore suffundere debent; quòd hi in Sacramento se justificatos credant; etiam si
nulla

nulla bonorum operum testificatione Justitiam demonstrent.

Verùm quàm malè de operibus Justorum sentiant Calvinistæ, aperiunt in alia lectione pro eadem Dominica vigesima, ubi de bonis Justorum operibus Magister quærit à Discipulo: *Comment nos bonnes œuvres ne sont-elles pas dignes d'être acceptées, puisqu'elles procedent du Saint Esprit?* Respondet Discipulus: *Non pas, à cause qu'il y a toujours quelque infirmité de notre chair melee parmi, dont elles sont souillées.*

Ex hoc falso Fidei justificantis principio, Novatores singulos sectæ suæ errores ferè deducunt, ac inprimis Justos non peccare, seu quod idem est apud ipsos: Justis non imputari peccata etiam gravissima, quamdiu fidem retinent. Deinde neminem à justitia recedere, nisi per diffidentiam ac proinde omne peccatum imputabile habere infidelitatem conjunctam, & per quodlibet peccatum fidem amitti. *Nulla peccata*, inquit Lutherus Lib. de captiv. Babyl. *possunt damnare, nisi sola infidelitas.*

Jam demonstravimus Paragr. I. Gratiā sanctificantem formaliter expellere peccatum, nihilque esse damnationis iis, qui sunt in Christo Jesu. Dicimus autem ubi de effectibus gratiæ, bona opera non vitiari motibus omninò indeliberatis concupiscentiæ, utpote qui non sint peccata formaliter, quemadmodum probamus ubi de peccato originali. Nunc itaque nobis incumbit duntaxat perpendendum, num sola Fides ad justificationem disponat, deinde utrùm certa Fide quis credere possit & debeat se esse justificatum à peccatis.

§. V.

Utrum sola Fides justificet?

R. Solam fidem non justificare ; est dogma Fidei in Concilio Tridentino definitum Sess. 6. Can. 9. his verbis : *Si quis dixerit, sola Fide impium justificari ; anathema sit.* Et Can. 12. *Si quis dixerit, fidem justificantem nihil aliud esse, quam fiduciam divinæ misericordiæ peccata remittentis propter Christum, vel eam fiduciam solam esse, qua justificamur ; anathema sit.*

Probatur Concilii definitio, 1. ex Scriptura, 1. Cor. 13. vers. 2. *Si habuero omnem fidem charitatem autem non habuero, nihil sum.* Qui dicit omnem, nullam omittit, quæ sine charitate justificare possit. Galat. 5. *In Christo Jesu neque circumcisio aliquid valet, neque præputium : sed Fides, quæ per charitatem operatur.*

Nec dicant Adversarii, dilectionem & alia bona opera tribui Fidei justificanti, tanquam fructus & consuetudines justificationis, non verò tanquam ejus causas aut dispositiones. Ait enim Apostolus, fidem sine dilectione nihil valere, nihil prodesse.

Confirmatur. Luc. 7. Christus de muliere peccatrice dicit : *Remittuntur ei peccata multa, quoniam dilexit multum.* Hic manifestè justificatio tribuitur dilectioni. Jacob. 2. *Vis autem scire, ó homo inanis, quoniam Fides sine operibus mortua est ? Abraham Pater noster nonne ex operibus justificatus est ? . . . Videtis quoniam ex operibus justificatur homo, & non ex Fide tantum.* Plures Scripturæ textus proferendi erunt Paragrapho sequenti ; ubi sigillatim exponemus

nemus per quos actus peccator disponatur ad justificationem.

Probatur 2. ex constanti praxi universalis Ecclesiæ, quæ à tempore Apostolorum variis virtutum operibus disposuit, sive Catechumenos ad Baptismum, sive lapsos post Baptismum ad Sacramentum pœnitentiæ.

Dices 1. Rom. 3. sic scribit Apostolus: *Arbitramur . . . hominem per fidem justificari sine operibus.* Ergo.

Respondeo distinguendo antecedens, justificatur homo sine operibus, quæ fidem & gratiam prætendunt, Concedo: quæ ex Fide & gratia procedunt, Nego anteced. Porro de prioribus loquitur sanctus Paulus: de posterioribus verò sanctus Jacobus. Ille quippe in Epistola ad Rom. infectatur tum Gentiles, qui de sua morum disciplina gloriabantur, fidemque in Christum ut minimè necessariam, respuebant: tum Judæos, qui de operibus legis præsumentes, electionem suam ad fidem proprio merito ascribebant. Contra utrosque autem Apostolus astruit necessitatem Fidei in Christum, ex eo quòd nec Gentiles servarint legem naturalem: nec Judæi legem Moisaicam: *Omnes enim, inquit cit. cap. peccaverunt, & egent gloria Dei.* Et cap. 11. vers. 32. *Conclusit . . . Deus omnia in incredulitate, ut omnium misereatur.* Ac proinde nemo ex operibus naturæ vel legis justificatur. Sed cùm hæretici superstitionibus adhuc Apostolis Epistolam ad Romanos in pravam sensum, à quo non recedunt Novatores, detorquerent teste Apostolorum principe, 2. Epist. cap. 3. vers. 15. his verbis: *Sicut charissimus frater noster Paulus . . . loquens in eis (Epistolis) de his, in*
E e 2 qui-

quibus sunt quædam difficilia intellectu, quæ indocti & instabiles depravant, sicut & cæteras Scripturas ad suam ipsorum perditionem. S. Jacobus, ad illos refellendos suam Epistolam scripsit, in qua multis probat, fidem non justificare sine operibus.

Instas: plures è sanctis Patribus, ut S. Hilarius Can. 8. in Matth. absolutè pronuntiant, *sola Fides justificat*. Ergo.

Distinguo antec. Sola Fides viva, quæ per dilectionem operatur, Concedo: Sola Fides mortua seu informis, ut loquuntur Theologi, Nego anteced. Nam ex S. Augustino Lib. 15. de Trin. cap. 18. *Fides sine charitate potest quidem esse, sed non & prodesse*. Et Lib. de nat. & gratia cap. ultimo: *Charitas inchoata, inchoata justitiæ est: charitas provecta, provecta justitiæ est: charitas magna, magna justitiæ est: charitas perfecta, perfecta justitiæ est*.

Urges: Fides mortua non est vera Fides, quemadmodum homo mortuus non est homo nisi æquivocè: atqui Fides sine operibus mortua est: Ergo non est vera Fides: nisi quæ attrahit Spiritum Christi, ex quo procedunt bona opera, justificationis fructus.

Confirmatur 1. S. Jacobus laudato capite 2. fidem sine operibus comparat Fidei dæmonum: atqui vera Fides non est in dæmonibus; Ergo nec in iis qui non operantur. 2. Sicut Christus non separatur à Spiritu Sancto, sic nec Fides à dilectione. 3. 1. Joan. 2. *Qui dicit se nosse eum, & mandata ejus non custodit, mendax est*. Ergo non est vera Fides sine operibus.

Respondeo negando majorem & paritatem. Disparitas est, quòd homo dicitur mortuus per subtractionem & separationem alicujus essentialis, nem-

nempe animæ: sublata autem parte essentiali, definit totum essentialē, scilicet homo. Contra Fides dicitur mortua, eo sensu quo dicitur corpus mortuum, hoc est, propter subtractionem ac separationem alicujus extrinseci, & minimè essentialis; quemadmodum enim anima non est essentialis corpori; ita nec charitas Fidei. Ergo sicut corpus mortuum est verum corpus; sic & Fides mortua est vera Fides.

Ad ea verò, quæ in confirmationem profertur, Respondeo,

Ad primum, alia est similitudo in natura, qualis est inter Patrem & Filium, alia in accidentibus, quo sensu homo carnalis dicitur similis bestiis, quia licet sit diversæ naturæ, easdem voluptates sectatur. Sic Fides peccatoris, quamvis essentialiter differat à Fide dæmonum, quæ in ipsis est cognitio naturalis, & propter evidentiam rerum necessaria; in eo tamen convenit cum Fide dæmonum, quod sit charitate & bonis operibus destituta; ac proinde peccator ad mentem Apostoli, de hac Fide non debet gloriari; nam Fides justorum propria per dilectionem operatur. Est hæc Fides viva, de qua dicitur. 1. Gal. 3. vers. 11. *Iustus ex Fide vivit.*

Ad secundum, Fides quidem non potest esse sine Sancto Spiritu assistente, sicut nec lux diei sine sole illuminante; sed manet in peccatoribus, Spiritu Sancto non inhabitante; disciplinæ enim effugiet fictum, nec habitabit in corpore subdito peccatis, ut dicitur Sap. 1. *Nam credit aliquis in Christo, sed odit Christum*, inquit sanctus Augustinus tract. 10. in Epistolam Joan. *Habet confessionem Fidei timore pænæ, non in amore coronæ.* Adde huic Fi-

dei dilectionem; ut fiat Fides, qualem dicit Apostolus, Fides quæ per dilectionem operatur.

Ad tertium, duplex est Dei cognitio, alia est speculativa, imperfecta, & otiosa, qualem Apostolus dicit Rom. 1. habuisse Philosophos, qui cum Deum cognovissent, non sicut Deum glorificaverunt . . . sed evanuerunt in cogitationibus suis. Alia est effectiva & practica. Qui hanc habet, ex Deo natus est 1. Joan. 5. & servat ejus mandata; qui non habet, confitetur quidem se nosse Deum; factis autem negat, ut dicitur ad Tit. cap. 1. Et ideo non illum novit, sicut oportet, mendaxque est, si hoc modo se nosse dicat.

Dices 2. ex sancto Augustino Lib. de Fide & operibus cap. 14. *Sequuntur opera justificatum, non justificandum.* In Psal. 110. *Justitiam homo non operatur, nisi justificatus.* Ergo sola Fides præcedit justificationem, quatenus per eam veluti per manum apprehenditur justitia Christi.

Distinguo anteced. Justificationem sequuntur opera viva & meritoria, quibus Lex adimpletur, & retributio seu merces debetur, Concedo: Sequuntur omnia omnino opera, ita ut nulla bona præcedant, Nego anteced. Namque sanctus Augustinus Serm. 351. aliàs Hom. 50. & alibi passim describit pœnitentiam, quam agi oportet ante Baptismum.

§. VI.

Quæ tandem dispositio adultis necessaria est ad justificationem?

R. Concilium Tridentinum Sessione sexta, capite 6. septem actus requirit, quibus impij

pil ad justitiam disponantur, scilicet Fidei, timoris, spei, dilectionis Dei, pœnitentiæ, & odii peccati, propositi suscipiendi Sacramenti, novæ vitæ instituendæ, & mandata servandi. *Disponuntur*, inquit, *ad ipsam justitiam, dum excitati gratia divina, & adjuti, fidem ex auditu concupientes liberè moventur in Deum Et dum peccatores se esse intelligentes, à divinæ justitiæ timore, quo utiliter concutuntur, ad considerandam Dei misericordiam se convertendo, in spem eriguntur, fidentes Deum sibi propter Christum propitium fore, illumque tanquam omnis justitiæ fontem diligere incipiunt; ac propterea moventur adversus peccata per odium aliquod & detestationem, hoc est per eam pœnitentiam, quam ante Baptismum agi oportet. Denique dum proponunt suscipere Baptismum, inchoare novam vitam & servare divina mandata.*

Probatur Concilii doctrina.

Primò, Fidem esse initium salutis docet Apostolus. Hebr. 11. *Credere enim oportet accedentem ad Deum. Ex sancto Clemente Alexandrino Lib. 2. Stromatum: Fides est ad salutem inclinatio, post quam timor, & spes, & pœnitentia. Et ex S. Augustino Lib. de Prædestinatione Sanctorum c. 1. Fides prima datur, ex qua cætera imperantur.*

Secundò, de Timore Dei dicitur Eccli. 1. *Qui sine timore est, non poterit justificari. Item timor Domini impellit peccatum. De eodem quoque S. Augustinus Lib. de Catechizandis rudibus cap. 5. Rarissimè accidit, imò verò nunquam, ut quisquam veniat volens fieri Christianus, qui non sit aliquo Timore Dei perculsus; tract. 9. in Epistol. Joan. Timor Dei sic vulnerat, quomodo Medici serramentum putidinem tollit. Opus est ergo ut intret timor, per quem veniat cbaritas. Timor, medicamentum; cbaritas, sanitas.*

Tertiò, spes disponit ad justitiam, cap. 28. Proverb. *Qui . . . sperat in Domino, sanabitur.* Matth. 9. *Confide, fili, dimittuntur tibi peccata tua.* Hinc S. Ambrosius Lib. de Pœnitentia cap. 1. *Nemo potest bene agere pœnitentiam, nisi speraverit indulgentiam.*

Quartò, dilectio Dei sequitur spem, ut habetur Eccli. 2. *Qui timetis Dominum, sperate in illum . . . diligite illum, & illuminabuntur corda vestra.* Item Galat. 5. *Neque circumcisio aliquid valet, neque præputium; sed Fides quæ per charitatem operatur.* Si hæc dilectio sit perfecta, est ultima dispositio, & justificat extra Sacramentum actu susceptum, juxta illud Christi, Luc. 7. *Remittuntur ei peccata multa, quoniam dilexit multum.* Si sit imperfecta, est dispositio duntaxat remota, nec justificat extra Sacramentum. Et de hoc amore imperfecto intelligendum est Concilium Arausicanum secundum Can. ultimo, ubi sic habet. *Deus fidem & amorem sui prius inspirat, ut Sacramenta Baptismi fideliter inquiramus.* Quid sit autem amor ille imperfectus, opportuniùs explicabitur tract. de Baptismo, ubi plura in praxi necessaria dicemus de dispositionibus ad Sacramentum, sive Baptismi, sive pœnitentiæ suscipiendum.

Quintò de Pœnitentia habetur Act. 2. *Pœnitentiam agite, & baptizetur unusquisque vestrum in nomine Jesu Christi in remissionem peccatorum.* Et c. 11. *Gentibus pœnitentiam dedit Deus ad vitam.*

Sextò, de proposito servandi mandata, inchoandi novam vitam, & suscipiendi Sacramentum loquuntur hi Scripturæ textus: *Præparate corda vestra Domino.* 1. Reg. 7. *Docete omnes Gentes baptizantes eos in nomine Patris, & Filii, & Spiritus*

tus Sancti, docentes eos servare omnia quaecunque mandavi vobis. Matth. 28. vers. 19. Enimverò qui paratus non est obtemperare voluntati ejus, quem offendit, cum illo reconciliari non potest. Atqui Deus vult, ut peccator Sacramentum recipiat, & mandata ejus observet. Ergo.

Q. *Recensitæ dispositiones concipiunturne simul an gradatim & successivè?*

Respondet S. Thomas 1. 2. qu. 113. art. 10. Sicuti morbi corporis ordinariè non sanantur, nisi successivè, & repetitis remediis, sic nec peccata, quæ sunt morbi animi. Gratia enim æquè ac natura ab imperfectis progreditur ad perfectiora. Sed extraordinariè & supra consuetum, five naturæ, five gratiæ operandi modum; salus, tum corporis per ægritudinem amissa, tum animi per peccatum perdita, in instanti recuperari potest. Legimus quippe in Scripturis plures ægros ab infirmitate subitò convaluisse, & peccatores statim justificatos, ut Davidem. 2. Reg. cap. 22. vers. 13. Peccatricem, Luc. 7. vers. 47. Paralyticum, Matth. 9. vers. 2. Latronem in Cruce, Luc. 23. vers. 43. Sed miracula sunt ista, utpote quæ excedant ordinem, priora naturæ, posteriora gratiæ. Ergo si periculosè ægrotans, temerè & admodum stultè, necessaria remedia rejiceret, hac confidentia, quòd Deus cujus misericordiæ non est numerus, in sui gratiam tale miraculum sit præstiturus, quale pluribus infirmis non denegavit: à fortiori peccator, qui spretis pœnitentiæ exercitiis, præsumeret se in extremis repente mutandum, & exemplo Davidis efficaciter pronuntiandum, *Peccavi.*

§. VII.

Utrum peccator solis liberi arbitrii viribus possit se disponere ad justificationem?

R. **N**on potest. Est Fidei dogma definitum
 1. In Conciliis Diospolitano, Milevitano, & aliis, in quibus oppositus Pelagianorum error proscriptus est. 2. In Concilio Arausicano secundo, quod Can. 7. contra Semipelagianos sic statuit: *Si quis per naturæ vigorem bonum aliquod, quod ad salutem vitæ æternæ pertinet, cogitare ut expedit, vel eligere posse confirmat absque illuminatione & inspiratione Spiritus Sancti, hæretico fallitur spiritu.* Ac demum in Concilio Trid. Sess. 6. cap. 5. his verbis: *Declarat præterea (Sancta Synodus) ipsius justificationis exordium in adultis à Dei per Christum Jesum præveniente gratia, sumendum esse.* Et Can. 3. *Si quis dixerit, sine præveniente Spiritus Sancti inspiratione, atque ejus adjutorio, hominem credere, sperare, diligere, aut pœnitere posse sicut oportet, ut ei justificationis gratia conferatur; anathema sit.* Novatores in hac parte Catholicis consentiunt.

Probatur. Veritas Catholica 1. ex Scripturis, Joan. 6. *Nemo potest venire ad me, nisi Pater . . . traxerit eum.* In quem locum sanctus Chrysostomus Hom. 45. vel 46. secundum nonnullas editiones, sic scribit: *Hoc non tollit liberum arbitrium, sed ostendit nos indigere divino auxilio.* Rom. capite 9. *Non volentis, neque currentis, sed misipientis est Dei.* Quæ verba expendens S. Augustinus Enchir. capit. 30. hæc habet: *restat, ut propterea dictum intelligatur, non est volentis, neque currentis, sed misipientis est Dei, ut totum Deo detur, qui hominis voluntatem præparat, adjuvando, & adjuvat præparatam.*

Pro-

Probatur 2. ratione; quia debet esse quædam proportio ordinis & habitudinis inter dispositiones & formam; cur enim humiditas & frigus lignum non disponunt ad formam ignis, sicut siccitas & calor; nisi quia nec proportionem nec ordinem habent ad formam ignis? Atqui actus naturalis nullam habet proportionem, nullumve ordinem ad formam supernaturalem, qualis est gratia justificans: Ergo quantumcunque bonus supponatur, non potest esse ad illam dispositio, quemadmodum nec calor, nec frigus, nec alia quævis qualitas naturalis aquam baptismalem, five proximè, five remotè disponit ad virtutem Sancti Spiritus recipiendam. Verissimè ergo S. Prosper cecinit carmine de ingratias cap. 25.

*Ipsa (gratia) agit & cunctis dux est venientibus ad se,
Perque ipsam nisi curratur, non itur ad ipsum.*

Dices 1. Zach. 1. dicitur: *Convertimini ad me . . . & ego convertar ad vos.* Ergo.

Respondent Patres Tridentini Sess. 6. cap. 5. cum in sacris Litteris dicitur: *Convertimini ad me, &c.* libertatis nostræ admonemur: cum respondemus: *Converte nos, Domine, ad te, & convertemur.* Thren. 5. vers. 21. Dei nos gratia præveniri confitemur.

Dices 2. Scriptum est Prov. 16. *Hominis est præparare animam, & Domini gubernare linguam.* Apoc. quoque 3. *Si quis . . . aperuerit mihi januam, intrabo ad illum.* Ergo.

Respondet S. Augustinus Lib. 2. ad Bonifacium cap. 8. *Homo præparat cor, non tamen sine adiutorio Dei, qui tangit cor, & aperit, juxta illud 2. Machab. cap. 1. Aperiatur (Deus) cor vestrum.*

Dices 3.

Dices 3. ex S. Chryſoſtomo Hom. 17. in Joan. Deus non prævenit voluntates noſtras; ſed cùm cœperimus, cùm voluntatem præbuerimus, tunc & ipſe plures nobis dat ſalutis occaſiones. Ergo.

Distinguo antecedens, non prævenit neceſſitatem inferendo, Concedo: alliciendo & adjuvando, Nego antecedens. Patet ſolutio ex Homil. 45. mox laudata.

Dices 4. Facienti quod in ſe eſt, Deus non denegat gratiam, ita S. Auguſtinus Lib. 19. de Civ. Dei cap. 13. *Quisquis talibus bonis (naturalibus) fuerit rectè uſus, accipiet meliora, ipſam ſcilicet immortalitatis pacem.* Et ſanctus Thomas quæſt. 24. de veritate art. 1. ad ſecundum, *Gratiam, inquit, quamvis ex libero arbitrio homo non poſſit acquirere, poteſt tamen ſe ad gratiam habendam præparare.* Et in ſecundum ſentent. diſt. 25. quæſt. 2. art. 1. ad ſecundum, docet hominem natum inter Infideles, faciendo quod in ſe eſt, accepturum à Deo neceſſaria ad ſalutem. Et quæſt. 14. de verit. art. 11. *Si quis in ſilvis natus ſequeretur ductum naturalis rationis, futurum ut Deus revelaret ea, quæ ſunt neceſſaria ad credendum.* Ergo.

Reſpondeo 1. ex ſancto Thoma lect. 3. in cap. 10. Epistol. ad Roman. Nemo ſine gratia faciet unquam quod in ſe eſt. *Hoc ipſum, inquit, quod aliqui faciunt quod in ſe eſt, convertendo ſcilicet ad Deum: ex Deo eſt movente corda ipſorum ad bonum, ſecundùm illud Thren. 5. Converterte nos, Domine, ad te, & convertemur: Hanc doctrinam Angelicus Doctor videtur hauſiſſe ex ſancto Auguſtino, qui Lib. 2. de pec. mer. cap. ſic ſcribit: *Ad nonnulla ſuperanda, vel quæ male cupiuntur, vel quæ metuantur,*
magnis*

magnis aliquando & totis viribus opus est voluntati, quas non perfecte nos in omnibus adhibitueros prævidit, qui per Prophetam veridicè dici voluit, non iustificabitur in conspectu tuo omnis vivens. Ergo à fortiori homo omni gratiæ auxilio destitutus, nunquam totas exeret vires, ut faciat quod in se est. Sed supponamus aliquando facturum, quod sine exemplo est.

Respondeo 2. distinguendo antecedens; facienti, quod in se est ex motione Spiritus Sancti, Deus non denegat gratiam, Concedo: *Quia intentio Dei*, inquit S. Thomas quæst. 112. artic. 3. *deficere non potest, unde si ex intentione Dei moventis est, quodd homo, cujus cor movet, gratiam consequatur, infallibiliter ipsam consequitur.* Facienti quod in se est naturalibus viribus, Deus non denegat gratiam, Nego anteced. Vel enim naturalis ille conatus esset dispositio ad gratiam, quod falsum esse jam ostendimus, vel esset conditio, sine qua non ex pacto Dei patris cum Christo inito: & hoc non; tum quia Clerus Gallicanus rejicit hujusmodi pactum, ut merè fictitium. Consule quæ in hanc rem diximus cap. 3. §. ultimo ad calcem; tum quia hæc conditio esset titulus onerosus contra rationem gratiæ, & puræ misericordiæ, qua Deus peccatorem vocat ad pœnitentiam; posita enim hujusmodi conditione viribus liberi arbitrii Deus teneretur suas partes implere, hoc est, gratiam conferre. Quàm autem illud repugnet doctrinæ sancti Augustini, cujus auctoritas nobis objicitur, nemo non videt. Quod verò spectat sanctum Thomam, præterquam quod mentem ejus satis jam aperuimus, potest amplius declarari exemplo Cornelii, quo ipse utitur, ut probet Deum

non defuturum homini in silvis enutrito, si faciat quod in se est; nam 2. 2. qu. 10. art. 4. ad tertium agnoscit, quod verissimum est, eundem Cornelium, non sine Dei auxilio, orasse, & elemosynas erogasse. Ergo sanctus Doctor supponit ejusmodi hominem in silvis natum, facere quod in se est, Deo interiùs illum adjuvante.

Instas: saltem negari non potest, quin naturalis ille conatus, si sit ex totis viribus, habeat rationem removentis prohibens; nam Apostolus testatur se ideo misericordiam consecutum esse, quia ignorans in Christum peccavit. Ergo bona opera naturalia aliquid conferunt ad justificationem.

Nego anteced. 1. Quia Deus impiissimos aliquando efficaciter vocat. Ergo peccata absolute non prohibent opus gratiæ. 2. Quia etsi peccata efficiant hominem gratiæ indignum, non sequitur quòd bona opera naturalia illum reddant gratiæ dignum; sed solum id præstant, ut eo titulo non sit indignus, quod ultro fatemur, nec negari potest; sed non desunt aliæ rationes, propter quam est indignus, cum non sit immunis ab omni peccato.

Sanctus Paulus ante conversionem dignus erat pœna, non misericordia: sed tantam pœnam non merebatur propter ignorantiam, quantam si in Spiritum Sanctum blasphemasset, hoc est, ex malitia; quemadmodum aliqui ex Phariseis. Ex quo sequitur duntaxat, quòd fuerit minùs quàm illi indignus misericordia.

Ergo falsa spe deluduntur, qui conversionem differunt aliquando usque ad mortem, ut interim liberiùs peccent. In quo enim confidunt illi?

An

An in firma, quam sentiunt, voluntate faciendi quandoque quidquid in se est, ut damnationem æternam effugiant? At constat ex dictis, quòd nemo unquam sine gratia totas vires sic adhibiturus sit. Annon peccator totas exerere debet, ut jugum cupiditatis, quæ ipsi dominatur, excutiat, ut vitia longa consuetudine contracta, quæ illum tenent ligatum, debellet, ut pietas palato malè affecto ingrata suavis fiat, ut cor adaperiat ad Deum extrema supplicia minitantem, & ideo minùs placentem, plusquam seipsum diligat? Nam ex S. Bernardo Serm. num. 9. in Cant. *Qui non placet Deo, non potest illi placere Deus*, nisi præveniatur gratiæ suavitate. Qui dicit ista nunc sibi videri impossibilia, an faciliùs præstiturus est, cùm vis morbi & acutissimi dolores sensum deprimant; cùm timor febris magis accendendæ, & mortis accersendæ præ nimia animi contentione, avocabit ab omni cura & sollicitudine?

Sed demus quòd facturus sit quidquid in se est, quid ad peccatorum remissionem & justificationem heroicus ille voluntatis conatus, cùm non habere possit rationem dispositionis aut conditionis sine qua non, nisi sit à Spiritu Sancto supernaturaliter movente? Absit ergo, ut confidat in naturali voluntatis affectu, quo æternam damnationem summè exhorret, spes ejus sola Dei misericordia nitatur necesse est. Sed unde illam sibi pollicetur? An quia sicut Apostolus ignorans fecit ipse toties vocatus, toties monitus, & semper rebellis? An potiùs, quia Deus peccatori, nullo excepto, promisit, Ezech. 17. quòd in quacunque die, etiamsi extrema, conversus fuerit, omni-
mnium

mnium iniquitatum ejus non recordabitur? At promissio illa datur sub conditione, *si conversus fuerit, si pœnitentiam egerit*: Ubi autem extat promissio, quòd in quacunque die, etiam extrema, Deus daturus sit gratiam, sine qua, juxta Fidem Catholicam, adultus nec converti, nec pœnitentiam agere potest? Certum igitur & indubitatum, quòd impius, in quacunque die conversus fuerit, benignè à Deo suscipiendus sit; fidelis enim Deus in promissis suis: at incertum, an Deus in quacunque die concessurus sit gratiam, qua impius actu & de facto convertatur, & pœnitentiam agat; quia nullibi extat ejusmodi promissio, imò Deus quàm sæpissimè minatur, se non auditurum ad se clamantes, qui illum vocantem non obaudire. *Justissima enim pœna est, inquit sanctus Augustinus, ut qui noluit cum potuit, non possit cum voluerit.*

Verùm supponamus, quod pro certo asserere non possumus, Deum in quacunque die peccatori daturum gratiam, qua quidquid in se est, agere possit ad justificationem consequendam; aliud fiduciam peccatoris elevabit, nempe ex dictis constat, gratiam sine miraculo non repente, sed successivè duntaxat ad justificationem disponere; quemadmodum nec in ordine naturali remedia salutem corporis subito operantur. Ergo peccator, qui hodie cor suum obdurat contra vocem Domini, sperans se in extremis gratia Dei repente convertendum, vana spe deluditur, non secus ac infirmus, qui spretis salutaribus & necessariis remediis, mori eligeret hac fiducia, quòd illum Deus sicut Lazarum & plures alios statim à mortuis revocaret; subita
enim

enim peccatoris immutatio, est majus miraculum, quàm mortuorum resurrectio; quia præterquam quod est contra consuetum operandi modum gratiæ, magis excedit naturæ vires. Ita S. Thomas hic qu. 113. art. 10.

§. VIII.

Utrum quis possit certò scire, se remissionem peccatorum, & gratiam sanctificantem esse consecutum?

Pseudo-Reformati ex falso suo principio, quòd Fides justificans nihil sit aliud, quàm certa & indubitata fiducia nos esse prædestinatos, deducunt peccatorem debere; nedum posse, esse certum de sua justificatione, adeo ut, si quis ea de re tantisper dubitet, statim à gratia excidat. Hunc impium errorem Concilium Tridentinum Sess. 6. Can. 14. anathemate percussit his verbis: *Si quis dixerit . . . neminem verè esse justificatum, nisi qui credat se esse justificatum . . . anathema sit.* Et Can. 15. *Si quis dixerit hominem renatum & justificatum teneri ex Fide ad credendum, se . . . esse in numero Prædestinatorum, anathema sit.* Denique Can. 27. *Si quis dixerit nullum esse . . . peccatum, nisi infidelitatis, aut nullo alio, quantumvis gravi & enormi, præterquam infidelitatis, peccato, semel acceptam gratiam amitti; anathema sit.* Quare ad propositam quæstionem juxta Concilii definitionem

Respondeo, nullus sine speciali Dei revelatione certus esse potest certitudine Fidei, quæ excludat omnem formidinem, sibi remissa esse peccata: potest tamen conjecturali & morali certitudine. Duæ responsionis sunt partes.

Prima pars probatur ex Scriptura & sanctis Patribus, Prov. 20. *Quis potest dicere, mundum est cor meum, purus sum à peccato?* Eccl. 9. *Nescit homo utrum odio vel amore dignus sit.* In quem locum sanctus Hieronymus sic scribit: *Sensus est, inveni justorum quidem opera in manu Dei, & tamen utrum à Deo amentur, aut non, nunc eos scire non posse, & ambiguos fluctuare, utrum ad probationem sustineant, quæ sustinent, an ad supplicium.* In futuro igitur scient. Eccl. 5. *De propitiato peccato noli esse sine metu.* 1. Corinth. 4. Apostolus de seipso ait: *Nibil . . . mihi conscius sum; sed non in hoc justificatus sum; qui autem judicat me, Dominus est.* Quæ verba expendens sanctus Chrysostomus scribit, non Corinthios tantum, sed seipsam privat hoc judicio: Et sanctus Hieronymus Libro secundo contra Pelagianos, temperabat sententiam, ne fortè per ignorantiam deliquisset, quanta abyssus sit, audite. Sanctus quoque Augustinus in Psalm. 41. *Tantam profunditatem credit esse in homine, quæ lateat ipsam hominem, in quo est.* Sanctus etiam Basilus, Constit. monast. cap. 2. *Multa peccantes, plurima non intelligimus.* Quapropter dicit Apostolus: *Nibil mihi conscius sum; sed non in hoc justificatus sum; hoc est, multa pecco, & non intelligo.* Denique sanctus Gregorius Lib. 9. Moral. Conditoris contra me judicia, quæ temeritate redarguo, qui ipsum me de infirmitatis caligine ignoro? Et Lib. 2. Regist. Epist. 22. ad Gorgoniam, quæ optabat fieri certior peccata sibi fuisse remissa, sic rescribit: *Rem difficilem & inutilem postulasti.* Difficilem quidem; quia indignus sum, cui revelatio fieri debeat. Inutilem etiam; quia secuta de peccatis remissis fieri non debes, nisi ciam jam in die vitæ tuæ ultimo, plangere eadem peccata minimè valebis quoadusque veniat, semper trepida, metuere culpas

culpas debes, atque eas quotidianis fletibus lavare. Ecce Summus Pontifex sanctissimus æquè ac doctissimus nesciebat, quod hodie Novatores exploratum se habere profitentur.

Probatur 2. ratione. Nulla sunt signa clario-
ra gratiæ jam adeptæ, quàm opera perfectissimæ
charitatis, quale est martyrium, erogatio totius
substantiæ in usus pauperum: Atqui ex Aposto-
lo, 1. Cor. 13. Ista præstari possunt sine charita-
te, atque adeò sine gratia sanctificante: Ergo.

Deinde ex Adversariis, ut quis certus sit cer-
titudine Fidei, credat necesse est, & quidem Fi-
de divina, se esse prædestinatum: Atqui nullus
hoc modo potest esse certus se esse prædestina-
tum. Nam ipsemet Calvinus fatetur, quod ne-
gare non potest, plures se credere prædestinatos,
qui revera sunt reprobi, ac proinde falli in hac
sua prædestinationis fiducia. Enimverò, non o-
mnes Lutherani & Calvinistæ sunt prædestinati;
& tamen nullus est ex iis, qui non indubitanter
credat, peccata sibi dimitti; Ergo plures ex iis
hac sua persuasione decipiuntur. Jam proferant
signa certa & indubitata, quibus constet hos esse
prædestinatos, ac proinde veram fidem habere;
illos verò esse reprobos, ideoque inani fiducia
deludi.

Dicent fortassis, Spiritum Sanctum certam
fiduciam in prædestinatis excitare, in reprobis
minimè.

Sed contra. Omnes & singuli Calvinistæ di-
cunt & credunt, à Spiritu Sancto se moveri ad
credendum, nec possunt discernere, quis in hac
persuasione decipiatur: Ergo non modò non ha-

bent absolutam de justificatione sua certitudinem, ut contra careant etiam probabilibus illis conjecturis, quibus Ecclesia Catholica obedientes filios, & nihilominus ob propriam infirmitatem formidantes, ex Scripturis recreat, ut videre est in altera parte nostræ responsionis. Itaque

Secunda pars, quæ est de certitudine probabili, quæ potest esse major vel minor, secundum diversos perfectionis gradus, ad quos justus pervenit, probatur 1. ex Scriptura, Rom. 8. v. 15. & 16. *Non accepistis spiritum servitutis iterum in timore; sed accepistis spiritum adoptionis filiorum, in quo clamamus: Abba, (Pater.) Ipse enim Spiritus testimonium reddit spiritui nostro, quod sumus Filii Dei: hoc est Spiritus Sanctus, quos inhabitat, non instar servorum solo pænæ timore, sicut olim Judæos adigit ad obediendum legi; sed filialem indit indolem, qua filiali fiducia invocant Deum & Patrem amantissimum, ex qua justii præsentiam Spiritus Sancti in se habitantis colligere possunt, 2. Cor. 1. Gloria nostra hæc est, testimonium conscientiæ nostræ. Quamvis enim Apostolus suprâ dixerit se hoc testimonio planè non inniti, ita ut certus esset se coram Deo justificatum; nihilominus inde reficiebatur interiùs, & inter adversa tranquillus erat & exultans, juxta illud. Isaïæ c. 32. *Erit opus justitiæ pax.* Et Gal. 5. *Fructus spiritus est charitas, gaudium, pax, &c.* 1. Joan. 3. vers. 19. *In hoc cognoscimus (nempe quia diligimus fratres) quoniam ex veritate sumus, & in conspectu ejus suadebimus corda nostra.**

Probatur 2. ex sanctis Patribus. S. Augustinus Serm. 155. aliàs 6. de verbis Apostoli, sic lo-

loquitur : *Ecce adjuvante ipsius misericordia, Spiritum Christi habemus : ex ipsa dilectione justitiæ, integra Fide, Catholica Fide, Spiritum Dei nobis inesse cognoscimus, sanctus Gregorius Lib. 6. Epist. 25. aliàs 187. Cum longa, inquit, mæroris anxietate fuerit formido consumpta, quædam jam de præsumptione securitas nascitur. Et sanctus Bernardus Serm. 5. in Cant. ait: Si hæc sensero, non ambigo sponsum adesse, verbi siquidem copiæ sunt ; & de plenitudine ejus ista accipimus.*

Dices 1. pro præsumpta Hæreticorum certitudine. Rom. 4. vers. 14. & 16. sic legitur : *Si enim qui ex lege, hæredes sunt, exinanita est Fides, abolita est promissio ; quia scilicet omnes legem sunt transgressi. Ideo ex Fide, ut secundum gratiam firma sit promissio omni homini.* Hæc non verba sunt, ait Chemnitius, sed fulmina contra Concilium Tridentinum. Ergo certitudine Fidei credere debemus Dei promissa.

Distinguo consequens. Credere debemus promissa generatim facta, v. g. *Omni qui invocaverit nomen Domini, salvus erit. Qui manducat hunc panem, vivet in æternum,* Concedo : quia Deus hæc dixit ; nec eorum veritatem labefactare potest hominum iniquitas : credere debemus promissa illa mihi privato applicari, dum invoco nomen Domini, dum panem hunc manduco, Nego consequ. quia certus non sum me invocare nomen Domini, aut panem, quem dedit nobis Dominus, manducare sicut oportet ; Deus enim illud posterius mihi non revelavit. Ita Patres Tridentini Sess. 6. cap. 9. *Sicut nemo pius, inquit, de Dei misericordia, de Christi merito, deque Sacramentorum virtute & efficacia dubitare debet : sic quilibet, dum seipsum, suam-*

que propriam infirmitatem & indispositionem respicit, de sua gratia formidare & timere potest.

Instas, promissio est universalis & omnibus facta; Ergo & singulis, namque pars continetur in toto.

Distinguo consequens: Ergo & singulis conditionatè, si pœnitentiam agant, sicut oportet, Concedo. Ergo & singulis absolutè, Nego consequ.

Ergo, inquires, si singuli partes suas non agant, nec conditionem ponant, abolita est promissio, quod manifestè pugnat contra Apostolum; probat quippe firmam esse Dei promissionem, quia ex Fide; alioquin si ex operibus, evacuata est promissio; nam ex Psalmo 13. quem laudat: *Omnes declinaverunt, simul inutiles facti sunt, non est qui faciat bonum, non est usque ad unum.*

Respondeo 1. retorquendo argumentum contra Adversarios, si singuli careant certa illa fiducia, sine qua non applicantur merita Christi, ut contendunt, abolita similiter erit Dei promissio. Absit, inquier; nam promissio Dei semper stat in se firma; etiamsi supponantur homines illam negligere; quemadmodum fons perennis non ideo exsiccatur, quia nullus haurit ex illò: Bene quidem. Sed quis non videat hac responsione solvi incommodum, quod nobis objicitur?

Respondeo 2. promissionem Dei universali Ecclesiæ factam: *Portæ Inferi non prævalebunt adversus eam*, Matth. cap. 16. *Ecce vobiscum sum usque ad consummationem sæculi*, Matth. 28. esse absolutam, ac proinde falsò supponitur in objectione, quòd omnes collectivè promissionibus divinis obicem ponant, quamvis id possint singuli distributivè

butivè sumpti; Ex falsa autem hypothefi mirum non est, quod fequatur absurdum.

Dices 2. Apostolus 2. Corinth. 13. verf. 5. sic fcribit: *Vosmetipfos tentate, fi estis in Fide, ipsi vos probate. Annon cognoscitis vosmetipfos, quia Christus Jefus in vobis est, nisi fortè reprobi estis?* Atqui hæc verba indicant omnimodam certitudinem: Ergo.

Distinguo min. Indicant omnimodam certitudinem miraculorum, per quæ Apostolus efficaciter probavit se à Deo missum, & Christum esse Filium Dei, Concedo: indicant certitudinem gratiæ sanctificantis, in unoquoque justo existentis, Nego min. nam de ea non agit Apostolus, sed de gratiis gratis datis, de dono linguarum, & aliis miraculis, quæ frequentia erant in Ecclesia Corinthiorum, quæque potenter demonstrabant divinam Christi potentiam, *nisi fortè*, inquit Apostolus, *estis reprobi*, hoc est, nisi aliqui inter vos ex infidelitate blasphemantes divina illa opera tribuant magicis artibus.

Instas: 1. Cor. 2. Apostolus manifestè loquitur de gratia sanctificante, & de ea tamen sic fcribit, verf 12. *Nos autem non spiritum hujus mundi accepimus, sed Spiritum qui ex Deo est, ut sciamus quæ à Deo donata sunt nobis*: Ergo.

Nego anteced. Constat enim vel ex ipsa contextu, Apostolum loqui de myfteriis nostræ Religionis, ac præsertim de Oeconomia redemptionis per Jesum Christum, quæ fuerat abscondita in Deo, quamque nemo sine Spiritu Dei cognoscere potest. *Quis enim hominum, inquit, scit quæ sunt hominis, nisi spiritus hominis qui in ipso est? Ita & quæ Dei sunt, nemo cognovit, nisi Spiritus Dei.* Nos autem non spiritum hujus mundi accepimus, sed Spiritum

qui ex Deo est, ut sciamus quæ à Deo donata sunt nobis.

Dices 3. Sanctus Chrysostomus Hom. 14. in Epist. ad Romanos de interiori Spiritus Sancti testimonio sic loquitur: *Quando verò Spiritus Sanctus testatur, quænam relinquitur ambiguitas?* Ergo in mente sancti Doctoris justus habet omnimodam certitudinem peccata sibi esse remissa.

Respondeo 1. opponendo quæ ex S. Chrysostomo retulimus in confirmationem primæ partis nostræ responsionis. Quare ut sanctus Doctor secum concilietur,

Respondeo 2. distinguendo anteced. Nulla relinquitur ambiguitas circa testimonium Spiritus Sancti in se spectatum, Concedo: firma enim Fide credimus, peccata in Baptismo remitti: Christianos non accipere spiritum servitutis iterum in timore; sed Spiritum adoptionis filiorum, in quo clament: *Abba Pater*. Nulla relinquitur ambiguitas circa signa; quibus justus conjicit Spiritum Sanctum sibi testari, sua peccata esse remissa, se accepisse gratiam adoptionis, Nego antecedens. Quot enim peccatores confidenter Deum inelamant: *Abba Pater*? Nonne Satanas transfigurat se in Angelum lucis, ut decipiat? Illud ipsum agnoscit Calvinus, docet plures falso credere se esse prædestinatos, & peccatorum remissionem esse consecutos. Itaque non de testimonio Spiritus Sancti, sed de testimonio propriæ conscientiæ cum Apostolo dubitamus; ita tamen ut justis non desint signa magis aut minus probabilia acceptæ justitiæ.

Q. *Quibus indiciis justus conjicere potest se gratiam justificationis esse consecutum?*

Huic-

Huicce quæstioni accuratius respondendum: cum ejus resolutio maximè sit necessaria, ut Clerici non solum alios, sed & seipsos probent, juxta illud Apostoli præceptum: *Probet autem seipsam homo*, 1. Cor. 11. Quare

R. Tria signa numerantur à S. Thoma qu. 112. art. 5. his verbis: *Cognoscitur aliquid conjecturaliter per aliqua signa, & hoc modo aliquis cognoscere potest se habere gratiam, in quantum scilicet percipit se delectari in Deo & contemnere res mundanas, & in quantum homo non est sibi conscius alicujus peccati mortalis.*

Primum probatur 1. ex Scriptura, Psal. 96. *Lux orta est justo, & rectis corde lætitia.* Gal. 5. *Fructus . . . Spiritus est caritas, gaudium, pax.* Col. 3. *Si consurrexistis cum Christo . . . quæ sursum sunt sapite, non quæ super terram.*

Sensus est, si revera à morte peccati ad vitam gratiæ educti estis, & Christo resurgenti similes effecti, cum sapore & delectatione, quæ Dei sunt, cogitatis & ametis necesse est. Unde omnibus in Christo renatis dicitur. 1. Petri cap. 2. *Si tamen gustastis quoniam dulcis est Dominus.* In Græco legitur: *Si quidem, quandoquidem gustastis.* De iisdem etiam scribit Apostolus Hebr. 6. vers. 4. *gustaverunt etiam domum cælestem.*

Probatur 2. ex Patribus. Ex S. Augustino, gratia est ipsamet spiritualis delectatio, Lib. de Spiritu & Lit. cap. 3. *Necesse est, inquit, ad bene vivendum, ut homo accipiat Spiritum Sanctum, quo fiat in animo ejus delectatio, dilectioque summi & incommutabilis boni.* Et in Psal. 85. *Si nulla jucunditas, deficiamus.* Et ex hac interiori delectatione concludit, fiduciam nasci, Deum nobis esse propitium: *brevis sermo, inquit, places tu Deo, si tibi non displicet*

Deus. Idem docet sanctus Bernardus Serm. 24. In Cant. ubi sic loquitur : *Cui placet Deus, Deo displicere non potest.*

Probatur 3. ratione ; quia cum remissione peccatorum charitas infunditur : Atqui 1. Joan. 4. *Qui manet in Charitate, in Deo manet, & Deus in eo.* Manet, inquam, in Deo, modo charitati proprio, nempe tanquam amans in amato, in quo ita delectatur saltem secundum interiorem hominem, ut nonnisi Deum & divina cogitare & intendere appetat, nec aliud ei magis in votis sit, quam per omnia dilecto placere, servire, gratificari.

Dices : multi qui pietatem impensè colunt, ejusmodi suavitate nonnunquam privantur, vel in pœnam præcedentis negligentiae, & levioris peccati, vel ad profectum humilitatis, vel ad probationem virtutis. Ipsemet sanctus Bernardus Serm. 54. in Cant. subtractam sibi interiorem illam suavitatem plangit flebilibus his vocibus : *Superbia inventa est in me, & dominus in ira declinavit à servo suo. Hinc ista sterilitas animæ, & devotionis inopia quam patior Nec compungi ad lacrymas queo, tanta est duritia cordis. Non sapit Psalmus, non legere libet, non orare delectat, meditationes solitas non invenio Nunquid qui humilibus dat gratiam, humili auferet datam? Ergo argumentum superbiæ, privatio est gratiæ. Quanquam tamen interdum subtrahitur gratia, sive retrahitur non pro superbia quæ jam est, sed quæ futura est, nisi subtrahatur. Ergo spiritualis delectatio non est effectus inseparabilis à gratia sanctificante, ac proinde sive percipiatur sive non, nihil probabiliter conjici potest.*

Distinguo anteced. Justi nonnunquam privantur spirituali delectatione in inferiori animæ parte,

parte, Concedo: in superiori, Nego antecedens, quia in illis angustiis, quas describit S. Bernardus, Spiritus Sanctus non ita se occultat; ut non possit aliquo probabili signo deprehendi, si-
ve ab ipsomet justo, si-ve à prudenti ejus Confessario. In illa quippe privatione aliter se gesserit justus, aliter peccator: justus se habet ut infirmus, cui panis & omnia alimenta ita fastidio sunt, ut inde doleat, remedia requirat, Medico obtemperet ad tollendum illud fastidium; quæ sæpè demonstrant infirmum appetitu saltem rationali alimenta concupiscere, iisque mente delectari. Sic justus in illa devotionis inopia & cordis durtia, coram Deo amplius sese dejicit, conscientiam mundare satagit, in oratione, quamvis pectore frigido, ut sibi videtur, diutius perseverat. Quis autem ista in eo operatur, nisi Spiritus, de quo scriptum est: *Adjuvat infirmitatem nostram, & postulat pro nobis gemitibus inenarrabilibus?* Dicat ergo Confessarius ei, qui hujusmodi est, *quoniam bene*, consoletur illum; magna enim præfert indicia, quòd sit Deo gratus, & misericordiam consecuturus. Contra peccator in illa tentatione Dei obliviscitur, ad terrenas consolationes se convertit, orationem & alia pietatis opera utpote sensibus insipida dimittit, satisfactionem à Confessario injunctam perfunctoriè exequitur, aut etiam negligit. Hunc non infirmum, sed planè mortuum meritò dixeris: qui enim spiritua-
lia alimenta non solum non admittit, sed nec mente concupiscit, nullum signum præbet vivifici spiritus.

Secundum signum inhærentis gratiæ, & quidem magis notum quoad nos, est contemptus
tempo-

temporalium ; quia charitas, sine qua non habetur remissio peccatorum, & cupiditas seu amor terrenorum, non minùs inter se pugnant, quàm calor & frigus, sanitas & ægrotudo. Sicut ergo eo ipso, quo calor introducit, frigus remittitur ; sic ubi charitas infunditur, cupiditas necessariò minuitur, & pœnitens tanquam à lethali hydropifis morbo sanatus, liberatur à mordacibus curis ambiendi & acquirendi ea, quæ vitam mortalem delectabilem efficiunt. Cum autem inchoata charitas perfecta fuerit, nulla supererit cupiditas. Ita passim Augustinus qui hoc indicio vult deprehendi qui sunt Filii Dei & filii sæculi, cives spiritualis Jerusalem, quibus caput Christus & Lex charitas ; & cives mysticæ Babylonis, quorum princeps Diabolus, & lex cupiditas. Omnes, inquit, pariter templa nostra implent iisdem aquis Baptismi, eodem Pœnitentiæ Sacramento initiantur, sed diversimodè ; quemadmodum olim ex eadem aquæ materia aves & pisces producti sunt, sed in diversa specie & indole. Aves quippe mox ad superiora avolarunt, nunquam ad inferiora redituræ, nisi necessitate sedandæ famis & sitis. Pisces contra in profundo remansere, ibi delectabiliter vivunt, natant, requiescunt, nec sine violentia inde extrahuntur. Similiter justi in Sacramento Baptismi & Pœnitentiæ, nova creatura in Christo effecti, deinceps non quæ super terram, sed quæ sursum sunt, concupiscunt & sapiunt, ibi eorum conversatio & voluptas ; sic utuntur hoc mundo tanquam non utantur, hoc est, sine affectu, sed ex necessitate naturæ & proprii status. Mali vero post perceptum Sacramentum, eo ardore, quo

quo prius, terrena sitiunt & vitæ præsentis sic addicti sunt: ut eam immortalem exoptent, dicantque apud S. Augustinum Hom. ex Lib. 50. Hom. si non motu linguæ, saltem cordis affectu: *Utinam hic mihi Deus in hoc sæculo omnia bona tribuat: non ad me pertinet quod in futuro sæculo de me fieri velit, o infelix anima!* &c.

Scio plures hancce cordis sui impletatem eo prætextu sibi dissimulare, quod non amore præsentis vitæ, sed judiciorum Dei terrore mortem exhorreant. Verum periculose eos decipi vel inde patet, quod interim omnis eorum sollicitudo sit delectabiliter hinc vivere, nulla cura sibi placandi judicem, & promerendi coronam justitiæ, quam Apostolus dicit 2. Timoth. 4. repositam iis, qui licet timeant Dei judicia, nihilominus diligunt adventum ejus; quia Christus per mortem suam destruxit eum, qui habebat mortis imperium, id est Diabolum, ut *liberaret eos, qui timore mortis per totam vitam obnoxii erant servituti*, Hebr. 2. vers. 4. & 15.

Tertium indicium, illudque insigne inhærentis gratiæ habetur, cum quis offensam Dei sic timet, cavetque, ut nullius peccati mortalis conscius se sentiat, & insuper vehementer doleat, quoties ex infirmitate in leviora labitur. Quia ex ejusmodi dolore duo moraliter certa conjicere licet. Primum, quod insit principium vitæ spiritualis. Secundum, quod non ex stupiditate, neque ex cordis cæcitate, aut ignorantia vincibili, ut contingit in peccatoribus; sed ex sana conscientia nullius gravioris peccati sit conscius. Namque ut ratiocinantur S. Augustinus, & auctor Lib. cœlest. & Eccles. Hierarchiæ, dolor
non

non exurgit, nisi ex pugna contrariorum, boni & mali; quamdiu Medicus v. gr. secatur quod putridum est, non sentit æger, neque dolet: at ubi attigerit quod vividum & sanum, natura refugit quod sibi noxium est, exclamat infirmus, nec præ dolore sectionem patitur. Atque hinc certò colligit membrum non esse prorsus corruptum; sed curandum quod in eo superest boni. Quidni Medicus spiritualis simile iudicium ferat de eo, qui Dei offensam summè exhorret, peccandi occasiones sollicitè fugit, contrà ingruentes tentationes acriter pugnat, & ubi se vel leviter vulneratum advertit, vehementi dolore pungitur? Nam præterquam quod non doleret, nisi spiritualiter viveret, ipsemet Apostolus testimonium perhibet Rom. 8. gemitus illos esse effectus inhabitantis spiritus, ac proinde, qui sic affectus dicit se conscius non esse ullius peccati mortalis, signum præbet valde probabile gratiæ sanctificantis. Quomodo enim conscientia, quæ leviora peccata sine dolore non admittit, nec patitur, sed quamprimum rejicit, cum gravioribus quiesceret?

Ergo conscientiæ testimonium sine contemptu temporalium, & ea, quam diximus, delectatione in Deo, non valet ad generandam fiduciam, de qua nobis est sermo, quia cum ex dicendis multiplex sit conscientia, alia simplex & recta, alia erronea & mala, valdè timendum est, ne peccitens, qui delectationes terrenas sectatur, peccata venialia negligit, multiplicatque sine ullo doloris sensu, dicat ex cordis cæcitate & ignorantia vincibili, se nullius peccati mortalis esse conscius; nam ex sancto Augustino, multa peccata hominum

num judicio levia videntur, quæ in statera Sanctuarii gravia reperiuntur. Denique qui sincerè timet Deum, nihil negligit eorum, quæ ipsi displicent.

§. IX.

Utrum justus gratiam justificantem amittere possit?

Negavit olim Jovinianus, ut constat ex S. Hieronymo Lib. 2. quem contra illum hæreticum scripsit. Calvinus eundem errorem à mille trecentis annis damnatum suscitavit, Lib. 3. Instit. cap. 2. paragr. 1. In illam autem foveam lapsus est ex erroneo suo principio, quo statuit peccatorem justum fieri sola fide, qua certò credit se esse prædestinatum; & ideo merita Passionis Christi sibi applicari. Hoc enim fundamento posito, necessariò sequitur, nec Davidem per adulterium & homicidium, nec Petrum per negationem à justitia excidisse, nec ullum prædestinatum per atrociora crimina gratiam justificantem amittere; quamdiu Fides in corde remanserit; quia immutabile est Dei prædestinantis decretum. Contra hunc detestandum errorem extat Can. 23. Sess. 6. Concilii Tridentini his verbis conceptus: *Si quis hominem semel justificatum dixerit amplius peccare non posse, neque gratiam amittere, atque ideo eum qui labitur & peccat, nunquam verè fuisse justificatum . . . anathema sit.* Juxta quam definitionem

R. De fide est, justum amittere posse gratiam justificantem.

Pro-

Probatur 1. ex Scriptura. Psal. 2. *Apprehendite disciplinam, ne quando irascatur Dominus, & pereatis de via justa.* Ezech. 18. *Cum averterit se justus à justitia sua: & fecerit iniquitatem, morietur in eis.* Sic Lucifer justitiam, in qua conditus fuerat, per peccatum amisit: sic Saul à Deo electus, peccando in æternum periit: sic Salomon prius Deo amabilis, & in fine reprobatus juxta S. Augustinum Lib. 22. contra Faustum c. 88. *De Salomone, inquit, quid dicam, quem vehementer arguit sacra Scriptura, atque condemnat, nihilque de pœnitentia ejus, vel in eum indulgentia Dei omnino commemorat?* Hinc Apostolus 1. Cor. 10. graviter monet, qui se existimat stare, videat ne cadat. Et c. 6. *Nolite errare, neque fornicarii, neque, &c. regnum Dei possidebunt.* Quibus ipsemet perterritus scribit cap. 9. *Castigo corpus meum, & in servitutem redigo, ne fortè cum aliis prædicaverim, ipse reprobus efficiar.* Liceat ergo adversus Calvinianos contorquere ejusdem Apostoli verba: *Si quis vobis evangelizaverit præterquam quod accepistis, anathema sit.*

Probatur 2. ex sanctis Patribus. Ex sancto Hieronymo, qui ex professo Lib. 2. contra Jovinianum, confutavit oppositam hæresim. Ex S. Augustino, qui Lib. de Hæresibus Hæresi 82. Joviniani sententiam numerat inter hæreses ab Ecclesia proscriptas. Et Lib. de Cor. & Grat c. 13. sic scribit: *Credendum est quosdam de filiis perditionis, non accepto dono perseverandi usque in finem, in fide, quæ per dilectionem operatur, incipere vivere, & aliquandiu fideliter & justè vivere, & postea cadere, neque de hac vita priusquam id contingat, auferri.*

Probatur 3. ratione; quia ex impia Calvinistarum doctrina sequitur omnimoda morum subversio.

versio. Si enim justus in eorum sententia non amittit gratiam justificantem, quantumcumque detestabiliter peccet, modò non timeat propterea mitti in gehennam, nec de prædestinatione sua diffidat, sequitur 1. justis & Dei amicis pugnandum contra indeliberatos timoris motus (quibus Spiritus Sanctus ad declinandum peccatum, & ad perseverandum incitat) veluti contra gravissimam & periculosissimam tentationem, nec audiendum Christum dicentem, Luc. 12. v. 4. & 5. *Dico vobis amicis meis . . . timete eum, qui postquam occiderit, habet potestatem mittere in gehennam.* 2. Salubre fore consilium, fortiter crede; & fortius pecca, quia nihil ita expellit timorem, quàm peccandi assiduitas, qua induratur cor, & præsumptio contra desperationem inducitur.

Dices ex Apostolo 1. Cor. 13. *Charitas nunquam excidit*: Ergo.

Distinguo antecedens, nunquam excidit per supervenientem gloriam, & visionem beatificam, quemadmodum fides & spes, Concedo, eadem enim charitas, quæ in vita inchoatur & crescit, in patria perficietur, & in æternum permanebit, sicut reverentialis & castus Dei timor: contra verò per Dei intuitivam visionem & possessionem fides & spes destruentur, uti idem docet Apostolus: charitas nunquam excidit superveniente gravi peccato. Nego antec.

Instas. Atqui charitas per peccatum extinguere non potest, ut constat ex pluribus Scripturæ textibus; nam Cant. cap. 8. habetur: *Aquæ multæ non potuerunt extinguere charitatem.* Rom. 8. *Certum quoddam neque mors, neque vita, &c. poterit nos separare à charitate Dei.* Et Joan. cap. 4. *Qui autem bi-*

D. Habert Theolog. Tom. II.

G g

berit

berit ex aqua, quam ego dabo ei, non sitiet in æternum; sed . . . fiet in eo fons aquæ salientis in vitam æternam: Ergo.

Distinguo anteced. Nec aquæ tribulationum, nec timor mortis, nec fitis, seu cupiditas rei cuiusque creatæ prævalere possunt adversus hominem, gratia sanctificante & charitate instructum, si eam per liberum arbitrium non abjiciat, nec negligat, Concedo: si abjiciat aut negligat, nego anteced. Quemadmodum enim Adamus, licet deferendo justitiam originalem, mortem incurrerit, immortalis tamen dicitur creatus; quia manente statu innocentiae, mors adversus illum prævalere non poterat; Similiter justus, si in omnibus sumat secutum fidei per dilectionem operantis, potest omnia tela nequissimi ignea extinguere, secus si potentissima illa arma voluntariè abjiciat.

Urges: atqui justus non potest abjicere gratiam sanctificantem, ut manifestè colligitur ex his verbis 1. Joan. 3. v. 9. *Omnis qui natus est ex Deo, peccatum non facit; quoniam semen ipsius in eo manet; & non potest peccare, quoniam ex Deo natus est.* Ubi Apostolus probat liberum non esse ei, qui natus est ex Deo deferere justitiam; quia, ut scribit v. 6. *Omnis qui peccat, non vidit eum, nec cognovit eum.* Atqui non potest dici, quòd natus ex Deo non cognovit eum, cum natus sit per verbum veritatis, juxta illud Jacobi 1. *Voluntarie genuit nos verbo veritatis: Ergo.*

Nego subsumptum, ad cujus confirmationem SS. Hieronymus & Augustinus jampridem responderunt hæreticis, locum illum objicientibus: ille Joviniano Lib. 2. iste Pelagianis Lib. 2. de pecc. mer. c. 7. Lib. de Gratia Christi cap. 20. & tract. 5. in 1. Joan.

Primò,

Primò , qui natus est ex Deo , peccare non potest ; quia charitas , cùm sit plenitudo legis , peccatum grave non patitur , quemadmodum fides informis. Homo quippe sola fide instructus , aliquando graviter peccat , & nihilominus remanet fidelis : justus contra non ita peccare potest , alioquin sic peccando desinit esse justus , & deseritur luce veritatis , qua coruscante priùs à peccato ad Deum se converterat. Quòd autem id contingere possit , patet ex alio Apostolo , cujus hæc sunt verba Hebr. 6. v. 4. *Impossibile est . . . eos , qui semel sunt illuminati , gustaverunt etiam donum cœlestē , & participes facti sunt Spiritus Sancti . . . & prolapsi sunt , rursus renovari ad pœnitentiam.*

Secundò ; ex sancto Augustino locis citatis. Justus in quantum renovatus , & ex Deo natus , nec peccat , nec peccare omnino potest , etiam venialiter ; sed quatenus est filius sæculi , & in eo remanet aliquid vetustatis & cupiditatis. Nam in Baptismo , inquit , *quamvis tota & plena fiat remissio peccatorum ; tamen si continuò tota & plena etiam hominis in æternam novitatem mutatio fieret . . . non diceret Apostolus ;* Etsi exterior homo noster corrumpitur ; sed interior renovatur de die in diem. *Profectò enim qui de die in diem renovatur , nondum totus est renovatus . . . Proficimus ergo in renovationem , justamque vitam , per quod filii Dei sumus , & per hoc peccare non possumus . . . Nunc ergo ei (Deo) & similes esse jam cœpimus , primitias habentes Spiritus , & adhuc dissimiles per reliquias vetustatis . . . Illinc ergo peccare nos possumus : hinc verò si dixerimus , quia peccatum non habemus , nos ipsos seducimus.*

§. X.

Utrum gratia sanctificans sit æqualis in omnibus justis?

Affirmavit Jovinianus, teste sancto Hieronymo Lib. 2. contra illum hæreticum, qui juxta Stoicorum doctrinam credebatur virtutes & peccata esse paria. Idem etiam nunc docent Pseudo-Reformati, definientes gratiam justificantem esse formaliter ipsam Christi justitiam fide apprehensam, quæ, cum tota & minimè per partes credentibus applicetur, ut Calviniani docent in suo Catechismo, sequitur quod omnes æqualiter sint justī, si-ve majora, si-ve minora virtutis opera producant. Hunc errorem proscripsit Concilium Tridentinum Sess. 6. Can. 24. his verbis: *Si quis dixerit justitiam acceptam non conservari, atque etiam augeri coram Deo per bona opera: sed opera ipsa fructus solummodo & signa esse justificationis adeptæ, non autem ipsius augendæ causam; anathema sit.* Quare,

Respondeo, de fide est gratiam sanctificantem non esse in omnibus justis æqualem, sed in aliis majorem, in aliis minorem.

Probatur 1. ex Scriptura Prov. 4. *Justorum semita, quasi lux splendens procedit & crescit usque ad perfectam diem.* 2. Corinth. 9. *Augebit incrementa frugum justitiæ vestræ.* Apoc. ultimo, *qui justus est, justificetur adhuc.* Orant persæpe Apostoli, ut Fideles impleantur in omnem plenitudinem Dei, Eph. c. 3. agnitione Dei, Coloss. cap. 1. pace & charitate, Jud. vers. 2.

Probatur 2. ex sanctis Patribus. Hieronymus cit. L. 2. contra Jovinian. *Quare dicunt Apostoli, adauge nobis fidem, si omnium una mensura est?* Augustinus

nus Serm. 158. aliàs 16. de verbo Apost. *Iustificati sumus; sed ipsa iustitia, cum proficimus, crescit.* Ep. 172. aliàs 29. *Induti sunt Sancti iustitia, alii plus, alii minus.* Et tract. 5. in primam Joan. ubi de charitate, *cum fuerit nata, nutritur; cum fuerit nutrita, roboratur; cum fuerit roborata, perficitur.* Favet ratio; quia charitas, utpotè amor amicitiae, amici praesentiam quaerit, donec illi perfecte uniatur, juxta illud Psalm. 104. *Quaerite Dominum & confirmamini, quaerite faciem ejus semper.* Appropinquat autem dum crescit per bona opera, & cum perfecta fuerit apprehendet, possidebitque.

Objicit sibi S. Thomas Lect. 1. in c. 6. Hebr. in qua expendit hæc Apostoli verba: *ad perfectiora feramur*; perfectio non est praecepti, sed consilii: atqui contendere ad perfectiora, pertinet ad perfectionem: Ergo minus conveniens videtur illud Apostoli praeceptum.

Respondet duplicem esse perfectionem, alia est exterior, quam sanctus Doctor reponit in exterioribus actibus, quæ sunt signa interiorum sicut virginitas, voluntaria paupertas; & ad hanc non omnes teneri patet ex his Christi verbis Matth. 19. *Si vis perfectus esse, vade, vende quæ habes, & da pauperibus*; dicendo enim *si vis*, consilium dat, non imponit praeceptum. Alia perfectio est interior, quæ consistit in dilectione Dei & proximi; *Et ad perfectionem hujusmodi*, inquit, *omnes tenentur tendere, quia si quis nollet plus diligere Deum, non faceret quod exigit charitas.* Eadem est sententia sancti Bernardi in Epist. 91. in qua sic scribit: *Minimè pro certo est bonus, qui melior esse non vult, & ubi incipis nolle fieri melior, ibi etiam desinis esse bonus.* Enimverò perseverantia hominis viatoris in eo differt à perseve-

rantia comprehensoris; quòd ista sit immobilitas in termino, & summo bono adepto; illa verò consistat in motu & progressu, donec attingatur terminus; neque enim desinit quis esse viator præcisè, quia viam deserit; sed quia in via subsistit, nec ulteriùs progredi decernit.

Quòdnam est signum proficientis animæ?

R. Cùm in omni motu necessariò intelligantur duo termini, scilicet terminus à quo mobile recedit, & terminus ad quem tendit, quique aliquando prospici non potest; viator intelligit ea proportionem, se esse proximiorē loco, ad quem tendit, quo se remotiorē videt à termino, à quo cœpit ejus peregrinatio, tumque judicat se nulum progressum fecisse, cùm post multos viarum anfractus & circuitus deprehendit se adhuc esse vicinum loco, à quo diverterat.

Porro in via virtutis, cupiditas & inordinatus amor sui, est terminus à quo recedere oportet; Deus verò terminus & finis, quem intendit justus. Ergo, *vis pervenire? incipe transilire*, inquit S. Bernardus cap. 10. de Vita & Mor. Cler. alioquin cavendum est, ne si nonnulla Legis cæremonialia observans, circa temporalia, velut rota volvaris, cadat in te quod scriptum est Psalm. 11. *in circuitu impii ambulant*. Signum itaque moraliter certum proficientis animæ, si minuat cupiditates: si refecet multa superflua, quæ prius necessaria arbitrabatur: si minùs solito sibi complaceat: si abstineat à quibusdam verè illicitis, quæ antea vel licita videbantur, vel saltem negligebat; nam ex sancto Augustino censetur propè aut longè respectu Dei, non spatiis locorum, sed similitudine, vel dissimilitudine morum.

§ XI.

Utrum gratia sanctificans sit necessaria?

Certum est absolutè esse necessariam, 1. Ut homo constitutur justus, filius Dei adoptivus, & hæres vitæ æternæ; quia ex dictis gratia sanctificans est causa formalis justificationis. 2. Ut opera supernaturalia sint vitæ æternæ & augmenti justitiæ meritoria de condigno. *Sequuntur opera (meritoria) justificatum, non præcedunt justificandum*, inquit S. Augustinus Lib. de Fide & Op. c. 14. sed illud fidei dogma stabiliemus, ubi de merito.

Quæritur itaque hic duntaxat, utrum gratia sanctificans sit necessaria ad eliciendum quemlibet actum supernaturaliter bonum.

Affirmavit Joannes Hufs; in Concilio enim Constantiensi Sess. 15. art. 16. inter ejus errores numeratur hæc propositio: *Sine gratia sanctificante nullum bonum opus fieri potest*. Pseudo-Reformati, juxta fundamentalem errorem suum, quo definiunt omnia virtutis opera per concupiscentiam infici, & esse vera peccata, sed justis non imputari propter justitiam Christi fide apprehensam, ipsisque applicatam, non solum negant posse esse ullum bonum opus in nondum justificatis; sed insuper contendunt illos eo amplius peccare, quo magis satagunt bonis operibus præparari ad justificationem: quam impletatem Concilium Tridentinum Sess. 6. Can. 7. anathemate percussit his verbis: *Si quis dixerit opera omnia, quæ ante justificationem fiunt, quacunque ratione facta sint, verè esse peccata, vel odium Dei mereri; aut quando vehementius quis nititur se disponere ad gratiam, tanto eum gravius peccare; anathema sit*. Fuit etiam 25. propositio Baji à

summis Pontificibus Pio V. & Gregorio XIII. damnata : *Omne quod agit peccator , aut servus peccati , peccatum est.* Quare ad propositam quæstionem

R. Gratia sanctificans ad quodlibet opus supernaturaliter bonum , absolutè necessaria non est , sed sufficit supernaturale Dei auxilium actuale : sine ea tamen peccator nondum pœnitens , diu non perseverabit absque novo peccato.

Dixi, *peccator nondum pœnitens* : quia de pœnitentibus , quos Ecclesia olim diuturno tempore probabat ante reconciliationem , aliter judicandum.

Prima pars responsionis probata manet ex dictis Paragraphis 6. & 7. de dispositionibus in adulto necessariis ad justificationem.

Confirmatur Luc. 18. Publicanus à Christo laudatur ob pœnitentiam & sui dejectionem ; & hisce dispositionibus gratiam sanctificantem , qua carebat , consecutus est. Act. 10. Cornelii orationes & eleemosynæ fuerunt Deo gratæ ; atqui ex S. Augustino Epist. 287. aliàs 57. q. 2. Cornelius nondum erat justificatus , ibi enim recensetur inter illos , in quibus Deus , licèt aliquid virtutis operetur , nondum tamen inhabitat per gratiam sanctificantem.

Dices 1. Matth. 7. *Non potest . . . arbor mala bonos fructus facere* : atqui peccator est arbor mala : ergo.

Distinguo min. peccator ut peccator , hoc est secundum malam voluntatem & intentionem spectatus , est mala arbor , nec potest bonos fructus facere ; quemadmodum justus ut justus est bona arbor , & ut sic peccare non potest , ex 1. Joan. cap. 3. Concedo : peccator secundum naturam spectatus , & actuali Dei auxilio adjutus ; est mala arbor , Nego minorem. Sicut enim justus ex
vetu-

vetustate remanente peccare potest, & malos fructus facere: ita peccator ex bono in ipso superstite, si Deus præveniat & adjuvet, fructus bonos facere potest. Ita S. Augustinus Lib. 4. contra Julian. c. 3. & Lib. 1. cap. 8. ubi per malam arborem intelligit malam voluntatem: & per bonam arborem, bonam voluntatem: mala autem voluntas non potest bonum facere, nec bona malum.

Dices 2. ex S. Augustino Lib. de Gratia Christi cap. 26. ubi non est dilectio, bonum opus non imputatur, nec rectè vocatur. Ergo.

Distinguo anteced. ubi non est dilectio, hoc est, bona voluntas, seu pia affectio & volitio, Concedo, qui enim serviliter, & renitente voluntate opus injunctum perficit, benè non operatur: ubi non est dilectio ex Theologica charitatis virtute proficiscens, Nego anteced. Quòd autem S. Augustinus nomine dilectionis intelligat quamlibet bonam voluntatem, & pium affectum, patet ex Lib. de Gratia & libero arbitrio cap. 7. ubi sic scribit: *Quod quidem sine suo fructu admoneretur (liberum arbitrium) nisi prius acciperet aliquid dilectionis, ut addi sibi quæreret, unde, quod jubebatur, impleret.* Et alibi docet fidem, quæ in peccatoribus est informis, non esse sine dilectione, hoc est, sine pia affectione; quia nemo credit, nisi volens.

Secunda pars: nempe quòd homo sine gratia sanctificante, omnia peccata mortalia diu vitare moraliter non possit,

Probatur 1. ex Scriptura, quæ victoriam temptationum refert ad gratiam sanctificantem, & Spiritum Dei inhabitantem in cordibus, Rom. 6. v. 4. *Peccatum enim vobis non dominabitur.* Et rationem subdit: *non enim estis sub Lege, sed sub Gratia,* uti-

que sanctificante ; renatos quippe alloquitur , 1. Joan. 4. v. 4. *Vos ex Deo estis , filioli , & vicistis eum* (mundum sive Antichristum) *quoniam major est , qui in vobis est , quàm qui in mundo : c. 3. v. 9. Omnis qui natus est ex Deo , peccatum non facit ; quoniam semen ipsius in eo manet : c. 5. v. 18. Scimus quia omnis natus ex Deo , non peccat ; sed generatio Dei conservat eum , & malignus non tangit eum.*

Probatur 2. ex Patribus : ex S. Augustino Lib. de Spiritu & Littera cap. 26. *Factores Legis justificabuntur , ut sciamus aliter eos non esse factores Legis , nisi justificentur : ut non justificatio factoribus accedat ; sed ut factores Legis justificatio præcedat.* Ex S. Gregor. Hom. 11. in Ezech. *Peccatum quod per pœnitentiam non deletur , suo pondere ad aliud trahit.* Ex S. Th. 1. 2. q. 109. a. 4. *In statu naturæ corruptæ non potest homo implere omnia mandata sine gratia sanctificante.* Et a. 8. *In statu naturæ corruptæ indiget homo gratia habituali sanante naturam , ad hoc quod omnino à peccato abstineat.* Ex Homil. 34. Lib. Operis imperfecti apud sanctum Chrysostomum : *Si semel peccantes nos obligaverimus operibus diaboli , jam nostra virtute evadere non possumus ; sed sicut navis , fracto gubernaculo , illuc ducitur , ubi tempestas voluerit ; sic & homo divinæ gratiæ auxilio perduto per peccatum , agit non quod vult , sed quod diabolus vult.*

Probatur 3. ratione duplici.

Prima : Sicut in appetitu inferiori , qui in hac vita rationi totaliter subditus non est , insurgunt inordinati motus , propter quos justi moraliter non possunt vitare omnia peccata venialia , ut infra dicetur : similiter quamdiu ratio ipsa non subditur Deo , ut contingit in peccatore , cùm sit habitualiter à Deo aversus , moraliter necesse est in voluntate excitentur inordinati affectus : *Maximè ,* inquit

inquit sanctus Thomas laudato art. 8. *cum homo in repentinis operetur secundum finem propositum, & secundum habitum præexistentem ex Philosopho. 3. Ethic. cap. 5. Et quamvis ex præmeditatione possit aliquid agere contra eundem finem atque habitum: tamen non potest semper esse in tali præmeditatione, adeoque nec diu non operari secundum convenientiam inordinatæ voluntatis, nisi citò per gratiam debitus ordo reparetur.*

Secunda ratio. Is lapsus diu vitare nequit, qui gravioribus pulsatur tentationibus, & potentiori Dei præsidio destituitur: Atqui peccator, qui pœnitentiæ remedia negligit, in ejusmodi incommoda volens se conjicit. Ergo.

Minoris duæ sunt partes.

Prima, quæ est de gravioribus tentationibus, ostenditur. Namque 1. peccatori dominatur cupiditas, quæ eo ipso saporem rerum cœlestium impedit, quo ad terrenas impellit: *Præoccupatum nempe secularibus desideriis animum delectatio sancta declinat: nec misceri poterunt vera vanis, æterna caducis, spiritualia corporalibus, summa imis, ut pariter sapias quæ sursum sunt, & quæ super terram,* ait S. Bernardus Sermon. 5. de Ascens. Atqui ex S. Augustino Lib. de Gratia Christi cap. 26. jam laudato; & Lib. de Spiritu & Littera cap. 30. sine suavitate & dilectione justitiæ Lex non impletur: *Per Legem, inquit, cognitio peccati, per fidem, impetratio gratiæ contra peccatum: per gratiam, sanatio animæ à vitio peccati: per animæ sanitatem, libertas arbitrii: per liberum arbitrium, justitiæ dilectio: per justitiæ dilectionem, Legis operatio.* 2. In peccatore concupiscentia & passionibus magis sunt effrænes, & rationem acrius impugnant; justum quippe est, ait S. Augustinus, ut ratio, quæ Deo superiori suo non obtem-

obtemperat ; Inferiorem suum , scilicet appetitum sensitivum sentiat rebellem. 3. Diabolus majorem potestatem exercet in peccatores , qui nisi resipiscant , laqueis ejus *captivi tenentur ad ipsius voluntatem*. 2. Tim. c. 2. v. 26. Ex his autem quis non intelligat difficile admodum esse non labi in vita tam lubrica , propellente diabolo , & Deo deferente, quod ultimum nunc incumbit probandum ?

Secunda itaque minoris pars probatur ; quia multa justè denegantur inimicis , quæ amicis liberalissimè conceduntur : Atqui gratia sanctificans, seu charitas constituit Dei amicos, Sap. 7. Peccatum verò Dei inimicos, juxta illud Sap. 14. *Odio sunt Deo impius & impietas ejus*. Hinc Psal. 33. *Oculi Domini super justos, & aures ejus in preces eorum: vultus autem Domini super facientes mala*. Et Psal. 17. Regius Psalter Deum alloquens , ait : *Cum sancto sanctus eris . . . & cum perverso perverteris*, hoc est, secundum communem interpretationem : cum bono benignè & liberaliter ages : contra verò cum perverso austerè & durè , ita ut ipsi perversus videaris, interprete S. Augustino in hunc locum. Denique ex eodem S. Doctore passim , & ex S. Thoma in caput 1. Epist. ad Rom. subtractio gratiæ, saltem commodioris, est justa peccati pœna , sicut & permissio sequentium peccatorum, juxta illud Psalmi 80. *Dimisi eos secundum desideria cordis eorum ; ibunt in adinventionibus suis*.

Ex his Pastor valida argumenta depromere poterit contra eos , qui in peccato obdormiunt, & vix semel per annum ad Sacramentum pœnitentiæ recurrunt.

Dices 1. Si gratia sanctificans est necessaria ad vitandum peccatum; peccator impœnitens carebit auxilio sufficiente, ac proinde necessariò peccabit; falsum consequens: Ergo & antecedens.

Respondeo 1. Non diximus, gratiam sanctificantem esse absolutè necessariam, sed moraliter duntaxat, non ad quodlibet grave peccatum vitandum, sed ad omnia peccata diu vitanda.

Respondeo 2. distinguendo majorem. Peccator carebit auxilio sufficiente proximo, Transeat: remoto, Nego majorem. Deus enim interiùs illum movet, & excitat ad pœnitentiam, per quam impetraret auxilia validiora & proxima.

Dices 2. Ecclesia non præcipit ut Fideles sæpius peccata confiteantur; quàm semel in anno, Ergo impœnitens potest per annum esse privatus gratia sanctificante absque novi peccati periculo.

Nego conseq. Namque 1. perabsurdè, ne dicam impiè, quis colligeret ex præcepto annuæ Confessionis Ecclesiam peccatoribus permittere, ut ad annum conversionem suam differant contra divinum illud præceptum: *Ne tardes converti ad Dominum, & ne differas de die in diem.* Eccli. 5. v. 8.

2. Annuæ Confessionis præcepto Ecclesia voluit duntaxat prohibere, sub pœna interdicti, ne Fideles, quorum multos Sacramentum Pœnitentiæ negligere noverat, ultra annum peccata sua confiteri differrent; Et hoc patet tum ex iis Canonis vocibus, *semel saltem in anno*: tum ex Ecclesiæ Cohortationibus in Concilio Tridentino Session. 13. & 22. ad frequentem Sacramenti Eucharistiæ perceptionem, ad quam peccatori non licet accedere, nisi præmissa Sacramentali confessione,

sessione , ex Concilio Tridentino , Session. 13.
cap. 7.

CAPUT V.

De Gratia actuali.

Recolendum est gratiam actualem ex dictis cap. 2.
esse supernaturalem , tum mentis illustrationem, seu cogitationem, tum piam voluntatis motionem seu affectionem.

Quamvis autem divinæ illæ motiones sint actus realiter distincti & diversæ speciei , cum à diversis facultatibus , scilicet intellectu & voluntate , supernaturaliter procedant , nomine tamen gratiæ actualis conjunctim intelliguntur ; quia sola mentis illustratio sine divina voluntatis motione , nihil prodest ad salutem. Unde Pelagius eo ipso habitus est gratiæ hostis & destructor , quo negavit necessariam Dei motionem in voluntate, licet admiserit (ut nonnullis videtur) quasdam mentis illustrationes & revelationes. *Non in eo nos (dicimus) divinitus adjuvari ad operandam justitiam, quod Deus Legem dedit plenam bonis sanctisque præceptis ; sed quod ipsa voluntas nostra, sine qua operari bonum non possumus , adjuvetur & erigatur impartitè Spiritu gratiæ , sine quo adjutorio doctrina illa littera est occidens . . . Nam sicut illis (Philosophis) per creaturam cognitoribus Creatoris ea ipsa cognitio nihil profuit ad salutem . . . Ita eos, qui per Legem cognoscunt quemadmodum sit homini vivendum, non justificavit ipsa cognitio.* Augustinus Lib. de Littera & Spiritu c. 12. Subdolè ergo quis confiteretur gratiæ interiori in hoc statu aliquando resisti , quia homo nonnunquam sanctæ cogitationi divinitus immis-

sæ

sæ non obtemperat, si interim negaret ullam dari supernaturalem voluntatis motionem, cui resistatur; quia ubi sermo est de gratia actuali, Catholici intelligunt non solum mentis illustrationem, sed præcipuè piam voluntatis affectionem; sine qua nequidem credere possumus quantumvis interiùs edocti & illustrati. Corde enim creditur, Rom. 10.

Sed antequam opus aggrediamur, monendi Lectores, devolvi nos in æstuosum quoddam pelagus, & turbulentissimis refertum procel-
lis, quas nonnulli Molinæ discipuli concitant. Volunt illi unum Molinæ de gratia dogma, non ullum aliud, esse Catholicum, nullum prorsus interjectum esse medium Jansenismum inter & Molinismum; eumque, qui Molinista non sit, esse Jansenistam; uno verbo, gratiam per se efficacem, in Scholis omnibus Catholicis (si Molinæ scholam excipias) omnibus sæculis propugnatam, fontem esse & originem, unde errores in Jansenii Libro damnati necessariò profluxerunt.

Porro de actuali gratia, quæritur 1. utrùm sit necessaria? 2. quæ ejus species, & quomodo inter se differant? 3. Utrùm gratia actualis detur omnibus?

§. I.

De Necessitate Gratiae actualis.

Expendimus Cap. præcedenti, Paragr. 11. an & quomodo gratia habitualis sit necessaria? Hic similis quæstio movetur circa gratiam actualem, cui ut fiat satis,

Præ-

Præmittendum 1. aliud esse verum & bonum supernaturale, & ad vitam æternam pertinens: aliud naturale, & illud vel est facile, vel difficile, five ex objecto, ut martyrium; five ex circumstantiis, putà ex concupiscentia, & gravibus tentationibus.

Præmittendum 2. duplicem esse potentiam, physicam scilicet & moralem.

Physica potentia est ea, cujus virtus activa proportionata est operi faciendo. Hanc potentiam non habet ad longum iter conficiendum, qui recens convalescit ex longo & gravi morbo; quia tam arduum opus vires ejus debilitatas longe superat. Hic adversarius mihi absque pudore imponit pag. 43. asseritque meam esse hanc propositionem: *Comme un homme malade peut & ne peut pas marcher: il le peut absolument & physiquement, parcequ'il a des jambes; mais il ne le peut pas moralement & relativement à cause de sa foiblesse actuelle.*

Moralis potentia est facultas non solum proportionata, sed etiam expedita, & nullis difficultatibus, saltem quæ graves sint, implicata, quæ ab opere suscipiendo deterreant, qualem cerne-
 • re est in homine vegeto, & in laboribus perferendis assueto, respectu longioris peregrinationis. Contra verò impotentiam moralem hinc patitur delicatus & deliciis diffluens; quamvis enim sufficientes vires habeat ad longum iter pedibus conficiendum, nunquam tamen illas exeret propter nimiam difficultatem. Denique illud dicitur physicè impossibile, quod excedit vires, & inducit absolutam necessitatem non operandi, adeoque

que excusat à peccato, quia omne peccatum debet esse voluntarium & liberum. Moraliter verò impossibile dicitur, quod, etsi vires absolute non superet; ita tamen difficile est, ut voluntas sibi dimissa nunquam ad illud faciendum se determinatura sit. Et hæc impotentia non excusat à toto peccato, sed à tanto, ut loquitur S. Thomas; quia non omninò perimit voluntarium & liberum; sed minuit duntaxat, proindeque voluntas vehementi tentationi non cedit ex necessitate, sed ex ignavia & socordia, quatenus vires omnes ad resistendum non exierit. Ita sanctus Thomas 1. 2. quæst. 10. artic. 3. & quæst. 24. de libero arbitrio artic. 12. ad 12. *Dicendum*, inquit, *quod cupiditas non potest esse cogens absolute liberum arbitrium, quod semper est liberum à coactione; sed dicitur cogens propter vehementiam inclinationis, cui tamen potest resisti, licet cum difficultate.* Limitat tamen laudato articulo 3. nisi violentia passionis rationem absorbeat.

Hanc impotentiam moralem cum libertate S. Augustinus conciliat Lib. 3. de pec. mer. c. 3. ubi Pelagianis objicientibus hominem non peccaturum, si gravi tentationi resistere sit impossibile, sic respondet: *Sed hoc non vident quod ad nonnulla superanda, quæ vel malè cupiuntur, vel quæ malè metuntur, magnis aliquando & totis viribus opus est voluntatis, quas nos non perfecte in omnibus adhibitueros prævidit, qui per Prophetam veridicè dici voluit, non justificabitur in conspectu tuo omnis vivens.* Et sanctus Bernardus Sermon. 81. in Cant. *Interveniente peccato, inquit, patitur quandam vim ipse homo, sed à voluntate, non à natura; ut ne sic quidem ingenita libertate privetur. . . . Nescio quo pravo & miro modo ipsa*
D. Habert Theolog. Tom. II. H h sibi

sibi voluntas peccato quidem in deterius mutata, necessitatem facit, ut non necessitas, cum voluntaria sit excusare valeat voluntatem: nec voluntas, cum sit illecta, excludere necessitatem. Est enim necessitas hæc quodammodo voluntaria; est favorabilis vis quædam premendo blandiens, & blandiendo premens, unde se se rea voluntas, ubi semel peccato consenserit, nec excutere jam per se, nec excusare ullatenus de ratione queat.

Ex hac autem præmissa explicatione facile eruetur responsio ad quæstiones, quæ fieri solent circa actualis gratiæ necessitatem.

Q. 1. *Utrum sine gratia actuali possit quis cognoscere verum, velle & operari bonum supernaturale?*

R. Omnino non potest sive potentia morali, sive potentia physica. Ita definitum est contra Pelagianos, & Semipelagianos. Vide quæ in hanc rem dicta sunt cap. 3. ubi de Pelagianis & Semipelagianis.

Probatur 1. Ecclesiæ definitio ex Scriptura sacra, Joan. 15. vers. 4. *Sicut palmes non potest ferre fructum à semetipso, nisi manserit in vite; sic nec vos, nisi in me manseritis.* Et vers. 5. *Sine me nihil potestis facere.* Non ait: Non potestis operari facile; sed nihil potestis, ut advertit S. Augustinus Lib. de Gratia Christi cap. 29. Roman. 11. *Quis prior dedit illi & retribuetur ei? Quoniam ex ipso, & per ipsum, & in ipso sunt omnia,* 1. Corinth. 4. *Quid babes quod non accepisti? si autem accepisti, quid gloriaris, quasi non acceperis?* Hoc Apostolico testimonio S. Augustinus testatur Libro de Prædestinat. Sanctorum cap. 3. se recessisse à semitis Semipelagianorum, in quibus errabat ante Episcopatum: quo testimonio, inquit, etiam ipse convictus sum, cum similiter errarem, putans fidem, qua in Deum credimus,

non

non donum, sed à nobis esse in nobis, & per illam nos impetrare Dei dona, quibus temperanter & justè, & pie vivamus in hoc sæculo. 2. Cor. 3. *Non quod sufficientes simus cogitare aliquid à nobis, quasi ex nobis: sed sufficientia nostra ex Deo est.* Quæ verba Sanctus Augustinus Lib. de Prædestinat. Sanctorum cap. 2. sic adversus Semipelagianos contorquet: *Attendant hic, & verba ista perpendant, qui putant ex nobis esse Fidei cœptum, & ex Deo Fidei supplementum. Quis enim non videat, prius esse cogitare quàm credere? nullus quippe credit aliquid, nisi prius cogitaverit esse credendum.*

Probatur 2. ratione. Quia ex dictis, tum impotentia physica dicitur, cum virtus activa non est proportionata operi perficiendo: Atqui facultates hominis naturales, putà intellectus & voluntas, non sunt proportionatæ operationibus supernaturalibus; ideo enim ita vocantur, quia excedunt vires naturales. Ergo: Deinde sicut actus rationalis non potest procedere nisi à principio & lumine rationali; ita actus supernaturalis non potest elici, nisi à principio supernaturali.

Dices 1. Credere mysteria sanctissimæ Trinitatis & Incarnationis, sunt actus supernaturales; Atqui Calviniani illa credunt sine gratia; hæretici enim carent lumine Fidei: Ergo.

Distinguo majorem: Credere Fide divina, Concedo: credere Fide & persuasionem humana, Nego majorem: Hæretici quippe ea Fide, qua credunt nonnulla Religionis nostræ mysteria, credunt etiam falsa & impia sectæ suæ dogmata, nempe quia ita edocentur à suis Pseudopastoribus, vel potius quia ita sibi persuadent. Cum ergo Fides divina non inclinet ad falsum,

sequitur quòd credant persuasione humana.

Instabis: mysteria sanctissimæ Trinitatis & Incarnationis sunt supernaturalia: Ergo non possunt nisi supernaturaliter credi.

Distinguo anteced. Sunt objecta supernaturalia ab hæreticis medio & motivo naturali apprehensa, Concedo: medio & motivo supernaturali apprehensa, Nego anteced. & consequentiam. Quemadmodum enim Gentiles Philosophi sempiternam Dei virtutem & Divinitatem, licèt sit objectum maximè supernaturale, naturaliter cognoverunt; quia nitebantur medio & motivo naturali, nempe creaturarum testimonio; Similiter hæretici motivo naturali, nempe persuasione humana, credunt quædam mysteria.

Ex hac responsione sequitur, nempe comperitur esse utrùm supernaturaliter agat, etiam cùm versatur circa objectum supernaturale; quia ipsi omnino non constat, an motivo supernaturali excitetur & deducatur.

Dices 2. Gratia habitualis seu sanctificans, est principium supernaturale: Ergo justus sine gratia actuali supernaturaliter operari potest.

Distinguo anteced. Est principium radicale & remotum, Concedo; ordinem quippe habet ad actus supernaturaliter bonos: est principium proximum, Nego antecedens. Sicut enim humana natura, licèt ad actus rationales ordinata, agere non potest, v. g. intelligere. 1. Sine facultate intellectiva. 2. Sine objecto facultatem movente & determinante sive per se, sive per sui speciem. 3. Sine actuali Dei concursu; ita gratia sanctificans veluti nova natura in ordine supernaturali, non operatur nisi mediantibus virtutibus

tibus infusis tanquam potentiis supernaturalibus, quas per gratiam actualem supernaturaliter excitari & moveri necesse est; objecta quippe per exteriorem verbi divini prædicationem proposita, sine gratia interiori naturaliter duntaxat movent. *Sicut oculus corporis, inquit sanctus Augustinus Lib. de Nat. & Grat. cap. 26. etiam plenissimè sanus, nisi candore lucis adjutus, non potest cernere; sic homo perfectissimè justificatus, nisi æterna luce justitiæ divinitus adjuvetur, rectè non potest vivere.*

Ergo gratia habitualis sola, sufficiens non est, ut mandata Dei dicantur justis possibilia.

Merito tamen vocatur principium sanctæ operationis, quia sicut Deus sapientiæ suæ debet, ut naturam non condant, nisi tribuat illi potentias connaturales, suppeditet illi media, concursusque suum præbeat, ut consequi possit finem, ad quem illam instituit; sic ad ejus sapientiam justificationemque pertinet, ut gratiæ sanctificanti respondeant auxilia, sine quibus non impleretur lex ad quam gratia sanctificans ex natura sua inclinat. Unde sanctus Augustinus expendens illud Psal. 7. *Justum adjutorium meum à Domino*, sic scribit: *Duo sunt officia medicinæ, unum quo sanatur infirmitas, alterum quo sanitas custoditur . . . ibi infirmus ut liberetur; hic sanus, ne corrumpatur, orat: ibi, ut à morbo evadat, remedium; hic autem ne in morbum incidat, tuitionem petit. Itaque ibi misericors auxilium est, quia nullum habet meritum peccator qui adhuc justificari desiderat, credens in eum, qui justificat impium; hic autem justum auxilium est, quod jam justo tribuitur. Dicat ergo peccator: Salvum me fac, Domine, propter misericordiam tuam: Et dicat justus: Justum adjutorium meum à Domino. Nihil expressius*

contra primam è quinque propositionibus in Janfenio damnatis:

Dices 3. Orationes & eleemosynæ fuerunt actus supernaturales in Cornelio, cum per illas dispositus fuerit ad Baptismum. Act. 10. Atqui non fuerunt ex gratia; prima enim gratia est Fides, qua carebat Cornelius; Ergo.

Nego min. cujus confirmationem distinguo. Prima gratia est Fides inchoata & implicita, Concedo: est Fides perfecta & explicita, Nego. Fides inchoata est supernaturalis illustratio & motio, qualis potest esse in infideli, & per quam Cornelius dicitur vir Religiosus, ac timens Deum; per eam quippe disponitur homo ad fidem explicitam & perfectam, quæ habetur ex auditu. Sic Lidix *Dominus aperuit cor intendere his, quæ dicebantur à Paulo*, Actuum 16. vers. 14.

Q. 2. *Verum saltem naturale potestne cognosci sine gratia actuali?*

R. Homo sine gratia potest etiam potentia morali cognoscere aliquod verum naturale, siue speculativum, siue practicum; modò non desit cognoscendi medium.

Probatur 1. ex Scriptura, Rom. 1. Philosophi Gentiles Deum ex creaturis cognoverunt. 2. Ex sancto Augustino Lib. 2. Conf. cap. 4. *Lex tua scripta est in cordibus hominum, quam nulla delet iniquitas.* Et in Psalm. 57. *Manu formatoris nostri in ipsis cordibus nostris veritas scripsit*, quod tibi non vis fieri, alteri ne feceris. *Hoc & antequam lex daretur, nemo ignorare permissus est.* 3. ratione, quia est proportio inter intellectum & veritates naturales, pluresque ex iis sine difficultate apprehendere possumus.

Dixi 1.

Dixi 1. *Modò non desit cognoscendi medium.* Nam sicut oculus quantumcunque sanus, nullum potest cernere colorem, si desit lumen; sic secreta cordium, licet facultati cognoscitivæ proportionata, detegere non valemus; quia nullum nobis suppetit medium ea detegendi.

Dixi 2. *aliquid verum naturale;* quia omne verum naturale collectivè sumptum, morali potentia cognoscere non possumus; tum quia plures veritates naturales longæ à sensibus remotæ sunt, nec sine gravi difficultate, & acri studio attingi queunt; tum quia prope infinita est illa veritatum collectio; & vitæ brevitās, morbi, somnus, &c. impediunt quominus intellectus iis omnibus vacare possit. Adde veritates practicas & singulares specialia habere impedimenta, nam concupiscentia & passionēs mentem ita perturbant, ut, quamvis non ignoremus, quid temperantia, humilitas, & aliæ virtutes in genere præscribant, in praxi ratio sibi dimissa videre non possit potentia morali, quid hîc & nunc sit faciendum aut fugiendum; in usu ciborum voluptas obrepit sub prætextu necessitatis; ira persuadet nos justè irasci; superbia hanc contumeliam non esse ferendam, &c.

Dices 1. ex Apostolo 2. Cor. 3. Non sumus sufficientes cogitare aliquid à nobis: Ergo.

Respondeo 1. opponendo caput primum Epistolæ ad Romanos, ubi docet Apostolus invisibilia Dei à creatura mundi per ea, quæ facta sunt, intellecta conspici. 2. Ad concilianda Apostoli verba, distingo anteced. Non sumus sufficientes cogitare aliquid supernaturale & conducens ad vitam æternam, Concedo: aliquid naturale, & ad salutem non pertinens, Nego antec.

Dices 2. ex Concilio 2. Arausicano cap. 22. Nemo habet de suo, nisi mendacium & peccatum. Et ex S. Augustino de gestis Pelagii c. 3. sufficit oculus ad non videndum; ad videndum verò lumine suo sibi non sufficit, nisi extrinsecus auxilium clari luminis præbeatur: Ergo.

Distinguo antec. ut supra, nemo habet de suo nisi mendacium, nec sibi sufficit ad videndum in ordine ad vitam æternam, Concedo: nemo absolute, Nego antec. Eo itaque sensu laudata verba accipienda sunt, quòd apud Summum Judicem ratio duntaxat habeatur operum, quæ à mala voluntate exeunt, ut puniantur, nulla verò virtutum naturalium, ut pro eis merces rependatur: & ita liberum arbitrium per se nihil valet nisi ad peccandum; cum enim pro nihilo reputetur quidquid boni naturalibus viribus facere potest, nihil in hac parte valere meritò dicitur.

Q. 3. *Gratia actualis estne necessaria ad vincendas tentationes?*

R. 1. Si agatur de victoria, quæ sit utilis ad salutem, certum est ex dictis, gratiam actualem esse absolute necessariam. Sed cum præcipue quæstio moveatur de victoria, quæ sufficiat ad vitandum peccatum, ad quod tentatio impellit.

R. 2. Homo naturaliter vincere potest aliquam levem tentationem potentia, tum physica, tum morali.

Probat, quia ex mox dicendis, homo naturaliter potest facere aliquod opus moraliter bonum si non occurrat nisi levis difficultas: Atqui tentatio levis non infert nisi levem difficultatem: Ergo naturaliter potest superare aliquam levem tentationem.

Dixi,

Dixi, *aliquam*, non omnem *levem tentationem*; quia omnes vel etiam multae leves tentationes, si collectivè fumantur, graves evadunt ob innatam voluntatis humanæ inconstantiam: aliquis, v. g. patienter audit verbum minùs gratum, quod sæpius repetitum intolerabile efficitur.

Dices 1. Dei providentiæ & Speciali ejus protectioni tribuendum est, quòd tentatio fuerit levis, nec permiserit Satanam amplius sævire: Ergo nulla tentatio, etiam levissima, superari potest sine gratia.

Nego conseq. tum quia illa exterior Dei protectio non est gratia supernaturalis, de qua hic agitur: tum quia nostra responsio est de tentatione secundùm se spectata, & in hypothesi quòd fuerit levis. Sic verè & propriè dicimus claudum à S. Petro sanatum, Act. 3. naturaliter ambulasse, quamvis ejus ambulatio supponeret præcedentem Dei gratiam.

Dices 2. constans est sanctorum Patrum doctrina, hominem naturalibus viribus nulli tentationi sine gratia resistere posse. Sanctus Chrysostomus Hom 24. in primam ad Corinthios sic habet: *Ubi sunt tentationes, quas sufferre non possumus? Et quænam illæ? Omnes, ut ita dicam: possibilitas enim in divino nutu est, quam nostra alliciamus voluntate. Quare, ut certò cognoscas, non solum illas, quæ nostram virtutem superant, non posse sine divino auxilio faciliè sustineri, sed ne has quidem humanas, &c. neque enim mediocres illas, quod dixi, propria virtute sufferremus: sed hic quoque divino indigemus auxilio, ut eas vel effugiamus, vel certè perferamus.* S. Augustinus Lib. 2. Confess. 7. *Gratiæ tuæ, inquit, depono quæcunque non feci mala.* S. Gregorius in Psalm. 3.

pœnitentialem. *Necessariò sequitur, ut omni tentationi sit subditus, quicumque à Deo fuerit derelictus. Ergo.*

Nego conseq. namque laudati textus, & alii plures, quos congerunt Patroni oppositæ sententiæ intelliguntur, vel de victoria quæ conferat ad salutem, vel de gratuita Dei protectione, qua non patitur nos tentari supra id, quod possumus; & ita videntur accipienda verba sanctorum Augustini & Gregorii; vel denique de levibus tentationibus collectivè sumptis; nam frequentius utimur propositionibus universalibus ad significandum quod fit ferè semper. Hanc esse mentem S. Chrysostomi indicant particulæ diminutivæ; *Omnes, ut ita dicam*, quæ idem sonant, quod propè omnes.

R. 3. Graves tentationes sine gratia vinci possunt potentia physica, nullatenus potentia morali. Duæ sunt responsionis partes.

Prima pars probatur 1. quia ex dictis, potentia physica est virtus activa proportionata operi faciendo, alioquin moraliter impossibili: Atqui in homine lapso inest virtus naturalis proportionata vincendis tentationibus. Namque ex sancto Thoma in prænotatis laudato, nec concupiscentia, nec tentationes imponunt necessitatem. *Diabolus, inquit S. Augustinus, consensum non extorquet, sed petit.* Ergo homo gravi tentatione pulsus, dissentire potest, cum remaneat liber à necessitate. Nunquam tamen sine gratia dissentiet; quia cum potentia physica conjuncta est impotentia moralis. 2. Si dissentire non posset ne quidem potentia physica, sequeretur in sententia eorum, qui docent obduratos & nonnullos

los infideles omni gratiæ auxilio destitui, vel non peccare transgrediendo legem naturalem, quod dici nequit sine scandalo; vel ad demerendum non requiri libertatem à necessitate, quòd Summi Pontifices Innocentius X. & Alexander VII. damnarunt in Jansenio tanquam hæreticum. Ergo homo, in hypothesi quòd omni auxilio careret, gravi tentationi resistere posset potentia physica.

Dices: est error Pelagii, hominem naturalibus viribus vincere posse graves tentationes, & gratiam dari duntaxat ad ~~facilius~~ resistendum; Ergo.

Distinguo anteced. posse vincere victoria quæ sit utilis ad salutem, Concedo: posse vincere victoriâ quæ sufficiat ad peccatum vitandum, Subdistinguo: posse potentia morali quæ ad actum reducatur, quamvis difficilius: Concedo. Posse potentia physica nunquam ad actum reducenda, nisi Deus adjuvet, Nego anteced. Pelagius itaque in eo errabat, quòd contenderet gratiam quidem esse utilem, sed minimè necessariam ad superandas graves tentationes, hominemque solis naturæ viribus non solum posse, sed etiam actu victorem existere, atque eo titulo vitam æternam promereri: nos verò dicimus, hominem vincere posse graves tentationes potentia duntaxat physica, & nunquam ad actum reducenda, nisi gratia succurrat.

Confirmatur nostra sententia communis inter Theologos Catholicos, ex summis Pontificibus Pio V. Gregorio XIII. & Urbano VIII. qui proscripserunt hancce 3. Baji propositionem, qua Catholicorum sententiam ad Pelagianismum revoca-

vocabat: *Non solum ii fures sunt & latrones, qui Christum viam veritatis & vitæ negant; sed etiam quicumque aliunde quàm per Christum in viam justitiæ, hoc est ad aliquam justitiam conscendi posse, aut tentationi ulli sine gratiæ ejus adjutorio resistere hominem posse, sic ut in eam non inducatur, aut ab ea non superetur.*

Non ergo sequitur ex nostra sententia gratiam tantum dari ad facilius; tum quia sine ejus adjutorio nulla victoria prodesse potest ad salutem; tum quia homo sibi soli relictus nunquam superabit gravem tentationem, sed ab ea infallibiliter dejicietur, quod nobis nunc probandum incumbit: Quare

Secunda pars nostræ responsionis, quæ est de morali impotentia resistendi viribus naturæ gravi tentationi, probatur adversus Pelagium, primò ex Scriptura, Psalmi 17. *In te eripiar à tentatione. Psalm. 117. Impulsus everfus sum ut caderem, & Dominus suscepit me. Matth. 6. Jubemur petere à Deo auxilium contra tentationes; Et ne nos inducas in tentationem.* In quem locum S. Augustinus, Lib. de dono persever. cap. 23. sic scribit: *Si hæc ab ipso quidem poscit Ecclesia, sed à seipsa sibi dari putat, non veras sed persunftorias orationes habet Quis enim veraciter gemit, desiderans accipere quod erat à Domino, si hoc à seipso sumere existimet, non ab illo?*

Probatur 2. ex Conciliis & sanctis Patribus.

Concilium Diospolitanum damnavit propositionem, qua Pelagius assererat tentationes naturalibus viribus superari posse. Unde fit consequens, (inquit S. Augustinus Epistola 186. aliàs 106.) *ut quisquis sequitur illius Episcopalis auctoritatem judicii . . . fateatur quando contra tentationes concupiscentiasque illicitas dimicamus, quamvis illic habeamus propriam voluntatem,*
non

non tamen ex illa, sed ex adjutorio Dei provenire nostram victoriam. Concilium Milevitanum definitionem Concilii Diospolitani confirmavit, ut constat ex Epistola, quam scripsit ad Innocentium I. extatque inter Epistolas S. Augustini, num 276. aliàs 92.

Innocentius I. Epistola ad Episcopos Africæ, quæ etiam inter Epistolas S. Augustini, numeratur 181. aliàs 91. *Neceſſe eſt, inquit, ut quo auxiliante vincimus, eodem rursus non adjuvante vincamur.*

Concilium Arausicanum II. Can. 9. sic definit: *Divini eſt muneris, cum & rectè cogitamus, & pedes noſtros à falſitate & injuſtitia continemus.*

Probatur 3. ex Conſenſione omnium Theologorum. Bellarminus Lib. 5. de libero arbitrio cap. 8. in reſponſione ad objectionem ex auctoritate ſancti Thomæ deductam ſic reſpondet: *Significat S. Thomas à paſſione non neceſſitari voluntatem neceſſitate phyſica; quaſi voluntas determinetur ad unum; quomodo determinatur appetitus animantium brutorum: tamen non negat neceſſitari moraliter, id eſt, INFALLIBILITER moveri.*

Suarezius Lib. de Neceſſitate Grat. cap. 24. n. 33. *Gravis tentatio . . . ſi inſtet, inſallibiliter hominem gratia non adjutum dejiciet.* Similia habent P. Martinon in ſuo Anti-Janſenio Diſputatione 16. Sect. 8. P. Perrin in ſuo Manuali 1. p. 133.

Iſambertus Profeſſor Regius in Scholis Sorbonicis Diſp. 5. art. 6. de impotentia morali ſic habet: *Juxta quam nunquam contingit, nec unquam continget, ut aliquis homo ſibi ſoli, & viribus tantum nature relictus vicerit, aut vincat gravem aliquam tentationem.* Scripſit ille Theologus ante Janſenium.

M. Gran-

M. Grandin etiam Professor Regius in Scholis Sorbonicis q. 1. de Necess. Grat. p. 79. afferit hanc esse communem Theologorum sententiam adversus Ruardum Tapperum, & pag. 80. ait: *Sed & difficultas duplex, altera tanta non est, ut semper impediatur actum: altera est tanta, ut semper impediatur actum, quomodo hic à nobis accipitur moralis impotentia.*

Denique Theodorus Eleutherius, qui scripsit Historiam de auxiliis pro Patribus Societatis Jesu, refert Lib. 4. c. 14. Molinam à Patribus Dominicanis delatum fuisse ad Sedem Apostolicam, quasi docuisset homines sine gratia graves tentationes vincere posse, atque ejusmodi criminationem sic diluit, *tametsi, ut dixi, moraliter necesse sit, aliquo tentationis notabiliter durantis momento tentatum labi, nisi gratiæ succurrat auxilium, ut Molina docet Unde apparet nihil minus velle Molinam quàm quod simpliciter & absolute possit absque gratia vehemens superari tentatio.*

Q. 4. *Quomodo tentatio gravis inducit malè agendi Moralem necessitatem?*

R. Id fit, quatenus sensibilia, utpotè præsentiora, sensus & appetitum sensitivum magis movent & afficiunt, quàm spiritualia rationem. Deinde sensus & appetitus objectis sensibilibus deliniti, rationem tam violenter attrahunt, ut mens ad Legem Dei vix attendat, aliudque appetendum aut fugiendum repræsentet, quàm quod passionibus suggerunt; nam ex Philosopho 3. Ethic. cap. 5. *Qualis unusquisque est, talis illi finis videtur; & ex vulgari axiomate, unusquisque judicat, prout affectus est.* Non quòd ratio malitiam objecti nullatenus advertat; sed aliò abstracta per ardentem concupiscentiam infallibiliter decernit (nisi Deus periculi-

periclitanti succurrat) satius esse hîc & nunc cupiditatibus indulgere. *Vigilate itaque & orate* (ait Magister noster Matth. 26.) *ne intretis in tentationem.* Nam ex Cœlestino summo Pontifice ad Episcopos Galliæ: *Nemo etiam baptismatis gratia renovatus, idoneus est ad superandas Diaboli insidias, & ad vincendas carnis concupiscentias, nisi per quotidianum Dei adjutorium, perseverantiam bonæ conversationis acceperit.* Illam autem suppliciter emereri possumus: *novit enim Dominus pios de tentatione eripere.*

Ex his manifestè sequitur, hominem sine gratia Legem naturalem posse quidem implere potentia physica, quia Lex naturalis est naturæ humanæ proportionata; nullatenus vero posse potentia morali: tum propter tentationes, quæ frequenter occurrunt: tum propter quædam mandata per se longè difficillima, quale est præceptum diligendi Deum super omnia. Quia amor Dei, super omnia sincerus non est, nisi totum hominem, & cætera ita ad Deum referat, ut vim habeat refecandi omnes cupiditates, & inordinatum sui ipsius amorem: quemadmodum aurum non est genuinum, nisi fornacem sustinere possit, quamvis actu eam non experiatur: Atqui talis actus homini lapsò moraliter est impossibilis. Ita sanctus Thomas q. 109. art. 3. ubi sic habet: *Hommo in statu naturæ integræ dilectionem sui ipsius referebat ad amorem Dei sicut ad finem, & similiter dilectionem omnium aliarum rerum, & ita diligebat Deum plusquam seipsum, & super omnia; sed in statu naturæ corruptæ homo ab hoc deficit secundum appetitum voluntatis rationalis, quæ propter corruptionem naturæ sequitur bonum privatum, nisi sanetur per gratiam Dei.*

Dices

Dices 1. homo naturaliter cognoscit Deum esse summum bonum, ac proinde super omnia amabile: Ergo potentia morali potest sic illum diligere.

Nego conseq. quia ex S. Thoma natura humana per peccatum magis corrupta est in appetitu, quam in intellectu. Deinde virtutes intellectuales, ut scientia & ars non pugnant contra cupiditates & passionēs, sicut virtutes morales.

Dices 2. Timor præsentissimæ mortis est gravissima tentatio: Atqui Romani, & plures alii Gentiles mortem acerbissimam, non solum patienter, sed etiam alacriter sustinuerunt. Ergo.

Distinguo minor. & quidem ad mentem sancti Augustini Libr. de Patientia cap. 16. sustinere motivo superbiæ & cupiditatis, ad quod dæmon juvare potest, Concedo: motivo honestatis, Nego. *An verò, inquit sanctus Doctor, idonea est iniquorum voluntas, ut Deo non adjuvante inter atrocissima & longa tormenta in mendacio perseverent & non est idonea justorum voluntas, nisi eis vires desuper suggerantur, quaslibet pœnas, vel ipsius decore justitiæ, vel æternæ vitæ amore perferre? Qui hæc dicunt, non intelligunt, & quemque impiorum tanto esse ad quæcunque mala perferenda duriores, quanto in eo est major mundi cupiditas, & quemque justorum tanto esse ad quæcunque mala perferenda fortiores, quanto in eo est major charitas Dei.*

Cur autem homo in hoc statu non æquè motivo honestatis ac motivo cupiditatis mortem optinere possit; ratio repetenda est ex dictis: nimirum, ubi læditur nominis fama, vel spes rei familiaris amplificandæ affulget, commovetur appetitus, ardent passionēs, solus timor amittendi quod

quod malè concupiscitur, mentem exagitat, & imminens mortis periculum vix obvertitur. Contra verò, si agatur de tuenda veritate & justitia cum capitis discrimine, sensus & passionēs vehementer obsistunt, mentem perturbant, & quodammodo ligant; horror mortis totum hominem invadit, jam non lucet decor justitiæ, nec afficit gehennæ metus, nec ulla subest cura nisi evadendi mortis periculum. At, superveniente gratia, uberior illustratio mentem veritati, qua nihil est fortius, affixam tenet, & major delectatio justitiæ voluntatem infallibiliter determinat, non quidem absolutè, sed moraliter; liberum quippe arbitrium, sive sub gratia efficaci, sive sub cupiditate constitutum, dissentire aut consentire potest, ut infra demonstrabitur.

Dices 3. ex Apostolo Rom. i. *Gentes, quæ Legem non habent, naturaliter ea, quæ Legis sunt, faciunt.* Ergo gratia actualis necessaria non est ad implendam Legem naturalem.

Respondeo i. negando consequent. Mirum quippè esset Apostolo, qui afflante Spiritu Sancto, totus est in hac Epistola ad probandum gratiam omnibus sive Judæis sive Gentilibus esse necessariam ut Lex impleatur, hæc excidisse contra propositum. De Gentilibus ait cap. i. *Cum cognovissent Deum, non sicut Deum glorificaverunt propter quod tradidit illos Deus in desideria cordis eorum, in immunditiam . . . repletos omni iniquitate, malitia, fornicatione, avaritia, &c.* De Judæis verò & Gentilibus simul cap. 3. *Causati enim sumus: Judæos & Græcos omnes sub peccato esse, sicut scriptum est, quia non est justus quisquam . . . omnes declinaverunt, simul inutiles facti sunt, non est qui faciat bonum, non est*

usque ad unum. Cùm textus illi sint luce meridiana clariores, investigemus necesse est quo sensu Apostolus scripserit, Gentiles naturaliter ea quæ Legis sunt, facere. Quamobrem,

Respondeo 2. cum sancto Augustino Lib. de Spiritu & Littera cap. 26. & sequentibus, 1. vox, *naturaliter*, sumitur hîc pro *sponte*, opponiturque coactioni, quæ fit per Legem extrinsecus advenientem & minantem, adeò ut sensus sit, Gentes sine Lege scripta (quam Judæi transgressi sunt; per eos enim nomen Dei blasphematur in Gentibus, Roman. 2. v. 24.) sponte & voluntariè ea, quæ Legis sunt, faciunt, ac proinde Judæi adversus Gentiles gloriari non debent eo titulo, quòd soli Legem acceperint, cùm transgressores existant ejusdem Legis, cujus opera Gentiles sine exteriori doctrina faciunt: Pharaon Gen. 12. v. 18. Saram Abrahamo reddidit intactam, ut audivit esse ejus uxorem, cap. 26. v. 11. Abimelech præcepit omni populo sub pœna capitis, ne quis Rebecca Isaac conjugem impudicè tangeret. Plura etiam facta Romanorum & aliorum, nec Deum verum veraciter justèque colentium, vel legimus, vel novimus, *quæ secundum justitiæ regulam* (inquit S. Augustinus cap. 27. citati Lib. de Spiritu) *non solum vituperare non possumus, verum etiam meritò rectèque laudamus.* Quanquam, si discutiantur, quo fine fiant, vix inveniuntur, quæ justitiæ debitam laudem defensionemve mereantur. 2. Itaque Gentiles multa Legis opera naturaliter faciunt, bona ex officio seu objecto, sed mala ex pravo fine, putà, superbia: vel si sunt simpliciter bona, tum ex officio, tum ex fine, & circumstantiis, vix illud fit sine gratia Christi, quam constat absque

que Lege scripta concessam esse quibusdam Gentilibus, puta Cornelio, Jobo, Melchisedcho, ut docet S. Augustinus laudato cap. 27. *Non quodd per naturam* (hoc est per vocem *naturaliter*) *negata sit gratia, sed potius per gratiam reparata natura.*

Gravis superest quæstio, utrùm Infideles sine gratia peccent in omnibus operibus suis, nec ullum simpliciter bonum, tum ex officio, tum ex fine elicere possint? quod expendemus frequenti Paragrapho.

§. II.

Utrùm Infideles absque gratia possint velle & facere aliquod opus naturaliter bonum, tum ex objecto, tum ex fine & circumstantiis?

Negavit Bajus his duabus Propositionibus 1. *Omnia opera Infidelium sunt peccata, & Philosophorum virtutes sunt vitia.* 2. *Cum Pelagio sentit qui boni aliquid naturalis, hoc est, quod ex naturæ solis viribus ortum ducit, agnoscit.* Quas Propositiones damnarunt Summi Pontifices Pius V. & Gregorius XIII. damnatasque revocavit ipse Bajus. Quare ad mentem Summorum Pontificum,

Respondeo: Infideles absque gratiæ auxilio possunt potentia morali aliquod opus naturaliter bonum, etiam ex fine & circumstantiis, velle & facere, etsi vix tale in ipsis reperiatur.

Prima pars probatur 1. ex Scriptura, Exodi 1. Laudantur obstetrices Ægyptiorum, quodd masculis Hebræis pepercerint, ac propterea Deus

ipsis benedixit, domosque ædificavit. Matth. 5. Ethnici amicos diligunt & salutant, quod non reprehendit Christus, licet à Christianis plus exigat.

Probatur 2. ex Bullis Summorum Pontificum, in quibus reprobantur Baji Propositiones tum ex sanctis Patribus. Ex S. Augustino c. 27. ad calcem præcedentis Paragraphi laudato, & Serm. 349. aliàs 52. de Tempore, ubi distinguit charitatem naturalem à supernaturali, his verbis: *Licita charitatem habere, humana est; sed ut dixi, licita est. Non solam autem ita licita est, ut concedatur: sed ita licita, ut si defuerit, reprehendatur. Liceat vobis humana charitate diligere conjuges, diligere filios, diligere amicos vestros, &c. Sed videtis illam charitatem esse posse & impiorum, id est Paganorum.* Ex sancto Chrysostomo Homil. 67. ad populum: *Nemo est, inquit, adeo malus, qui non habeat aliquid boni, cujus ratione mereatur aliquod bonum temporale.* Ex sancto Thoma 2. 2. quæstione 10. articulo 4. ubi sic scribit: *Peccatum etiam infidelitatis naturam totaliter non corrumpit; alioquin peccator desineret esse homo. Unde non oportet quod in omni opere suo peccent Infideles; sicut enim habens fidem, potest aliquod peccatum committere in actu, quem non refert ad finem fidei; ita etiam infidelis potest aliquem actum bonum facere in eo quod non refert ad finem infidelitatis.*

Probatur 3. ratione: quia ex dictis ibi agnoscenda est potentia moralis, ubi objectum est proportionatum facultati activæ, nec occurrunt impedimenta, quæ reddant opus difficile: Atqui colere parentes charissimos v.g. aliquod obsequium illis exhibere in re facili, & iisdem gratissima, est objectum naturæ rationali valde proportionatum,

tum, & admodum facile, cui interdum nulla saltem gravis resistit tentatio : Ergo.

Nec dicas opus, ut sit moraliter bonum, debere referri in ultimum finem, quod non potest Infidelis. Namque Infidelis moraliter potest aliquem actum ad Deum referre, cum invincibiliter ignorare non possit illum esse cujusque ultimum finem.

Instabis 1. hæc responsio satisfaceret pro statu naturæ puræ, in quo ultimus finis esset Deus ut auctor naturæ, hoc est, ut possidendus per cognitionem perfectam ex creaturis abstractam, & per amorem illi cognitioni respondentem. At in hoc statu, ultimus finis non est alius quam Deus intuitivè videndus, ad quem actus fidei informis ex natura sua tendit, nullatenus verò actus naturalis, quisquis ille sit, utpote inutilis, & à scopo aberrans; sic enim conficitur syllogismus: ille actus moraliter bonus non est, qui prorsus inutilis est, & ab ultimo fine aberrans; quis enim dixerit bene agere eum, qui à recta via deflectit, & frustra ac inutiliter operatur? Atqui omnes infidelium actus sunt inutiles & devii: Ergo boni non sunt. Hinc Apostolus Rom. 14. *Omne, quod non est ex fide, peccatum est.* Tit. cap. 1. *Omnia munda mundis infidelibus nihil est mundum.* Et sanctus Augustinus Lib. 4. contra Jul. cap. 3. *Si ergo ad consequendam veram beatitudinem, quam nobis immortalem fides, quæ in Christo est vera, promittit; nihil prosunt homini virtutes, nullo modo veræ possunt esse virtutes.* Et infra alloquens Julianum, qui ejusmodi virtutes laudabat, sic pergit: *Dici non potest quantum te fallat ista opinio, qua dixisti, omnes virtutes affectus esse, per quos*

aut steriliter aut fructuosè boni simus. Fieri autem non potest, ut steriliter boni simus . . . Arbor enim bona bonos fructus facit. Absit autem ut Deus bonus, à quo securis paratur arboribus non facientibus fructum bonum, excidat, & in ignem mittat arbores bonas. Ibidem sanctus Doctor solvit objectionem ex Philosophis petitam, qui virtutem sic definire: *Virtus est animi habitus naturæ atque rationi consentaneus*. Quæ definitio optimè convenit quibusdam Infidelium virtutibus, per quas nonnulla facilia operantur juxta dictamen rectæ rationis, & modo consentaneo naturæ rationali. Verum dixerunt, inquit, sed quid sit consentaneum liberandæ ac beatificandæ naturæ mortalium nescierunt. Ergo ex Scriptura & ex doctrina sancti Augustini, nulla potest esse vera virtus, nisi ordinetur ad beatitudinem supernaturalem, quæ in hoc statu sola est ultimus finis, ac proinde omnia Infidelium opera sunt vera peccata.

Respondeo 1. Hæc obiectio ad summum pugnat contra Infidelium opera, qui positivè & contumaciter gratiam rejiciunt, & necessariam humilitatis viam, quam Christus nobis aperuit ad salutem, ingredi detrectant. Tales sunt Judæi, qui in Lege confidunt: tales Philosophi Gentiles, qui de operibus in se, non in Domino gloriantur: tales hæretici, putà, Pelagiani & Semipelagiani, contra quos præsertim pugnabat sanctus Augustinus, tanquam in liberi arbitrii præsumptores & gratiæ destructores; opus enim quod fit ex hac præsumptione, puta nudum operire, prorsus peccatum est; *Non quia*, inquit sanctus Augustinus cit. cap. 3. *per seipsum factum, quod est nudum operire, peccatum est; sed de tali opere*

pere non in Domino gloriari, solus impius negat esse peccatum.

Sed infidelis negativus, qui de Religione Christiana nihil audire potuit, similis est famulo, qui, cum in mandatis acceperit occurrere Domino, ex longa peregrinatione redeunti, iter aggreditur; sed ex ignorantia, & intempestæ noctis tenebris, nullatenus verò ex sua culpa à recto itinere deflectit, nec Dominum consequitur in condito loco; quemadmodum enim famulus ille in suo conatu omnino laudandus est, nedum vituperandus; ita infidelis negativus, qui ex præcepto Legis naturalis actum elicit, & ad Deum dirigit, sed non eo modo, quo ad Deum pervenire possit; quia invincibiliter ignorat Christum esse unicam viam, qua itur ad Patrem.

Neque verò hujusmodi actus ex omni parte sterilis est & inanis; per illum quippe Infidelis satisfacit præcepto legis naturalis, peccatum vitat, & pœnam illi debitam, minus indignum se præbet misericordiæ à Deo consequendæ: denique promereri potest aliquod præmium temporale; habetur enim Exodi i. Deum ædificasse domos obstetricibus Ægyptiorum ob earum humanitatem erga infantes Hebræos.

Unde in forma distinguo majorem syllogismi in objectionis confirmationem confecti: actus ille bonus non est, qui ab ultimo fine inutiliter aberrat, si culpa agentis aberrat, Concedo: si sine ejus culpa, sed ex ignorantia prorsus invincibili, Nego majorem. Solutio patet ex dictis.

Respondeo 2. ad textus Apostoli. *Omne, quod non est ex fide, peccatum est. Infidelibus nihil est mun-*

dum. 1. Si ad litteram accipiantur, non sunt ad propositum. Apostolus quippe loquitur de conscientia, quam qui sequitur, bona fide dicitur agere; mala verò fide, qui ea reluctante, operatur. Ait ergo Apostolus eum peccare, qui non ex fide, hoc est, qui contra conscientiam manducat de cibis olim in Lege veteri prohibitis, nunc verò in nova Lege licitis; quia omne, quod non est ex fide, id est, ex conscientia, peccatum est, etiamsi fiat secundum Legem. Unde in posteriori textu Apostolus absolutè pronuntiat ejusmodi infidelibus nihil esse mundum, sive abstineant à cibis in Lege vetitis, sive iis utantur. Si enim ex sua superstitione abstinent, peccant, quia superstitiosè abstinent: si manducant, etiam peccant, quia mala fide, & contra conscientiam manducant.

Verùm quia S. Augustinus citato capite 3. laudatos Apostoli textus de Fide Christiana intelligit, quamvis allatam à nobis expositionem non rejiciat: alia solutio iisdem textibus in sensu sancti Doctoris acceptis adhibenda est: 1. Infideli nihil est mundum, & omne quod agit, peccatum est, quando agit ut infidelis, hoc est, ex infidelitate; quo sensu dicitur 1. Joan. 3. *Omnis, qui natus est ex Deo, peccatum non facit*, scilicet quando agit ut Filius Dei, & secundum gratiam adoptionis. Sed sicut justus quandoque titillanti concupiscentiæ consentit, & eatenus peccat; sic infidelis potest ex infidelitate non agere, & sequi lumen rationis, adeoque non peccare. Ita S. Thomas 2. 2. qu. 10. art. 4. ad primum. 2. Infidelis, etiamsi ex infidelitate non operetur, nihilominus omne, quod agit, moraliter loquendo

quando peccatum est ; quia vix actum elicit, qui non procedat , vel ex superbia vel ex cupiditate ; quemadmodum enim universalis hæc propositio , omnis Æthiops totus est niger , moraliter accepta vera est , licet Æthiops sit albus in minima sui corporis parte , nimirum in oculis ; eodem sensu verum est dicere , omne , quod agit infidelis , peccatum est , quamvis extraordinariè contingat aliquem ejus actum non esse peccatum.

Respondeo 3. Sigillatim ad ea , quæ opponuntur ex S. Augustino.

Ad primum. Effatum illud sancti Doctoris : *Si ad consequendam veram beatitudinem, nihil profunt homini virtutes, nullo modo veræ possunt esse virtutes*, vel extenditur ad Fideles nondum justificados : vel restringitur ad solos Infideles.

Si primum ; distinguo propositionem , nullo modo veræ possunt esse virtutes ; id est , vivæ & perfectæ , quo sensu , S. Thomas docet 2. 2. qu. 4. art. 5. Fidem in peccatore quam vocat informem , non pertingere ad perfectionem virtutis , Concedo : nullo modo veræ possunt esse virtutes , hoc est , habitus boni , & principia actuum laudabilium , Nego propositionem. Solus enim Lutherus aut Calvinus dixerit opera , quibus peccator ex Fide ad justificationem sese disponit , non esse bona , sed vera peccata ; à qua hæresi patenter abest sanctus Augustinus , utpotè qui doceat Fide impetrari justificationem. Hic ergo loquitur de virtute perfecta , cujus actus sunt meritorii vitæ æternæ : ait enim : *Abfit ut sit in aliquo vera virtus, nisi fuerit justus*.

Quodd si verba S. Augustini restringantur ad solos infideles , alia distinctione opus est ad asse-

quendam ejus mentem, nempe in Infidelibus non possunt esse veræ virtutes etiam naturalis ordinis, si spectentur quoad habitum, Concedo: si spectentur quoad actum, subdistinguo, quæ disponant ad gratiam, Concedo: quæ sint rectæ rationi consentaneæ & moraliter bonæ, quamvis ad salutem inutiles, Nego propositionem.

Enimverò cum habitus naturales nascantur ex actibus sæpius repetitis, & actus Infidelium ferè semper sint vitiosi, saltem ex malo fine, sequitur in Infidelibus non posse reperiri potentia morali, nisi habitus moraliter malos, unus quippe aut alter actus contra eorum agendi morem recta intentione elicitus habitum laudabilem producere nequit; ac proinde sicut Æthiops ex oculis albis denominandus non est albus; sic nec Infideles, ex aliquo bono opere dici debent arbores bonæ.

Ad secundum locum, qui ex S. Augustino obicitur, *fieri non potest, ut steriliter boni simus*; distingo: in hypothesi falsa Juliani, Concedo: in nostra, de qua non agit S. Augustinus, Nego.

Julianus itaque cum Pelagio docebat benè velle esse à nobis, benè autem operari tribuebat gratiæ, & in hoc posteriori à Pelagio recedebat. Sed cum in opere bono duo spectanda sint, nempe officium seu objectum, & finis, contendebat ille Hæreticus contra omnium hominum etiam indoctorum opinionem, officium sine recto fine, v. g. operire nudum ob vanam gloriam, esse bonum & laudabile quamvis sterile & infructuosum, ideoque gratiæ Christi non adscribendum, sed naturalibus liberi arbitrii viribus. Quæ absurdissima sententia incredibilis, præsertim in homine

mine Christiano & Episcopo videretur, nisi S. Augustinus ejus verba referret in hunc modum: *Ne tibi videar calumniari* (inquit, Julianum alloquens) *ipsa tua verba ponam.* Cunctarum, inquis, origo virtutum in rationali animo sita est, & affectus omnes, per quos aut fructuosè aut steriliter boni sumus. In subiecto sunt mentis nostræ prudentia, justitia, temperantia, fortitudo; horum igitur affectuum vis, cum insint omnibus naturaliter, non tamen ad unum finem in omnibus properat, sed pro judicio voluntatis, cujus nutui serviunt, aut ad temporalia, aut ad æterna dirigitur. Quod cum sit, non in eo quodd sunt, non in eo quodd agunt; sed in eo solo quodd variant, quodd merentur, nec nominis sui igitur, inquis, possunt, nec generis sustinere dispendium; sed solius quodd appetiverint præmii aut amplitudine ditantur, aut exiguitate frustrantur. Ex quibus verbis concludit S. Augustinus in sententia Juliani, veram virtutem esse avarorum prudentiam, veram Catilinæ fortitudinem, veram justitiam, quæ dominam reperit avaritiam, cum omnium judicio sint vera vitia, à quibus nemo denominari potest bonus, etiam steriliter.

Instabis 2. ex S. Augustino Enchir. 17. regnat carnalis cupiditas, ubi non est charitas: Atqui in Infidelibus non est charitas; Ergo omnia eorum opera procedunt ex carnali cupiditate, ac proinde mala sunt.

Distinguo majorem, regnat habitualis cupiditas, ubi non est charitas habitualis, Concedo: neque enim datur medium: regnat actualis cupiditas, ubi non est charitas, Nego maj. tum quia homo non semper agit ex habitu; tum quia actus fidei & spei in peccatore, qui ad justitiam sese disponit, boni sunt, nec ex vitiosa

vitiosa cupiditate procedunt: tum denique quia summi Pontifices Pius V. & Gregorius XIII. damnarunt hanc Baji propositionem, quæ est numero 38. *Omnis amor creaturæ rationalis, aut vitiosa est cupiditas, aut laudabilis illa charitas, qua per Spiritum Sanctum in corde diffusa Deus amatur.*

Instabis 4. S. Prosper responsione 8. ad Capitula Gallorum scribit: *Dicamus gratiam Dei per Jesum Christum Dominum nostrum, non solum ad cognoscendam, verum etiam ad faciendam justitiam, nos per singulos actus adjuvare, ita ut sine illa nihil veræ sanctæque pietatis habere, cogitare, elicere valeamus.* Eadem habent Concilium Carthaginense Epist. ad Zosimum Summum Pontificem, Milevitanum II. Can. 4. Arausicanum II. Can. 9. Ergo sine gratia nullum potest esse bonum opus morale.

Distinguo consequens, bonum opus ad salutem æternam conferens seu disponens, Concedo: nullum absolutè, Nego consequ. Hæc solutio petitur tum ex scopo sancti Prosperi, Conciliorum, & aliorum Patrum illius ætatis, qui toti erant ad refellendum errorem Pelagianorum & Semipelagianorum, asserentium initium salutis repetendum, non ex gratia, sed ex libero arbitrio: tum ex verbis Concilii Arausicani Can. 7. in quo sic habet: *Si quis per naturæ vigorem opus aliquod, quod ad salutem pertinet vitæ æternæ, cogitare aut eligere posse confirmat, absque illuminatione & inspiratione Spiritus Sancti, hæretico fallitur spiritu, restrictio enim illa, quod ad salutem pertinet; qua etiam usi sunt Patres Tridentini Sess. 6. Can. 3. planè indicat sermonem non esse de actibus nihil ad salutem conferentibus.*

Secunda

Secunda pars nostræ responsionis, nempe vix in Infidelibus reperiri opus bonum ex objecto, sine & circumstantiis, probatur tum ex sancto Augustino, qui laudato cap. 27. Libr. de Spiritu & Littera nostram doctrinam iisdem tradit verbis: tum ex dictis præcedenti Paragrapho, de necessitate gratiæ ad superandas tentationes, quæ in omni ferè opere nos impugnant.

De necessitate gratiæ ad perseverandum agimus Tract. de Attrib. c. de Effectibus Prædestinationis, ubi expendimus ea, quæ pertinent ad magnum perseverantiæ donum.

§. III.

Utrum justus gratiæ auxilio possit vitare omnia & singula peccata venialia?

Constat ex dictis cap. 4. Paragr. ultimo, gratiam sanctificantem esse necessariam, ut per diuturnum tempus peccata mortalia vitentur. Infra dicemus gratiam saltem sufficientem non deesse justis, qua possint mandata Dei implere, & lethaliter non peccare. Quæritur hîc duntaxat an justî cum gratiæ auxilio, quod ex dicendis supponimus ipsis non denegari, possint vitare omnia & singula peccata venialia, quamdiu in terris agunt.

Affirmarunt Pelagius & Cœlestius, ideo damnati in Concilio Milevitano secundo, Can. 6. ubi dicitur anathema ei, qui asserit propter humilitatem oportere dici, non quia veritas est, illud 1. Joan. c. 1. Si dixerimus, quoniam peccatum non habemus, ipsi nos seducimus, & veritas in nobis non est.

Et

Et Concilium Tridentinum antiquorum Patrum vestigiis insistens Sessione 6, cap. 23. sic definit: *Si quis hominem semel justificatum dixerit posse in tota vita peccata omnia, etiam venialia, vitare, nisi ex speciali privilegio, quemadmodum de Beata Virgine tenet Ecclesia: anathema sit.* Juxta quam definitionem propositæ quæstioni

R. Justus in hac vita cum auxiliis gratiæ ordinariis, non potest morali potentia per diuturnum tempus vitare omnia peccata venialia, etiam ea, quæ ex inadvertentia & infirmitate subrepunt: potest verò cum auxiliis extraordinariis. Duæ sunt partes.

Prima pars probatur, 1. ex Scriptura, 2. Paralip. 6. *Neque enim est homo, qui non peccet.* Pl. 142. *Non justificabitur in conspectu tuo omnis vivens.* Jac. 3. *In multis enim offendimus omnes.* 1. Joan. 1. *Si dixerimus, quoniam peccatum non habemus, ipsi nos seducimus, & veritas in nobis non est.*

Probatur 2. ex constanti Traditione Ecclesiæ. *Tria sunt*, inquit S. Augustinus Lib. de dono persever. c. 2. *quæ maxime adversus Pelagianos defendit Ecclesia, quorum est unum, gratiam Dei non secundum merita nostra dari.* Alterum est, *in quantacunque justitia, sine qualibuscunque peccatis in hoc corruptibili corpore neminem vivere.* Tertium est, *obnoxium nasci hominem peccato primi hominis.* Ad vindicandum autem secundum, librum integrum scripsit de perfectione justitiæ. Idipsum passim refricat in aliis operibus, ut Ep. 167. aliàs 29. *Nemo, inquit, hic vivit absque peccato, & hoc alius magis, alius minus: optimus autem est, qui minimus.* Et Lib. de Spir. & Litt. c. 1. sic respondet ad Marcellinum: *Rescripsisti te moveri, eo quòd in posteriori duorum librorum fieri posse*

posse dici ; ut sit homo sine peccato , si voluntas ejus non desit ope divina adjuvante , & tamen præter unum , in quo omnes vivificabuntur , neminem fuisse aut fore , in quo hic vivente foret ista perfectio. Absurdum tibi videtur dici aliquid fieri posse, cujus ubi desit exemplum. Tum nonnulla adducit exempla eorum, quæ fieri possunt , nec unquam fient. Cur autem justus non declinat ab omni peccato cum declinare possit, explicat S. Hieronymus Lib. 2. contra Pelagianos, his verbis : *Quamdiu ille finis adveniat necesse est nos subjacere peccato , non naturæ & conditionis , ut tu calumniaris , vitio , sed fragilitate & commutatione voluntatis humanæ , quæ per momenta variatur , quia Deus solus est immutabilis.* Ex quibus colliges aliter dici circulum perfectè rotundum esse possibilem , quamvis nunquam existat perfectè rotundus , aliter possibile esse justo vitare omnia peccata venialia , etsi nunquam vitet. Quòd enim non conficiatur circulus perfectè rotundus , non provenit ex defectu voluntatis , quæ ad hoc totis viribus nititur , sed ex defectu aliarum potentiarum. Contra verò justus ideo non vitat omnia peccata venialia , quia voluntas ejus nunquam ad id totas vires exerit , ac proinde defectus in hoc posteriori exemplo peccatum est, quia voluntarius ; in priori verò minimè , quia omnino involuntarius. Ita sanctus Thomas hic qu. 109. art. 8. *Non potest , inquit , abstinere homo ab omni peccato veniali , propter corruptionem inferioris appetitus sensualitatis , cujus motus singulos quidem ratio reprinere potest , & ex hoc habent rationem peccati & voluntarii : non autem omnes , quia dum uni resistere nititur , fortassis alius insurgit , & etiam quia ratio non potest esse semper pervigil.*

Dixi in responsione, *in hac vita*; quia in statu beatitudinis iusti erunt prorsus impeccabiles; nulla quippe in eis erit concupiscentia, nulla deordinatio, partes inferiores perfectè subditæ erunt superiori; & hæc per visionem intuitivam, & amorem beatificum Deo immobiliter adhærebit.

Dixi 2. *moralis potentia*; Verba enim sanctorum Hieronymi, Augustini, & Thomæ indicant inesse in iustis aliquam potentiam vitandi omnia peccata venialia, quæ, cum non sit moralis, dici debet physica, alioquin sine sua culpa caderent.

Dixi 3. *ad diuturnum tempus*; Nam ad breve potest iustus etiam potentia morali cum gratiis ordinariis vitare omnia peccata venialia, ex S. Hieronymo Lib. 3. contra Pelagianos, ubi postquam dixit impeccantiam esse Dei propriam, subdit: *Nec, quia ad breve tempus possum, coges me, ut possim jugiter: Possum jejunare, vigilare, psallere, nunquid in perpetuum?* Nunquam tamen nisi temerè dicere potest, purus sum à peccato; quia nescit homo utrùm amore an odio dignus sit. Unde S. Hieronymus citato Lib. 3. ait: *Potest quisque, etiam qui mox baptizatus est, dicere; Dimitte nobis, non humilitatis mendacio, sed pavore fragilitatis humanæ suam conscientiam formidantis.*

Quamdiu autem iustus possit esse sine veniali, definiri non potest. Certè Oratio Dominica singulis diebus recitanda, usus loquendi sanctorum Patrum & Concilii Tridentini Sess. 6. Can. 11. qui peccata venialia vocant quotidiana, innuunt iustum moraliter non posse per integrum diem ita vigilare, ut nullum peccatum subrepat. Si unius
saltem

saltem diei vellemus peccata numerare, inquit S. Chrysostomus Hom. 20. in Matth. tunc optimè disceremus, quantum rei essemus malorum.

Dixi 4. *omnia venialia*; quia non pauci puri sunt ab omnibus levioribus, quæ ex proposito & ex plena deliberatione contingunt. Hæc quippe morali potentia vitari possunt, non verò quæ ex inadvertentia & fragilitate subrepunt. Quare Theologi docent votum vitandi omnia venialia primi generis esse validum; quia est de re bona & possibili: invalidum verò respectu venialium secundi generis; quia est de re moraliter impossibili. Sed justus nihil hîc præsumat, nisi prius computaverit cum viro sapiente, an habeat sumptus necessarios ad perficiendum; ne, sub prætextu majoris perfectionis, incautè incidat in laqueos diaboli.

Dices 1. Scriptura Jobum laudat, quòd abstinuerit ab omni opere malo, Job cap. 1. Zachariam & Elisabeth, Luc. 1. quòd incederent in omnibus mandatis: Ergo.

Nego consequent. Nam ex Augustino Lib. de perfectione justitiæ: *Ingredi sine macula non absurdè etiam ille dicitur, non qui jam perfectus est: sed qui ad illam ipsam perfectionem irreprehensibiliter currit, carens criminibus damnableibus, atque ipsa venialia non negligens mundare eleemosynis.* Et Lib. 4. ad Bonifac. cap. 5. expendens illa verba Apostoli Phil. 3. *Non quòd jam acceperim, aut jam perfectus sim; sequor autem si quo modo comprehendam. . . quæ quidem retro sunt obliuiscens. . . quicumque perfecti sumus, hoc sentiamus.* Hæc ab Apostolo dicta ait, ut ostenderet secundum illius vitæ modum esse quandam perfectionem, eique perfectioni hoc quoque deputari, si se quisque noverit imperfectum.

D. Habert Theolog. Tom. II.

K k

Dices

Dices 2. S. Ambrosius Lib. 1. in Luc. damnat eos, qui dicunt hominem sine peccato frequentius esse non posse.

Respondet S. Augustinus Lib. de Gratia Christi c. 48. & 49. S. Ambrosium loqui vel de peccato mortali, quo qui caret, in criminationis querelam vocari non potest: vel si de veniali, eum suam sententiam minutiùs excutiendo correxisse: nam explicans Isaïam dicit; neminem in hoc mundo esse posse sine peccato.

Secunda pars nostræ responsionis, scilicet iustum extraordinariis gratiæ auxiliis, posse vitare omnia peccata venialia, probatur; quia ab actu ad posse valet consequentia: atqui beata Virgo actu & de facto vitavit omnia peccata & mortalia, & venialia: Ergo.

Minor probatur 1. ex Concilio Tridentino cit. Can. 23. Sess. 6. ubi docet Ecclesiam tenere beatæ Virgini fuisse concessum, ut nunquam peccaverit. 2. Ex S. Augustino, qui agens de peccatis Lib. de Nat. & Grat. cap. 36. sic loquitur: *Excepta sola Virgine Maria, de qua, propter honorem Domini, nullam prorsus, cum de peccatis agitur, habere volo questionem. Inde enim scimus quòd ei plus gratiæ collatum fuerit ad vincendum omni ex parte peccatum, quæ concipere ac parere meruit eum, quem constat nullum habuisse peccatum.* 3. Ex S. Ambrosio in Psal. 118. cap. ultimo: *Est integra ab omni labe peccati.* 4. Ex S. Bernardo Epist. 114. copiosior sanctificationis benedictio in eam descendit, *quæ ipsius non solum sanctificaret ortum, sed & vitam ab omni deinceps peccato custodiret immunem.* Mitto alios, ut SS. Damascenum, Anselmum, Thomam, &c.

Dices :

Dices : S. Chrysostomus Hom. 25. in Joān. ait, beatam Virginem in nuptiis Cana petiisse miraculum ex ostentatione, ob idque à Christo fuisse reprehensam.

Respondet sanctus Thomas 3. p. q. 27. art. 4. excessum esse in verbis sancti Chrysostomi, qui in hac parte contrarius est aliis Patribus, ut sanctis Cyrillo Alexandrino, & Bernardo, qui ex ipso Evangelii contextu colligunt, beatam Virginem ex provida charitate, & firma fide Filium monuisse, sponsum jamjam pudore suffundendum ob vini defectum, nisi ipse in hujusmodi angustiis succurreret; nec veram fuisse reprehensionem, in hac Christi responsione, *quid mihi & tibi, mulier?* sed necessariam nobis doctrinam, scilicet in operationibus hierarchicis & divinis carnem, quæ plerumque per parentes se explicat, non esse auscultandam.

§. IV.

De Gratia actualis Divisione.

Q. *Quomodo dividitur gratia actualis?*

R. Dividitur 1. in excitantem, seu prævenientem & operantem: in cooperantem sive adjuvantem & concomitantem: & in subsequentem: cujus divisionis singula membra explicuimus c. 2.

Dividitur 2. in gratiam efficacem & sufficientem. Efficax vocatur à S. Augustino Libr. de Cor. & Gr. cap. 12. *auxilium quo*, sufficiens verò *auxilium sine quo*, quæ nomina scholæ retinent. Per *auxilium quo* significatur gratia, qua actu fit opus; per *auxilium autem sine quo*, gratia sine

qua non potest opus fieri, & cum qua potest. Unde auxilium *sine quo*, dat posse, non verò dat actu operari: auxilium autem *quo*, dat actu operari, ac consequenter & posse; qui enim operatur, habet certè potentiam operandi, cùm actus supponat potentiam. Sed audiendus est sanctus Doctor de utroque auxilio sic differens ut velit auxilium *quo*, concessum non fuisse Angelis viatoribus, & primo homini in statu innocentie; sed auxilium duntaxat *sine quo*: post peccatum verò collatum esse meritis Christi auxilium *quo*. *Ipsa adjutoria*, inquit, *distinguenda sunt. Aliud est adjutorium sine quo aliquid non fit, & aliud est adjutorium, quo aliquid fit.*

Secundum adjutorium comparat cum alimentis, sine quibus homo vivere non potest, licet iisdem non fiat ut vivat, & mortem effugiat. Primum verò cum beatitudine seu visione beatifica, qua fit ut homo non tantum possit, sed actu fiat beatus; sic enim pergit sanctus Doctor: *Nam sine alimentis non possumus vivere, nec tamen cum adsuerint alimenta, eis fit ut vivat, qui mori noluerit. Ergo adjutorium alimentorum est sine quo non fit, non quo fit, ut vivamus. At verò beatitudo, quam non habet homo, cùm data fuerit; continuò fit beatus; adjutorium est enim non solum sine quo non fit, verum etiam quo fit propter quod datur. Tum docet sanctus Augustinus adjutorium quo datum non fuisse homini innocenti, sed lapso duntaxat; quia ille erat sanus, & ab omni concupiscentia immunis, hic verò infirmus & motibus concupiscentie obnoxius, ac proinde majori dono indigens. Primo itaque homini, inquit, qui in eo bono quo factus fuerat rectus acceperat posse non peccare, datum*

tum est adjutorium perseverantiæ, non quo fieret ut perseveraret; sed sine quo per liberum arbitrium perseverare non posset . . . tales vires habebat ejus voluntas, quæ sine ullo fuerat instituta peccato, & nihil illi ex seipso concupiscentialiter resistebat, ut dignè tantæ bonitati, & bene vivendi facilitati, perseverandi committeretur arbitrium. Nunc verò posteaquam est illa magni peccati merito amissa libertas, etiam majoribus donis adjuvanda remansit infirmitas Nam si in tanta infirmitate vitæ hujus, ipsis relinqueretur voluntas sua, ut in adjutorio Dei, sine quo perseverare non possent, manerent si vellent, nec Deus in eis operaretur ut vellent; inter tot & tantas tentationes infirmitate sua, voluntas ipsa succumberet, & ideo perseverare non possent; quia deficientes infirmitate nec vellent, aut non ita vellent infirmitate voluntatis, ut possent. Subventum est igitur infirmitati voluntatis humanæ, ut divina gratia indeclinabiliter & insuperabiliter ageretur; & ideo quamvis infirma, non tamen deficeret, neque adversitate aliqua vinceretur.

Verba S. Augustini latius exposuimus: tum quia Jansenii Defensores jactare solent illa esse veluti clavem, qua scripta sancti Doctoris aperiantur; cum tamen mirum videatur, si clausa voluerit usque ad senectutem, in qua Librum de Cor. & Gr. exaravit; tum quia non desunt, qui ex illo cap. 12. insinuare velint, sanctum Augustinum nullam aliam gratiam per se efficacem agnovisse, quàm donum perseverantiæ, quo datur homini sive adulto sive parvulo, ut in statu gratiæ decedat, nullatenus, inquit, ut rectè vivat; cum tamen S. Doctor disertè & luculenter doceat homini infirmo concessum esse majus donum, ne inter tot & tantas tentationes voluntas

ejus ex infirmitate deficeret, aut non ita vellet, ut eas superare posset. Quæ manifestè spectant victoriam, quam voluntas gratia per se efficaci adjuta, ex tentationibus indeclinabiliter & inseparabiliter reportat. *Infirmis*, inquit ibidem, *servavit Deus, ut ipso donante, invictissimè quod bonum est, vellent, & hoc deferere invictissimè nollent.* Alia ex benemultis testimonia ejusdem sancti Doctoris in eandem rem proferemus c. 6. Paragr. 1. & 7. Non enim æquè pro gratia sufficiente, ac pro efficaci asserenda laboravit. Et ratio est; quia cùm Pelagiani virus sui erroris velarent isto vocabulo *posse*, quod dicebant esse à Deo quatenus est Auctor naturæ, cui indidit naturalem agendi potentiam; S. Augustinus, ut æquivocationem & omne subterfugium auferat, ferè semper de ipso *velle & perficere* loquitur, multisque probat esse Dei dona, non innatæ possibilitatis effectus. *Non ait (Apostolus,) Deus est qui operatur in vobis posse; tanquam ipsi jam & velle & operari per se ipsos babeant . . . sed ait, Deus enim est qui operatur in vobis & velle & perficere,* Lib. de Gratia Christi, cap. 5.

Ergo duplex est gratia efficax: alia qua quis bene operatur; alia qua in bono perseverat usque in finem, & hæc est prædestinatorum propria, de qua ubi de prædestinatione.

Q. 2. *Quomodo definitur gratia efficax priori modo spectata?*

R. *Definitur, actuale Dei auxilium, quo voluntas actu vult & operatur bonum infallibiliter & insuperabiliter, liberè tamen & minimè necessario.* Hæc descriptio eruitur ex laudatis verbis sancti Augustini, cap. 12. Lib. de Correctione & Gratia. *Subventum est infirmitati voluntatis humane,*

ut divina gratia indeclinabiliter & insuperabiliter ageretur; & ideo, quamvis infirma, non tamen deficeret, neque adversitate aliqua vinceretur.

Dicitur 1. *Actuale Dei auxilium*, in quo conveniunt gratia efficax & sufficiens: utraque enim est species auxilii & gratiæ actualis.

Dicitur 2. *quo voluntas actu vult & operatur*. Quibus verbis exprimitur differentia gratiæ efficacis à gratia sufficiens; hæc potentiam solum complet, ut possit velle & agere, illa verò ponit potentiam in actu, & efficit ut agat.

Dicitur 3. *infallibiliter & insuperabiliter*, ut significetur modus operandi gratiæ efficacis, distinguaturque à gratia concessa Adamo innocenti; hæc quippe erat versatilis ad nutum voluntatis ejus, adeo ut quandoque haberet suum effectum, nempe cum recens conditus, motu amoris ad Deum se convertit; quandoque verò non haberet, ut contigit in esu pomi vetiti. At gratia efficax infallibiliter & insuperabiliter ponit voluntatem in actu, habet effectum ex se, non verò ex consensu voluntatis redditur efficax, ut definit Molina.

Dicitur 4. *liberè tamen & minimè necessariò*: quia gratia efficax est principium meriti; nullum autem potest esse meritum in eo, qui necessariò agit, nec ita dominus est sui actus, ut de eo non possit disponere, hoc est, divinæ motioni dissentire. Sed quæ summatim hinc exponuntur, accuratius demonstrabuntur sequentibus Paragraphis.

Q. 3. *Velle & operari infallibiliter & insuperabiliter, nonne idem est ac operari necessariò?*

R. Minimè, ut videre est in exemplo mendici, cui si dives offerat satis largam eleemosynam, putà nummum, vel etiam nummi quadrans.

drantem, certò & infallibiliter curret ad eam recipiendam, quamvis absolutè respuere possit, præferens quietem, in qua fortè quibusdam fructus jam quæsitis delectabiliter vescebatur. Ergo liberè & infallibiliter operari non sunt duo opposita.

Efficaciter quoque demonstrat nostræ responsionis veritatem, exemplum petatum ex inclinatione cuique indita ad tuendam propriam vitam. Enimverò innatus vitæ amor hominem illæsa libertate, quam indifferentiæ vocant, infallibiliter & insuperabiliter determinat ad præstandum id, sine quo mors præsentissima vitari nequit. Latio v.g. exerto gladio minatur mortem viatori, si obstitat, vel tantisper moveatur: in hac hypothesis, in qua nulla spes affulget declinandi ictum mortis, timor viatorem immotum tenet, firmissimèque ligat quàm compedes & catenæ ferreæ, etiam si nemo ex seipso non intelligat liberum esse viatori movere se & resistere.

Porro si amor vitæ præsentis impressus à Deo, & timor mortis temporalis tam efficaciter & insuperabiliter determinant absque præiudicio libertatis quam vocant indifferentiæ; quis non intelliget quomodo Deus inspirans dilectionem efficacem vitæ æternæ, & similem timorem damnationis perpetuæ, infallibiliter & insuperabiliter flectat ad quod voluerit, voluntates humanas, salva semper earum libertate?

Vox ergo *insuperabiliter* in mente sancti Augustini & ejus discipulorum, non significat voluntatem efficaciter motam non posse resistendo superare divinam motionem, ut vult Jansenius, sed denotat solum nec concupiscentiam, nec cordis duri-

duritiam, nec dæmonum conatus prævalere posse adversus efficientem Dei motionem, eo ferè modo, quo dicimus arcem inexpugnabilem, quia hostes nulla vi eam expugnare possunt, quamvis liberum sit gubernatori portas hostibus aperire, & ultrò eis se tradere. Sic voluntas efficaci Dei præsidio munita, carnalibus desideriis, quæ militant adversus animam, superari non potest: sed ipsa pro sua innata libertate simpliciter & absolute recedere potest à divino præsidio, & ad oppositum se convertere, quod fusiùs disputabimus cap. seq. in responsione ad objectiones.

Q. 4. *Quomodo definitur Gratia sufficiens?*

R. Describi potest, actuale Dei auxilium, quo voluntas redditur potens sive ad operandum, sive ad obtinendum id, sine quo operari non posset, quamvis contingat eam resistere.

Dicitur 1. *actuale Dei auxilium*; quia gratia sufficiens est species gratiæ actualis, ut jam diximus. Unde gratia habitualis seu sanctificans dici nequit gratia sufficiens.

Dicitur 2. *quo voluntas redditur potens*; ut significetur eam gratiam sufficientem non esse, sed absolute insufficientem, si inchoatas duntaxat vires ad agendum tribuat, ut gratia habitualis, fides, illustratio intellectus, quis enim dixerit pusionem posse vincere gigantom, quia inchoatas habet vires ad eum vincendum?

Dicitur 3. *sive ad operandum, sive ad obtinendum*, &c. quia sicut finis simpliciter possibilis est, si adsint media, quibus acquiri potest, pusio, v. g. gigantom vincere potest in hypothesi, quod paratos habeat amicos, quorum ope, si eos advocaverit, victoriam reportare potest: similiter qui

illam voluntatis inobedientiam esse accidentalem gratiæ sufficienti, & contra ejus inclinationem, ac Dei intentionem; absit enim impia hæc cogitatio, quòd sicut gratia efficax datur, ut ei insuperabiliter obediatur; ita & gratia sufficiens, ut ei resistatur. Expendemus autem suo loco, utrùm semper contingat resisti gratiæ sufficienti.

Dices: si ponere actum, seu voluntatis consensum sit essentiale gratiæ efficaci, sequitur gratiæ efficaci non posse resisti; cum enim actus includatur in ejus definitione, tanquam essentialis ejus differentia; non minùs implicat actum posse separari à gratia efficaci, quàm rationalitatem ab homine: atqui hæreticum est dicere gratiæ efficaci non posse resisti, repugnatque ejus definitioni supra allatæ & explicatæ: Ergo.

Distinguo maj. si necessariò ponere actum sit essentiale gratiæ efficaci, non potest ei resisti, Concedo: si modo libertati congruo, quemadmodum supra explicuimus, Nego maj.

Distinguo quoque ejus confirmationem, actus includitur in definitione gratiæ efficacis indirectè & tanquam aliquid extrinsecus connotatum, infallibiliter quidem ponendum, non verò necessariò, Concedo: includitur directè, & veluti differentia essentialis quemadmodum rationale in definitione hominis, Nego. Itaque sicut in communi Philosophorum sententia non ipse terminus, sed ordo ad terminum est de essentia relationis, qui ordo explicari non potest, nisi indirectè & per modum alicujus connotati exprimatur terminus: ita pariter non actus seu consensus voluntatis, sed ordo ad actum liberè & infallibiliter ponendum,

endum, est de essentia gratiæ efficacis; ac proinde actus in ejus definitione ponitur indirectè duntaxat, veluti aliquid extrinsecus connotatum.

Instas: sublato termino, tollitur relatio: Ergo à pari, non posito actu, non erit gratia efficax.

Admitto paritatem; sed quid inde? nam licèt actus possit non poni, nunquam tamen non ponetur.

Ais: posito possibili in actu, nullum sequitur absurdum: atqui possibile est actum non poni: Ergo supponere licet non poni.

Distinguo maj posito possibili in actu, eo modo quo possibile est, Concedo: alio modo, Nego maj.

Distinguo similiter minorem, possibile est non poni actum, ad quem gratia efficax movet: possibile, inquam, physicè, Concedo: possibile moraliter, Nego minorem, & consequentiam: ita Isambertus quæst. 3. & Grandin pag. 239. & 240.

Hæc solutio, quæ non est mea, sed Theologorum mox laudatorum, nota censoria inusta est à quodam Scriptore ignoto, sed temerè; constat enim tum ex Scriptura, tum ex Conciliis, tum ex sanctis Patribus, tum ex consensione Theologorum, excepta Molinæ schola, quæ sic dicuntur moraliter impossibilia, numquam extitura.

Ac primò quidem è Scriptura, namque Joan. 6. ait Christus: *Omnis, qui audit à Patre: & dicit, venit ad me.* Absolutè tamen & physicè potest non venire, sed nunquam non veniet, quia ex S. Thomæ 1. 2. qu. 10. art. 4. ad tertium: *Si Deus movet*

movet voluntatem ad aliquid, impossibile est poni quòd voluntas ad illud non moveatur: non tamen impossibile est simpliciter. Unde non sequitur quòd voluntas à Deo ex necessitate movetur.

Secundò. Justus cum auxiliis ordinariis omnia peccata venialia absolutè & physicè vitare potest, & in justitia perseverare: Concilium tamen Tridentinum Sess. 6. Can. 22. & 23. definiit eum absque singulari dono, nec sine peccato saltem veniali victurum, nec in bono usque ad finem perseveraturum propter infirmitatem scilicet & moralem impotentiam. Eodem Canone 23. declarat eam esse Ecclesiæ Catholicæ sententiam, quòd beata Virgo nunquam peccaverit etiam venialiter, cum tamen physicam haberet peccandi potentiam, ut observat M. Grandin pag. 240. ubi sic habet: *Beata Virgo cum speciali suo privilegio retinuit quidem physicam potentiam ad peccandum, moralem tamen non habuit, ut licèt ob physicam potentiam, si sola fuisset, potuisset poni actus peccandi, tamen, ob moralem impotentiam, quæ conjuncta erat, idem peccandi actus poni non potuerit.*

Tertiò. S. Augustinus Lib. de Spiritu & Litera ex professo probat multa esse absolutè possibilia, moraliter verò impossibilia, quæ nec extiterunt, nec extitura sunt. Et Lib. de Præd. Sanctor. cap. 8. de gratia efficaci sic scribit: *Hæc gratia quæ occultè humanis cordibus divina largitate tribuitur, à nullo duro corde respuitur.* Hæc propositio, utpotè universaliter negans, nullam exceptionem admittit, nullus resistit gratiæ efficaci; quia etsi absolutè & physicè id possit, moraliter tamen non potest.

Quartò. Ex dictis pag. 517. omnes Theologi

logi conveniunt hominem, nisi divina gratia succurrat, infallibiliter dejiciendum à gravi tentatione; quia cum potentia, quam habet ad illam superandam, concurrit impotentia moralis. Nec desunt in civilibus exempla ejusmodi impotentiae moralis, cum qua nunquam ponitur actus. Mendicus, v. g. nunquam respuet oblatam sibi elemosynam, quamvis simpliciter & absolutè illam respuere possit. Quis sana & tranquilla mente præcipitem se dabit è superiori cubiculo? Mercator contemnetne unquam occasionem magnum quæstum faciendi absque difficultate & periculo? Liceat addere illud exemplum, quod S. Augustinus Lib. 13. de Trinitate cap. 3. profert ex quodam Mimo, qui, ait sanctus Doctor, cum se promississet in Theatro quid in animo haberent, & quid vellent omnes, esse dicturum . . . suspensis & silentibus omnibus, dixisse perhibetur: *Vili vultis emere, & caro vendere. In quo dicto levissimi scenici, omnes tamen conscientias invenerunt suas, eisque vera ante oculos omnium constituta, & tamen improvisa dicenti admirabili favore plausuerunt.*

Nec obstant quæ in oppositum adduci possent exempla, v. g. Oratoris, cujus facundiae moraliter non potest resisti, quia ut plurimum id contingit, quamvis, nonnullos aliquando non trahat in suam sententiam; quia in hujusmodi exemplis, non est impotentia moralis nisi secundum quid, cum qua aliquando conjungitur actus, ut docet M. Grandin qu. 1. de necessitate Grat. pag. 88. *Difficultas duplex, inquit, altera tanta non est, ut semper impediatur actum. De utraque potest intelligi S. Anselmus, & dici posset non priorem solam, sed etiam posteriorem opponere impossibilitati physicae, quamvis utraque concurrat cum impotentia morali, sive*
quæ

quæ talis est secundum quid, quando fieri aliquid moraliter, sed raro; sive absolute, quando nunquam, quomodo hic à nobis accipitur moralis impotentia. Sed absolute negare malim in exemplis, de quibus est sermo, semper concurrere aliquam impotentiam moralem cum potentia physica; identidem enim occurrunt circumstantiæ, quæ omnem difficultatem tollunt, efficiuntque ut quod aliàs censetur moraliter impossibile, evadat moraliter possibile; sic commiseratio aliquando vincit affectum moraliter determinantem ad emendum vilius & vendendum carius, efficitque, quemadmodum observat S. Augustinus citato loco, ut vir misericors absque difficultate & ulla morali impotentia viliori pretio vendat pauperi, & ab eo emat cariori. Similiter disertissimus Orator, qui auditores vulgò in suam sententiam adducit, quosdam licet raro, dissentientes experitur: Quid ita? Quia nullatenus, aut leviter eos movit, & ideo absque difficultate & impotentia morali ipsi resistunt. At nulla tentatio aut quævis alia ratio vincit unquam efficacem Dei motionem; *Cum voluntas divina sit efficacissima*, inquit sanct. Thom. 1. part. quæst. 13. art. 8. *non solum sequitur, quod fiant ea, quæ Deus vult fieri, sed & quod eodem modo fiant, quo Deus ea fieri vult.* Scilicet vel modo necessario, si causæ sint necessariæ, vel modo libero, si causæ sint liberæ, ut ibidem explicat Angelicus Doctor. Et quæst. 10. suprâ laudata 2. p. Si Deus, inquit, movet voluntatem ad aliquid, impossibile est poni, quod voluntas ad illud non moveatur, non tamen impossibile est simpliciter, sed moraliter tantum & secundum quid.

CAPUT VI.

De Gratia efficaci.

§. I.

Utrum detur in hoc statu ?

R. Certum est dari.

Probatur 1. ex Scriptura, Ezech. 36. vers. 26. & 27. *Auferam cor lapideum de carne vestra, & dabo vobis cor carneum, & spiritum meum ponam in medio vestri, & faciam ut in præceptis meis ambuletis.* Joan. 6. vers. 37. *Omne, quod dat mihi Pater, ad me veniet.* Et vers. 45. *Omnis, qui audit à Patre, & didicit, venit ad me.* Phil. 2. vers. 13. *Deus est enim, qui operatur in vobis, & velle & perficere.*

Probatur 2. ex Patribus. Tertullianus Lib. de Anima cap. 21. *Erit, inquit, vis divinæ gratiæ potentior utique natura, habens in nobis subjacentem sibi liberam arbitrii potestatem.* S. Augustinus Lib. de Gratia Christi cap. 14. sic scribit: *De isto docendi modo etiam Dominus ait, omnis qui audit à Patre meo & didicit, venit ad me. Qui ergo non venerit; non de illo rectè dicitur, audit quidem, & didicit sibi veniendum, sed facere non vult quod didicit.* Et Lib. de Præd. Sanctior. cap. 8. *Hæc itaque gratia, quæ occultè humanis cordibus divina largitate tribuitur, à nullo duro corde respuitur; idè quippe tribuitur, ut cordis duritia prinitus auferatur.* Huc referri debent, quæ Paragr. præcedenti tradidimus de natura & essentia gratiæ efficaci, & infra Paragr. 7.

§. II.

In quo consistat efficacia Gratiæ efficacis ?

R. Circa propositam quæstionem variæ sunt sententiæ.

Prima, eaque hæretica, est Lutheri, qui in assertione articuli 36. scribit, liberum arbitrium esse figmentum in rebus, & titulum sine re; quia nulli est in manu quidquam cogitari boni vel mali; sed omnia necessitate absoluta evenire, quemadmodum docuit Wiclefus in Concilio Constantiensi damnatus. *In cæteris, inquit, de Papatu, de Conciliis, & Indulgentiis, aliisque nefariis nugis, ferenda est levitas & stultitia Papæ, & suorum; sed in hoc articulo de servitute arbitrii, qui omnium optimus est, & rerum omnium summa, dolendum ac flendum est miseros sic insanire.*

Temperavit tamen Lutherus suam sententiam in Lib. de Visitatione Saxonica, ubi restringit quod prius docuerat, ad actiones, quæ spectant vitam æternam; sic enim scribit: *Multi de libero arbitrio indiscretè loquuntur; idcirco hanc brevem informationem adscripsimus. Homo habet ex propria virtute liberi arbitrii ad faciendum, vel omittendum opera externa per legem; quapropter potest & sæcularem probitatem & bona opera facere ex propria virtute. . . . quod autem hæc libertas non se extendat ad actiones supernaturales, declarat Liber, cui titulus est: Operationes in Psalmos. Error est, quod liberum arbitrium habet aliquam activitatem in bonas actiones, quando de interno opere loquimur.*

Chemnitius in Examine Concilii Tridentini ad Sess. 6. ait dandam esse veniam Luthero, nec ibi aliud significare voluisse scribendo, voluntatem

se passivè habere, quàm non liberè concurrere; quia in Libro de servitute arbitrii solam libertatem indifferentiæ excludit, ubi sic habet: *Nec erat in manu Judæ aliter facere, aut voluntatem mutare, licet fecerit id volendo non coactus.*

Calvinus posteriorem Lutheri sententiam amplexus est; sic enim scribit in Antidoto ad Can. 5. Sess. 6. Concilii Tridentini: *De verbo ne moveas rixam: sed quia per liberum arbitrium intelligunt Episcopi Tridentini, eligendi facultatem in utramque partem liberam & solutam: titulum sine re esse qui affirmant, Christum habent auctorem.* Et Lib. 2. Instit. cap. 2. *Voluntatem gratia movet, non qualiter multis sæculis traditum est & creditum, ut nostræ postea sit electionis obtemperare aut refragari.* Et juxta hanc Calvini doctrinam scribit ejus discipulus Joannes Scarpus Lib. 2. cap. 2. de misero hominis statu: *Status primæ controversiæ est, an ad liberum arbitrium constituendum requiratur libertas à necessitate, an verò sufficiat illa quæ est à coactione: Papiæ negant, nos affirmamus.*

Jansenius adhæsit huic Calvinistarum sententiæ, ut constat ex iis, quæ de ipso retulimus cap. 3.

Secunda sententia, quæ vulgò tribuitur Ludovico Molinæ, reponit efficaciam gratiæ in consensu voluntatis, adeo ut non gratia voluntatem, sed voluntas gratiam determinet, efficiatque per consensum, ut gratia sit efficax; per dissensum verò, ut sit inefficax & merè sufficiens. Sic enim scribit Molina Lib. de Concord. disp. 12. sect. 14. art. 13. *De duobus eo modo affectis, æqualiterque à Deo ad fidem vocatis, pro sola eorum libertate potest evenire, ut unus amplectatur fidem, alter verò contemnat.* Et disp. 40.

disp. 40. *Divisio, inquit, sufficientis gratiæ in efficacem & inefficacem nostra sententia ab effectu simul ac arbitrii libertate pendet, sumitur.*

Ergo in hac sententia Gratia Christi non distinguitur à Gratia Angelis & primo parenti ante lapsum concessa. Ista, secundum Molinam, fuit efficax in Angelis qui steterunt, & in Adamo, quando recens conditus ad Deum se convertit; sufficiens verò tum in Angelis, qui ceciderunt, tum in Adamo cum præceptum transgressus est, quod è diametro pugnat contra doctrinam S. Augustini, § 4. præcedentis capitis.

Sed Molinam non moratur auctoritas sancti Augustini & antiquorum; namque ultro fatetur quæst. 23. artic. 4. disput. 1. suam sententiam esse novam, & Patribus incognitam, confiditque ei adhæsurus, si fuisset ipsis proposita: *Neque verò, inquit, dubito, quin ab Augustino & cæteris Patribus unanimi consensu comprobata fuisset hæc nostra de Prædestinatione sententia, ratioque conciliandi libertatem arbitrii cum divina gratia.* Quo autem fundamento tam confidenter loquatur, ibidem exponit his verbis: *Quæ si data explanataque semper fuissent, fortè neque Pelagiana hæresis fuisset exorta, neque Lutherani tam impudenter arbitrii nostri libertatem fuissent ausi negare, obtendentes cum divina gratia, præscientia & prædestinatione coherere non posse, neque ex Augustini opinionione concertationibusque cum Pelagianis tot fideles fuissent turbati.* Verum iste conciliandi modus ab Augustino fuit cognitus & rejectus, ut patet ex Lib. de Gratia Christi cap. 47. ubi expendens, quod Pelagius scripserat, posse velle & posse agere esse à Deo, qui naturam contulit; velle autem & agere esse à nobis & ex libero arbitrio, sic

exponit sanctus Doctor : Si consenserit nobis (*Pelagius*) ipsam etiam voluntatem & actionem divinitus adjuvari, & sic adjuvari, ut sine illo adiutorio nihil bene velimus & agamus nihil de adiutorio gratiæ Dei, quantum arbitrator, inter nos controversia relinquetur. Ex quibus verbis colligitur quidem, Molinam non esse Pelagianum & hæreticum in mente sancti Augustini, cum Pelagium ab hæresi absolvat, modò saltem admittat, quod revera admittit Molina, nos actu neque bene velle, neque bene agere absque auxilio *sine quo*, seu gratia sufficienti. Sed sanctus Doctor hunc modum conciliandæ gratiæ cum libero arbitrio nunquam amplexus est, utpote Scripturæ Sacræ minus conformem.

Nova Molinæ doctrina plurimum animos statim offendit, ac primò proscripta in Academiis Lovaniensi & Duacensi, tandem ad Sedem Apostolicam delata est. Hinc celebres Congregationes *de auxiliis* sub Clemente VIII. & Paulo V. quarum acta à diversis identidem evulgata Molinæ doctrinam reprobata, nedum approbata perhibent; sed iudicium Summi Pontificis hætenus non exiit, ac proinde hæc sententia ab Ecclesia expressè damnata dici nequit.

Nihilominus Suarezius, celebris è Societate Jesu Theologus, sententiam Molinæ temperandam censuit, existimavitque gratiam efficacem, quamvis entitate non semper differat à sufficienti, non esse tamen efficacem ab eventu, seu à consensu voluntatis; sed à circumstantiis in quibus datur. Hinc nova extitit opinio.

Tertia itaque sententia efficacem gratiam repetit à circumstantiis, quas Deus prævidit ita congruas, ut gratia ab ipso misericorditer præparata

rata in iisdem infallibiliter sortitura sit effectum, ut videre est in exemplo Tyrionum, apud quos, si factæ fuissent virtutes, quæ factæ sunt apud Betsaidas, illi pœnitentiam egissent. Atque patroni hujus sententiæ, ut mentem suam explicant, docent. 1. Deum aliquos præ aliis velle efficaciter vocare & justificare; sed ne bona illa voluntas libertati noceat; Statuunt 2. Deum per scientiam! mediam explorare, quid voluntas humana esset actura, si in his aut illis circumstantiis daretur gratia; & cum prævidit eam sub hac conditione consensuram; tum demum decernere gratiam, quæ idè dicitur congrua; quia à Deo exit tempore opportuno, & in talibus circumstantiis voluntatem prævenit, ut quamvis ex entitate sua sit solum sufficiens, tamen prout dirigitur à Deo per scientiam mediam infallibiliter habitura sit effectum. Hinc fit, ut qui consentit, non possit sese discernere ab alio, qui non consentit; non enim propriæ voluntatis est, quòd præ alio gratiæ consenserit, sed singularis Dei beneficii, quòd gratia opportuniori tempore eum prævenierit. Et hanc sententiam amplexi sunt non solum Patres Societatis Jesu, ex Decreto Præpositi Generalis Aquaviva, quo cavit anno 1613. ne in Societate propugnaretur sententia Molinæ sine hoc temperamento; sed etiam plures alii graves Theologi, ex quibus olim Magistros habuimus in Academia Parisiensi, cum Scholas discipuli frequentaremus.

Quarta sententia est Thomistarum, qui, ut in Philosophicis docent, ad actus naturales non sufficere Dei concursum, ut verè, & propriè dicatur primus omnium rerum motor, sed requiri

præmotionem physicam; sic in Theologicis docent ad actus supernaturales necessariam similem esse præmotionem, in qua contendunt consistere efficaciam gratiæ.

Quinta denique sententia efficaciam gratiæ reponit in delectatione victrice, non qualis cernitur in mendico, dum ipsi porrigitur ampla elemosyna; ad hanc quippe delectationem elemosyna objectivè & moraliter duntaxat concurrat: Deus verò per supernaturalem delectationem, de qua sermo est, physicè movet, & operatur eo ferè modo, quo unicuique indidit inclinationem tuendæ propriæ vitæ.

Expositis omnibus sententiis circa gratiæ efficaciam, operæ pretium est, ut deinceps sigillatim expendamus, quid de unaquaque sentiendum, quæve cæteris videatur præferenda: quod præstabimus, Deo juvante, absque cujusquam invidia aut contemptu, sed illæso vinculo charitatis & pacis, quod cùm illibatum esse debeat inter eos, quos Mater Ecclesia in sinu suo complectitur, nonnunquam tamen labefactari contingit nimio contentionis ardore circa propositam quæstionem, hac nostra ætate multùm agitatam.

§. III.

Utrum gratia efficax necessitet?

R. De fide est, non necessitare, ita enim definiit Concilium Tridentinum Sess. 6. Can. 4. his verbis: *Si quis dixerit liberum hominis arbitrium à Deo motum & excitatum nihil cooperari assentiendo Deo excitanti atque vocanti . . . neque posse dissentire si velit;*

velit ; sed veluti inanime quoddam nihil omnino agere, merèque passivè se habere : anathema sit. Ibi Concilium duos errores confodit, primum Lutheri, quo priùs docuerat liberum arbitrium ad motiones gratiæ passivè se habere, & velut instrumentum inanime : declaratque ipsum agere, & gratiæ cooperari assentiendo. Secundum, quo postea Lutherus cum Calvino, ac deinceps Jansenius asseruerunt liberum arbitrium sic motum, necessario, quamvis non coactè, gratiæ assentiri & cooperari, definitque Concilium dissentire posse, quod denotat libertatem à necessitate. Hoc sensit Calvinus in suo Antidoto, ut Paragr. præcedenti retulimus.

Fatendum tamen est, Jansenium & Sectatores ejus in modo loquendi à Calvino differre ; illi quippe liberum vocant necessarium, modò voluntarium sit & minimè coactum, & hoc sensu consentiunt liberum arbitrium remanere sub gratia efficaci, posseque dissentire in sensu diviso ; hoc est, si voluntas secundum se spectatur, & non quatenus movetur per gratiam ; quia, inquit, gratia non destruit naturam, nec naturalem potestatem dissentiendi, si major concupiscentiæ vis urget. Calvinus verò retinet communem Catholicorum loquendi morem, scilicet liberum arbitrium esse facultatem in utramque partem liberam & solutam ; unde cum in ejus sententia voluntas sub gratia efficaci, quam solam in hoc statu agnoscit, non sit ita libera, & soluta, consequenter negat liberum arbitrium remanere sub motione gratiæ, & voluntatem dissentire posse. Porro Concilium non modum loquendi, qui verus & legitimus est, in Calvino damnavit : sed

rem ipsam, in qua Calvinus & Jansenius consentiunt.

Concilii definitionem confirmarunt Innocentius X. & Alexander VII. suis Constitutionibus ab Ecclesia receptis, in quibus hæreticam declarant hanc tertiam propositionem ex Libro Jansenii excerptam, *ad merendum & demerendum in statu naturæ lapsæ, non requiritur in homine libertas à necessitate, sed sufficit libertas à coactione.* Qui enim docet gratiam & concupiscentiam necessitatem inferre, is procul dubio docet ad merendum & ad demerendum sufficere libertatem à coactione, nec requiri libertatem à necessitate; cum non mereamur, nec demereamur, nisi consentiendo gratiæ vel concupiscentiæ. Atqui Jansenius utrumque docet, ut patet ex dictis cap. 3. Ergo. Non potest clarius exponi Doctrina Catholica, & error Jansenii ipsi oppositus.

Probatur nostra responsio, ac simul Ecclesiæ definitio; 1. Ex Scriptura Eccli. cap. 15. *Deus ab initio constituit hominem, & reliquit illum in manu consilii sui, adjecit mandata & præcepta sua; si volueris mandata servare, conservabunt te . . . apposui tibi ignem & aquam, ad quod volueris, porrige manum tuam. Ante hominem vita & mors, bonum & malum, quod placuerit ei, dabitur illi.* Et cap. 31. dicitur justus mereri laudem & gloriam, qui potuit transgredi, & non est transgressus, facere mala, & non fecit.

Probatur 2. ex S. Augustino, cujus potissimum auctoritate gloriari nituntur Adversarii. Sic autem scribit Libro de Spiritu & Lit. cap. 31. *Cum potestas datur, non necessitas utique imponitur.* Cap. 34. *Agit Deus ut velimus & credamus . . .*

sed

sed consentire vel dissentire propriæ voluntatis est. Lib. 2. contra Faustum cap. 5. *Sub fato stellarum nullius hominis genescim ponimus, ut liberum arbitrium voluntatis, quo vel bene vel male vivitur, propter Dei judicium ab omni necessitatis vinculo vindicemus.* Et Lib. 5. de Civit. cap. 9. docet frustra objurgationes, vituperationes, exhortationes adhiberi, neque ulla justitia bonis præmia & malis supplicia esse constituta, si Dei præscientia necessitatem imponat.

Dices 1. Christus meruit implendo præcepta Patris: Atqui necessariò implevit, alioquin peccasset, quod erat ipsi impossibile: Ergo.

Distinguo min. necessariò implevit necessitate specificationis, Concedo: necessitate exercitii, N. min. Consule quæ in hanc rem fusè tradidimus, ubi de merito Christi.

Dices 2. ex S. Augustino passim, homo per peccatum amisit libertatem: Ergo.

Disting. antec. amisit libertatem à peccato & à miseria, Conced. libertatem à necessitate, N. antec. Ita S. Bernard. de Gr. & lib. arb.

Instabis 1. atqui homo per peccatum amisit libertatem à necessitate, S. enim Augustinus sic alloquitur Julianum: *Multum erras, qui vel necessitatem nullam putas esse peccandi cum peccatis de ignorantia vel affectionum necessitate venientibus plenum sit genus humanum:* Lib. 1. operis imperfecti num. 105. & Lib. 8. Confess. *dum consuetudini non resistitur, fit necessitas.* Ergo.

Distinguo antec. amisit libertatem à necessitate morali, quam S. Thomas vocat coactionem insufficientem, Concedo: à necessitate absoluta & physica, Nego antec. *Dicendum, inquit S. Thomas quæst. 6. de malo, quod consuetudo facit*
necessi-

necessitatem, non simpliciter; nam ex deliberatione quantumcunque consuetus potest contra consuetudinem agere. Porro necessitas moralis liberum arbitrium non perimit, nec indifferentiam omninò tollit, nec proinde excusat à peccato, juxta ea, quæ diximus de necessitate gratiæ ad implendam legem & vincendas tentationes. Quod autem S. Augustinus de ista necessitate intelligendus sit, patet ex ejus textibus allatis ad probandam nostram responsionem.

Instabis 2. Atqui necessitas absoluta non officit libertati, ex S. Augustino; sic enim scribit Lib. 5. de Civ. cap. 10. *Si . . . illa definitur esse necessitas, secundum quam dicimus necesse esse, ut ita sit aliquid, vel ita fiat; nescio cur eam timeamus, ne nobis libertatem auferat voluntatis; neque enim vitam Dei & præscientiam ejus sub necessitate ponimus si dicamus necesse esse Deum semper vivere & cuncta præscire. Unde S. Thomas, quæst. 10. de potentia artic. 2. ad 5. Dicendum, inquit, quod naturalis necessitas, secundum quod voluntas aliquid ex necessitate velle dicitur, ut felicitatem, libertati voluntatis non repugnat, ut Augustinus docet in Lib. 5. de Civit. Ergo.*

Distinguo anteced. necessitas physica & absoluta non officit libertati naturæ, Concedo: libertati arbitrii, subdistinguo; necessitas consequens & hypothetica, Concedo: antecedens, Nego antec.

Duplex itaque est libertas, alia naturæ, qua natura seu voluntas naturali instinctu, ut loquitur S. Thomas, sine impedimento tendit in suum finem, & ultimam perfectionem, quemadmodum dicimus aquam liberè fluere, si contra proprium pondus

pondus non retineatur. Alia arbitrii, qua voluntas unum præ alio eligit. Hanc libertatis distinctionem sanctus Thomas expressis verbis tradit 1. p. q. 19. art. 10. *Dicendum*, inquit, *quòd liberum arbitrium habemus, respectu eorum, quæ non necessario volumus, vel naturali instinctu, non enim ad liberum arbitrium pertinet, quòd volumus esse felices, sed ad naturalem instinctum. Cum igitur Deus ex necessitate suam bonitatem velit, alia verò non ex necessitate, respectu illorum, qui non ex necessitate vult, liberum arbitrium habet.*

Contra libertatem naturæ absolutè pugnat necessitas moriendi, ex sancto Augustino, loco in objectione citato; quia sic est contra naturæ inclinationem, ut vitare mortem nullatenus sit in nostra potestate, sed eodem sancto Doctore voluntas benè vel malè agendi nunquam sub hac necessitate constituta est. Si, inquit, *necessitas nostra illa dicenda est, quæ non est in nostra potestate . . . sicut est necessitas mortis, manifestum est voluntates nostras, quibus rectè vel perperam vivitur, sub tali necessitate non esse; multa enim facimus, quæ si nollemus, non utique faceremus.*

Motus quoque concupiscentiæ & tentationes libertati naturæ repugnant, quatenus sunt impedimenta quædam consequendi suum ultimum finem, in quo est felicitas & summa ejus perfectio. Hinc Beati, secundum sanctum Doctorem, Deum amant liberè, licèt necessariò, liberè, inquam, libertate naturæ; quia toto naturæ pondere in Deum feruntur, nulla concupiscentiæ titillatio ejus impetum cohibet, aut retardat. Non modò igitur naturæ libertati non nocet ista necessitas, quin illam perficit. Cum autem in Deo sum-

ma sit necessitas vivendi, bonitatem suam amandi, concipitur quoque maxima divinæ ejus naturæ libertas.

Duplicem iterum sanctus Augustinus distinguit necessitatem, alia est antecedens, quæ causaliter ita antecedit consensum voluntatis, ut absolute dissentire non possit, qualem Manichæi fingebant esse influxum siderum; quem errorem sanctus Doctor supra dicebat se rejicere tanquam noxium libertati, *ut liberum arbitrium voluntatis inquit, ab omni necessitatis vinculo vindicemus.* Alia est hypothetica & consequens, cujus duo exempla profert loco in objectione citato. Primum petit ex præscientia Dei, quam dicit esse liberam, quamvis necessariam; ex hypothese enim quod Deus decreverit aliquid futurum, illud consequenter necessario præscit, quod non impedit, quin & decretum & præscientia sint actus absolute liberi; quia Deus absolute potuit non decernere, ac proinde non præscire. Alterum exemplum repetit ex actuali voluntatis determinatione, qua posita necessario sequitur actus, v. g. ex hypothese quod Petrus currat, consequenter Petrus currit necessario & nihilominus liberè libertate absoluta, quia absolute potuit non currere. Sed ne videamur detorquere locum sat difficilem, proferenda sunt verba sancti Doctoris. *Quocirca, inquit, nullo modo cogimur, aut retenta præscientia Dei tollere voluntatis arbitrium, aut retento voluntatis arbitrio, Deum (quod nefas est) negare præscium futurorum; sed utramque amplectimur, utrumque fideliter & veraciter confitemur Neque enim ideo peccat homo, quia Deus illum peccaturum præscivit: imò ideo non dubi-*

dubitatur ipsum peccare, cum peccat; quia ille, cujus præscientia falli non potest, non fatum, non fortunam, non aliquid aliud, sed ipsum peccaturum esse præscivit. Quod si nolit, utique non peccat; sed si peccare noluerit, etiam ille hoc præscivit. Ubi præscientia Dei in mente sancti Augustini supponit peccati futuritionem, ac proinde necessitas, quæ oritur ex præscientia, non tollit libertatem indifferentiæ, utpote quæ sit consequens. Idipsum confirmat alio exemplo, nempe hominis, qui agit ex libera determinatione. Sic enim pergit: Cum dicimus, necesse est, ut cum volumus, libero velimus arbitrio, & verum procul dubio dicimus, & non ideo ipsum liberum arbitrium necessitati subijcimus, quæ admittit libertatem.

Dices 3. in mente S. Augustini, actio humana tum est perfectè libera, cum est maximè voluntaria; sic enim scribit Lib. de Corr. & Grat. cap. 8. *Quando rogavit Christus pro Petro, ne deficeret fides ejus; quid aliud rogavit, nisi ut haberet in fide liberrimam, invictissimam, perseverantissimamque voluntatem?* Ubi voluntas liberrima non est voluntas indifferens, sed ardentissimè voluntaria; absurdum quippe est dicere Christum rogasse, ut Petrus in fide haberet voluntatem maximè indifferentem. Ergo.

Confirmatur. Gratia, utpotè naturæ humanæ perfectiva non destruit, nec minuit ejus perfectiones naturales, quale est liberum arbitrium: Atqui gratia quo major est aut minor, magis aut minùs minuit indifferentiam, quin & illam destruit cum consummata fuerit. Ergo indifferentia non pertinet ad rationem liberi arbitrii.

Respondeo 1. distinguendo antecedens in mente S. Augustini, actio maximè voluntaria est liberrima libertate inadæquatè sumpta, Concedo: adæqua-

adæquatè sumpta, Nego antec. Itaque cùm arbitrii libertas duo essentialiter includat, scilicet voluntarium & indifferentiam activam, seu vim se determinandi, sanctus Augustinus tractans de gratia, libertatem quàm sæpissimè sumit inadæquatè pro voluntario. Et ratio est, quia activa voluntatis indifferentia infallibiliter determinatur per id, quod amplius delectat, & est plenius voluntarium. Unde cùm S. Augustinus contra Pelagianos totus esset in asserenda necessitate gratiæ, quæ ex nolentibus nos faciat volentes, voluntatemque liberet à servitute carnis & peccati; mirum non est, quòd S. Doctor visus sit primò Pelagianis, deinde Lutheranis & Calvinistis, ac demum Jansenio, liberum arbitrium in voluntario duntaxat reponere, & retractare, quæ ad vindicandas à fatali necessitate voluntates humanas priùs scripserat contra Manichæos. Nam, ut ipse scribit Libr. de Gratia Christi cap. 47. *ubi de arbitrio voluntatis, & Dei gratia disputatur, ita est ad discernendum difficile, ut quando defenditur liberum arbitrium, negari Dei gratia videatur: quando autem asseritur Dei gratia, liberum arbitrium putetur auferri.*

Respondeo 2. ad confirmationem, distinguendo min. gratia minuit indifferentiam contrarietatis, quæ est ad benè & malè agendum, Concedo: contradictionis tam specificationis, quàm exercitii, ut diximus ubi de merito Christi pag. 145. & seq. Nego min. Porro libertas contrarietatis, qua quis potest bonum & malum velle, v.g. mentiri, alium finem ultimum, quàm Deum sibi proponere, media necessaria ad Deum consequendum negligere, non est hominis perfectio, sed defectus, quem gratia eò magis minuit, quòd amplius
crescit,

crescit, & prorsus tollit in patria cœlesti, ubi perfecta & consummata beatos efficit impeccabiles; sed essentia libertatis arbitrii in iis non consistit. Nam ex sancto Thoma liberum arbitrium spectat solummodo electionem mediorum, quæ cum fine ultimo non habent necessariam connexionem, ita ut absque peccato & ullo defectu bonum præ alio eligi possit. Et hæc libertas indifferentiæ pertinet ad perfectionem creaturæ intellectualis, quæ ut est ad imaginem Dei, non agitur brutorum more, sed domina est suorum actuum, & de his ita liberè disponit, ut possit illos non ponere, quemadmodum Deus potuit mundum non creare, Incarnationis mysterium non implere: & multa beneficia creaturis non conferre, cum horum omissio non pugnet contra ejus sapientiam, bonitatem, & justitiam. Gratia autem Christi ejusmodi libertatem indifferentiæ nedum minuit, quin eam perficit, quatenus voluntatem liberat à necessitate morali serviendi carnis vitiis & concupiscentiis, juxta illud Joan. 8. v. 36. *Si ergo vos Filius liberaverit, verè liberi eritis.*

§. IV.

Utrum efficacia Gratiæ reparetur à consensu sive ab eventu.

R. Minimè: probaturque 1. ex Scriptura, quæ efficaciam tribuit gratiæ antecedenter ad consensum voluntatis, Phil. cap. 2. *Deus est . . . qui operatur in vobis & velle & perficere pro bona voluntate.* Non ait Apostolus, Deus operatur in vobis posse velle, quod est proprium Gratiæ sufficientien-

ficientis; sed ipsum velle, ipsum consensum efficaciter operatur, Rom. 8. *Quicumque enim Spiritu Dei aguntur, ii sunt filii Dei: in quem locum S. August. sic scribit Lib. de Gestis Pelagii c. 3. Procul dubio plus est agi quàm regi; qui enim regitur, aliquid agit, & à Deo regitur ut rectè agat; qui autem agitur, agere aliquid vix intelligitur, & tamen tantum præstat voluntatibus nostris gratia Salvatoris, ut non dubitet Apostolus dicere; quotquot Spiritu Dei aguntur, ii sunt filii. 1. Cor. 4. Quis enim te discernit? Quid autem habes, quod non accepisti? Si autem accepisti, quid gloriaris: quasi non acceperis? Atqui si gratia dat solum posse, voluntas verò consensum, per quem gratia sit efficax: qui consentit, habet quo se discernat à non consentiente simili gratia adjuto, nempè per consensum quem dedit, habet aliquid quod non accepit; unde gloriari potest Rom. 9. Igitur non volentis neque currentis, sed misertentis est Dei. Quod expendens S. Augustinus Lib. ad Simplicianum quæst. 2. hæc habet: Si propterea solum dictum est, neque currentis, neque volentis; sed misertentis esse Dei, quia voluntas hominis sola non sufficit, ut justè rectèque vivamus, nisi adjuvemur misericordia Dei, potest & hoc modo dici, igitur non misertentis est Dei, sed volentis est hominis; quia misericordia Dei sola non sufficit, nisi consensus nostræ voluntatis addatur. Tum rejecta hujusmodi paritate, sic concludit: Non igitur idèò dictum putandum est, non volentis, neque currentis, sed misertentis est Dei; quia sine ejus adjutorio non possumus adipisci quod volumus; sed idèò potius, quia nisi ejus vocatione volumus. Huc revocanda sunt, quæ supra diximus de existentia gratiæ efficacis.*

Frustra hìc proferemus testimonia ex Traditione & consensu sanctorum Patrum petita,
cum

cùm patroni sententiæ, quam impugnamus, ultrò fateantur suam doctrinam esse novam, & antiquis incognitam.

Probatur itaque 2. ratione. Illa doctrina vel eo solo titulo in Religione non est admittenda, quòd sit nova, & Scripturam detorqueat ad sensus sanctis Patribus ignotos, ne dicam contrarios: Atqui talis est doctrina, quæ efficaciam gratiæ repetit ab eventu & consensu voluntatis. Ergo. Minor constat ex dictis. Major probatur ex Tertull. Lib. de Præscriptionibus cap. 13. *Ex ipso ordine*, inquit, *manifestatur id esse dominicum & verum, quod sit prius traditum: id autem extraneum & falsum, quod sit posterius immixtum.* Ex Vincentio Lirin. in Commonitorio, *falsum, quod recens inventum.* Ex Conc. Tridentin. Sess. 4. *Ad coercenda petulantia ingenia decernit (sancta Synodus) ut nemo suæ prudentiæ innixus, in rebus fidei & morum . . . sacram Scripturam ad suos sensus contorquens contra eum sensum, quem tenuit & tenet sancta mater Ecclesia . . . aut etiam contra unaninem consensum Patrum, ipsam sacram Scripturam interpretari audeat.*

Porro Patroni hujus sententiæ textus Scripturæ à nobis laudatos contorquent ad sensus alienos ab interpretatione sanctorum Patrum, præsertim sancti Augustini, quem in controversiis de gratia consulendum docuerunt unanimi consensu summi Pontifices. Ergo.

Eadem major probatur 2. ratione. Quia illud est discrimen inter Philosophiam & sacram doctrinam, quòd Philosophi eruant suas conclusiones ex ipsis naturæ visceribus, ubi cùm identidem nova detegantur, posteriores possunt addere iis, quæ priores docuerunt, & evadere

peritiores. At doctrina sacra sola nititur revelatione, quam plenissimè factam Apostolis constat, Joan. 16. v. 13. *Cum autem venerit ille Spiritus veritatis, docebit vos omnem veritatem.* Et Luc. 24. v. 45. *Tunc aperuit illis sensum, ut intelligerent Scripturas.* Quod autem Apostoli immediatè acceperunt, illud Ecclesiæ commendarunt, quæ sacrum depositum hætenus illibatum custodivit, & usque in finem custodiet juxta promissionem sibi divinitus factam, ut dicitur suo loco. Ergo verus Scripturæ sensus petendus est ab Apostolica Traditione, nec in rebus fidei & morum posteriores possunt esse antiquioribus peritiores; ac proinde præferret falsi speciem, quidquid in iis rebus est recens inventum.

Dices 1. Gratia Angelis viatoribus non dedit velle, sed posse duntaxat, habuitque effectum ex libero arbitrio & ex sola determinatione voluntatis: Atqui nemo dixerit Angelos bonos propterea se discrevisse à malis, & quidquam habuisse, quo in se gloriari possent. Ergo in hypothesis quòd efficacia gratiæ repetatur ab eventu, habeatque effectum ex determinatione voluntatis, non sequitur eum qui consentit, se discernere ab eo qui dissentit, & habere quo in se gloriatur.

Confirmatur: generalis est isthæc Apostoli sententia, *in solo Deo gloriandum*, extenditurque ad omnes dotes etiam naturales, ingenium, industriam, eloquentiam, qua Corinthiorum Pseudo-Magistri inflabantur: eorum autem superbiam frangit Apostolus his verbis: *Quid habes quod non accepisti? si autem accepisti, quid gloriaris quasi non acceperis?* Quæ objurgatio sanè est æquissima, quamvis

vis ex libero arbitrio pendeat uti vel non uti hisce dotibus.

Distinguo majorem : habuit effectum ex libero arbitrio & determinatione voluntatis omnino sanæ , in bonum propensæ , & nulla concupiscentia repugnante , Concedo : ex determinatione voluntatis infirmæ ; tentationibus & contrariis concupiscentiæ motibus agitatæ , Nego majorem.

Concessa min. absolute negari debet consequentia ; argumentum enim non est in forma , cum in consequentia fiat transitus à statu naturæ integræ , de quo est sermo in præmissis , ad statum naturæ corruptæ . Sed explicationis gratia ,

Distinguo consequens , non sequitur eum , qui consentit , se discernere , si sit sermo de statu naturæ integræ , Concedo : si de statu naturæ corruptæ sit sermo : Nego consequ.

Itaque cum in Angelis viatoribus , sicut in primo homine innocente , nulla esset difficultas , nullo molesta obediendi justitiæ , sed mera suavitas & omnimoda propensio , qui steterunt , minus se discreverunt ab iis , qui ceciderunt , quam isti ab illis , nec habuerunt quo in se gloriarentur , sed in Deo , qui eos condidit in illa integritate & rectitudine . Sic nemo inflabitur adversus furem , qui sibi violentas manus infert , abhorrente natura , sed gratias Deo aget quod eum in illam rabiem non tradiderit , qua pauci furentes se ab aliis discernunt . At verò in hoc statu naturæ corruptæ cum *posse* , quod habetur per gratiam sufficientem , manet caro rebellis concupiscens adversus spiritum , manet infirmitas ex peccato re-

licta, manent tentationes. Quapropter si Deus det solum posse per gratiam sufficientem, & hominis sit velle & operari, habet unde se discernat & in se gloriatur; nempe bonam voluntatem.

Nec dicas, bonam voluntatem esse à Deo, à quo habet ut vincere possit per gratiam sufficientem; illud enim effugium est Pelagianorum, quod sanctus Augustinus invictissimè refellit Lib. 2. de pec. mer. à c. 17. ad 19. verba illius sunt: *Illud Apostoli quod commemoravi, quis te discernit? sic defendere quidam (Pelagiani) voluerunt, ut dicerent, ideo quidquid etiam bono voluntatis habet homo, Deo tribuendum esse, quia & hoc in illo esse non posset, si homo ipse non esset: cum verò ut homo sit, non habeat nisi à Deo, cur non auctori Deo tribuatur etiam quod in illo est bonæ voluntatis? sed hoc modo etiam illud dici potest malam quoque voluntatem Deo auctori esse tribuendam, quia nec ipsa esse posset in homine, nisi homo esset. Quapropter nisi obtineamus non solum voluntatis arbitrium, quod huc atque illuc flectitur... sed etiam bonam voluntatem, nisi ex Deo nobis esse non posse; nescio quemadmodum defendamus quod dictum est, quid enim habes quod non accepisti? Nam si nobis libera quædam voluntas ex Deo est, quæ adhuc potest esse vel bona vel mala; bona verò voluntas ex nobis est, melius est id quod à nobis, quàm quod ab illo est. Quod cum sit longè absurdissimum, idem S. Doctor testatur Lib. de Prædestinatione Sanctorum c. 4. hoc Apostolico præcipuè testimonio, quis te discernit; se fuisse convictum, cum de hac re aliter saperet.*

At, inquiet Molinæ Discipulus, Pelagius reponebat posse in natura, nos verò in gratia sufficiente. Verum est; sed quid inde? nisi quod
illi

illi à Pelagio dissentiant in hac parte, de qua nulla est inter nos controversia; sed sicut Pelagius contendebat præter illam possibilitatem à Deo naturæ nostræ gratuito inditam non requiri aliam gratiam, ut liberum arbitrium convertat se in bonum naturalis ordinis, illudque perficiat cum concursu Dei generali, qui deest nemini; ita in sententia quam impugnamus, præter possibilitatem supernaturalem, quæ habetur per gratiam sufficientem, liberum arbitrium alio auxilio non indiget, ut bonum supernaturalis ordinis velit, perficiatque cum Dei concursu supernaturali: quam opinionem S. Augustinus totis viribus impugnat, utpote quæ sit contraria gloriæ victricis gratiæ Christi, & foveat hominis superbiam, quia nimis in se confidit cum morali periculo damnationis æternæ. *Nam si in tanta infirmitate vitæ hujus, inquit Lib. de Cor. & Grat. c. 12. ipsis relinqueretur voluntas sua . . . nec Deus in eis operaretur ut vellent, inter tot & tantas tentationes infirmitate sua voluntas ipsa succumberet.*

Ad confirmationem dico, nec sapientem consiliarium uti ad salutem sua sapientia, nec artificem sua industria, nec quemvis suo ingenio, nisi Deus ipsis dederit non solum posse per gratiam sufficientem, sed etiam velle & perficere per gratiam efficacem, & hoc ab illo esse deprecandum, ejus gratia didicimus, dum antea lateret; ejus gratia dileximus, dum antea non delectaret, inquit S. August. cit. Lib. 2. de pec. mer. c. 19. ubi addit Deum optimum, ideo etiam Sanctis suis alicujus operis justitiam aliquando non tribuere, vel certam scientiam, vel victricem delectationem, ut cognoscant non à seipsis, sed ab illo sibi esse lucem, qua illuminentur tenebræ eorum, & sua-

vitam qua det fructum suum terræ eorum, ut qui gloriatur, non in se, sed in Domino gloriatur, qui non solum dat posse, sed etiam velle & operari. Verum de his plura inferius.

Dices 2: Theologorum est explanare, quæ obscurius fuerunt tradita, & iis fidem conciliare, excogitatis novis explicationibus ad caput Fidelium magis accommodatis. Ergo novitas in rebus fidei & morum non est prorsus eliminanda.

Distinguo antecedens: Theologorum est explanare, quæ obscurius fuerunt tradita, & iis Fidem conciliare, retento dogmate & Scripturarum sensu, quem Patres tenuerunt, Concedo: mutato dogmate, & spreto Scripturarum sensu quem Patres posteris commendarunt, ut patet ex allatis textibus, Nego anteced.

Porrò novitas, quam impugnamus, immutat gratiæ dogma, Scripturam contorquet ad sensum sanctis Patribus ignotum, ut ipsemet Cardinalis Bellarminus agnoscit Lib. 1. de Gratia & lib. arbitr. cap. 2. *Opinio eorum, inquit, qui gratiam efficacem constituunt in assensu & cooperatione humana, ita ut ab eventu dicatur gratia efficax . . . omnino aliena est à sententia Scripturarum . . . evertit omnino fundamentum prædestinationis divinæ. Omitto quod esset abuti vocabulis, vocare gratiam efficacem. Esto, reddat mysterium creditu facilius; sed quæ creditu sunt facilia, non debent censerī veriora; alioquin verior esset sententia Socinianorum circa mysterium sanctissimæ Trinitatis, & Sacramentariorum circa Sacramentum Eucharistiæ, utpotè quæ solvat omnem difficultatem.*

Instabis;

Instabis : Nova est , & à nullo ex sanctis Patribus tradita isthæc modernorum propositio , gratia est per se efficax ; Ergo à Scholis quoque Catholicis est rejicienda.

Distinguo antecedens. Est nova quoad explicationem & sonum verborum , Concedo ; quoad sensum & rem significatam , Nego antecedens ; *Fas est autem* , inquit Vincentius Lirinensis commonit. 1. capit. 3. *ut prisca illa cælestis Philosophiæ dogmata processu temporis limentur , poliantur ; sed nefas ut commutentur , nefas ut detruncantur , ut mutilentur. Accipiant licet evidentiam , lucem , distinctionem ; sed retineant necesse est plenitudinem , integritatem , proprietatem. Et cap. 27. Intelligatur , te exponente , illustrius quod ante obscurius credebatur . . . eadem tamen quæ didicisti ; doce , ut cum dicas novè , non dicas nova.* Sic Ecclesia , cum Ariani Filium Patri similem æquivocè confiterentur , similem , inquam , propter divinas quasdam proprietates , non propter identitatem substantiæ , excogitavit vocem *Consubstantialis* , qua distinctius exprimitur antiquum fidei dogma , & discernitur ab errore recens inducto. Sic adversus Sacramentarios commenta est nomen *Transubstantiatio* , quo dispelluntur quæ de Sacramento Eucharistiæ ambiguè docent. Eodem planè modo , cum Molinæ Schola retineret nomen gratiæ efficacis , necessum fuit , ut aliæ Scholæ exponerent , quo sensu Scriptura & sancti Patres docerent gratiam esse efficacem , adderentque voces *per se* , quæ nihil immutant circa antiquum dogma , novèque dicerent , sed non nova.

§. V.

Utrum efficacia Gratiæ reponenda sit in circumstantiis magis congruis?

R. Reponenda non est.

Probatur 1. ex Scriptura, quæ in textibus jam laudatis Paragrapho præcedenti, efficaciam gratiæ clarè repetit ex absoluto Dei dominio in voluntates humanas, docetque Deum prohibito eas immutare, etiam in circumstantiis minùs congruis. *Auferam, ait Dominus Ezech. 11. cor lapideum de carne vestra, & dabo vobis cor carneum, & Spiritum meum ponam in medio vestri, & faciam, ut in præceptis meis ambuletis.* Quid est autem cor lapideum, nisi cor durum, malè affectum, & pessimè dispositum? Illud tamen Deus subito immutat, & in carneum convertit, non expectatis congruis dispositionibus, nec captato tempore opportuniori; sed potenter efficit, ut operetur. Sic Esther cap. 15. convertit cor Regis Assueri in mansuetudinem. Luc. cap. 7. Peccatricem immutavit in circumstantiis minimè consentaneis, & capite 23. Latronem nequissimum, & in Cruce blasphemantem, Matth. 27. Quid congruum in circumstantiis, in quibus efficaciter vocati sunt Jacobus, Joannes rescindentes retia, Matthæus sedens in telonio, Saulus spirans minarum & cædis in discipulos, de quo sic scribit sanctus Augustinus Lib. 1. ad Simplic quæst. 2. *Quid volebat Paulus, nisi ut invaderet & traderet, vinciret & necaret Christianos? quàm rabida voluntas, quàm furiosa, quàm cæca! qui tamen una desuper voce prostratus, occurrente utique tali viso, quo mens illa &*
voluntas

voluntas refracta sævitia retorqueretur , & corrigeretur ad Fidem.

Nec dicant Patroni hujus sententiæ in hujusmodi vocationibus extraordinariis , gratiam efficacem alio operari modo , quàm in ordinariis , namque omnibus efficaciter vocatis dicitur : *Auferam cor lapideum de carne vestra . . . & faciam , ut in præceptis meis ambuletis* , Ezech. 11. vers. 19. & cap. 36. vers. 36. Ad omnes Dei filios extenditur illud Apostoli : *Quicumque Spiritu Dei aguntur , ii sunt filii Dei* , Rom. 8. vers. 14. *Deus est enim , qui operatur in vobis & velle & perficere* . Philipp. 2. vers. 13. *Dabit Spiritum bonum petentibus se* , Luc. 11. vers. 13. quàm autem dogma , quod hic impugnamus , alienum sit ab obvio & genuino sensu horum textuum , vel inde patet , quòd dici nequeat nisi improprie & metaphoricè illum dare velle & operari , tribuere cor novum & Spiritum bonum , qui alium trahit in suam sententiam explorando ejus animi propensionem , & captando tempus locumve opportunum ; quis enim sine impietate ejusmodi orationem dirigeret ad consiliorum aut studiorum moderatorem , da mihi Spiritum bonum , aufer à me cor lapideum , & cor novum crea in visceribus meis ?

Probatur 2. ratione , tum quia scientia media , qua tanquam fundamento nititur hæc opinio , communiter rejicitur , ex dictis Tract. de Attributis : tum quia prædestinatio , etiam ad gratiam , in hac sententia præsupponit , si non merita , saltem dispositiones & prævisum consensum voluntatis , si gratia concederetur ; ex quo sequitur efficaciam gratiæ esse ex consensu præviso : tum denique quia is occasiones captan-

di modus ad alliciendas voluntates liberas, est indignus Deo, competitque solis creaturis. Enimverò cùm Principes terreni non possint directè agere in subditorum voluntates, coguntur explorare eorum genios & mores, & extrinsecùs adhibere pollicitationes & minas idoneas ad flectendas eorum cervices. Contra verò Deus tam immediatè dominatur voluntatibus nostris quàm corporibus, & sicut dat illis esse liberum; ita & velle & operari similiter liberum. *Cor Regis*, inquit Sapiens Prov. 21, *in manu Domini, quocunque voluerit, inclinabit illud*; illæsa tamen ejus libertate. Si enim anima nullo mediante potentias suas efficaciter determinat & applicat ad actum modo ipsis competenti, nempe intellectum necessariò, voluntatem verò liberè; quantò magis Deus, qui est ipsis intimior quàm anima, & à quo magis pendent in esse & operari?

Porro sententia, quam impugnamus, Deo denegat ejusmodi imperium in voluntates humanas, exhibetque liberum arbitrium veluti speciem quandam divinitatis, quæ ita est independens & domina suorum actuum ut Deus ipse, nisi eam spoliet juribus concessis, hoc est necessitatem ipsi inferat, teneatur fingere se ad ejus nutum, & observare quæ foret ejus propensio in prævisis circumstantiis, ut ab illa obtineat quod intendit: an non de Deo sentit indignè, qui ita sapit?

Dices: Scriptura & sancti Patres efficaciam gratiæ reponunt in congruitate: Ergo.

Probatur antec. 1. ex cap. 11. Matth. ubi Christus sic exprobrat incredulis; *Væ tibi Corozain, væ tibi Bethsaida; quia si in Tyro & Sidone factæ essent virtu-*

virtutes, quæ factæ sunt in vobis, olim in cilicio & cinere pœnitentiam egissent. Quæ verba intelligi debent de æquali gratia, non solum exteriori, sed etiam interiori, aliàs non magis æqua videretur exprobratio, quàm si dux de milite victo quereretur, ejusque probrum augeret ex alterius militis victoria, qui melioribus armis fuisset munitus.

2. Ex S. Augustino Lib. 1. ad Simplicianum qu. 2. sic scribente: *Verum est ergo, multi vocati, pauci vero electi, qui congruenter vocati; illi autem, qui non congruebant & cooperabantur vocationi, non electi, quia non secuti.* Ubi sanctus Doctor totam efficaciam gratiæ reponit in congruitate, quam habet ad voluntatem humanam: hæc autem congruitas petitur ex scientia media Dei moventis, eo modo quo scit aptum esse ut voluntas obtemperet. *Igitur misereantis est Dei, inquit, qui hoc modo vocavit, quomodo aptum erat eis, qui secuti sunt vocationem.*

Distinguo anteced. in congruitate ad infallibiliter determinandam voluntatem, petita ex ipsiusmet gratiæ entitate, Concedo; in congruitate petita ex circumstantiis temporis & loci per scientiam mediam exploratis, Nego antec. Itaque non negamus, gratiam ex entitate efficacem, esse aptam & congruam voluntati flectendæ. Congrua illa gratia caruerant habitatores Corozain duplici ex capite, 1. quia erant indurati. 2. quia non erant prædestinati, & secundum propositum vocati. Ita S. Augustinus Lib. de dono perseverantiæ c. 14. *Tyrri relictæ sunt, inquit, & Sidonii, qui etiam credere potuerunt, si mira illa Christi signa vidissent; sed quoniam ut crederent, non erat eis datum, etiam unde crederent, est negatum, . . . non ergo erant sic excæcati sicut Judæi, nec sic induratum*

duratum cor Tyriorum & Sidoniorum, quoniam credidissent, si qualia viderant isti, signa vidiſſent. Sed nec illis profuit quòd poterant credere; quia prædeſtinati non erant; nec illis obſuiſſet; quòd non poterant, ſi ita prædeſtinati eſſent, ut eos cæcos Deus illuminaret; & induratis cor lapideum auferret. Verùm quod dixit Dominus de Tyriis & Sidoniis, aliquo alio modo poteſt fortassis intelligi. Eo ſcilicet modo, quo ſanctus Doctor ſeipſum explicat citata quæſt. 2. lib. 1. ad Simplicianum his verbis: Non poteſt effectus miſericordiæ Dei eſſe in hominis poteſtate ut fruſtra ille miſereatur, ſi homo nolit; quia ſi vellet eorum miſereri, poſſet ita vocare, quomodo aptum eſſet, ut moverentur, & ſequerentur.

Ex his duo colliges,

Primum Gratia, qua Tyrii & Sidonii pænitentiam egiſſent, ſi eadem ſigna vidiſſent quæ Corozaitæ, in mente S. Auguſtini non foret auxilium, ſine quo illi credere non potuiſſent, & cum quo credere potuiſſent, ſi voluiſſent; ſed auxilium, quo infallibiliter credidiſſent. Quid enim aliud innuunt laudata verba, Lib. de dono perfeverantiæ: *Verùm quod dixit Dominus de Tyriis & Sidoniis, aliquo alio modo poteſt fortassis intelligi*, niſi quòd de Tyriis ac Corozaitis, non eodem modo dicendum utroſque potuiſſe credere; nam iſti, cùm poſſent, non tamen crediderunt propter malitiam & duritiam cordis. Illi vero ſic potuiſſent, ut actu infallibiliter credidiſſent, non quia ſic indurati non erant; ſed quia prædeſtinati alio modo moti fuiſſent.

Secundum. Juſta fuit objurgatio Corozaitis facta, quia quòd non crediderint, imputandum eſt propriæ eorum cæcitati & malitiæ, cui obno-

xii non erant Tyrii & Sidonii, quemadmodum in allato militis exemplo, dux justè exaggerat militis ignaviam, ex qua victus est, cùm in altero nulla fuerit.

Instabis : S. Augustinus Libr. 12. de Civ. Dei cap. 6. admittit eandem gratiam in duobus æqualiter affectis, in altero habere effectum, in altero verò non habere : Ergo efficacia gratiæ reperiri potest, vel ex eventu, vel ex congruis circumstantiis ; sic enim scribit : *Si aliqui duo æqualiter affecti animo & corpore, eadem tentatione agitati, videant unius corporis pulchritudinem, qua visa unus eorum ad illicitè fruendum moveatur, alter in voluntate pudica stabilis perseveret : quid putamus esse causæ, ut in illo fiat, in illo non fiat voluntas mala ?* Ergo.

Nego conseq. Nam S. Augustinus eo loci non agit de gratia, sed de causa peccati duntaxat, probatque exemplo allato, Deum non esse illius Auctorem, neque naturam ab ipso conditam, cùm illi ambo homines sint æquè affecti animo & corpore : quòd ergo alter eorum malè concupiscat, oriri non potest nisi ex mala voluntate. Nec ulterius perpendit S. Doctor ; unde alter maneat in proposito castitatis, an propriis viribus, an Dei auxilio ; quia ad ejus institutum non pertinet.

§ VI.

Utrum efficacia gratiæ sita sit in præmotione physica.

R. Sita non est.

Probant nonnulli : quia opposita Thomistarum sententia libertatem destruit, Deumque facit peccati auctorem. Sed absit, ut impius ille
error

error impingatur Scholæ tot titulis de Ecclesia bene meritæ, & ob integritatem doctrinæ pluribus in Provinciis Orbis Christiani à summis Pontificibus, velut in specula positæ, ut contra graffantes profanas novitates invigilet.

Enimverò ejusmodi criminatio vel unò animæ rationalis exemplo facilè diluitur. Certum quippe est quòd anima suas potentias (à quibus realiter distinctam supponunt Thomistæ) physicè præmoveat & applicet ad operandum, sed modo cui-libet earum attemperato, nempe ita movet v. g. intellectum, ut necessariò cogitet; voluntatem verò, ut liberè velit; sicque tantum abest, ut anima sua præmotione tollat libertatem, cum illam astruat, & in actu ponat. Hoc sentimus & experimur in nobis, adeo ut opus non sit alia probatione. Similiter Deus intimior creaturis, quàm anima suis potentiis, illas præmovet modo ipsis consentaneo, aliis operandi necessitatem imponit, aliis actualem libertatem tribuit.

Neque verò propter præmotionem Deus magis est auctor peccati, quàm propter concursum, quem omnes aliæ Scholæ coguntur admittere; quia nihil objicitur contra præmotionem, quod non facilè retorqueatur contra Dei concursum, ad actiones malas absolutè necessarium, nec quidquam reponere possunt propugnatores concursus simultanei, quod non militet pro assertoribus præmotionis. Etenim quærenti quo modo Deus suo concursu non est auctor peccati, cum voluntas prius non sit actu determinata ad peccandum, quàm Deus concurrat, actualis quippe determinatio est actio, quæ non potest esse sine Dei concursu? Respondent Thomistarum Adversa-
rii,

rii, Deum concurrere ad actiones malas, ut causam universalem, ubi id exigunt causæ secundæ, non verò ut causam particularem, quæ ad malas actiones incitet roboretque, quemadmodum impiè docet Calvinus. Deus enim ut causa particularis retrahit à malo, tum extrinsecè per Legem prohibentem: tum intrinsecè per pias motiones. Sed cùm voluntas pro sua libertate non acquiescit divinis suasionibus, necesse est vel Deus denegat creaturæ usum suæ libertatis suspendendo influxum primi motoris & causæ universalis; vel eam permittat, ut pars est, suæ libertati, hoc est, præbeat concursum, sinatque illam deficere. In qua hypothesi (inquiunt & quidem veraciter) defectus in Deum non est refundendus, sed in ipsam creaturam, quæ sua abutitur libertate, & Deum facit servire iniquitatibus suis, ut ipse conqueritur per Isaiam Prophetam, cap. 43. Atqui Thomistæ eadem planè responsione satisfaciunt iis, quæ ipsis objiciuntur; nam in eorum sententia Deus præmovet actiones malas, ut causa universalis duntaxat, & ad exigentiam causarum secundarum; ac proinde illis imputandum, si alicubi peccent. His ergo promissis,

Probatur nostra responsio. In eo sita non est efficacia gratiæ, quod est commune omni statui. Atqui præmotio physica ex Thomistis est communis omni statui. Angeli in statu viæ, & primus parens in statu innocentiae physicè præmovebantur ad bonum; cùm in illa sententia creaturæ non possint agere, nisi physicè præmotæ: Ergo efficacia gratiæ sita non est in præmotione physica.

Major est sancti Augustini, tum cap. 12. Lib. de Cor. & Grat. supra laudato Paragrapho 4. tum cap. 10. *Istam gratiam, inquit, non habuit homo primus, qua nunquam vellet esse malus: sed sanè habuit, in qua si permanere vellet, nunquam malus esset, & sine qua etiam cum libero arbitrio bonus esse non posset; sed eam tamen per liberum arbitrium deferere posset* Tale quippe erat adiutorium, quod defereret cum vellet, & in quo permaneret si vellet, non quo fieret, ut vellet. *Hæc est prima gratia, quæ data est primo Adam; sed hæc potentior est in secundo Adam. Prima est enim, qua fit ut habeat homo iustitiam, si velit. Secunda ergo plus potest, qua etiam fit, ut velit. Et paucis interjectis, subdit de Angelis bonis; cadentibus aliis per liberum arbitrium, per idem liberum arbitrium steterunt ipsi.*

§. VII.

Utrum efficacia gratiæ consistat in delectatione viâtrici?

Ista est ultima quæstio circa efficaciam gratiæ, in qua quidem quæstione Catholicæ Scholæ omnes conveniunt, sed diverso modo. Namque 1. celeberrimi in Schola Molinæ blandam motionem moraliter determinantem admitti posse, imò aliquando admittendam scribunt. 2. Tota Thomistarum Schola eam admittit, sed ei necessario adjungendam præmotionem physicam contendit. 3. Augustinianorum Schola uno ore docet efficaciam gratiæ reponendam esse in ejusmodi suaviori motione, nec ad eam requiri physicam Thomistarum præmotionem. Hanc sententiam
commu-

communem, præsertim in Academia Parisiensi, & testimonium habentem ab omnibus Scholis Catholicis, ut ex dicendis mox patebit, in prima editione operis nostri breviter tradidimus, utpote quia via tuta & nullis hostibus obsessa incederemus.

Sed in hac posteriori Editione quæstio proposita eò accuratius est tractanda, quò impotentiùs nonnulli adversùs delectationem victricem nunc debacchantur, ut eam non solum ad Janse-
nianorum, sed etiam ad Epicureorum Scholam ablegare non vereantur.

Tam insignis temeritas & impietas, quamvis Censura Ecclesiæ potiùs opprimi debeat, quàm oratione Theologi, assentatores tamen reperit, qui ut res dant sese, ita sunt, aut loquuntur, & ex ejusmodi effrænata scribendi libidine occasionem arripiunt, alii ut novam Molinæ doctrinam in Catholicum dogma erigant, alii ut suscitent extinctum errorem, quo Quietistæ docent gratiam in statu perfectionis, quem passivum vocant, omnem animæ motum comprimere, adeo ut nequidem reluctari debeat obscænis carnis voluptatibus. Hinc est, quòd in controversia Scholæ non versemur jam, sicut priùs, sed in controversia Fidei, quemadmodum Adversarii autumant; novumque nos animum assumere oporteat, ut Clerici adversùs ejusmodi vaniloquos muniantur, sciant quid credere debeant, quidve docere; simplices enim & mulierculæ trahuntur in illam controversiam; fluctuantisque redduntur per libellos vernaculo idiomate in eorum gratiam seu potius subversionem editos. Atque ut ratione & vi procedat di-

sputatio, quædam prius elucidanda sunt circa delectationem, quàm quidquam definiamus.

Nonnulla elucidantur circa delectationem universim spectatam.

Q. 1. *Quotuplex est delectatio?*

R. Duplex, scilicet carnis & spiritus. Adversus delectationem carnis extat Lex Divina, Exodi 20. *Non concupisces.* Et Eccli. 18. *Post concupiscentias tuas non eas, & à voluntate tua* (S. Augustinus legit, *à voluptate tua*) *avertere*; quia, ut scribit S. Doctor Libr. 10. Confess. cap. 35. fervientes voluptatibus sensuum depereunt. Sed cum nemo possit esse continens, nisi Deus det, Sap. 8. Justi continuò invocant Dei dexteram, ne capiantur carnis illecebris, adversus quas quotidianum bellum gerunt divina gratia adjuti & roborati.

Quæ cum ita sint, quis ita desipiet, ut efficaciam gratiæ reponat in carnis delectationibus, cum ad hoc detur, vel ut comprimantur omnino, si turpes sint, vel ad sanum modum redigantur, si utiles ad vitæ humanæ officia. Restat ergo, ut quæramus num efficacia gratiæ reponi possit in aliqua spiritus delectatione?

Q. 2. *Quotuplex est delectatio spiritus?*

R. Duplex, scilicet præveniens, & consequens.

Præveniens, nihil est aliud, quàm complacentia in bono, quod intellectus apprehendit & voluntati proponit, ut ipsi consentaneum & ab ipsa appetibile; inde enim voluntas suaviter ille-

cta

ita excitatur, & pondere amoris inclinatur ad bonum illud prosequendum.

Delectatio consequens est quies in bono obtento & possessio, diciturque fruitio. In eo autem differt à delectatione præveniente, quòd ista præcedat omnem motum liberi arbitrii, illudque excitet tum ad consensum, tum ad opus, ac propterea constituitur à Philosophis primus finis effectus: illa verò sit fructus bonorum operum, ex quibus eò major efflorescit, quò opera fuerint perfectiora, ut invictissimè probavimus Tractatu de Actibus humanis, capite secundo, & capite sexto, paragrapho quinto, & paragrapho nono. Perspicuum autem est efficaciam gratiæ non posse reponi in delectatione consequente, utpotè quæ sit gratiæ efficacis effectus, & proprius justitiæ fructus, juxta illud Apostoli Galat. 5. v. 22. *Fructus autem Spiritus est charitas, gaudium, pax.* Utraque isthæ spiritualis delectatio nonnunquam ex anima in corpus effluit, ut habetur Psalm. 83. *Cor meum & caro mea exultaverunt in Deum vivum;* & hac suavitate cælesti solet Deus eos recreare, quos recens ad se convertit, donec virtus in eis radices miserit, quia, ut observat sanctus Gregorius, teneriores arbusculæ frequentiori irrigatione indigent, quæ grandioribus subtrahitur. Sed multò minùs efficacia gratiæ constitui potest in ejusmodi derivata suavitate.

Tota igitur controversià versari potest circa delectationem antecedentem, utrùm scilicet efficacia gratiæ in ea sit constituenda. Itaque

Q. 3. *Delectatio præveniens estne causa omnium actuum humanorum?*

N n 2

R. Af-

R. Affirmant omnes. *Omnis actio*, inquit S. Thomas 1. 2. q. 28. art. 6. ad 2. *procedit ex amore, sicut ex prima causa*, laudatque illud Auctoris de divinis nominibus cap. 4. *propter amorem boni omnia agunt, quaecunque agunt*. Et S. Augustinus Lib. 14. de Civ. Dei cap. 7. *Recta voluntas, inquit, est bonus amor, & voluntas perversa malus amor. Amor ergo inbians habere quod amatur, cupiditas est: id autem habens, eoque fruens, lætitia: fugiens quod ei adversatur, timor est: idque, si acciderit sentiens, tristitia est. Proinde mala sunt ista, si malus est amor; bona, si bonus. Porro amor ille nihil aliud est, quam complacentia; ex S. Thoma 1. 2. tota ferè q. 26. sic enim habet art. 1. Appetitio appetitus sensitivi, vel voluntatis ad aliquod bonum, id est, ipsa complacentia boni, dicitur amor sensitivus, vel intellectivus. Et art. 2. Prima ergo immutatio appetitus ab appetibili vocatur amor, qui nihil est aliud, quam complacentia appetibilis, & ex hac complacentia sequitur motus in appetibile, qui est desiderium: & ultimò quies, quæ est gaudium. Et qu. 27. art. 1. Amor, inquit, importat quandam connaturalitatem vel complacentiam amantis ad amatum. Hinc secundum communem usum loquendi promiscuè dicimus, volo, amo, mihi placet, me delectat; nolo, mihi displicet. Ergo si Deus operatur in nobis velle, quemadmodum asserit Apostolus ad Philipp. 1. operatur amorem, complacentiam, delectationem; cum ista sint termini Synonimi. Sed præter auctoritatem, invictissima nobis suppetunt argumenta, delectationem prævenientem esse causam omnium actuum humanorum.*

Primum. Quia voluntas est facultas essentialiter boni appetitiva, sicut intellectus est facultas
veri

veri cognoscitiva, adeo ut, quemadmodum nulla potest esse operatio intellectus, nisi cognitio, sive affirmet, sive neget; ita nulla sit actio voluntatis, nisi volitio, seu amor boni, sive oderit, sive tristetur, sive timeat, &c. atqui voluntas nec velle, nec amare potest bonum, nisi ipsi placeat, eique proponatur ut conveniens; contradictorium enim est, voluntatem velle, aut amare, quod ipsi actu displicet: quia si displiceat, illud adversatur & fugit: si velit & amet, in illud inclinatur & fertur; porro contradictorium est in bonum simul ferri, & ab eo retrahi: Ergo ut voluntas bonum velit & appetat, necesse est, ut ipsi placeat: *Amor*, inquit S. Thomas cit. art. 2. ad 3. *nominat motum appetitus, quo immutatur ab appetibili, ut ei appetibili complaceat*, alioquin illud actu non appeteret, nec amaret. Notum est Poetæ effatum, *Video meliora, proboque, deteriora sequor*. Quid ita? Nimirum voluntati deterioribus præoccupatæ ac veluti inescatæ meliora placere nequeunt. Solus Deus habet, quæ omnibus placeant, utpotè qui sit omne bonum; attamen nemo tam habet, quæ infidelibus displiceant, ut observat S. Augustinus, ideoque pantomimus, horreo dicere, inquit sanctus Doctor, potius ab iis diligitur, quàm Deus. Ait Christus Matth. 11. *Fugum meum suave est*; sed nisi suavitas illa voluntatem afficiat, abjicitur ut intolerabile. Unde S. Augustinus Serm. 17. in hæc verba: Psal. 118. *Bonitatem fecisti cum servo tuo*, secundum editionem vulgatam; & secundum Syriacam, *saporem fecisti*; secundum verò Codicem, quo utebatur, *suavitatem fecisti*, sic habet, *nihil hic aliud dictum existimo, nisi fecisti ut me delectaret bonum*; quando enim delectat bonum, magnum est

Dei donum. Et expendens versiculum sequentem, *suavitatem & eruditionem, & scientiam doce me*, ait, cum quo ergo facit Deus suavitatem, id est, cui propitius inspirat boni delectationem profectò instanter orare debet, quo tantum sibi augeatur hoc donum. Ex quibus plenissimè demonstratur, voluntatem nunquam ferri in bonum sive verum, sive apparens, nisi ipsi placeat, & ad illud suaviter afficiatur.

Secundum argumentum. Ex omnium consensione finis est prima causa, bonitate sua cæteras excitans: causalitas verò ejus, ut ajunt, hoc est, ratio qua tendit in effectum, est metaphorica voluntatis motio, quemadmodum causalitas virtutis calefactivæ est calefactio, virtutis illuminativæ illuminatio, quæ concipiuntur veluti via & medium quid inter causam & effectum, inter ignem calefacientem & calefactum, inter solem illuminantem & aerem illuminatum.

Quæro jam quam motionem primario in voluntate efficiat bonitas finis. An displicentiam, an fastidium & odium, an timorem aut tristitiam? atqui repugnat bonitatem præcisè & sub ratione bonitatis apprehensam displicere, fastidium creare, metum injicere, aut tristitiam, sicut repugnat intellectum dissentire veritati lucenti, alioquin ejusmodi facultates ferrentur extra latitudinem sui objecti, quod est impossibile & contradictorium. Ergo fatendum est finem bonitate sua voluntatem primariò movere motu complacentiæ & delectationis; secundariò verò motu vel timoris, ne auferatur bonum concupitum, vel tristitiæ & doloris, si eo privetur.

Tertium argumentum. Extra controversiam est omnes homines semper agere ex amore finis
ultimi

ultimi seu habitudinis, saltem universim spectatæ, beatitudinis causa omnes operantur omnia, inquit Aristoteles 1. Eth. cap. 22. S. etiam Augustinus Lib. 10. de Civ. cap. 1. *Omnium certè sententia est, qui ratione uti possunt, beatos esse omnes homines velle.* Et Conc. 1. in Psalm. 118. *Beatum esse tam magnum est bonum, ut hoc & boni velint, & mali.* Nec mirum est quòd boni propterea sunt boni: sed illud est mirum, quòd etiam mali propterea sunt mali, ut sint beati. Idem confirmat S. Thomas 1. 2. qu. 1. art. 6. tum quia beatitudo est expletio naturalis appetitus: atqui nihil facit homo nisi ut expleat naturalem appetitum: tum quia ultimus finis se habet ad motum appetitus; sicut se habet in aliis motibus primum movens: *Manifestum est, inquit, quòd causæ secundæ moventes, non movent, nisi secundum quod moventur à primo movente.* Unde *secunda appetibilia non movent appetitum, nisi in ordine ad primum appetibile, quod est ultimus finis.* Ergo constat omnem animi motum ex amore & complacentia boni surgere, inde iram in eos qui nos interturbant, in possessione vel prosecutione rei amatæ: inde timorem, ne auferatur: inde odium eorum, qui rapere volunt: inde tristitiam & dolorem, si fuerit amissa, & eò majorem, quo amplius placebat. Sed in iis probandis lucem ad solem meridianum asferre videmur.

At, inquires Deus, innumeris rationibus movet corda hominum longè diversis à delectatione, de qua est sermo, alios ad se revocat fastidio rerum, quas turpiter deperibant, alios metu gehennæ, alios dolore cruciante.

Quòd autem non semper operemur secundum quod amplius delectat, adduci potest testi-

monium S. Augustini ex Lib. 8. Confess. cap. 8. in quo sic habet : *Non faciebam quod & incomparabili affectu magis placebat, & mox, ut vellem, possem : Ergo.*

Nego conseq. Ad singula autem antecedentis momenta respondeo.

Ad primum. Ideo voluntas ea fastidit, quæ prius delectabant, quia in iis quietem, quam quærebat, non invenit, atque uno & eodem motu amoris ab iis, ad alia, quæ placent amplius, se convertit; odium enim seu fastidium in amore fundatur, *beatitudinis causa omnes operantur omnia*, inquebat supra Philosophus. Sed audiendus est S. Augustinus Lib. 9. Conf. cap. 1. ubi non minus piè quàm verè de se scribit, quomodo satietas rerum terrenarum ipsum ceperit, *quàm suave mihi subito factum est carere suavitatibus nugarum, & quas amittere metus fuerat, jam dimittere gaudium erat; ejiciebas enim eas à me; vera & tu, summa suavitas, ejiciebas, & intrabas pro eis, omni voluptate dulcior.*

Igitur sicut clavus clavum trudit, & affulgens lumen veritatis fugat ab intellectu tenebras erroris; ita boni majoris appetitus, eorum movet fastidium, quæ hactenus placuerant; fastidium enim est veluti recessus à termino à quo, qui nec esse, nec concipi potest sine accessu ad terminum ad quem, scilicet ad aliud appetibile.

Ad secundum & tertium. Qui metu pœnarum & doloris cruciatibus acquiescit minitanti & vim inferenti, vult liberari à malo, & vitam servare incolumem, quæ voluntatem ejus magis allicit ac delectat, quàm ea, quæ dimittere cogitur; sic mercator v. g. in evidenti periculo naufragii merces projicit amore propriæ salutis, cui
mavult

mavult consulere; sic qui timore mortis pejerat, aut vi tormentorum Religionem Christianam abjurat; corpus plus amat quàm justitiam: peccat, non peccati illecebra, sed vivendi delectatione: In illis etiam, qui ab omni spe dejecti violentas manus sibi inferunt, vincit boni suavitas; care-re enim malis bonum est, quod dulcius ipsis vi-detur, quàm tristem vitam trahere. Isthæc om-nia discunt, qui prima tyrocinia ponunt in re-bus philosophicis.

Ad quartum. S. Augustinus laudato Lib. 8. Conf. à cap. septimo ad finem Libri describit acerrimam pugnam oppositarum voluntatum, qui-bus cor ejus discerpebatur quodammodo, & dila-niabatur: *Hinc pulchritudo castitatis delectabat superiùs; inde temporalis peccati voluptas retentabat inferiùs, ob-versabatur mentis oculis casta dignitas continentiae, sere-na & non dissoluta sed hilaris honestè blandiens, & omnia ossa mea clamabant eundem ad eam, quæ incomparabili af-fectu amplius mihi placebat. Sed retinebant nugæ nuga-rum, & vanitates vanitatum antiquæ amicæ meæ; quas sordes suggerebant, quæ dedecora! Audiebam eas, & re-tardabant; plusque in me valebat deterius inolitum quàm melius insolitum.* Itaque continentia speculativè & in se spectata amplius Augustino placebat, sed practicè & absolutè minus quàm carnalis volu-ptas: ad illam ex parte assurgebat *semisauzia volun-tate*, ut ipse loquitur, ad istam totus relabebatur plena voluntate. Sic se habent omnes peccato-res; cùm audiunt Psam. 33. *Quis est homo qui vult vitam, & diligit dies videre bonos?* Quilibet eorum statim respondet: Ego volo; vita quippe beata mirum in modum placet omnibus, sed cùm ista ponitur conditio: *Prohibe linguam tuam à malo, &*

labia tua ne loquantur dolum. Nolo, dicit homo miser, beata vita displicet sub hac conditione. Unde me pascio, inquit? Non potest ars sine impostura esse, non potest negotium esse sine fraude; si timuero Deum, non habebo unde vivam. Et ita fit ut practicè ampliùs placeat perversa vita, quàm vita immaculata dies bonos sola efficiens.

Ex dictis evidenter sequitur, 1. velle, amari, delectari esse verba synonyma. 2. Omnem voluntatis motum, quocunque vocetur nomine, esse volitionem seu complacentiam, quemadmodum omnis operatio intellectus est cognitio, adeo ut voluntas, sive ex odio agat, sive ex ira, sive ex timore aut ex tristitia, ea omnia absolutè & simpliciter velit & amet, quamvis secundùm quid nollet, & quodammodo invita ad agendum se determinet. 3. Voluntatem non posse velle aut amare nisi bonum saltem apparens. 4. Repugnare voluntatem velle aut amare bonum, nisi ipsi placeat, sapiat, eam alliciat & suaviter moveat. Cùm autem ex hoc sapore & complacentia boni aut mali universa morum pendeat disciplina, quotidianumque sit periculum, ne malum sub falsa boni specie decipiat, aut quòd verè bonum est & appetendum, non alliciat, vel etiam fastidium creet, quis non intelligit hanc Dei esse gratiam, quam cum Matre Ecclesia continuò efflagitare debemus, *da mihi intellectum, & vivam; Inclina cor meum in testimonia tua. Averte oculos meos, ne videant vanitatem*, scilicet rerum mundanarum, quæ tenebras menti offundunt, & e mentita boni Imagine corda nostra seducunt? *Da populis tuis id amare quod præcipis, id desiderare quod promittis, ut inter mundanas varietates ibi nostra fixa sint corda, ubi vera sunt*

sunt gaudia. Figuntur autem corda amoris pondere, sicut lapis gravitate sua centro firmitus adhærescit.

Q. 4. *Cum voluntas nihil sit aliud quàm boni appetitus, nonne eò ipso satis juvatur, quo Deus per gratiam suam ipsi clarè & congruè revelat bonum, quo beata sit? mercator enim inhians ad lucrum, estne movendus & urgendus, ut oblatam lucrandi occasionem arripiat?*

Sic docebat Pelagius, & ideo hæreticus ex sancto Augustino Lib. de Gratia Christi cap. 8. *Hinc itaque, inquit, apparet hanc eum gratiam confiteri, qua demonstrat & revelat Deus quid agere debeamus, non qua donat & adjuvat, ut agamus.* Et cap. 10. *Sed nos eam gratiam volumus iste aliquando fateatur, qua futuræ gloriæ magnitudo non solum promittitur, verùm etiam creditur & speratur, nec solum revelatur sapientia, verùm & amatur . . . hanc debet Pelagius gratiam confiteri, si vult non solum vocari, verùm etiam esse Christianus.*

R. De fide est, Doctrinam & interiorem mentis illustrationem non sufficere, ut quis velle & operari possit in ordine ad vitam æternam; sed insuper requiri supernaturalem voluntatis motionem, quæ appellari solet volitio, complacentia, amor, delectatio, suavitas, pia affectio. Patet tum ex laudatis sancti Augustini verbis adversus Pelagium: tum ex dictis de Necessitate Gratiæ ad bonam voluntatem concipiendam, & ad tentationes superandas capite 5. Paragr. 1. pag. 484. 485. 492. & 493. tum ex historia Semipelagianorum, qui ideo damnati sunt, quòd docerent ex nobis esse affectum credendi ea, quæ de Christo prædicantur Tract. de Incarn. capite 15. Paragr. 1.

ragr. 1. pag. 211. 212. & Tract. de Gr. cap. 3. Paragr 3. pag. 342.

Dices 1. ait Christus Joan. 6. vers. 45. *Omnis qui audit à Patre, & didicit, venit ad me*: Ergo ut velimus satis est ut, homine exterius docente, Deus interiùs nos illuminet.

Distingo anteced. cum S. Augustino Lib. de Gr. Chr. cap. 14. & Lib. de Prædest. Sanctorum cap. 8. omnis qui audit secundum gratiam C. secundum Litteram tantum, Nego anteced. Interior igitur Patris doctrina non solum mentem illuminat, sed etiam voluntatem inflamat, *ita ut*, inquit S. Doctor Lib. de Gratia Christi cap. 13: *non ostendat tantummodo veritatem, verum etiam imperat charitatem.* Et cit. cap. 8. de Prædest. Sanctorum: *Quando ergo Pater intus auditur, & docet, ut veniatur ad Filium, aufert cor lapideum, & dat cor carneum.*

Dices 2. Non licet Doctrinam Molinæ aspergere aliqua hæreseos nota; id enim prohibuit Paulus V. referente Theodoro Eleutherio Lib. 6. cap. 28. Hist. Cong. *De auxiliis*: atqui in sententia Molinæ Deus solummodò movet hominum voluntates visorum suasionibus, quæ vim habent eas alliciendi: Ergo fide divina credendum non est gratiam aliter movere voluntatem quàm objective per congruam veritatis revelationem, qua Deus interiùs eo modo & in iis circumstantiis docet, in quibus prævidit voluntatem alliciendam & consensurum.

Nego minorem: Accusatores quidem Molinæ in famosis Congregationibus *de auxiliis* ejus doctrinam Pelagianæ hæreseos insinulaverunt, sed ejus Defensores criminationem constanter repule-

pulerunt, agnoveruntque præter mentis illustrationem necessarium esse Dei auxilium, quo voluntas supernaturaliter moveretur, simulque roboraretur adversus rebellem concupiscentiam, aliàs quomodo Summus Pontifex prohibuisset inurere censoriam notam doctrinæ olim à Conciliis & Patribus proscriptæ? Malè ergo merentur de Schola Molinæ, & invidiam ejus doctrinæ conflagrant, qui eam, dum supra modum, & contra Pauli V. interdictum erigere student, Pelagianismo commaculant.

Meliùs quidem de Molinæ doctrina sperabimus, donec suum de ea judicium Romana Sedes promulget, pacem cum ejus discipulis retinebimus: quamdiu ipsi se Pauli V. decreto Religiosè submittent, nec doctrinam multò antiquiorem, & in Catholicis Scholis longè communiorem hæreseos aut erroris accusabunt: & si quæ duriora ac acerbiora verba nobis alicubi excidant, non in eos contorquentur, sed in larvatos Molinistas, qui Pelagianismum instaurant, & ut multi suspicantur, Quietismum; sic dictum, quia in illa Fanaticorum Schola, eò tendit gratia, ut quiescat, seu potius extinguatur innatus ad beatitudinem appetitus, & omnis in statu perfectò voluntatis nisus & conatus, sive ad prosequendum bonum, sive ad resistendum carnis desideriis. In hoc quippe totum Quietismi virus continetur, quòd prætextu summæ perfectionis, sublato mercedis omnis intuitu, virtutis amor & usus paulatim intereat, & prohibita cum vitiis pugna, libido deinceps dominetur. Cæterum quidquid sit de illa suspitione, non desunt multa aliunde argumenta insanum illum Quietistarum errorem ab Eccle-

Ecclesia solemniter contritum reviviscere ac dif-
feminari sub obtentu colligendi zizania Janseniana.
Sed elucidatis jam quæ delectationem spectant,
veniamus ad propositam quæstionem, utrùm in ea
reponenda sit efficacia gratiæ.

Resolvitur quæstio.

Dico : efficacia gratiæ consistit in prævenien-
te delectatione, eaque victrici & moraliter deter-
minante. Duæ sunt partes ;

Prima pars negari non potest, cùm ex dictis
gratia præveniens sit supernaturalis motio vo-
luntatis : motio autem illa sit allectatio seu com-
placentia primus effectus finis, ex quo homo sem-
per agit.

Nihilominus probatur 1. ex Scriptura Cant. 1.
*Oleum effusum nomen tuum, ideo adolescentulæ dilex-
runt te. Trabe me post te, curremus in odorem unguentorum
tuorum.* Hic fidelis anima, Christi sponsa dicit
sponsum suum voluntates suavitatem suam & fragran-
tia in sui amorem allicere. Hinc gratia 1. Joan.
cap. 2. simpliciter dicitur unctio. Psal. 20. *Præ-
venisti eum in benedictionibus dulcedinis.* Psal. 50. *Red-
de mihi lætitiā salutaris tui.* Rogat æger, cui ex
morbo, scilicet peccati, panis erat pœna, ut cum
pristina delectatione illum degustet. Psalm. 85.
Lætetur cor meum ut timeat nomen tuum. Psalm. 118.
vers. 66. Ubi legimus, *bonitatem & disciplinam, &
scientiam doce me,* S. Augustinus legit, *suavitatem, &
eruditionem, & scientiam doce me,* scribitque, *qui jam
dixerat suavitatem fecisti cum servo tuo, quomodo dicit
suavitatem doce me, nisi ut ei Gratia Dei magis magisque
innotet.*

innotescat dulcedine bonitatis? Matth. 11. Christus gravi cupiditatum iugo oppressos vocat & allicit suavitate mandatorum suorum, *venite ad me omnes, qui laboratis & onerati estis, & ego reficiam vos* iugum enim meum suave est, & onus meum leve. Ex quibus clarè elucet sine insigni impietate & blasphemia non posse dici doctrinam esse Epicuream, & à Magistratu puniendam, bonum honestum non movere voluntatem, nisi ei placeat, eamque suavitate sua delectet.

Probatur 2. ex S. Augustino, qui in hæc verba Joan. 6. *Nemo potest venire ad me, nisi Pater, qui misit me, traxerit eum*, sic scribit Tractatu 26. in Joan. *Noli cogitare te invitum trahi; trahitur animus & amore.* Si Poetæ dicere licuit, trahit sua quemque voluptas; non necessitas, sed voluptas, non obligatio, sed delectatio, quantò magis fortiùs nos dicere debemus trahi hominem ad Christum, qui delectatur veritate, delectatur beatitudine, delectatur iustitia, delectatur sempiterna vita, quod totum Christus est? Lib. 2. ad Bonifacium cap. 9. *Tum bonum concupisci incipit, cum delectare incipit, in qua dulcedinis gratia si nos non prævenit Deus, non solum non perficitur bonum, sed nec inchoatur ex nobis.* Lib. de Gratia Christi cap. 13. *Hæc gratia, si doctrina dicenda est, certè sic dicatur, ut altius & interiorius eam Deus cum ineffabili suavitate credatur infundere, non solum per eos, qui plantant & rigant extrinsecus, sed etiam per seipsum, qui incrementum suum ministrat occultus.* Et nonnullis interjectis sic pergit sanctus Doctor: *Iustitia ex Deo dicitur, quæ datur per gratiæ beneficium, ut non sit terribile, sed suave mandatum, sicut orator in Psalmo: Suavis es, Domine, & in tua suavitate doce me iustitiam tuam, id est, ut non formidine pænæ serviliter cogar esse sub lege, sed libera*

libera charitate delectetur esse cum lege . . . & hoc modo quisquis discit, agit omnino quidquid agendum didicerit. Et cap. 24. Legant ergo, intelligant, intueantur atque fateantur non lege atque doctrina insonante forinsecus, sed interna & occulta mirabili ac ineffabili potestate operari Deum in cordibus hominum, non solum veras revelationes, sed bonas etiam voluntates. Lib. 1. ad Simplicianum quæst. 2. circa finem, restat ergo, ut voluntates eligantur, sed voluntas ipsa, nisi aliquid occurrerit quod delectet, atque invitet animum: MOVERI NULLO MODO POTEST. Hoc autem ut occurrat, non est in hominis potestate. Lib. de Spiritu & Littera cap. 3. Necesse est ad bene vivendum, ut homo accipiat Spiritum Sanctum, quo fiat in animo delectatio, dilectioque summi illius atque incommutabilis boni. Sine hac delectatione frustra veritas innotescit, quando, inquit ibidem, veritas cœperit non latere, nisi etiam delectet, non suscipitur.

Tria igitur certa sunt apud sanctum Augustinum. 1. Deum operari in cordibus hominum, non sola veritatis revelatione; non scientia media captante opportunas occasiones; sed interna & occulta, mirabili ac ineffabili potestate. 2. Deum sic operando allicere & trahere voluntatem suavitate ac delectatione. 3. Voluntatem moveri non posse, nisi occurrat, quod eam delectet, quando veritas cœperit non latere, nisi etiam delectet non suscipitur.

Probatur 3. ex communi hominum sensu; omnes enim docti & indocti, sapientes & insipientes Gratiam Dei mente apprehendunt, ut suavitatem quandam, qua Deus inclinat corda nostra

stra ad ipsum diligendum, & mandata ejus observanda. Enimverò, cum ex dictis à natura sic comparati sumus, ut bonum nec velle, nec amare possimus, nisi placeat, quid virulenti excogitari potest in dono, quo nobis suavis sit Dominus & mandata ejus desiderabilia super aurum, & topazion? Certè nullus ita malè sentit, nisi qui naturam damnat tanquam à malo principio conditam. Sed forte communis sententia non carpitur ex eo capite quòd juxta eam gratia sit perveniens boni complacentia, suavitas, allectatio & delectatio: insanus enim esset, nedum impius hujusmodi error: sed ex eo quod illa delectatio asseratur victrix & infallibiliter (non tamen necessario, ut volunt & Calvinus & Jansenius) voluntatem determinans. Non audent quidem nonnulli delectationis victricis hostes gratiam per se efficacem palam & apertè impugnare, sed dissimulanter sub nomine delectationis & blandæ motionis, quasi sub eo lateat virus Janseniani erroris; timent enim ne adversum se concitent integras Augustinianorum & Thomistarum Scholas, videanturque in ipsis impletum, quod prædixit Sapiens Eccl. II. v. 36. *Admitte ad te alienigenam, & subvertet te in turbine, & alienabit à tuis propriis.* Quid enim Scholæ Catholicæ nisi antiqua Augustinianorum & Thomistarum possessio? Novam Molinæ Scholam admiserunt, cum ea pacificè hætenus egimus, & agemus quamdiu Sedes Apostolica ejus dogma non damnaverit. Sed novi insurgunt pacis inimici, bellum indicunt antiquis scholis, & in turbidine seu fidelium commotione eas à propriis abalienare conantur, fingentes delectationis nomen aliquid virulenti continere, ut solum Molinæ

D. Habert. Theolog. Tom. II. Oo dogma

dogma iis dominetur. Hinc est quòd in prævientis delectationis nomen, usum & necessitatem curiosius inquisierimus, demonstraverimusque huiusmodi nomine, aliud non significari quàm voluntatis motionem, complacentiam, propensionem, allectationem, piam affectionem; quam omnes admittunt necessario præviam omnibus actibus deliberatis, ut jam controversia esse non possit, nisi circa secundam nostræ responsionis partem, quæ est de efficacia victrici & moraliter determinante. Itaque

Secunda pars probatur 1. ex omnibus Scripturæ & Patrum testimoniis, quibus supra cap. 6. §. 1. demonstravimus in hoc statu existere gratiam efficacem; expendenti enim ejusmodi testimonia, quæ frustra hic exscriberemus, evidens fiet dari in hoc statu gratiam per se efficacem. Quid clarius verbis S. Augustini mox laudatis ex cap. 24. lib. de gratia Christi, *intueantur atque fateantur non lege atque doctrina insonante forinsecus, sed interna & occulta mirabili ac ineffabili potestate operari Deum in cordibus hominum, non solum veras revelationes, sed bonas etiam voluntates.*

Probatur 2. ratione triplici.

Prima in hunc modum urgetur à M. Grandin q. 2. de divisione gratiæ art. 5. sect. 3. conclusione secunda, tantumtribuendum est gratiæ efficaci quoad determinationem ad bonum, quantum tentationi gravi quoad determinationem moralem ad malum; nullus enim negaverit Deum per gratiam suam plus posse in cordibus hominum, quàm Dæmonem per concupiscentiam, si (Deus) *potens est*, inquit S. Augustinus lib. de grat. & lib. arb. c. 21. *sive per Angelos, vel bonos*
vel

vel malos, siue quocunque alio modo operari etiam in cordibus malorum pro meritis eorum quorum malitiam non ipse fecit quid mirum est, si per Spiritum Sanctum operatur in cordibus electorum suorum bona? Atqui Dæmon nonnunquam determinat moraliter: cum Dæmonem dico, concupiscentiam dico: nec tamen deest libertas; verba sunt ejusdem Theologi, qui sic concludit: *Ergo Deus salva libertate moraliter determinare potest Quod eo fortiùs intelligitur à Deo fieri posse, quod non exterius solùm, sed etiam interius docere potest, ac diligere intellectu, quod imprimere voluntati affectiones supernaturales, & SUAVITATEM attrahentem moraliter, directè & immediatè influendo in facultates spirituales animæ.* Ex quibus Theologi verbis sic argumentari licet: Deus per gratiam suam eo modo operatur in cordibus, voluntatesque moraliter determinat ad bonum, quo Dæmon per concupiscentiam moraliter determinat ad malum: atqui Dæmon per concupiscentiam moraliter determinat ad malum suaviter alliciendo; Ergo Deus moraliter determinat ad bonum per gratiam blandè ac suaviter attrahentem. Hæc doctrina laudatur à Patribus Societatis Jesu in Diario Trevoltiensis, doceturque in Seminariis S. Lazari & Sulpitii.

Secunda ratio, eaque efficacissima, & ad captum etiam muliercularum & idiotarum, in forma sic proponitur. Deus omnipotentissima sua voluntate idem potest in ordine supernaturali, quod efficit in ordine naturali; quid enim obstarèt? Atqui Deus in ordine naturali eum timorem mortis temporalis, & amorem vitæ corporeæ in natura impressit, qui illæsa libertate, nos moraliter

liter & invincibiliter determinat ad rejicienda; quæ certò & evidenter mortem inferrent; & ad ea usurpanda, in quibus vitam positam esse constat; docti & indocti, omnes ita se affectos esse sentiunt; nullus sana mente ultrò se projiciet in fornacem ardentem aut è superiori domo se præcipitem dabit; illud tamen cuique liberum est; alioquin à peccato excusandi essent, qui metu mortis pejerant, aut veram religionem abjurant. Ergo vel ipsi idiotæ intelligunt optimè conciliari liberum arbitrium cum determinatione morali: ergo nihil repugnat, quominus Deus infundat in cordibus nostris hinc efficacem gehennæ metum, inde victricem amorem seu suavitatem suorum mandatorum. Quis enim affirmare audeat Deum sapientissimum plus dedisse homini quo salutem corporis conservet, quam electis suis, quo peccatum mortale infallibiliter vitent, & in justitia quæ est supernaturalis vita animæ, insuperabiliter perseverent? Præter generelem concursum, indidit naturæ fragili horrorem mortis, & impotentem vivendi appetitum, quibus urgemur determinamurque, salva libertate, ut omnes experiuntur, ad depellenda, vel declinanda quæ noxia sunt saluti corporis: secundum autem Molinam q. 14. art. 14. disp. 10. æternam nostram salutem ita posuit in manu liberi arbitrii, ut infirmis nonnisi generale gratiæ sufficientis auxilium præbeat? Absit. *Fortissimo* (Adamo) dimisit, atqui permisit facere quod vellet; infirmis servavit, ut ipso donante, invictissimè quod bonum est vellent, & hoc deserere invictissimè nollent. S. Augustinus lib. de cor. & grat. cap. 12.

Tertia ratio. Illa doctrina est cæteris præferenda, in qua omnes Scholæ Catholicæ conveniunt:

niunt: hæc propositio absque temeritate negari non potest. Atqui omnes Scholæ Catholicæ, sola Molinæ recens nata dissentiente, conveniunt efficaciam gratiæ consistere in suavitate, seu delectatione victrici, salva libertate, quam indifferentiæ vocant. Ergo.

Minor, cùm tota versetur circa factum, testibus probari debet. Ex innumeris autem gravissimus & locupletissimus proferetur

R. P. Massoulierus Thomista celeberrimus ob singularem tum pietatem, tum eruditionem, qui in libro, cui titulus est. *S. Thomas, sui interpres*, tit. I. disp. I. q. 7. art. 4. pro schola sua sic testatur, *quæstio est, de qua modo non agitur, utrum major illa motio physica requiratur, vel blandior moralis sufficiat, vel quòd utraque UT NOS VOLUMUS, requiratur; physica, ut fortiter; moralis, ut suaviter voluntas moveatur.* Et dissert. I. de motione q. 7. art. 4. *præter motionem moralem, QUAM NEMO NEGAT, majorem alteram, & diversæ omnino rationis, id est, physicam admissam fuisse à S. Thoma, & revera admitti debere; &c.* Omnes ergo Thomistæ conveniunt cum aliis Theologis circa delectationem seu blandiorem motionem; & in eo solo ab iis discrepant, quod præter suavem illam motionem, physicam requirant.

Ergo doctrina de blanda motione non est recens invec̃ta in Scholam Thomistarum, sed in ea semper obtinuit: tum quia Thomistæ docent necessariam esse præmotionem physicam; sicut aliæ Scholæ concursum simultaneum, ad omnes actiones sive bonas, sive malas: unde si à præmotione physica separanda sit suavis motio, proditio Judæ æquè erit opus Dei, ac confessio sancti Pe-

tri; ad utramque enim Deus æquè præmovit: atqui hæc est insignis blasphemia Lutheri & Calvinii. In eo ergo distat præmotio physica ad opera mala, à præmotione physica ad opera supernaturaliter bona; quòd illa non faciat voluntatem malam, sed supponat eam ex propria malitia paratam, & quasi in procinctu ad malè agendum, si Deus præbeat concursum aut præmotionem physicam, quam exigentibus causis secundis non denegat absque miraculo, utpotè causa universalis. Contra præmotio physica ad opera supernaturaliter bona, voluntati majores tribuit vires, dat ipsum velle liberum, tumque agit Deus non modò ut causa universalis, sed etiam ut particularis, tribuens bonam voluntatem, eamque blandè ac suaviter convertens, si prius fuerat averrà, movensque ad boni dilectionem; aliàs quid absurdius dici potest, quàm voluntatem peccatoris à Deo invitam & retinentem physicè trahi ac præmoveri ad bonum supernaturale?

Sed quid virulentius habet blanda motio per se efficax, quàm physica præmotio? illud scilicet, inquires, quòd prior se teneat ex parte potentiæ, illamque compleat: ex quo sequitur nullam dari gratiam verè sufficientem, qualem prædicant Catholici; cùm nulla gratia absque blanda motione victrici completas vires tribuat voluntati: posterior verò se teneat ex parte actus, voluntatemque jam satis validam solummodo applicet ad opus.

Qui ita differeret, videretur ignorare prima elementa, quæ huic Tractatui præmitti solent in Scholis Catholicis, & nos præmisimus, nimirum commune esse gratiæ tum sufficienti, tum efficaci, conferre vires operi faciendo accommodatas;

propri-

proprium autem esse gratiæ efficacis infallibiliter applicare ad opus, eo fere modo, quo gravis & vehemens oratio patris ad filium à natura ad literarum studia apprimè institutum, aut heri ad famulum viribus & industria valentem, sed utrumque pigrum & otio torpentem movet ac determinat ad ea quæ sunt sui officii, strenuè præstanda; sicut enim ejusmodi oratio animos sive filii, sive famuli ita ad laborandum incendit, ut absque ejusmodi incitamento desides remanerent, licèt sufficientibus viribus instructi: similiter gratia efficax superveniens homini gratia sufficienti adjuto indormientem excitat, & actum infallibiliter determinat; gratia etiam sufficiens, ut supra dicebamus, est actuale Dei auxilium, quo voluntas redditur potens ad implendum præceptum; alioquin si inchoatas dumtaxat vires tribueret, verè sufficiens non foret; sed prorsus insufficiens. Ita omnes Catholici adversus Janse-
nium. Sed voluntas sic instructa & roborata, præ infirmitate hujus status, vires divinitus acceptas non exercet, ut potest & debet; nisi Deus efficaciori modo excitet, & ad agendum determinet. Quàm autem hæc doctrina Scripturæ Sacræ sit consentanea, vel ex eo patet, quòd animis nostris sine ulla intermissione inculcet semper orandum, quia gratiam efficacem, etsi non cadat sub meritum de condigno, ut communiter docent Theologi, assiduis tamen precibus impetrare possumus; Deus enim petentibus, quærentibus, & pulsantibus misericorditer concedit, quod eorum meritis retribuere non tenetur.

Hinc est, quòd Propheta, qui Psalmo 118. confessus est Domino, *bonitatem, seu suavitatem*

fecisti cum servo tuo, statim subjungat, bonitatem seu suavitatem, & disciplinam, & scientiam doce me, quem locum expendens Sanctus Augustinus ferm. 17. in eundem Psalmum, sic habet, qui jam dixerat, suavitatem fecisti cum servo tuo, quomodo dicit, suavitatem doce me? nisi ut ei gratia Dei magis magisque innotescat dulcedine bonitatis. Habebant enim fidem, qui dixerunt: Domine auge nobis fidem. Et quamdiu vivitur in hoc mundo, proficientium est ista cantatio Cum quo ergo Deus facit suavitatem, id est, cui propitius inspirat boni delectationem profectò instanter orare debet, quo tantum sibi augeatur hoc donum. Doctrina adeò Christiana, pietatem aut humilitatem tota spirans, cohæretne cum quorundam auctorum dogmate? Duo enim complectitur hujusmodi dogma; primum, quòd gratia sit versatilis ad nutum voluntatis, dicaturque efficax vel sufficiens ab eventu: efficax quidem, si voluntas consentiat: sufficiens verò, si dissentiat. Alterum, quòd gratia sufficiens semper præsto sit in ordine supernaturali, sicut concursus generalis in ordine naturali; ut voluntas velit aut nolit, prout placuerit; & ea ratione semper in manibus liberi arbitrii posita sit salus nostra. Verba sunt Molinæ q. 14. art. 13. disp. 10. Quæ si ita sunt, quæ major necessitas gratiam à Deo instanter petendi, quam concursum generalem? Annon potius geminandæ sunt preces pro concursu generali, qui impediri potest à causis secundis, quam pro gratia actuali, quam Deus ubique diffundit independentem à concursu causarum secundarum? Quare merito ejusmodi dogma excluditur à Scholis Patrum Societatis Jesu, ex Decreto Generalis eorum

eorum Præpositi Aquaviva anno 1613. nec hætenus irrepsit in Scholas Academiæ Parisiensis. Sed agimus hic causam Thomistarum, non nostram; satisque nobis est, quod demonstraverimus efficaciam gratiæ in mente S. Thomæ & ejus Scholæ esse non posse sine victrici delectatione.

Quæ verò sit aliarum Scholarum sententia circa efficaciam gratiæ, exponit Eminentissimus Cardinalis de Bissy Meldensium Episcopus in suo mandato ad Clerum an. 1710. pag. 175. *Il y a d' autres Theologiens Catholiques que les Thomistes, qui croient que la grace efficace determine par elle meme la volonté au bien: mais ils sont consister son efficacité dans un plaisir victorieux de celui de la cupidité; & ils soutiennent communement que la détermination de cette grace n'est que morale. Selon les memes Theologiens les graces des deux états sont différentes; celles de l'état d'innocence ne donnoient que le pouvoir de faire le bien; au lieu que dans l'état présent il y a deux sortes de graces intérieures: les unes donnent le pouvoir de faire de bonnes œuvres, & les autres les font pratiquer. Les memes Theologiens ajoutent que sans ces dernières, en ne les fera jamais. Similia habentur in Mandato Illustrissimi Episcopi Noviomensis, nunc autem Archipræfulis Rothomagensis, ann. 1708. Si la Theologie en question se renferme uniquement à dire, que la nature de la grace efficace consiste dans une delectation victorieuse, on ne lui en feroit aucun reproche; puisqu'il y a des Theologiens Catholiques, qui sont dans le meme sentiment.*

Quinam, inquires, sunt illi Theologi? R. omnes ita sentiunt, iis dumtaxat exceptis, qui Molinæ dogma absque Suarezii temperamento amplexi sunt; qui enim Congruistæ vocantur, efficaciam gratiæ delectatione victrici vel reponunt,

vel reponi posse agnoscunt. Probatur responsio ex celeberrimis cujusque Scholæ Theologis, qui ante & post Jansenium scripserunt.

Cardinalis Toletus è Societate Jesu fato functus anno 1596. expendens illud Apostoli Galat. 1. *Cum ei placuit . . . vocavit per gratiam suam*, sic scribit annotat. 54. in cap. 5. Lucæ, *non dicit Paulus, quando novit me obediturum, sed quando illi placuit; quoniam per gratiam me vocavit. Non expectat Deus semper arbitrium nostrum; quia sua gratia ipsam excitat, ipsique dat velle & perficere, & qui etiam rebelles convertit & compellit voluntates. Tunc ergo vocavit, quando illi placuit; & si ante vocasset, utique respondisset & obtemperasset . . . Potest autem intelligi Chrysostomus (qui hom. 31. in Matth. ait Christum vocasse Discipulos, quando obtemperaturos sciebat) nimirum per ipsius gratiam; sciebat enim quando ipse operaturus erat in eis . . . Existimo nimirum tunc vocasse discipulos multos, & præsertim Matthæum; quando plus erant impediti, magisque detinebantur, ut venirent . . . Sic Paulum vocavit quando in via erat, nec prævenit professionem ejus priusquam accepisset literas à Summo Sacerdote, & vocavit dum opus fervebat, minusque ad obsequendum paratus erat. Et in capite 11. ad Romanos annotat. 4. Augustinus existimat totum esse gratiæ; quia Deus facit hominem cooperari, & determinat arbitrium hominis quia dat, ut velle possit; & facit velle.*

Cardinalis Bellarminus etiam è Societate Jesu, pro qua militavit in famosis Congregationibus de auxiliis, lib. 4. de grat. & lib. arbit. cap. 16. hæc habet: *Altera ratio conciliandi libertatem humanam cum operatione divina, & fortasse etiam probabilior, est juxta sententiam sancti Thomæ, qui docet cooperationem divinam*

divinam ita concurrere cum secundis causis, etiam liberis, ut non solum eis dederit & conservet virtutes operatrices, sed etiam eos moveat & applicet ad opus quæ sententia videtur valde consentanea tum Scripturæ . . . tum etiam rationi & ordini, quem habet prima causa cum secundis.

Martines de Ripalda ex eadem Societate, Theologiæ Professor in Academia Salmanticensi, cujus opera Lugduni typis mandata sunt anno 1666. lib. 5. de auxiliis supernaturalibus gratiæ disp. 109. sect. 2. sic scribit: *Supponimus dari quod actus liberi impossibilitatem moralem conjunctam cum possibilitate physica quærimus autem, an ea impossibilitas moralis intercedat ex vi impulsus gratiæ quoad dissensum ipsius?* Ad quam quæstionem sic respondet, *Communis Theologorum sententia affirmat, quin nec noverrim unum, qui negat. Quod stabilire promptum est ex sacris literis, Ecclesiæ Patribus, Theologicisque rationibus.* 1. *Quia ad moralem Dei providentiam & potentiam spectat, ita subdere sibi arbitrium creatum, ut possit ab eo certò certitudine objectiva tenente se ex parte gratiæ, obtinere consensum, quando & quomodo Deus voluerit: at id Deus non posset, si motio gratiæ non posset reddere dissensum moraliter impossibilem.* Tum refellens *Congruistam, sic pergit, Satis disertè exprimunt Patres, eam potestatem in virtutem intrinsecam divinæ gratiæ referendam, item eam esse omnino antecedentem necessarium consensum: sicut est alia quævis potestas, quæ in commendationem divinæ potentiæ à Patribus prædicatur . . .* 2. *Possunt cogitationes & affectiones boni delectabilis reddere dissensum nostræ voluntatis moraliter impossibilem, ut concors est omnium Theologorum sententia. Ergo etiam cogitationes & affectiones boni honesti: tum quia non est minus potens bonum impulsus Dei, quam impulsus*

ius dæmonis, & naturæ in malum: tum quia bonum honestum secundum se non est minus amabile à voluntate rationali, quàm bonum delectabile. Ac tandem sectionem sic concludit. Porro vis intrinseca gratiæ red-dens moraliter impossibilem dissensum, potest in multa capita referri, & pluribus enumeratis, sic pergit. Denique, quod maximi momenti est, IN VEHEMENTEM ET INGENTEM AFFECTIONEM ET DELECTATIONEM VOLUNTATIS in objectum & consensum honestum, quam Deus sine fine potest augere. Notum est omnibus opus de ordine, seu de priori & posteriori Remis cusum anno 1620. in quo Claudius Tiphaine, insignis Societatis Jesu Theologus, Parisiis Theologiæ Professor in Collegio Claromontano, deinde variorum Collegiorum Rector, Cancellarius in Academia Mussipotana, ac demum Provinciæ Campanæ Præfectus, ex professo confutat Molinæ & Suarezii dogma, stabilitque gratiam per se efficacem, cum nondum editus fuisset famosus Jansenii liber. Sed priusquam ad alias Scholas transeamus, pergam referre aliquos è celeberrimis Societatis Jesu Theologis, qui ante & post Jansenium floruerunt, agnoveruntque gratiam per se efficacem & moraliter determinantem non perimere liberum arbitrium, licitèque posse propugnari, quamvis Molinæ dogmati adhæserint.

Quin ante aliquot annos P. Garnier in eodem Collegio eandem doctrinam publicè profitebatur, & novissimè, hoc est anno 1703. P. Tournemine in eodem Collegio, hanc thesim propugnandam proposuit: *Hujus (gratiæ) efficacia in eo consistit, quod illecebra major, adeoque causa consensus, non necessario videm, sed tamen certo futuri . . . gratiæ efficaci resisti potest,*

potest, quia non est summi boni præsentia; nunquam resistitur, quia est majoris boni illecebra. Et in appendice septima de gratia sufficienti sic habet, Gratia inefficax sufficientis & rem & nomen habet, quod ad bonitatem boni operis sufficiat; liberum enim arbitrium, etiamsi majorem illecebram sequatur perpetuo, minorem nunquam non sequi potest.

Suarezius lib. 3. de Auxiliis cap. 10. hæc habet; Difficultas magna superest; an possit hæc determinatio (gratiæ) pervenire ad summam quendam gradum, in quo sit exacta certitudo, & infallibilis connexio talis effectus cum tali causa, scilicet consensus liberi voluntatis cum excitatione divina, ex sola efficacia morali talis excitationis Dicendum censeo posse pervenire in hac determinatione ad moralem infallibilitatem, quæ simpliciter dici possit nunquam deficere, non tamen ad metaphysicam, ut si dicam, infallibilitatem, id est, ita exactam, ut repugnet deficere Morale est, ut voluntas se sinat ferri à vebementi propensione, maxime si ex parte intellectus objectum aptè proponitur, & avertuntur ea quæ impedire possunt, quod facile potest efficere divina gratia . . . sicut ex parte alterius extremi; scilicet quando excitatio est minima, & indispositio, seu obduratio nimis magna, licet moraliter sit infallibile talem hominem induratum non converti, non tamen simpliciter, seu metaphysice.

Tannerus ex eadem Societate magni nominis Theologus de Gratia sic scripsit ante Jansenium dub. 4. qu. 2. disp. 6. Dicitur potest gratia vocans voluntatem efficaciter determinare ad consensum quod ipsam per se intrinsecam vim & efficacitatem sive quia ob ipsam magnitudinem & vebementiam, etiam in ratione entis adeo potens est, ut quamvis absolute & physice ei resisti possit, moraliter tamen impossibile sit eidem resistere. Atque hæc sententia est, quam hoc secundo loco commemora-

moravimus, & quam etiam (absque tamen Auctoris nomine) referunt Suarez lib. 3. de auxiliis cap. 10. n. 5. & Mascarenas disp. 3. n. 6. At vero quamvis hæc sententia libertatem arbitrii ipsiusque consensus in præviam Dei vocationem utcumque tueatur, & verè satis propriè asserat per gratiam efficacem hoc modo explicatam moraliter determinari voluntatem ad consensum, si quidem verè ac propriè dicitur aliquis moraliter determinare alterum ad peccandum, qui seu vehementer urgendo, & importunè suadendo, vel etiam blandis lenociniis, quibus resistere difficile fuerit, alterum ad peccandum traxit: ob alias tamen causas meritò refellitur à citatis Suarez & Mascarenas.

Maratius in eadem Societate Theologiæ Professor, qui opus Theologicum, ut ipse testatur, edidit rogantibus sibi addictis Theologis Parisiensibus, Disputatione 6. sectione 15. de gratia ad calcem admittit ut probabilem sententiam de gratia per se efficaci moraliter determinante. Sic P. Daniel in suo opusculo de efficacia gratiæ: sic P. Perin in suo Manuali 1. p. c. 5: de scientia media, ubi agnoscit juxta Theologos Parisienses Deum videre futura conditionata in suis decretis efficacibus, admittereque gratiam per se & ex natura sua efficacem, non autem ex consensu voluntatis, aut ex circumstantiis per scientiam mediam prævisis. Et c. 8. de gratia efficaci pag. 153. de victrici delectatione sic scribit: Quando gratiam efficacem vocat (S. Augustinus) victricem delectationem, nihil aliud vult, quàm quod fatentur omnes Catholici, Deum scilicet sua præveniente gratia efficere, ut, quamvis liberè, infallibiliter tamen, & indeclinabiliter voluntas humana operetur bonum. Quin ipse Molina ex-
cogi-

cogitatum à se dogma ita proposuit, ut oppositum nusquam damnaverit.

Atque hæc testimonia ex Schola Molinæ sufficient.

Ex Scotistarum Schola duo testes omni exceptione majores profero, scilicet Cardinalem Lauream & Franciscum Macedo.

Cardinalis igitur Laurea, quem singularis eruditio, & vitæ integritas ad eminentissimam illam dignitatem evexerunt, sic scribit in opusculo de gratiis actualibus c. 7. pag. 339. *In sententia S. Augustini, gratia qua, seu auxilium quo est illa gratia, quæ ita allicit ac delectat, atque trahit voluntatem ad opus bonum faciendum, ut non solum det ei posse facere, sed faciat infallibiliter facere.* Similia habet c. 8. 12. 13. & 14.

Franciscus Macedo Minorita, & Consultor in Inquisitione Romana annò 1638. hoc est, priusquam Jansenii opus de gratia prodiiisset, tanto plausu Theologiam Romæ docuit, ut Serenissima Venetiarum Respublica nihil prætermiserit, ut Academia Patavina tanti viri præsentia & doctrina decoraretur: sic autem habet Thesi 46. *Gratia efficax in delectatione supernaturali consistit.* Et Thesi 69. *Efficacia gratiæ in propria virtute intrinseca ipsius gratiæ victrici sit adest, cujus victoria in delectatione & suavitate consistit.*

De Augustinianorum Schola nullum potest esse dubium, cum dogma quod hic propugnamus, sit ipsi velut proprium; testimonium tamen Cardinalis Noris prætermittendum non est, cum ejus doctrina calumniis obtrectatorum, velut aurum in fornace, adeò probata fuerit, ut propterea Innocentius XII. in Sacrum Cardinalium Collegium

gium cooptandum indicaverit. Hic autem Eminentissimus Cardinalis in opusculo, cui titulus est, *Calumnia Jansenismi sublata*, differt 5. c. 1. & in vindiciis Augustinianis cap. 6. impensè laudat citatum cap. 7. & cap. 13. Cardinalis Laurea, eamque doctrinam confirmat auctoritate Consultorum in Congregationibus de Auxiliis, qui omnes, uno excepto, gratiam per se efficacem tuebantur, quod ipse constituisse affirmat ex genuinis actis earundem Congregationum, scriptis scilicet propria manu P. Coronelli ejusdem secum Ordinis Sancti Augustini, qui in Congregationibus de Auxiliis Scribæ officio fungebatur.

Ergo Romæ & in Italia communis est doctrina, efficaciam gratiæ in delectatione viâtrici consistere. Videamus jam quæ sit Gallorum sententia. Certò id colligemus ex Academia Parisiensi, utpote quæ consletur ex omnibus Regni Provinciis: atqui P. Perrin supra laudatus testatur Theologos Parisienses docere gratiam per se & ex natura sua esse efficacem, non autem ex consensu voluntatis, aut ex circumstantiis per scientiam mediam mediam prævisis. Sed præter testimonia extrinseca, audiendi sunt ipsimet Theologi Parisienses, præsertim qui à centum annis in Scholis nostris Sorbonicis successivè docuerunt.

Isambertus noster, Professor Regius tractatum de gratia in Scholis Sorbonicis legebat, priusquam prodiisset Jansenii liber. Sic autem ordinat quæstionem de efficacia gratiæ disp. 5. artic. 2. pag. 411. & quia piæ memoriæ Summus Pontifex Clemens VIII. die 20. Martii anno 1602. declaravit Congregationi vulgò dictæ de Auxiliis; ut referunt qui
hoc

hoc ipso die Congregationi aderant, mentem ejus restringere totam disputationem de gratia efficaci ad normam & regulam doctrinæ S. Augustini: tum quod ipsa Ecclesiæ acies ita per 20. annos dimicavit pro gratia contra Pelagianos, ut illo duce vicerit . . . tum quod S. Augustinus aded fuit eruditus & versatus in iis, quæ spectant ad gratiam, ut nihil eorum videatur omisisse; tum denique quia alii omnes Summi Pontifices (quos longa serie refert) . . . acres fuerunt assertores & vindices doctrinæ S. Augustini de gratia tanquam verissimæ, ita & nos conabimur sinceram bujus gratiæ naturam exprimere juxta mentem S. Augustini. His præmissis celebris ille Theologus primo loco rejecit Molinæ sententiam, Probatur, inquit p. 417. ex variis S. Augustini testimoniis, quibus docet ipsam efficaciam gratiæ esse quendam effectum divinæ omnipotentiae: at si hæc efficacia esset à consensu voluntatis, illa non esset referenda ad omnipotentiam Dei. Pag. 420. adversus præmotionem physicam hæc habet. Efficacia gratiæ prævenientis non consistit in aliqua qualitate, etiam per modum fluentis à Deo impressa voluntati, illam prædeterminante physicè; Et adversus Congruistas pag. 438. gratia efficaciter excitans, præcisè, propriè & formaliter loquendo est efficax in actu primo ex ipsa ratione sibi intrinseca, & non ex aliqua scientia, Pag. 414. statuit suam sententiam his verbis, tandem gratia illa, qua intellectus sic illuminatur, ut quod latebat, aperiatur; QUOD ANTEA NON DELECTABAT, ITA SIT SUAVE VOLUNTATI, UT HÆC PER ILLAM RE IPSA VINCAT quidquid occurrit in oppositum, & qua etiam omnia externa impedimenta tolluntur, vel de facto superantur, est entitativè major ea gratia, quæ solum illuminat intellectum, delectat quidem voluntatem, non tamen reddit illam re ipsa victri-

cem eorum, qui in contrarium ei opponuntur. Pag. 334. docet ejusmodi gratiæ efficaciam non excludere libertatem, *Consensus*, inquit, in gratiam vocantem, sic sequitur infallibiliter, ut tamen liberè & absque necessitate exerceatur, etiam cum potentia ad dissensum ponendum, qui nihilominus nunquam de facto ponetur.

Ergo in mente Isamberti omnis gratia, sive sufficiens, sive efficax, consistit in suavitate, seu delectatione, cum hoc tamen discrimine, quòd voluntas per sufficientem, etsi possit, actu tamen non vincat difficultates: per efficacem verò insuperabiliter operetur, liberè tamen, & minimè necessariò.

Denique cùm Isambertus eandem difficultatem sibi proposuisset, quam ego mihi Pag. 535. nimirum delectationem illam victricem esse ipsammet Thomistarum præmotionem physicam, difficultatem sic solvit, *Respondetur in actuali gratia efficaci duo posse distingui: primum est ipsa tanta & tam perfecta entitas, sic illustrans intellectum, & movens affectum voluntatis; alterum est modus, quo hæc gratia agit in voluntatem, ut trahat illam ad assensum. Primum, quia est ita aliquid morale, ut tamen sit etiam aliquid physicum, & reale, rectè potest attribui omnipotentiæ Dei At si consideremus modum illum, quo hæc gratia agit in voluntatem ejus, qui vocatur à Deo, ille est tantum moralis, & non efficiens physicè.*

Gasto Chamillart è Societate Sôrbonica Professor regius, quem omnes norunt fuisse orthodoxæ fidei adversus Jansenii doctrinam vindicem acerrimum, paulò post Isambertum sic docuit in nostris Scholis q. 2. sect. 11. *Hæc gratia ita*

ita apta est, ita attemperata potentia, ita tam suaviter allicit, ut quamvis voluntas absolute loquendo possit resistere, nunquam tamen resistat; sed gratia semper infalibiliter, & insuperabiliter, indeclinabiliter, irrefragabiliter operetur suum effectum.

M. Grandin aliàs Sacrae Facultatis Syndicus, tandem Decanus, & per quinquaginta circiter annos Theologiam in nostris Scholis professus, sic docet Tractatu de Grat. q. 1. sect. 3. conclusione 1. *ratio constituens gratiam efficacem non est consensus.* Et conclusione 2. *posset in eo constitui ratio gratiae efficaciae, ut ex sua entitate determinaret moraliter: & reipsa nonnunquam talis conceditur: tamen ubique necessario admittenda non est.* Tres sunt hujusce conclusionis partes. Tertiam, insignis ille Theologus probat, quia experiuntur justi se gratiae interdum consentire; licet non ita vehementer inclinentur in consensum, ut moraliter loquendo resistere non possint. Sed meo judicio, levioris est momenti ista ratio; quia gratia nonnunquam immotis, quin & reluctanter sensibus, tam secretè & latenter operatur in cordibus justorum, ut ipsimet non advertant, doleantque vehementer, quasi pristinum virtutis studium remiserint, utpotè qui fervidum illum dilectionis impetum, & sensibilem contritionis vehementiam, quibus initio conversionis incitabantur, minus in se sentiant, cum interim voluntas eorum toto suo pondere feratur in Deum, ingentium fluviorum instar, qui ad mare properant absque ullo murmure ac sonitu, quem edunt rivuli, sed lapsu ita silenti, ut vix labi ac fluere, imò & residere videantur, cum tamen volvantur tanta vi, tantoque pondere, ut obvia quæque ever-

P p a

tant,

tant, ac secum trahant. Sed quidquid sit, idem Auctor in prima sua conclusionis parte convenit cum omnibus Theologis, quos laudavimus; in secunda nostram sententiam confirmat; & ad objectionem, quam sibi proponit adversus primam partem conclusionis, his verbis respondet, *cum determinatione morali cohærere potest indifferentia physica.* Testimonium hujusce Theologi quis audeat elevare, cum scripta ejus laudentur in literariis diurnis Trevoltii, & legantur in celeberrimis Seminariis Sancti Lazari, & sancti Sulpitii Parisiorum?

Guillelmus de Lestocq, Professor Regius in Scholis Sorbonicis per annos 49. q. 5. de gratia efficaci art. 2. assertionem ultima hæc habet: *Virtus intrinseca, quæ reddit gratiam per se efficacem, nihil aliud est, quàm magna quædam suavitas & dulcedo, seu victrix quædam delectatio, quæ reperitur in actibus indeliberatis voluntatis & intellectus.*

Hos Theologiæ Professores laudavi præ aliis qui magis fuerunt addicti Thomistarum dogmati, ut M. M. Desperieres, Robert, & Piro, ut magis constet dogma gratiæ per se efficacis hætenus obtinuisse in Scholis Sorbonicis, ex quibus tanquam ex fontibus hauserunt non solum Baccalaurei, qui eandem doctrinam in suis Thesis solenniter propugnant, sed etiam celeberrimi nostri Magistri, qui ejusmodi Thesis præfunt, iisque subscribunt cum Syndico, & studiorum Baccalaurei Moderatore.

Constat ergo ex nube testium, quos jam laudavimus, dogma gratiæ per se victricis in omnibus Scholis Catholicis probari & propugnari.

Solvuntur Objectiones.

Objicies 1. libertas indifferentiæ est facultas sui determinativa : atqui sub monitione gratiæ per se efficacis, seu sub delectatione victrici voluntas non se determinat ; cum ex dictis voluntas determinetur per delectationem victricem : ergo voluntas sub illa motione non habet libertatem indifferentiæ.

Nego minorem, ad cujus confirmationem alii aliter respondent. Thomistæ quidem juxta suum dogma prædeterminationis physiciæ : nos vero, & cæteri Theologi cum distinctione sæpius allata : voluntas per delectationem victricem determinatur moraliter, C. physicè, N. sic homo fluctuans vel repugnans dicitur determinari alterius consiliis & suasionibus ; quo usu loquendi omnes intelligunt hominem illum in sententiam Consiliarii ita fuisse pertractum, ut eam liberè etiam libertate contradictionis & exercitii amplexus fuerit. Consensit igitur determinatus tum à Consiliario, tum à seipso : à Consiliario quidem moraliter, & secundum quid tantum : à seipso autem simpliciter tanquam dominus sui consensus, quem absolute in iis circumstantiis denegare potuit. Similiter gratia, quantumcunque efficax, nonnisi moraliter determinat per modum suasionis & illecectionis, ita ut penès voluntatem sit ponere vel non ponere actum, ad quem efficaciter movetur. *Cum voluntas divina sit efficacissima*, inquit S. Thomas 1. p. q. 20. art. 8. *non solum sequitur, quòd fiant ea, quæ Deus vult fieri ; sed & quòd eo modo fiant, quo Deus vult ea fieri. Vult autem quædam fieri Deus necessariò, quædam contingenter (id est liberè)*

ut sit ordo in rebus ad complementum universi. Et ideo quibusdam effectibus aptavit causas necessarias, quæ deficere non possunt, ex quibus effectus de necessitate proveniant; quibusdam autem aptavit causas contingentes, defectibiles, ex quibus effectus contingenter (hoc est libere) eveniant. Consule Tract. de attributis cap. 15. §. 2. ubi ex professo veritas illa stabilitur.

Instabis: victrix illa delectatio oritur tum ex dispositionibus voluntatis, tum ex objecto extrinsecus proposito, & aliis circumstantiis, ut innuit S. Augustinus cit. Tractatu 26. in Joan. exemplo pueri, qui nucibus, & ovis, quæ ramo viridi trahitur: ergo nostra sententia non differt à sententia Congruistarum.

Nego antecedens; in nostra quippe sententia, quæ est Sancti Augusti, Theologorum, quos laudavimus, delectatio, de qua agitur, venit ex potentissima Dei voluntate immediatè & intimè humanam voluntatem suaviter inclinantis. *Legant ergo & intelligant, intueantur atque fateantur*, inquit Sanctus Augustinus lib. de Gratia Christi cap. 24. *non lege atque doctrina insonante forinsecus; sed interna & occulta, mirabili ac ineffabili potestate operari Deum in cordibus hominum non solum veras revelationes, sed bonas etiam voluntates.*

Ergo, inquires, delectatio illa victrix est ipsa met Thomistarum promotio physica; cum ex præcedenti responsione Deus voluntatem physicè moveat.

Nego sequelam: alioquin idem concludi posset ex qualibet alia Catholicorum sententia; omnes quippe uno ore docent interiorem gratiam actualem, sicut & Dei concursum, si secundum entitatem spectentur, esse quid physicum:

ficum; solusque Pelagianus dixerit gratiam tantum movere objectivè & intrinsecè, quemadmodum larga eleemosyna movet mendicum, nuces puerum, ramus viridis ovem, & doctrina auditores.

Circa causalitatem duntaxat & modum operandi divinæ motionis dissentiunt Catholici: alii, ut Molina, volunt effectum ejus determinari à voluntate: alii, ut Suarezius, à congerie circumstantiarum; alii ab ipsa motione, & hi rursus in duas abeunt sententias; nam Thomistæ contendunt physicam motionem physicè etiam determinare, alii moraliter tantum. Itaque juxta hanc ultimam sententiam, quæ est nostra, in gratia efficaci est aliquid physicum & aliquid morale. Ipsa motio est entitas physica divinitus immissa: causalitas ejus est moralis; quia gratia interior delectando seu aliciendo operatur; sicut innatus amor vitæ determinat ad fugiendam mortem, & vehemens concupiscentia ad peccandum, nisi auxilium gratiæ prævenit & adjuvet.

Hæc responsio excerpta est ex verbis supra laudatorum Theologorum Ysambert, Pirot,ournemine, quin & S. Augustini Tract. 26. in Joan. *Trahit sua quemque voluptas, non necessitas, inquit; non obligatio, sed delectatio . . . amando trahitur, cordis vinculo trahitur.* Et ex S. Doctore, Gasto Chamillart, olim Professor Regius in Scholis nostris quæst. 3. artic. 5. sect. II. *Jansenius, inquit, gratiæ efficaciam reponit in cælesti quadam delectatione . . . nos quoque in illa delectatione efficaciam gratiæ sitam esse arbitramur. Verum Jansenius contendit id fieri per modum prædeterminationis Physicæ, nos verò dicimus gratiam*

DELECTANDO VINCERE, INCLINANDO,
NON NECESSITANDO.

Objicis 2. reponere efficaciam gratiæ in delectatione victrici, nova est opinio à Jansenio excogitata; fatis enim fuit S. Augustino generatim dicere, gratiam operari miro & ineffabili modo; quis verò sit ille modus, definire ausus non est; & hanc scribendi rationem etiamnum retinent plures Theologi ex iis, qui admittunt gratiam per se efficacem; nec ullus ex veteribus, qui eam vel asserunt, ut Toletus: vel possibilem confessi sunt, ut Suarezius, Tannerus, &c. meminit ejusmodi delectationis victricis: Ergo falsum est omnes Scholas Catholicas convenire in dogmate, quod propugnamus.

Nego antecedens, 1. quia S. Augustinus in laudatis supra textibus, & in aliis pluribus mirum & ineffabilem modum, quo voluntas trahitur ad Christum, in gratiæ suavitate & delectatione constituit, *dicere debemus*, inquit Tract 26. in Joan. *trahi hominem ad Christum, qui delectatur justitia.* Et l. de Grat. Christi c. 13. *hæc gratia, si doctrina dicenda est, certè sic dicatur, ut altius & interius eam Deus* CUM INEFFABILI SUAVITATE *credatur infundere.* 2. nondum editus erat liber Jansenii, cum Isambertus noster, & Franciscus Macedo scripserunt per gratiam fieri, ut quod prius non delectabat, *ita sit suave voluntati*, inquit Isambertus loco supra citato, *ut hæc per illam reipsa vincat quidquid occurrit in oppositum.* 3. quamlibet Theologiæ Candidatus amplectatur opinionem, siue Molinæ, siue Suarezii, quæ nunc est Communior Patrum Societatis Jesu, velit, nolit, causalitatem gratiæ reponet in ejus suavitate, & allectatione voluntatis;

tatis; quia ex S. Thoma supra laudato, & ex omnibus Philosophis, *Prima immutatio appetitus ab appetibili vocatur amor, qui nihil est aliud, quàm complacentia appetibilis, & ex hac complacentia sequitur motus in appetibile, qui est desiderium*, 1. 2. q. 26. art. 2.

Objicies 3. admissio dogmate de delectatione infallibiliter, & insuperabiliter victrici, Janseniana hæresis evadit figmentum & evanida umbra. Namque Jansenius & ejus sectatores agnoscunt hominem motum victrici delectatione sive cœlesti, sive terrena physicè & absolutè resistere posse: non posse autem moraliter, seu quod idem est, pati necessitatem quandam simplicem & voluntariam. *Respondetur*, inquit Jansenius l. 8. de Gratia Christi Salvatoris c. 20. *sive in infidelitate ante gratiam, sive jam sub gratia indifferentiam ad contraria semper inesse libero arbitrio. Et iterum, in nobis non solum illa potentia voluntatis, quæ de se ad malum est pondus ad peccatum remanet, quod est peccandi potestas, perfectissima.* Jansenii patroni eandem potentiam admittunt in libello de triplici sensu, quem Innocentio X. post latam constitutionem obtulere. Ex quibus sic conficitur syllogismus. Jansenii Defensores docent hominem sub motione gratiæ vel concupiscentiæ constitutum physicè & absolutè resistere posse; non posse autem moraliter, seu, quod idem est, pati necessitatem simplicem & voluntariam: atqui idem planè docent patroni sententiæ, quam tuemur, & nos idem hætenus docuimus: Ergo nostra hæc sententia est verus & realis Jansenismus, larvatus quidem, atque ideo perniciosior.

R. Distinguo majorem, Jansenii Defensores docent hominem physicè & absolutè resistere posse, in sensu captioso, & à communi non solum

Theologorum, sed & omnium hominum more loquendi alieno, C. in sensu verborum proprio & usu recepto, N. majorem.

Itaque in communi hominum acceptione hæ voces, *posse physicè, absolutè & simpliciter*, significant potentiam, quæ præsentem habet vires, easque sufficientes ad hunc & nunc agendum & resistendum, usurpanturque ad distinguendam impotentiam propriè dictam ab impotentia secundum quid, seu moraliter & impropriè dicta; sic dicimus nobilem matronam robustam, & viribus valentem longum iter pedibus conficere posse physicè & absolutè; sed spectata ratione vivendi omnino molli & voluptuaria, non posse moraliter & secundum quid tantum laborem sustinere. Atque hoc sensu Theologi Catholici una voce docent hominem motum delectatione sive cælesti, sive terrena, physicè, absolutè & simpliciter posse ei resistere secundum præsentem, quas habet vires. Ita M. Chamillart supra laudatus, ita M. Grandin Tractatu de Grat. sect. I. pag. 220. *his quid addam, inquit, copulari cum libertate necessitatem, sed hypotheticam solum ac moralem, non absolutam ac physicam, ac proinde quæ non excludat indifferentiam*: ita Illustrissimus Episcopus Carnotensis in suo Mandato adversus Institutiones Theologicas, ubi vult ad merendum aut demerendum voluntatem ab omni necessitate absoluta liberam, *en un mont, ait, une volonté dégagée de toute nécessité* ABSOLUTE: ita qui ante Jansenium scripserunt, ut Bellarminus lib. 2. de gratia & lib. arb. & Maldonatus cap. 8. in cap. 6. Joannis, expendentis versum 44. *nemo potest venire ad me*, sic interpretantur, *dicitur non posse venire qui non trahitur per efficacem gratiam, non quod absolutè non possit, sed*

sed quia infallibiliter non veniet. Sicut etiam contra qui trahitur, potest ABSOLUTE non venire, tamen infallibiliter veniet, ipsissima sunt verba Maldonati. Quid referam Suarezium, Tannerum, & cæteros Theologos, eodem sensu accepisse voces illas, posse physicè, absolutè, & simpliciter, relativè ad præsentem difficultatem, ad significandam potentiam completam & propriè dictam, distinguendamque impotentiam physicam & absolutam ab impotentia secundum quid, moraliter, & impropriè dicta.

At Janfenius & ejus Defensores in citato libello, in quo declarant quo sensu deferant Ecclesiæ definitioni, captiosè voces illas, *posse physicè, & absolutè*, usurpant ad significandum præcisè voluntatem, quæ est potentia physica sub motione gratiæ vel concupiscentiæ remanere; sed relativè ad monitiones, sive gratiæ, sive concupiscentiæ, trahi necessitate simplici & voluntaria, id est, necessitate, quæ non sit violentia, aut coactio, sed determinatio tam necessaria, & quidem antecenter ad actum, ut ab illo prorsus abstinere non possit; atque in eo sensu ab omnium intelligentia alieno, qui jacet in tenebris, physicè & absolutè potest videre; physicè quidem, quia habet oculos, & potentiam visivam; absolutè etiam, quia, etsi lumine actu careat, potest ei lumen afferri. Cùm autem fallacia tam pudenda in viris Theologis excedat fidem, propriis eorum textibus demonstranda est.

Janfenius igitur lib. 8. de Gratia Salvatoris, cap. 20. jam alibi citato, sic scribit, *respondetur, quandiu hic vivimus, sive in infidelitate ante gratiam, sive jam sub gratia, indifferentiam ad contraria semper inesse*

inesse libero arbitrio; sed non eo modo, quo isti Scholastici (Catholici) putant, quo supra diximus, quocunque modo arbitrium, siue gratiæ, siue peccati delectationibus imbuatur, semper existimant cum utraque ejus dispositione posse fieri, ut utrumlibet velit, siue bonum, siue malum. Quam autem alienus sit à sententia Catholicorum Theologorum, aperit lib. 4. de Gratia Christi Salvatoris cap. 9. his verbis: ille conflictus delectationum sopiri non potest, nisi altera alteram delectando superaverit, & eo totum animæ pondus vergat. Quod enim amplius delectat, secundum id operemur necesse est. Vigente enim delectatione carnali impossibile est, ut virtutis ac honestatis consideratio prævaleat. Et lib. 7. cap. 5. cum igitur justitiæ, vel peccati delectatio sit illud vinculum, quo liberum arbitrium in justitia vel peccato ita firmiter ligatur, & retinetur, ut, quandiu isto stabiliter possidetur & constringitur, actus oppositus sit extra ejus potestatem.

Jansenii quoque Defensores in citato libello de triplici sensu declarant hominem constitutum siue sub gratia, siue sub concupiscentia posse dissentire, vel consentire, quatenus in utroque statu habet voluntatem, quæ est potentia essentialiter electiva, & flexibilis ad bonum & ad malum. Ergo, inquam ego, propter ejusmodi naturalem flexibilitatem, verum erit dicere, hominem sine gratia, Physicè, absolutè, & plenissime posse omnia, quæ legis sunt implere, & mereri vitam æternam, cum voluntas ex natura sua & absque gratia, sit potentia electiva, & flexibilis ad bonum supernaturale. Siccine ludunt homines? Nec satis ipsis est fabricasse ejusmodi sophismata; volunt insuper Summum Pontificem iis usum fuisse in sua Constitutione, & eo sensu ab omnium men-

mente, & usu loquendi alieno intelligendas esse ejus definitiones.

Nec dicas Jansenii patronos in eodem libello confiteri gratiam sufficientem, cui non solum physicè & absolutè resisti possit, sed cui etiam actu resistatur. Id enim dicunt cum simili fallacia; namque 1. gratia quam admittunt, omnem habet effectum, quem potest habere, & ad quem datur, nempe velleitatem, seu inefficacem quandam complacentiam, & imperfectam volitionem: atqui falsò quis diceretur alteri resistere, quem non impedit implere quicquid habuit in animo. 2. Ejusmodi gratia par non est vincendæ delectationi terrenæ, sed se habet in voluntate, inquiunt, ut pondus leve, quod à graviori alio pondere in statera necessariò superatur, dicente S. Augustino in exposit. epistolæ ad Galatas; *quod enim amplius delectat, secundum illud operemur necesse est. Cuncta ponderibus suis moventur*, pergit S. Doctor, lib. 13. Confess. cap. 7. *pondus meum, amor meus, illo feror quocunque feror.*

En verus & realis Jansenismus, à quo distat communis Scholarum sententià, sicut lux a tenebris, & doctrina orthodoxa ab hæresi.

Enimverò secundum Jansenium suprà citatum, justitiæ delectatio est vinculum, quo liberum arbitrium ita constringitur, ut actus oppositus sit extra ejus potestatem, & contra, urgente delectatione carnali, IMPOSSIBILE sit, ut virtutis & honestatis consideratio prævaleat. Nos ex adverso dicimus, quantumcunque intensa sit delectatio, sive cœlestis, sive carnalis, hominem physicè, absolutè, simpliciter, & potentia relativa ad ejusmodi delectationem posse resistere; non posse

posse autem potentia morali, improprie dicta, & secundum quid, & quocunque alio modo, quo possit exprimi vera & completa potentia, quæ adversus prævenientem delectationem vires non exerit, sed ab ea trahi se sinit. Condonet Lector istam verbositatem; necessaria quippe est hocce tempore, quo vix ullus liberè scribit de gratia, & Janseniani nomen effugit, nisi juret in dogma Molinæ. Absit verò ut Jansenianum dicamus, qui damnata Jansenii doctrina, & rejectis cavillationibus, de quibus suprà, communem Catholicarum Scholarum, ac speciatim Parisiensium sententiam sincerè nobiscum amplectitur.

Probata autem manet ejusmodi sententia, tum ex paragrapho IV. ubi eam ex professo stabilivimus ex Scriptura, Traditione, Concilio Tridentino, & Constitutionibus Summorum Pontificum, confutavimusque quæ contra opponunt Jansenii Defensores; tum ex definitione gratiæ efficacis ex sancto Augustino prolata cap. 5. parag. 4. *Gratia efficax, inquebamus, est actuale Dei auxilium, quo voluntas actu vult infallibiliter & insuperabiliter; libera tamen, & minimè necessariò; quia gratia efficax est principium meriti: nullum autem potest esse meritum in eo, qui necessariò agit, nec ita dominus est sui actus, ut de eo non possit disponere, hoc est, divinæ motioni, vel consentire vel dissentire.* Quæ verba perspicuè exprimunt libertatem indifferentiæ, qualem fusè exposuimus Tractatu de Actibus humanis pag. 19. & seq. ubi ostendimus amorem beatificum non esse liberum, ut contendit Jansenius lib. 6. de Gratia Christi Salvatoris cap. 8. ubi de Beatis sic habet, *liberè non peccant, & liberè amant*; quia scilicet voluntariè agunt, quamvis necessariò.

Ad quæsitum autem, utrùm velle aut operari infallibiliter & insuperabiliter, quemadmodum loquitur Sanctus Augustinus lib. de correct. & grat. cap. 12. idem sit ac velle & operari necessariò, respondimus non esse. Primum ostendimus exemplo pauperis, qui liberè, infallibiliter tamen, accurrit ad divitem, qui pinguem offert eleemosynam. Secundum demonstravimus ex inclinatione cuique indita ad tuendam propriam vitam; amor enim vitæ impressus à Deo, insuperabiliter determinat ad præstandum id, sine quo mors præsentissima vitari nequit; non vincitur cupiditate auri v. g. quod viator ultimò & liberè offert latroni, ne vita ipsum spoliet.

Vox igitur, *insuperabiliter*, quam usurpat sanctus Augustinus, non significat delectationem victricem non posse superari à voluntate sub ea constituta, ut vult Jansenius, sed denotat solum nullas mundi illecebras, nullosve terrores posse prævalere adversus hominem gratia efficaci præventum; quo sensu dicitur invincibilis aut insuperabilis, qui in arce munitissima ac firmissima constitutus est; quia nulla vi expugnari potest; quamvis ipsi liberum sit portas aperire hostibus. Sic S. Hieronymus adversus Jovinianum, & omnes Catholici adversus Lutherum & Calvinum interpretantur illud 1. Joan. 3. vers. *Omnis qui natus est ex Deo, peccatum non facit; quoniam semen ipsius in eo manet, ET NON POTEST PECCARE*; quia nec dæmonum impulsus, nec mundi terrores aut illecebræ dejicere possunt qui habitat in adjutorio Altissimi: quamvis ipse propria sponte, & libero arbitrio recedere possit, quemadmodum primus parens, inquit Cornelius a Lapide in laudatum

datum textum sancti Joannis, ita erat immortalis per justitiam originalem, ut mortem accersere potuerit. Nisi enim homo efficaci Dei gratia adjutus liberè disponderet de actibus, ad quos illa impellit, nullum esset virtutis meritum; cùm ad merendum, liber esse debeat non solum a coactione, sed etiam à necessitate. Consule quæ in hanc rem diximus Tract. de Actibus humanis.

Longè autem absurdissimè Jansenii Defensores definiunt inæquales gradus gratiæ & concupiscentiæ, sive delectationis cœlestis & terrenæ, id esse in voluntate, quod inæqualia pondera in ambabus stateræ lancibus; alioquin in hypothese quodd ejusmodi gradus sint æquales, voluntas non posset ullum actum elicere, sed necessariò maneret suspensa, quemadmodum ambæ lances stateræ paribus libratae ponderibus, nec sursùm nec deorsùm ferri queunt, sed pendent immobiles; & ita pro homine exhibebitur nobis stipes sine actu & motu; quod nequidem de equo posito duas inter corbular avenæ plenas asserere potuerunt nonnulli Philosophi; quin statim aliis fuerint ludibrio.

Humana igitur libertas non est facultas passivè indifferens, instar stateræ ad recipiendos contrarios motus, ut docuimus Tractatu de Actibus humanis cap. 1. parag. 4. Pudet Lutheranos suum Magistrum aliquando lapsum in insanum illum errorem, quem Synodus Tridentina anathemate percussit sess. 6. can. 4. Unde mirum videri debet, quodd in mentem Novatorum incidere comparatio stateræ ad explicandam hominis libertatem, sub gratia, vel sub concupiscentia
con-

constitutam; cum de fide sit libertatem ejus esse facultatem activam immunem etiam à necessitate relativè ad motionem gratiæ vel concupiscentiæ; atque ideo asseruimus adversùs Jansenium citato parag. 4. amorem beatificum, quamvis voluntarium, non esse liberum, quia posita visione Dei intuitiva, Beati in amorem Dei necessariò erumpunt.

Quare etiamsi supponantur quatuor gradus concupiscentiæ, aut delectationis terrenæ, & duo gradus duntaxat gratiæ, aut delectationis justitiæ, vel contra, voluntas tamen non agit necessariò secundum quod amplius delectat; *trahit sua quemque voluptas*, ajebat supra S. Augustinus, *non necessitas, sed voluptas; non obligatio, sed delectatio*. Et infra, *Videte quomodo trahit Pater, docendo delectat, non necessitatem imponendo*. De delectationibus corporalibus S. Thomas speciatim scribit 1. 2. qu. 10. art. 3. ad 2. *Et si ratio obnubiletur à passione, remanet tamen aliquid rationis liberum; & secundum hoc potest aliquis vel totaliter passionem repellere, vel saltem se tenere, ne passionem sequatur*. Et q. 24. de libero arbitrio art. 12. ad 12. *dicendum quòd cupiditas non potest esse cogens absolute liberum arbitrium, quod semper est liberum à coactione, sed dicitur cogens propter vehementiam inclinationis, cui tamen potest resisti, licet cum difficultate*. Porro qui solam prætexit difficultatem, cur præcepto non obtemperaverit, hoc ipso confitetur negligentiam suam & peccatum; negligentia enim, omnium judicio, culpa non caret. Illud ipsum agnoscit Sanctus Augustinus lib. 2. de peccatorum meritis cap. 3. ubi respondens Pelagianis contendentibus in eo nullum esse peccatum, qui moralem patitur necessitatem, hoc est gravem difficultatem, cui absolute resisti possit,

D. Habert. Theolog. Tom. II. Qq sic

sic habet; sed hoc non vident, quod ad nonnulla superanda, quæ vel male concupiuntur, vel quæ malè metuumtur, magnis aliquando & totis viribus opus voluntatis, quas nos non perfectè in omnibus adhibituros prævidit, qui per Prophetam veridicè dici voluit, non justificabitur in conspectu tuo omnis vivens. Et S. Bern. serm. 81. in Cantica, interveniente peccato, inquit, patitur quandam vim & ipse (homo) sed à voluntate, non à natura, ut ne sic quidem ingenua libertate priveatur nescio quo pravo & miro modo ipsa sibi voluntas peccato quidem in deterius mutata, necessitatem facit; ut nec necessitas, cum voluntaria sit, excusare valeat voluntatem, nec voluntas, cum sit illecta, excludere necessitatem, (moralem scilicet.) Est enim necessitas hæc quodammodo voluntaria, est favorabilis vis quædam premendo blandiens, & blandiendo premens, unde sese rea voluntas, ubi semel peccato consenserit, nec excutere jam per se, nec excusare ullatenus de ratione queat.

Quæ hinc dicuntur de victrici peccati delectatione, cum proportionem transferri debent ad victricem gratiæ delectationem; est enim & ipsa quædam vis blandiens, quæ voluntatem ingenua libertate non privat: illi quippe resistere potest, sed vires ad id nunquam adhibituram prævidit, qui per prophetam veridicè dici voluit, faciam ut in præceptis meis ambuletis, Ezech. 18.

Atque in huiusce dogmatis confirmationem adduxeramus textum ex S. Augustini expositione in epist. ad Gal. Quod amplius nos delectat, secundum id operemur necesse est: sed delevimus postea, non tamen metu Censoriæ notæ; quid enim mali suspicari quis posset in ipsissimis verbis S. Augustini, maximè cum monuissemus ea non esse intelligenda de necessitate absoluta, &
pro-

propriè dicta, ut vult Jansenius, sed de necessitate morali, & impropriè dicta? Nihilominus propositio tanti Doctoris ad Ecclesiam delata est à Scriptore sine nomine tanquam Janseniana & hæretica. Cur ergo eam delevimus? quia visa non est argumentum efficax ad probandam gratiæ efficaciam, cum controversia sit in Scholis, num Sanctus Augustinus loquatur ibi de delectatione præveniente, aut de consequente, in qua non potest reponi gratiæ efficacia, cum ipsa sit gratiæ efficacis effectus, & fructus boni operis, ut jam observavimus.

Quamobrem in hac posteriori editione satius judicavimus permittere nonnullis Theologis Catholicis Sanctum Doctorem eo loci loqui de delectatione consequente liberum voluntatis consensum, licet alii contra contendant ipsum loqui de delectatione præcedente, sed quæ non inferat absolutam necessitatem, seu relativam resistendi impotentiam, simpliciter & propriè dictam, aliàs dici oporteret Sanctum Doctorem, quæ hîc leguntur, postea correxisse in lib. de spirit. & lit. cap. 30. in quo sic habet, *cum potestas datur, non necessitas utique imprimitur.* Et cap. 33. *agit Deus, ut velimus & credamus . . . sed consentire vel dissentire posse, propriæ voluntatis est.* Textus igitur ille, quem Jansenius & ejus sectatores præsertim urgent adversus doctrinam Catholicam, nihil eos juvat, de qualibet delectatione accipiatur; si enim de præveniente consensum, non imponit necessitatem, nisi secundum quid & impropriè dictam: si de consequente consensum, necessitas est solummodo hypothetica & consequentiæ, quomodo reus mortis, qui plus delectatur vita quàm veritate, hoc est, qui

salutem corporis præfert veritati, interrogatus à Judice pejerat necessariò necessitate finis & consequentiæ, quia mortem aliter vitare nequit; sed necessitas illa consequens non officit libertati; cum absolutè & simpliciter necessarium non fuerit, ut pluris faceret vitam quàm veritatem.

Instabis: Quid ad mores referet siue physicè & simpliciter secundùm Jansenium, siue moraliter tantùm, sed indeclinabiliter gratia efficax per se determinet, cum eadem sequantur incommoda & absurda? Enimverò si omnia infallibiliter eveniant, siue mala sub gravi tentatione, siue bona sub cœlesti delectatione; frustrantur præcepta & consilia. Frustra adhibentur exhortationes & correptiones: tollitur humana industria, diligentia & sollicitudo; ad quid enim deliberaret, aut vires intenderet, qui certò novit rem aliter non eventuram, gratiam sufficientem v. g. non sortituram effectum, efficacem verò semper obtenturam? Quid juvat physica & absoluta resistendi potentia, etiam relativè ad præsentem gratiam vel concupiscentiæ motionem, si constet eam ad actum nunquam redigendam? Ergo dogma de duplici delectatione moraliter, sed infallibiliter determinante non minùs perniciosum est in moribus noxium, quàm dogma Jansenianum, ac proinde à Scholis Catholicis ablegandum.

Nego anteced. & ad ejus confirmationem

R. I. Mirum, quòd etiamnum recoquantur quæ olim Pelagiani & Semipelagiani objecerunt adversùs S. Augustini doctrinam, quæ erat & Ecclesiæ, nimirum inutiles fore exhortationes, correptiones, &c. doctrina, quæ armis Pelagianorum hìc impugnatur, ipsamet sancti Augustini doctrina,

ctrina, pro cuius defensione Sanctus Doctor ejusmodi Pelagianorum tela passim in suis scriptis repulit, sed præsertim toto libro de corr. & gr. & lib. de dono perseverantiæ cap. 14. 15. & 17.

R. 2. Hæc momenta non privatam, sed communem & constantem Scholarum Catholicarum doctrinam vellicant; excepta enim Molinæ Schola, nulla est, quæ neget gratiam per se efficacem, & moraliter determinantem, admittatque solam gratiam versatilem, quæ ex consensu vel dissensu voluntatis dicatur efficax vel sufficiens. *In omni sententia*, inquit M. Grandin. qu. 3. de divis. grat. sect. 3. p. 240. *quæ non ponit efficaciam gratiæ in solo consensu, gratia sufficiens prout ab efficaci distinguitur, effectum suum non obtinet.* Et p. 238. ejusdem sectionis de gratia orationis sic habet, *si cuius, gratiæ efficacitas à consensu repetenda esset, maximè gratiæ orationis: sed hoc dici non potest: quippe sicut agendi gratia EST EFFICAX A DEO; ITA ET OPERANDI GRATIA, ut indicat illud sancti Augustini, &c.*

R. 3. Falsò supponit in objectione hominem præveniri semper delectatione vel cœlesti, vel terrena, quæ illum in omnibus infallibiliter determinet, vel ad benè, vel ad malè agendum. Namque 1. plures sunt tentationes leves, quas superare possumus, etiam potentia morali. 2. Sunt aliqua opera etiam in Infidelibus moraliter bona, quantò magis in Fidelibus, qui verum Deum colunt, noveruntque ejus præcepta, quorum plura sunt naturæ suavia, nedum difficilia. Annon mater vel filius naturaliter propendet ad opem ferendam, illam proli charissimæ, iste parentibus amantissimis? Quot homines delectabiliter feruntur ad honesta sui status officia?

3. In difficilioribus non desunt gratiæ sufficientes, quæ si non obtinet effectum, ad quem dantur, id tribuendum est desidiæ & fœcordiæ accipientium.

R. 4. Quæ colligi posse quis putaret absurda ex gratia per se efficaci, prorsus aliena sunt à mente Apostoli, qui ad Philipp. sic scribit c. 2. *Cum metu & tremore salutem vestram operamini: Deus enim in vobis operatur velle & perficere.* Attendat hic, & verba illa perpendat Lector, *Deus in vobis operatur velle & perficere*, non ait, Deus congruis modis suadet, hortaturque amicorum more ut bonum velimus & operemur, sed ipse operatur in nobis, & velle & perficere, seu, ut loquitur S. Thomas, dat ipsum actum liberum, quem neque prudens Consiliarius, neque Orator disertissimus dare, sed solum expetere possunt. Quid autem ex hujusmodi dogmate colligit Apostolus? Quod nobis opus non sit industria, sed otiosi expectare debeamus, quoadusque Deus sua gratia nos assumat, & ad id, quod bonum est, potentissima sua voluntate trahat? Absit. *Cum metu & tremore*, inquit, *salutem vestram operamini*, hoc est cavete pericula, vigilate, timetè eum offendere, cujus auxilium vobis adeo est necessarium, & conscii propriæ infirmitatis corda ad eum erigite perseverantes in orationibus; sicut enim volentibus & conantibus gratia non deest, qua mandata possibilia fiant, quemadmodum definierunt Innocentius X. & Alexander VII. ita negligentibus & de se præsumentibus dicitur, *apprehendite disciplinam, ne quando irascatur Dominus, & pereatis de via justæ.* Unde S. Bernardus serm. 1. in Psal. 90. *Soli*, inquit, *in adjutorio Altissimi habitant, qui id solum obtinere deside-*

desiderant, id solum amittere trepidant, sedula circa illud & sollicita cogitatione versantes, quæ est utique pietas cultus Dei: beatus planè qui sic habitat in adjutorio Altissimi; quia in protectione Dei cæli commorabitur.

Ergo propriæ infirmitatis conscientia, & in adjutorio Dei firma fiducia, duo sunt veluti cardines, in quibus vita christiana vertitur: conscientia quidem propriæ infirmitatis, ut homo nihil de propriis viribus præsumat; fiducia verò in Dei adjutorio, ut totum ei tribuat, & cum Apostolo fidenter dicat, *omnia possum in eo qui me confortat*, Phil. 4. hinc audeat, & animosumat: illinc metuat & caveat. Restat, ut expendamus jam quoddam dogma conciliari possit cum doctrina tam sana tamque divina.

Quæstio esse non potest de Janseniano dogmate, cum in confesso sit apud omnes Catholicos illud pugnare adversus doctrinam Apostolicam; quæ enim singulis potest esse fiducia in Dei adjutorio, si Deus secundum Jansenium non vult salvos fieri nisi solos electos, id est, paucissimos, dicente Domino Matth. 20. *multi vocati, pauci verò electi*? Quis fructus vigilantiae & industriæ, ad quam acuendam metum & tremorem injicit Apostolus, si electi, quantumcumque flagitiosi, necessariò sunt convertendi & in bono perseveraturi: reprobi verò, quidquid agant, simili necessitate peccatum finale, & æternam damnationem non evasuri? Tota igitur controversia versatur circa dogmata in Scholis Catholicis recepta.

Contendebat nuper nescio quis sine nomine auctor solum Molinæ dogma esse Catholicum,

solumque cohærere cum verbis Apostoli; experiamur. Sic docet ille Theologus qu. 14. art. 13. disp. 10. *Sicut Deus semper præsto est per concursum generalem libero arbitrio, ut naturaliter velit aut nolit prout placuerit, ita præsto illi est per auxilium gratiæ sufficiens; ut quoties ex viribus naturalibus aggredi voluerit opus aliquod ex iis quæ ad justificationem spectant, illud exequatur prout ad salutem pertinet . . . ut ea ratione semper in manu liberi arbitrii nostri posita esset salus nostra.* Atqui non videtur quomodo hujusmodi dogma conciliari possit cum doctrina Apostoli. Namque 1. Deus per concursum generalem non dat velle & perficere: Ergo neque per supernaturale auxilium, sed solum præstat ut velle & perficere possimus, si ita libuerit. 2. Necessitas divini concursus, qui præsto est omnibus, non est ratio cur homo cum metu & tremore operetur quæ ad suum statum naturalem pertinent, nec quisquam hactenus fuit anxius, aut in orationibus perseveravit, ne Deus extraordinariè & per miraculum, suspendat concursum suum? Ergo si auxilium sufficiens similiter præsto sit, & ad nutum voluntatis versatile, absque metu & tremore operari debemus quæ ad justificationem spectant, cum in illa sententia salus nostra magis posita sit in manibus nostris, quàm successus operis cujuscunque naturalis. Generalis enim Dei concursus adversos casus non avertit, dat quidem agricolæ v. g. ut vineam excolere possit, si velit; sed per se & sine speciali providentia, nihil confert sive ad valetudinem corporis conservandam, sive ad pluviam temporariæam obtinendam, sive ad arcenda noxia animalia, genus, prædones, & cætera, quæ agricola prudenter metuere potest. Unde necessum est.

est, ut ad orationem sæpius recurrat, Deumque omnipotentem promereri fatagat, ne adversus casus ipsum labore suo defraudet. Sed admissio dogmate, de quo agitur, non est cur quidquam horum timeamus in ordine supernaturali; gratia quippe, quæ omnibus non minus præsto est quam concursus generalis, sufficit tum ad spiritualem animæ salutem conservandam, tum ad superandos Dæmonum impetus; tum ad patienter sustinendos quoslibet casus adversus, & in bonum convertendos. Judicet lector, an ista cohæreant cum cœlesti doctrina Apostoli.

Nec dicas Molinæ dogma hodie non propugnari in Scholis præsertim Parisiensibus sine Congruistarum temperamento, juxta quod vigilandum & orandum, ut Deus congruo tempore & loco suum offerat auxilium; quia, ut jam observavimus, sententia illa non satis convenit cum laudatis Apostoli verbis, *Deus est, qui operatur in vobis & velle & perficere*; qui enim oportunam captat occasionem, qua amicum inclinet ad opus aggrediendum, non dicitur illi dare velle & perficere, sed obtinere dumtaxat, ut ille velit & operetur.

Supereft discutiendum commune & antiquum Scholarum dogma de gratia per se efficaci, & dico illud ex omni parte concordare cum verbis Apostoli, perfectè conciliare diffidentiam sui cum firma fiducia in Dei adjutorio, & præcipuum esse argumentum ad acuendam nostram diligentiam, & vigilantiam in orationibus. Juxta enim hujusmodi dogma, 1. Deus sincerè vult omnes & singulos homines salvos fieri, nemo ex hac parte anxius sit aut diffidat. Sed opponet aliquis, ad me ipsum anima mea turbata est, regnum cœlorum

vim patitur, & infirmus sum, voluntas humana levis est, & in bono proposito mutabilis. Confidat 2. subventum est enim humanæ infirmitati, Deus in nobis operatur & velle & perficere. At non semper, inquis, nec in omnibus. 3. Singulis offert auxilia verè & planè sufficientia, quibus efficax illud donum promereri possit, si non de condigno, saltem de congruo, ut ajunt; timeat solum ne per fœcordiam in vacuum gratiam Dei recipiat, sed vires intendat, vigilet, instanter oret nihil hæsitans; nullus enim hoc modo speravit & confusus est.

Urgebis contra responsionem; gratia sufficiens secundum dogma de gratia per se efficaci, nihil confert ad bonos mores & ad vitam æternam; cum in statu naturæ corruptæ numquam effectum obtineat, utpotè quæ semper sit conjuncta cum difficultatibus, quas numquam superat; quæ enim sic vocantur moraliter impossibilia ex alibi dictis, numquam existunt: Ergo gratia quantumcumque sufficiens, nullam spem injicit in hac sententia, quin optandum magis videtur ea carere, cum accipienti aliud non conferat, quàm ut apud Deum inexcusabilis fiat.

Nego anteced. cujus confirmationem distinguo, gratia sufficiens numquam in statu naturæ corruptæ effectum obtinet ex vitio & negligentia accipientis, C. ex ipsiusmet gratiæ imbecillitate, quasi par non sit superandis difficultatibus, Nego: jam enim diximus cum S. Anselmo, & congruis exemplis demonstravimus, supra, impotentiam, quam Theologi vocant moralem, *non esse ex impossibilitate, sed ex difficultate: frequenti namque usu dicimus nos non posse aliquid, non quia nobis est impossibile,*
sed

sed quia illud sine difficultate non possumus. Sunt ipsissima verba S. Anselmi dial. de lib. arb. cap. 6. Difficultatem verò, etsi non tollat omnino gratia sufficiens, minuit tamen, mentem sancta cogitatione imbuat, voluntatem pia affectione incitat ad faciendum quod potest, & petendum quod non potest; omnibus enim dicit Christus, *Petite, & dabitur vobis*, Matth. 7. *Omnis qui petit, accipit*, Luc. 13. Unde S. August. in Psal. 65. *Securi de pollicitatione ipsius, inquit, non deficiamus orando. Cùm videris non à te amotam deprecationem tuam, securus esto, quia non à te amota misericordia ejus.* Quis aliquando non expertus est orationem suam, quæ initio erat tepida & penè nulla, perseverando incaluisse, & reluctantem prius voluntatem hærendo crucis trunco, ut loquitur S. Hieronymus, ad divinam tandem se convertisse, ut dubium esse non possit, quin gratiæ sufficientes disponant ad efficaces: impieque dicatur optandum illis carere?

At, inquires, quomodo in ista sententia gratia sufficiens sive operationis sive orationis, potest esse dispositio ad efficacem, cùm ex ea nec operemur, nec oremus, sed ex efficaci tantùm, *in omni sententia, quæ non ponit efficaciam gratiæ in solo consensu*, inquiebat supra M. Grandin; *sicut agendi gratia est efficax à Deo, ita & orandi gratiæ.*

R. I. Cum Sapiente Eccl. 2. v. 12. *Quid est, inquam, homo, ut sequi possit Regem factorem suum?* Et Eccl. 1. v. 7. *Disciplina sapientiæ, cui revelata est & manifestata, & multiplicationem ingressus illius quis intelligit?* Si autem ratio & modus, quibus inferiora Deus administrat, ab intelligentia & sensu Philosophorum longissimè disjuncta sunt; quis mentem ad supernaturalia transferens, non exclamet

clamet cum Apostolo Rom. 11. *O altitudo divitiarum Sapientiæ & Scientiæ Dei, quàm incomprehensibilia sunt judicia Dei, & investigabiles viæ ejus!* vel ipse Adversarius dicat, an facile duo conciliare possit, quæ Concilium Tridentinum docet Sess. 6. Alterum cap. 13. *In Dei auxilio firmissimam spem collocare & reponere omnes (Justi) debent*, cùm de fide sit illis volentibus & conantibus non deesse gratiam, qua mandata possibile fiant. Alterum Can. 22. quo Anathemate percutit asserentem justificatos sine speciali auxilio Dei in accepta justitia perseverare posse. Cùm enim constet non omnibus justis speciale illud donum esse concessum, quomodo omnes firmissimam spem in Dei auxilio collocabunt? humiliter ergo nobiscum audiat illud Sapientis Eccl. 3. v. 24. & 25. *In pluribus operibus ejus non eris curiosus: plurima enim super sensum hominum ostensa sunt tibi.* Scholæ tamen, quarum commune dogma propugnamus, difficultati prorsus non succumbunt. Ex ipsis itaque

R. 2. Gratiam sufficientem multis capitibus disponere ad efficacem. Namque 1. gratia sufficiens, mentem evehit ad ordinem supernaturalem, & quæ dicitur sufficiens ad actum ultimum ad quem movet, sæpe est efficax respectu proximi, ut docet S. Thomas 1. 2. q. 112. art. 2. ad 2. *Contingit quandoque, inquit, quòd Deus movet hominem ad aliquod bonum, non tamen perfectum: & talis præparatio præcedit gratiam.* 2. Concupiscentiam minuit, & ejus impetum frangit. 3. Mentem illuminat, & voluntatem pia affectione commovet. Ex dictis enim gratia sufficiens duo ista complectitur, ex quibus contingit, ut homo interius officii sui moneatur & ad illud præstandum, vel
ado-

adorandum ut plenè possit, incitetur : ubi autem ex negligentia tentationi succumbit, id fiat repugnanter & quodammodo invitè, conscientiae stimulis exagitetur, seipsum coarguat ac dejiciat. Quis autem negaverit ista præparare ad ulteriorem gratiam, propter quam prior concessa est ?

Porro si filius plurimum debet optimo parenti, qui studiosè illum edocet, quæ recta sunt, diligenterque hortatur ut ad ea mores suos componat, quantò amplius obstricti sumus Patri luminum, qui longè præstantiori modo per gratiam etiam sufficientem vera & utiliora animis nostris instillare, & corda nostra excitare non intermittit ? Esto, non obtemperet quis divinæ motioni, saltem minus liberè peccat, aliquatenus quippe repugnat voluntas cœlesti lumine collustrata, factum contra scientiam nulla imaginatione justitiæ, ut loquitur S. Augustinus, defendere potest, inde pungitur, seipsum dejicit, & ex sui displicentia residet animi tumor, sicque ex lapsu demissiùs de se sentiens accedit ad salutem ; Deus enim qui alta à longe cognoscit, juxta est iis qui tribulato sunt corde, & humiles spiritu salvabit, Psal. 33. *Audeo dicere*, inquit S. Augustinus lib. 14. de Civ. Dei cap. 13. *superbis esse utile, cadere aliquod in apertum manifestumque peccatum unde sibi displiceant, qui jam sibi placendo ceciderant. Salubrius enim Petrus sibi displicuit, quando flevit, quàm sibi placuit, quando præsumpsit. Hoc dicit sacer Psalmus : Imple facies eorum ignominia, & quærent nomen tuum Domine : id est, ut tu eis placeas quærentibus nomen tuum qui sibi placuerant, quærendo suum.* Et S. Gregorius lib. 33. mor. cap. 11. *Qui acceptis virtutibus extollitur ; non gladio, sed ut ita dixerim, medicamento vulneratur . . .*

Quia

Quia ergo nos de medicamento vulnus facimus, facit Deus de vulnere medicamentum, ut qui virtute percutimur, (superpiendo) vitio curemur: quemadmodum Medicus arte sua contra venenum incautè haustum præparat aliud venenum, ut observat S. Augustinus lib. de nat. & grat. adversus Pelagium Catholicos irridentem, quòd in eorum sententia ex Dei consilio natura humana per peccatum primi hominis vitiosa remaneat infirma, & ideo peccatis obnoxia, nec superbiat, aut quidquam de se præsumat; nam Medicus, inquiebat ille; ad curandum jam vulneratum paratus esse debet; non debet autem ut sanus vulneretur, optare; quia nullum malum boni alicujus est causa, ad quod S. Doctor cap. 27. sic respondet: Quasi non & ulcus in dolore est, & sectio dolorem operatur, ut dolor dolore tollatur. . . . hoc utique agit (Deus) ut sanet omnia; sed agit judicio suo, nec ordinem sanandi accipit ab ægroto. Procul dubio quippe firmissimum Apostolum valebat efficere, cui tamen dixit, 2. Cor. 12. virtus in infirmitate perficitur: & non ei toties oranti aufert nescio quem stimulum carnis, quem sibi dicit datum, ne magnitudine revelationum extolleretur. Cætera enim vitia tantum in malefactis valent, sola autem superbia etiam in recte factis cavenda est. Unde admonentur illi, ne dona Dei suæ potestati tribuendo, seseque extollendo gravius pereant, quàm si nil operarentur boni, quibus dicitur Phil. 2. Cum timore & tremore vestram ipsorum salutem operamini Quare cum timore & tremore, & non potius cum securitate, si Deus operatur? nisi quia propter voluntatem nostram, sine qua bene non possianus operari, citò potest subrepere animo humano, ut quod benè operatur, suum tantummodo existimet, & dicat in abundantia sua, non movebor in æternum. Ideo qui in voluntate sua præstiterat decori ejus virtutem, aver-

tit faciem suam, ut, qui hoc dixerat, fieret conturbatus; quoniam ipsis est ille tumor sanandus doloribus. Ex quibus perspicuum fit longè falsissimum gratiam verè sufficientem, qualem descripsimus, nihil conferre ad bonos mores & ad vitam æternam.

Ais, tanta bona non proveniunt sine gratia efficaci: Quis neget? sed ad eam quandoque præparantur corda per sufficientem, ut supra docebat S. Thomas. Per ipsam videt quis quam in multis offendat; lumen quippe est, sine quo non adverteret nunc inaniter jactare se ex bonis operibus, nunc periculosius placere sibi de se cùm aliis nec placere, nec displicere curat: nunc voluptatem subrepere sub obtentu necessitatis, negligentiam sub prætextu curandæ valetudinis, libidinem vindictæ sub falsa imagine consulendi proximo, vel tuendæ veritatis, & innumera alia quæ in dies serpunt ex vitiata natura. Per ipsam quoque sufficientem gratiam inspiratur amor boni & odium mali, est enim divina motio & pia affectio, cui nonnisi repugnanter resistitur. Hinc conscientia stimuli & eo major animi dejectio, quò quis sentit se sua socordia cecidisse, cùm stare potuisset, (quidquid in contrarium dicat Jansenius) & experimento didicit se ad præcavenda in posterum tot mala valdè esse infirmum.

Sed infirmitas illa non est ad insipientiam; Deus enim animis sic demissis, succurrit per efficacem orandi gratiam, qua postulant non perfuntioriè, sed gemitibus inenarrabilibus, ut loquitur Apostolus. *Nemo autem, inquit Chrysostomus hom. de Moyse, aliquando ad eum flens accessit, qui non, quod postulavit, accepit: nullus ab eo beneficia dolenter postulavit, qui non impetravit, quod voluit:*

voluit: scriptum est enim, Respexit in orationem humilium, & non sprexit precem eorum. Psal. 10. Poterat quidem, ait S. August. conc. 27. in Psal. 118. nobis & non orantibus dare, sed oratione nostra nos voluit admonere, à quo accipiamus hæc beneficia. Tutiores autem vivimus, si totum Deo damus, non autem nos illi ex parte, & nobis ex parte committimus. Sed ut totum Deo detur sanandus est superbiæ tumor, quem peccatores præ cordis cæcitate & duritia sanitatem putant; unde sibi nimirum præfidentes oratione neglecta, totum virtuti & industriæ committunt; gratia autem sufficienti interiùs lucente & movente, eo quo diximus modo, periculosum morbum agnoscunt, & ad eum depellendum infirmos se sentiunt, sed in humilitate sua efficaciter adjuti clamant ad Dominum: Sub umbra alarum tuarum protege nos, alioquin præda futuri aereis potestatibus. Et hæc quidem ita dixerim, ut altius Dei consilium me fatear ignorare. S. Augustinus lib. de nat. & Grat. cap. 31.

Instabis iterum; quæ in hac sententia obscura sunt & explicatu difficilia, in alia sunt plana & lumini naturali pervia; posito enim quòd gratia omnibus præsto sit sicut generalis concursus; omnes intelligunt nos sine gratia nihil posse in ordine supernaturali, sicut nec sine concursu in ordine naturali, cum ea verò omnia posse quæ ad salutem pertinent, neque propterea ullam voluntatibus imponi necessitatem sive physicam sive moralem. Ergo omnes Scholæ in hanc sententiam convenire debent; ut quid enim ingrederentur vias obscuras, salebrosas & periculosas, cum ipsis aperitur via plana, facilis & secura?

Nego conseq. Namque prædestinatio & gratiæ dispensatio mysterium est, & rationi imperium & ab hominum sensu longè remotissimum, sicut exaltantur cæli à terra, sic exaltatæ sunt viæ meæ à viis vestris, dicit Dominus Is. 55. Hic ergo captivetur ratio in obsequium fidei, sicut in cæteris mysteriis, regatur ut ancilla, nec dominari permittatur; si enim ad iudicium Dei referantur controversiæ de gratia, & quæcumque ad fidem & mores pertinent, errorum monstra pariat necesse est. *Quid enim Philosophi, ex S. Hieronymo epist. ad Ctesiphontem, nisi Hæreticorum Patriarchæ, qui Ecclesiæ puritatem perversa maculavere doctrina? Unde errores Sabellii, Arii, Nestorii, & aliorum Hæreticorum in Ecclesia irreperunt, nisi ex Philosophia, quæ libidine disputandi & rixandi prurientem dialecticam inserit, in sententiis coactam, in argumentis operariam contentionum, omnia retractantem?* inquit Tertullianus libr. de præscript. c. 8. *Nostri institutio, pergit idem Auctor, de porticu Salomonis est, qui & ipse tradiderat Dominum in simplicitate cordis quærendum. Et c. 14. Fides in regula posita est, habes legem & salutem ex observatione legis: exercitatio autem in curiositate consistit, habens gloriam solam de peritiæ studio. Cedat curiositas fidei, cedat gloria saluti. . . nihil ultra scire, omnia scire est.* Porro vel ex ipsa objectione perspicuum est opinionem gratiæ versatilis, gratiæ mysterium non astruere, sed destruere, cum illud lumini naturali accommodet, & quodammodo subjiciat, atque de gratia idem sentiendum definiat, ac de concursu generali, in quo nullum est mysterium. Plura essent hic dicenda, nisi fusè explicata

D. Habert Theolog. Tom. II.

Rr

habere

haberentur in nostris Prolegomenis tom. 1. à pag. quarta ad decimamtertiam.

Objicies 4. illa sententia est à Scholis ableganda, qua hæretici se tueri conantur, quæque eis infervit ad occultandum virus sui erroris; atqui experientia constat Jansenium & ejus Sectatores se tueri Thomistarum, & S. Augustini doctrina: Ergo.

R. 1. Absolute negando majorem; quia ut jacet absurda est, falsa & perniciofa. 1. est absurda; nihil quippe absurdius, ut notat sanctus Augustinus, quàm docere oves sua pelle debere exui, quia lupi ea plerumque sese contegunt. Numquid Ecclesia, ut Lutherum & Calvinum efficacius protegeret, ideo S. Augustini doctrinam abjecit, quòd illi hæretici ejus auctoritate suum errorem defenderunt? 2. Est falsa; quia veritas media inter opposita incedere solet, v. g. dogma unius naturæ divinæ in tribus personis subsistentis inter Sabellianismum & Arianismum: fides unionis hypostaticæ inter errorem Apollinaris & Nestorii: doctrina peccati originalis inter impietatem Manichæorum seu Priscillianistarum, & errorem Pelagianorum: atqui quod obtinet locum medium, minùs distat ab extremis, quàm ipsa extrema ad invicem comparanda. Hinc Catholici ab Arianis traducebantur ut Sabelliani, à Nestorianis ut Apollinariistæ, à Pelagianis ut Manichæi & Priscillianistæ. 3. Denique est perniciofa; quia viam aperit novitatibus, falsis Scripturæ & Traditionis interpretationibus, discordiis, & suspicionibus malis. Accidit quippe iis, qui declinandi erroris gratia, ad extrema incautè confugiunt, quod prospicienti eminùs tres columnas recta linea dispositas, & æqualiter à se invicem distantes; quemadmodum enim iste

iste mediam apprehendit ut conjunctam remotiori; sic illi, quos à sua privata opinione alienos noverint, hos veluti hæresis patronos conspiciunt: Janseniani v.g. Molinistas ut Pelagianos, & Molinistæ intemperantiores Augustinianos & Thomistas ut Jansenianos. Hinc contentiones, dissidia & rixæ, quæ cum magna bonorum offensione pacem perturbant. Unde major objectionis propositio dimitti non potest, nisi cum aliquo temperamento. Quare.

R. 2. Distinguendo majorem. Illa sententia à Scholis est ableganda, qua hæretici se tueri conantur, nisi sit conformior Scripturæ Sacræ & Traditioni Ecclesiæ, Concedo: secus, Nego majorem. Constat autem ex dictis nostram sententiam longè conformiorem Scripturæ Sacræ & Traditioni, ac propterea communem in Scholis maximè Sorbonicis, in quibus Theologiæ Professores constanter eam hætenus tradiderunt.

CAPUT VII.

De Gratia sufficienti.

§. I.

*Utrum in statu naturæ lapsæ detur Gratia
sufficiens?*

Negarunt Lutherus lib. de servo arbit. & Calvinus lib. 2. Instit. cap. 3. ubi Theologos Parisienses sibi adversantes vocat Sorbonicos sophistas, Pelagianos, & phreneticos. Iis se adjunxit Jansenius; ut constat ex dictis cap. 3. paragr. 7. ubi ostendimus Jansenianos in suo libello de triplici sensu ejusdem esse cum magistro sententiæ;

Rr 2

quam-

quamvis enim gratiæ sufficientis nomen cum Catholicis retineant, rem tamen hoc nomine significatam rejiciunt; scilicet gratiam, quæ completas tribuit vires ad præceptum hîc & nunc implendum: quantumvis difficile, & ad resistendum tentationi in iis etiam circumstantiis, in quibus ad malum vehementer impellit. Janseniani quippe nomine gratiæ sufficientis ibidem intelligunt, vel solam gratiam habituales, vel parvam gratiam actualem, quæ totum habet effectum, ad quem datur, nempe velleitatem. Adversus autem ejusmodi errorem

R. De fide est dari in hoc statu gratiam verè ac propriè sufficientem, relative ad præsentem difficultatem, quia Summi Pontifices Innocentius X. & Alexander VII. in suis Constitutionibus, ubique receptis, hanc Jansenii propositionem, *interiori gratiæ in statu naturæ lapsæ nunquam resistitur*, declaraverunt hæreticam: Atqui propositio non est hæretica, nisi pugnet contra aliam, quæ sit de fide; Ergo credendum est fide divina interiori gratiæ in statu naturæ lapsæ aliquando resisti. Porro gratia interior, cui resistitur, est gratia sive sufficiens, qualem descripsimus.

Nec dicas, propositionem illam esse conclusionem Theologicam, nec proinde esse de fide; namque ex dictis in Prolegomenis pag. 13. conclusio Theologica, quæ elicitur per simplicem explanationem, est de fide, utpote quæ revelata sit immediatè. Atqui hæc nostra propositio non est vera illatio, sed nuda expositio propositionis ab Ecclesia definitæ: Ergo.

Probatur autem nostra responsio, i. ex Scriptura Prov. 1. *Vocavi & remissis . . . ego quoque in inte-*

interitu vestro ridebo. Ibi puniendi sunt, qui vocationi non responderunt, ergo potuerunt respondere: Atqui non potuerunt nisi per gratiam interioriorem: Ergo restiterunt gratiæ interiori, Is. 5. *Judicate inter me & vineam meam, quid . . . debui illi facere & non feci ei? an quoddam expectavi ut faceret uvas, & fecit labruscas?* Atqui sine gratia interiori non erat expectandus fructus bonus. Ait enim Christus Joan. c. 15. *Sine me nihil potestis facere.* Unde S. Augustinus concione secunda in Psalm. 101. expendens illa verba Matth. 23. *Quoties volui congregare filios tuos, quemadmodum gallina congregat pullos suos sub alas, & noluisti?* (quæ indicant gratiam interioriorem) scribit de veteri Jerusalem, *pluit desuper, & pro fructu spinæ proferantur: de nova verò: Ille pluit, illa fructum dedit.* Luc. 10. *Væ tibi Corozain, væ tibi Bethsaida, quia si in Tyro & Sydone factæ fuissent virtutes, quæ factæ sunt in vobis; olim in cilicio & cinere sedentes pæniterent.* Insignis est ille locus; in eo quippe sermo est de gratia, per quam converti debuerant Bethsaitæ, & per quam Tyrii revera fuissent conversi: Atqui illa gratia non potest esse nisi interior, cui tamen restiterunt Bethsaitæ, Act. 7. *Dura cervice & incircumcisis cordibus & auribus vos semper Spiritui sancto resistitis.* Hic locus est etiam expressus pro gratia interiori, & de ea S. Thomas illum intelligit quodlib. 2. art. 6. ubi sic loquitur: *Tenebantur homines interiori vocationi non resistere, sicut de quibusdam dicitur, Actuum 7. Vos semper Spiritui sancto resistitis.*

Probatur 2. ex Traditione, in qua Janseniani tempora, quæ præcesserunt ortum hæresis Pelagianæ, distinguunt à subsequentibus, contenduntque Patres S. Augustino antiquiores, magis ali-

quando accessisse ad hæresim Semipelagianam, quàm ad sententiam Catholicam; quia nondum ventilatæ erant quæstiones de gratia, quibus obortis ipsemet S. Augustinus nonnulla in prioribus scriptis corrigenda invenit. Calvinus similia scribit, lib. 2. Instit. cap. 2. §. 4. *Veteres, inquit, excepto uno Augustino, sic hac in re aut variant, aut vacillant, aut perplexè loquuntur, ut certi ferè nihil ex eorum scriptis referre liceat.*

Sed refelluntur vel ex uno Semipelagianorum testimonio, quod tract. de Incarnat. pag. 210. ex S. Prospero protulimus. Ii quippe fatebantur se nihil in antiquioribus invenisse, quod suæ sententiæ erroneæ faveret: Ergo Patres antiquiores non erant Semipelagiani, sed gratiæ sufficientis assertores. Imò ipsimet Semipelagiani ex eodem S. Prospero meliùs sentiebant, priusquam legissent librum de cor. & grat. in quo S. Augustinus sic gratiam efficacem astruit, ut visus sit illis hæreticis destruere liberum arbitrium, indeque sumpserint occasionem mutandæ prioris sententiæ & cudendi novi erroris.

Cùm ergo Adversarii non negent Patres S. Augustino antiquiores agnovisse gratiam sufficientem, de ipsomet S. Augustino, ac de posterioribus Conciliis & Patribus duntaxat nobis agendum superest.

S. itaque Augustinus 1. omnem excusationem peccatori adimit, ex eo quòd cùm posset peccatum vitare noluerit. *Si Satanas loqueretur, inquit in Psalm. 91. & taceret Deus, haberes unde te excusares: modò aures tuæ positæ sunt inter monentem Deum, & suggerentem diabolum; quare hic flectuntur, hinc avertuntur?* lib. 2. de natura & grat. c. 34. de peccatis, sic ait; *Ut in nostra potestate fuisse, ne accide-*

rent

rent confitemur; ita, ut sanentur, in illius magis esse misericordia, quàm in nostra potestate fateamur. Et c. 24. Rectè, inquit, fortasse quererentur (peccatores) si erroris & libidinis nullus hominum victor existeret; cum verò ubique sit præsens, qui multis modis per creaturam sibi Domino servientem adversum vocet, doceat credentem, consoletur sperantem, diligentem adhortetur, conantem adjuvet, exaudiat deprecantem: non tibi deputatur ad culpam quod invitus ignoras; sed quòd negligis quærere quod ignoras; neque illud quòd vulnerata membra non colligis, sed quòd volentem sanare contemnis. 2. Meminit duplicis vocationis, congruæ scilicet, cui obtemperatur; & minùs congruæ, cui resistitur. De posteriori scribit libro primo ad Simplicianum quæst. 2. Vocavit Esau, inquit, & non currit; sed etsi voluisset, Dei auxilio pervenisset, qui ei etiam velle, & currere præstaret vocando, nisi contempta vocatione, reprobus fieret. Et lib. de spiritu & lit. cap. 34. scribit Deum agere binis suasionibus, ut velimus & credamus, sive extrinsecùs per Evangelicas exhortationes, sive intrinsecùs, ubi, inquit, nemo habet in potestate quid ei veniat in mentem; sed consentire & dissentire propriæ voluntatis est. Et infra: In omnibus misericordia Dei prævenit nos, consentire autem vocationi Dei, vel ab ea dissentire, ut dixi, propriæ voluntatis est. Jam si ad illam profunditatem scrutandam quisquam nos coarctet, cur illi ita suadeatur, illi autem non ita suadeatur, illi autem non ita? duo sola occurrunt interim, quæ respondere mihi placeat: O altitudo divitiarum! & Nunquid iniquitas apud Deum? cui responsio ista displicet, quærat Doctiores; sed caveat, ne inveniat præsumptores. 3. Passim hortatur ad petendum, quia Deus paratus est ad exaudiendas preces nostras; Speremus omnes, (ait in Psalm. 33.)

quod pulsantibus aperturus sit; non enim hortaretur nos ut pulsaremus, si nollet pulsantibus aperire.

Lib. de natura & grat. cap. 66. *Eo quippe ipso, quo firmissimè creditur Deum justum ac bonum impossibilia nunquam præcipere; hinc admonemur, & quid agamus in facilibus, & in difficilibus quid petamus; Nam ut scribit lib. de fide contra Manichæos: Quis non clamet stultum esse dare præcepta ei, cui liberum non est, quod præcipitur, facere, & iniquum esse eum damnare, cui non fuit potestas jussa complere? Unde concludit lib. de grat. & lib. arb. c. 4. Homo gratia juvatur, ne sine causa voluntati ejus jubeatur. Ergo juxta S. Augustinum, qui non petit, ut præcepta implere possit, resistit gratiæ.*

Concilia, quæ post S. Augustinum celebrata sunt, non minùs clarè gratiam sufficientem prædicaverunt. Concilium Arelatense 3. approbat Epistolam Faustii, in qua anathematizantur, qui asserunt eos, qui periere, non accepisse quo salvi esse possent. Arausicanum secundum sic definit Can. 25. *Credimus quod accepta per baptismum gratia, omnes baptizati, Christo auxiliante & cooperante, quæ ad salutem pertinent, possint & debeant (si fideliter laborare velint) adimplere.* Valentinum IX. sæculi declarat c. 2. nec ipsos malos perire, quia boni esse non potuerunt, sed quia noluerunt. Concilium Trid. sess. 6. c. 11. sic habet: *Nemo (debet) temeraria illa, & à SS. Patribus sub anathemate prohibita voce uti, Dei præcepta homini justificato esse impossibilia; nam Deus impossibilia non jubet, sed jubendo monet, & facere quod possis, & petere quod non possis; & adjuvat ut possis.* Et infra, *Deus namque sua gratia semel justificados non deserit, nisi priùs ab eis deseratur.*

Deni-

Denique Can. 18. *Si quis dixerit Dei præcepta homini etiam justificato, & sub gratia constituto, esse ad observandum impossibilia; anathema sit.* Quæro autem à Jansenianis, utrùm sine gratia homini justificato mandata sint possibilia, vel peti possit, ut possibilia fiant? Cùm ergo justificatus negligit petere, & consequenter in peccatum labitur, gratiæ interiori resistit,

Mitto Theologos, qui ante Concilium Tridentinum floruerunt; illos enim, præsertim Parisienses, Calvinus sibi adversari agnoscit. Unum duntaxat S. Thomæ testimonium proferam, quia cùm expressè & distincto articulo de gratia sufficiente non scripserit, cùm nondum hac de re controversia mota fuisset, fortassis videretur quibusdam gratiam sufficientem non admisisse. Sic autem scribit 1. 2. q. 106. art. 2. ad secundum: *Si quis post acceptam gratiam novi Testamenti peccaverit, majori pœna, tanquam majoribus beneficiis ingratus; & auxilio sibi dato non utens, mulcabitur, nec tamen propter hoc dicitur, quòd lex nova iram operatur, quia quantum est de se, sufficiens auxilium dat ad non peccandum.*

Dices 1. S. Augustinus lib. de corr. & gratia cap. 12. in eo distinguit statum innocentiae à statu naturæ lapsæ, quòd in priori gratia esset auxilium, *sine quo*, seu sufficiens; in posteriori verò sit auxilium *quo*, seu efficax. Atqui nulla esset distinctio, si in hoc quoque statu daretur gratia sufficiens: Ergo in mente S. Augustini nulla datur in hoc statu gratia sufficiens.

Nego minorem: namque 1. etiamsi gratia sufficiens sit utrique statui communis, nihilominus status hic differt à priori per gratiam efficacem, quæ est ipsi propria; quemadmodum

licet animalitas sit communis homini & bruto; rationalitas tamen, quæ est differentia hominis essentialis, illos simpliciter & absolutè distinguit. 2. Et quidem magis ad mentem S. Augustini, ambo illi status in eo differunt, quòd homini in priori benè operatur per gratiam sufficientem ad nutum voluntatis versatilem; & si in ea perseverare voluisset, beatitudinem fuisset consecutus, quemadmodum Angeli: in hoc verò statu nullus salvatur, nec rectè operatur nisi auxilio *quo*, licet salvari & operari possit per auxilium *sine quo*, seu sufficiens, ut dicetur infra.

Inst. 1. Atqui S. Augustinus non agnoscit in hoc statu aliud auxilium, præter auxilium *quo*. Namque lib. de grat. Christi cap. 14. & lib. de prædestinatione Sanctorum cap 8. ex Christi verbis Joan. 6. *Omnis qui audit à Patre & didicit, venit ad me*, concludit alios omnes, qui non veniunt, interiùs non audire nec vocari; sed exteriùs duntaxat, scilicet per Verbi prædicationem. *Omnis, inquit, qui non venit, profectò non didicit secundùm gratiam, sed secundùm litteram.* Ergo.

Distinguo anteced. qui non venit, non didicit actu secundùm gratiam efficacem, sed secundùm litteram, quam solam audivit, Concedo; non didicit, nec potuit discere per gratiam sufficientem, quæ intus eum movit, sed frustra propter cordis duritiam, Nego antec. Capharnaitæ ergo & habitatores Corozain & Bethsaidæ, sicut & cæteri, qui Deo vocanti non responderunt, actu & de facto non audierunt, nisi secundùm litteram, propter duritiam cordis, sed intus per gratiam illustrati & excitati sunt, ineffaciter tamen; & ideo dicuntur non audivisse, sicut dicimus servum duræ cervicis

cis non audire herum præcipientem. Unde non habent, quo se excusent, ut supra docebat S. Augustinus in Psalmum 91. & lib. de natura & grat. cap. 67.

Inst. 2. Atqui ex S. Augustino, qui non venit, nec actu didicit, non potuit venire, nec audire. Ergo nulla solutio.

Antecedens probatur ex lib de gratia Christi cap. 10. ubi S. Doctor disertè docet non esse in hoc statu aliam gratiam præter eam, qua non solum suadetur, sed etiam qua actu persuadetur. *Sed nos inquit, eam gratiam volumus iste (Pelagius) aliquando fateatur, qua non solum suadetur omne quod bonum est, verum & persuadetur Quorum autem sit fides, & quibus persuadetur, ut ad eum veniant, satis ipse demonstravit, ubi ait: Nemo venit ad me, nisi Pater qui misit me, traxerit eum. Hanc debet Pelagius gratiam confiteri, si vult non solum vocari, verum etiam esse Christianus. Et c. 14. Si solam posse nostrum hac gratia juvaretur, ita diceret Dominus: Omnis qui audivit à Patre, & didicit, potest venire ad me. Non autem ita dixit, sed omnis, inquit, qui audivit à Patre, & didicit, venit ad me, Venire posse in natura ponit Pelagius, vel etiam, ut modo dicere cæpit, in gratia qualem libet eam sentiat, qua ipsa, ut dicit, possibilitas adjuvatur; venire autem jam in voluntate & opere est. Quid expressius, quid clarius? Sanctum Augustinum ab hoc statu rejecisse omnem gratiam, quæ dat posse duntaxat, solamque gratiam efficacem agnovisse, Nego subsumptum.*

Ad confirmationem respondeo verba sancti Augustini, in sensum prorsus ab ejus mente alienum detorqueri, quod ita clarè patebit librum legenti à c. 8. ad 15. ut miraturus sit quòd laudati
textus

textus opponantur contra gratiam sufficientem. Ibi quippe S. Doctor infectatur Pelagium, qui hæc tria distinguebat, *posse, velle, & esse seu operari*. *Posse* reponebat in natura, *velle & operari* in libero arbitrio. *Posse* tribuebat naturæ, quam vocabat gratiam; quia Deus sine nostris præcedentibus meritis illam creavit: *velle* verò *& operari*, liberæ hominis electioni; & ita fucum faciens Catholicis, concludebat nos ex gratia (scilicet qua homines conditi sumus) posse, velle & operari bonum. Sed cum urgerent Catholici naturam nasci cæcam, & ignorantiae tenebris obvolutam; cogeatur fateri eam indigere gratiæ adiutorio. Sed quam gratiam admitteret S. Augustinus detegit c. 8. sequentibus. *Hic itaque apparet, inquit, hanc eum gratiam confiteri, qua demonstrat & revelat Deus quid agere debeamus, non qua donat atque adjuvat ut agamus, cum ad hoc potius valeat legis agnitio, si gratiæ desit opitulatio, ut fiat mandati prævaricatio.*

Aliquando tamen hæreticus ille pressus argumentis Catholicorum, qui ex Scripturis demonstrabant Deum interius docere, admisit, juxta quosdam Theologos, gratiam interiorem; sed quæ mentem illustraret, suaderetque verum esse quod dicitur, nullatenus verò voluntatem moveret. Contra hos errores insurgit S. Augustinus, docetque 1. divini esse muneris quod bene velimus, & bene operemur. *Hanc, inquit, debet Pelagius gratiam confiteri, si vult non solum vocari, verum etiam esse Christianus.* 2. Confutat illam possibilitatem, quam Pelagius ponebat in natura, nisi consenserit eam divinitus adjuvari saltem per auxilium *sine quo*, hoc est, per gratiam sufficientem; sic enim habet cap. 47. *Si consenserit nobis, (Pelagius) etiam ipsam voluntatem &*

actionem divinitus adjuvari, & sic adjuvari, ut sine illo adiutorio nihil bene velimus & agamus nihil de adiutorio gratiæ Dei, quantum arbitror, inter nos controversiæ relinquetur. Ergo S. August. nedum gratiam sufficientem ab hoc statu rejiciat, quin illam astruit. Unde in forma,

Distinguo S. August. in hoc statu non admittit *posse* viribus naturæ, Concedo: *posse* per auxilium Dei *sine quo*, Nego. Solutio patet ex dictis.

Urgebis contra solutionem. S. Augustinus vult, ut Pelagius fateatur gratiam, qua non solum suadetur, sed etiam persuadetur. Ergo non agnovit in hoc statu aliam gratiam quam efficacem; nam gratia, qua persuadetur, est efficax, facitque velle & consentire.

Nego consequentiam. Non enim sequitur S. Augustinum non agnovisse in hoc statu gratiam sufficientem; ex eo quod possibilitati naturali (quam Pelagius vocabat gratiam, utpote gratis datam in nostra origine) hinc opponat ex Scripturis gratiam efficacem, cogatque fateri, ipsum velle & operari non surgere ex possibilitate naturali, sed ex gratiæ motione; cum Christus non dixerit, omnis qui audivit à Patre & didicit, potest venire ad me, scilicet possibilitate naturæ, de qua erat controversia; sed actu & de facto venit. Ideò autem sanctus Doctor contra Pelagianos disputans, quàm sæpissimè urget testimonia, quæ gratiam efficacem commendant; quia hac argumentandi ratione, illos faciliùs educit è latebris, in quibus sub nomine possibilitatis à Creatore gratis concessæ, delitescabant. Sed propterea non negat gratiam sufficientem, ut constat vel ex cit. c. 47. ejusdem libri de gratia Christi, ubi declarat se nullam contro-

controversiam habiturum cum Pelagio, modò fateatur ipsum posse adjuvari auxilio *sine quo*, per Jesum Christum Dominum nostrum.

Adversarii multos S. Augustini textus congerunt, in quibus docet ex peccato originali, relictam esse necessitatem peccandi, nos aliquando velle, nec posse, imò deesse nonnumquam bonam voluntatem & orationis donum, per quod obtineri possit auxilium, quo mandata Dei possibilea fiant. Sed ex ejusmodi textibus non sequitur nullam in hoc statu existere gratiam sufficientem. Ad summum inde colligi posset hanc gratiam non semper & ubique omnibus dari, quod infra examinabitur.

Dices, 2. Ex Scriptura & ex constanti doctrina Scholarum, nemo etiam justus potest elicere actum veræ virtutis sine gratia efficaci; Ergo præter gratiam efficacem nulla datur in hoc statu gratia sufficiens.

Probatur ant. 1. ex Scriptura Joan. 6. Christus Dominus alloquens Judæos repugnaces, ait v. 37. *Omne quod dat mihi Pater, ad me veniet*; Hæc de efficacia gratiæ, cui nunquam resistitur; de ejus verò necessitate sic pergit v. 43. & 44. *Nolite murmurare invicem, nemo potest venire ad me, nisi Pater meus traxerit eum*. Ergo præter hanc gratiam nulla est alia sufficiens, cum nulla sit, qua possit quis venire ad Christum.

Probatur 2. ex constanti Scholarum Traditione.

Gregorius Ariminensis insignis Theologus Parisiensis, Præpositus generalis Augustinianorum & maximè addictus doctrinæ S. Augustini, P. Deschamps teste in suo Antijanseniano lib. 3. disp. 4. cap. 18. sic scribebat 14. ineunte sæculo in lib. 2. sent. dist. 28. q. 2. art. 2. *Satis patet, quod etiam veri*
justi

justi & in potentia existentes, ut tentationibus fortiter resistant & in peccatum non cadant, indigeant adhuc speciali auxilio Dei, & sine illo NON POSSENT resistere quin caderent in peccatum.

Cardinalis Cajetanus ex Ordine Dominicanorum scribebat etiam ante Concilium Trid. in 1. 2. S. Thom. q. 109. art. 10. *Homo, (justificatus) est potens elicere operationem bonam, & resistere impulsionebus tentationum, & continuare in hoc quod est perseverare, sed quia gratia non potest exercere hos actus simpliciter, quando oportet, ubi oportet, ideo dicitur quod ex sola gratia sine speciali auxilio NON POTEST in hac simpliciter.*

Petrus Soto Dominicanus & Theologus Pii IV. in Concilio Trid. sic habet c. 2. operis ad Ruardum Tapperum, *detur quod possumus facere bonum sive per naturam, sive per gratiam aut dona alia, sed NUNQUAM POSSUMUS sine alio auxilio, nisi scilicet adsit gratia, qua id facimus.* Eandem doctrinam amplexi sunt Patres Tridentini, ut perspicuè demonstrabitur Parag. seq.

Post Concilium Trid. Consultores in Congregationibus de *Auxiliis*, inter quos sedebant duo insignes Theologi Parisienses; le Bossu & de Creil, post discussam Molinæ doctrinam sequentes Canones adornarunt jussu Pauli V. 1. *Qui dixerit gratiam qua Deus operatur in nobis velle & perficere, non sic movere voluntatem nostram; ut ex virtute motionis Dei per eam operantis sit infallibile quod actu consentiamus & operemur: errat.* 2. *Qui dixerit gratiam istam aut non esse ita efficacem, ut præveniendo voluntatem nostram, ipsam verā & reali efficientia præmoveat & faciat velle, & operari, aut sine ea POSSE aliquam actu velle & operari: errat.*

Franciscus Macedo ex Scotistarum Schola olim Consultor sancti officii & celebris Theologiæ Professor

fessor tum Romæ, tum Patavii, *Cum gratia inefficaci*, inquit Thesi 54. *Et difficultate quadam morali stat impotentia moralis ad operandum, unde dicitur voluntas non posse operari ex S. Augustino: cujus plures textus profert.*

Cardinalis Laurea ex eadem Schola opusculo 3. de gratia actuali num. 103. *Apostolus, inquit, confitetur se imparem ac IMPOTENTEM ad resistendum legi membrorum, id est, concupiscentiis à quibus agebatur . . . non dicit se liberari ab hac difficultate per suam voluntatem utentem illis auxiliis illuminationis Et inspirationis, sed à gratia Dei per Christum, id est, à gratia efficaci superante difficultatem.* Cardinalis Noris in sua Apologia cum laude meminit hujusce sententiæ Cardinalis Laurea.

M. Grandin Professor Regius in Scholis Sorbonicis per 50. annos & Sacræ Facultatis Syndicus, tandem Decanus Tract. de Angelis q. 64. art. 2. docet Angelos perduelles habuisse, post lapsum tempus pœnitendi, sed eos non potuisse pœnitere quia defuit ipsis gratia efficax: *Angeli, inquit, illa duratione qua fuerunt in via, pœnitere potuerunt: tam enim erant liberi, Et ex parte Dei non deerat gratia sufficiens . . . Ubi Patres dicunt impossibile Dæmones pœnitere, intellige de Dæmonibus damnatis, vel impossibile idem ac difficile, vel id intellige impossibile, quia gratiam efficacem non habuerunt.* Nec secum pugnat ille Theologus tract. de Gratia pag. 80. ubi sic habet, *Circa graves tentationes non est impotentia moralis supposita gratiæ, cum eo loci loquatur de gratia in genere, sub qua continetur gratia efficax.* Sic contraria non docet qui primò generatim statuit omne peccatum deleri per pœnitentiam, ac postea definiit pœnitentiam imperfectam solam non sufficere ad remissionem peccatorum.

Guillel-

Guillelmus de Lestocq etiam Professor Regius in Scholis Sorbonicis per 49. ann. tract. de Grat. quæst. 4. de Divis. Gratiæ art. 2. sic habet, *Gratia sufficiens tribuit homini posse operari; sed ita ut potentia illa dicat dependentiam ab auxilio efficaci, sine quo non est POSSIBILE reduci ad actum.*

Reginaldus Dominicanus & Professor Regius in Academiâ Tolosana an. 1671. in opere Typis mandato Antuerpiæ an. 1676. in appendice de Mente Concilii Trid. 2. part. cap. 12: pag. 823. *Noverint ergo, inquit, nullum actum veræ virtutis, multò minus meritorium dici POSSE ab homine quantumcunque justo sine auxilio gratiæ per se ipsam efficaci, atque adeo nullam levem tentationem vinci POSSE actu veræ virtutis, sive meritorio, sine adjutorio ejusdem gratiæ.*

Ergo recens est opinio à Molina & ejus Discipulis excogitata, repugnante Scriptura & Traditione, præter gratiam efficacem dari in hoc statu aliam gratiam verè sufficientem, cum ex laudatis textibus nullus sine gratia efficaci possit supernaturaliter operari.

Nego antecedens:

Ad ea autem quæ afferuntur & alia similia quæ afferri possunt in eius confirmationem, jam olim S. Anselmus, qui floruit 11. & 12. sæculo respondit cum distinctione, nemo etiam justus actum veræ virtutis sine gratia efficaci elicere potest moraliter loquendo, C. simpliciter & absolute, N. Verba sancti Doctoris sunt Dial. de liber. arbitr. cap. 6. *Quod nonnisi difficile facere debemus, dicimus nos hoc facere non posse.* Et cap. 6. *Fam dubitare hanc impotentiam servandi rectitudinem non debet (quam dicis in nostra voluntate esse, cum tentationibus consentimus) non esse ex impossibilitate, sed ex difficultate;*

frequenti enim usu discimus nos non posse aliquid, non quia nobis est impossibile, sed quia sine difficultate non possumus. Hanc explicationem deinceps amplexi sunt communiter Theologi præsertim ex Societate Jesu, quos in prima Editione hujus operis secuti sumus, nec immeritò; eam quippe suggerunt ipsimet laudati textus Gregorii Ariminensis, Cajetani & Petri Soto, qui utrumque asserunt justos posse & non posse: posse quidem simpliciter & absolute, non posse autem moraliter & improprie propter difficultatem, ad quam superandam vires, quas habent, ex negligentia non exerunt sine speciali gratia, ut docet Sanctus Augustinus lib. 2. de pecc. mer. c. 3. sæpius citato, unde impotentia, quam prætexunt, profus est voluntaria.

Eandem explicationem suppeditant Patres Tridentini, qui sess. 6. can. 22. ita definiunt justificatum perseverare non posse in accepta justitia sine speciali auxilio quod pluribus justis non conceditur, ut nihilominus doceant c. 11. & 12. præcepta non esse justis impossibilia, modo petant quod non possunt, & cum timore ac tremore salutem suam operantur in vigiliis, eleemosynis, in orationibus, in jejuniis, &c. Quibus autem ista ad perseverandum necessaria videntur difficiliora, quàm ut ad ea observanda animum studiumque conferant, suam ignaviam impossibilitatis nomine velare solent, sed Christo ipso judice excusationem non habent Joan. 25. v. 22. At, inquires, Pater eos non traxerat; ait autem Dominus, *nemo potest venire ad me, nisi pater qui misit me, traxerit eum.* Quod vero peccatum est hominis non facientis quod non potest facere? quærit Sanctus Augustinus tract. 53. in Joan. citò respondet Sanctus Doctor, *quod illi non poterant credere,*

dere, culpa est voluntatis humanæ, quatenus scilicet homo superbus & de viribus liberi arbitrii præsumens, in orationibus non vigilat, ut Deus qui jam dedit posse per gratiam sufficientem, det velle & operari, ac in bono perseverare ac per gratiam.

§. II.

Utrum gratia sufficiens aliquando habeat effectum?

R. Nulla gratia sufficiens in hoc statu habet effectum sine efficaci.

Probatur 1. tum consensu Theologorum mox laudatorum, qui à quadringentis annis constanter docent gratiam sufficientem sine efficaci ne quidem posse obtinere effectum; tum iisdem momentis, quibus supra demonstravimus efficaciam gratiæ non esse repetendam ex consensu voluntatis. Namque in opposita sententia. 1. Deus per gratiam sufficientem daret posse dumtaxat, voluntas verò operaretur & velle, & perficere, quod est manifeste contra Apostolum. 2. Non esset solius Dei misericordis, sed etiam volentis & currentis hominis: posito enim quòd duo homines æquali gratia sufficiente moveantur ad orandum, & unus oret, alter verò non: qui oravit, dicere poterit ideo gratias efficaces, ipsumque perseverantiæ donum præ alio se fuisse consecutum; quia voluit & oravit, ac proinde non solius Dei misericordis fuisse, sed etiam ipsiusmet volentis, quod refellit Sanctus Augustinus scribens lib. 1. ad Simplicianum q. 2. Deum non solum dare posse velle & currere, sed ipsum velle & currere, ac proinde Dei solius esse misericordis. Si, inquit, *propterea solum dictum est, non volentis, neque currentis, sed misericordis est Dei, Rom. 9.*

quia voluntas hominis sola non sufficit, ut pie recteque vivamus, nisi misericordia Dei adjuvemur: potest & hoc modo dici, igitur non est miserentis, sed volentis est hominis, quia misericordia Dei sola non sufficit, nisi consensus nostræ voluntatis addatur. Quàm autem absurdè illud dicatur, Sanctus Doctor declarat his verbis: Manifestum est frustra nos velle, nisi Deus misereatur: illud autem nescio quomodo dicatur frustra Deum misereri, nisi nos velimus. Unde concludit, non igitur ideo dictum esse putandum, non volentis neque currentis, sed Dei miserentis: quia sine ejus adjutorio non possumus adipisci quod volumus; sed ideo non possumus, quia sine ejus vocatione non volumus. Quibus verbis S. August. clarè docet actu velle & orare non esse effectum auxilii, sine quo non possumus velle & orare, sed auxilii, quo volumus & oramus, & lib. de cor. & grat. cap. 12. tantum Spiritu Sancto accenditur voluntas eorum, ut ideo possint, quia sic volunt; ideo sic velint, quia Deus operatur ut velint. Nam si in tanta infirmitate vitæ hujus (in qua tamen infirmitate propter elationem reprimendam perfici virtutem oportebat) ipsis relinqueretur voluntas sua inter tot & tantas tentationes infirmitate sua succumberet, quia deficientes infirmitate, nec vellent, vel non ita vellent infirmitate voluntatis, ut possent. Quid expressius pro nostra responsione? 3. Si actualis oratio aliquando tribueretur gratiæ sufficienti, qui sic ad orandum se determinasset, per consensum propriæ voluntatis se discerneret ab eo, qui gratiæ orationis non consensisset, non solum in eo quod orasset, sed etiam in sequentibus operibus, quæ essent fructus orationis. Quàm autem aliena sint ista à Doctrina sancti Augustini liquet in c. 6. lib. de dono persever. ubi laudans quod dixerat S. Cyprianus

nus in expositione orationis Dominicæ, totum Deo esse tribuendum, sic ait: *Tutiores igitur si totum Deo damus. Non autem nos illi ex parte, & nobis ex parte committimus: illi quidem posse quia inest nobis per ejus gratiam; nobis verò velle quia exurgit ex libero arbitrio.*

Confirmatur ex eodem S. Augustino, qui citata q. 2. lib. 1. ad Simplicianum de oratione speciatim sic scribit: *Nonne aliquando ipsa oratio nostra sic tepida est, vel potius frigida; ut pene nulla, imò & interdum nulla sit, ut neque hoc in nobis cum dolore advertamus: quia si vel hoc dolemus, jam oramus? Quid igitur aliud ostenditur nobis, nisi quia & petere, & quærere, & pulsare concedit, qui ut faciamus, jubet. Et epist. 194. aliàs 105. ad illa verba: Spiritus postulat pro nobis gemitibus inenarrabilibus, sic habet: ita dictum est, interpellat, quia interpellare nos facit, nobisque interpellandi inspirat affectum neque enim & hoc ita sit de nobis tanquam nihil facientibus nobis. Adjutorium igitur Spiritus Sancti sic expressum est, ut ipse facere diceretur, quod ut facitamus, facit. Ergo in mente Sancti Augustini, oratio actualis non minus est effectus gratiæ efficacis, quàm opus supernaturale.*

Quid ad hæc repones? Lutherana, inquis, est isthæc doctrina non minus pugnans adversus notissima Philosophiæ principia, quàm adversus inconcussa fidei dogmata. Si enim Deus non solum dat posse, sed & ipsum velle, atque ideo totum ei sit dandum, manifestè sequitur quod velle, seu motus voluntatis non sit actus vitalis multò minus liber, quo nihil absurdius tum apud Philosophos, tum apud Apostolum, qui 1. Cor. 15

gratiam scilicet & voluntatem; nonego, inquit, *sed Gratia Dei mecum.*

Sed palpas in luce meridiana: quid enim clarius, neque enim, & hoc ita fit de nobis, tanquam nihil facientibus nobis. Sed quia agit Omnipotens in cordibus hominum etiam motum voluntatis eorum, ut loquitur idem S. Doctor l. de grat. & l. arb. cap. 21. ipse facere dicitur quod ut faciamus facit. Sic Matth. 10. *Non enim vos estis qui loquimini, sed Spiritus Patris vestri, qui loquitur in vobis.* Sic Gal. 4. *misit Deus Spiritum filii sui in corda vestra clamantem, Abba Pater.* Sic autem expressum est adjutorium Spiritus Sancti, quia non solum dat facultatem loquendi, postulandi, & clamandi cum gemitibus inenarrabilibus, quæ omnia sunt actus vitales, & liberi, cum motioni divinæ dissentire possimus ex lib. de spir. & lit. c. 33. sed insuper dat usum hujusce facultatis, motum voluntatis; nam si in tanta infirmitate vitæ hujus, ipsi relinqueretur voluntas sua, ut in adjutorio Dei manerent si vellent, nec Deus in eis operaretur, ut vellent . . . infirmitate sua voluntas ipsa succumberet, lib. de cor. & gr. cap. 12.

Totum ergo Deo detur, etiam ipsa justî merita, quia, inquit S. Doctor cit. Epist 194. *cum Deus coronat merita nostra, nihil aliud coronat quam munera sua . . . nec ideo, quia non meritis datur (vita æterna) sed quia data sunt & ipsa merita, quibus datur.* Voluntas quidem activè & liberè ad opus meritorium concurrat, sed propterea dici non debuit causa partialis, cum hujusmodi elocutio jam dudum explosa sit in 35. cong. de Auxiliis; causa quippe partialis adjuvat alteram, ejusque efficaciam propriam adjungit. Quis autem Catholicus hoc dixerit de voluntate concurrente cum gratia?

Certè

Certè doctrina hæc prorsus aliena est à mente S. Augustini, ut agnovit Cardinalis Toletus Molinæ cœtaneus & ejusdem cum ipso societatis annot. 4. in cap. 11. ep. ad Rom. ubi sic habet: *Augustinus existimat totum esse gratiæ; quia Deus facit hominem cooperari, & determinat arbitrium hominis, quia dat ut velle possit, & facit velle.* Ergo juxta doctrinam Sancti Augustini usus gratiæ sufficientis est gratia specialis, sine qua gratia sufficiens non obtinet effectum.

Probatur 2. ex Synodo Tridentina, quæ sess. 6. c. 13. docet omnibus justis concessam esse gratiam sufficientem ad perseverandum, *in Dei auxilio firmissimam spem collocare & reponere omnes debent.* Et can. 18. *Si quis dixerit Dei præcepta homini etiam justificato, & sub gratia constituto, esse ad observandum impossibilia; anathema sit:* atqui hujusmodi gratia sufficiens nunquam obtinet effectum, nempe perseverantiam, in justis non prædestinatis, utpotè qui careant efficaci perseverantiæ dono electorum proprio; sic enim definit Sancta Synodus can. 22. *Si quis dixerit justificatum, vel sine speciali auxilio Dei in accepta justitia perseverare posse . . . anathema sit.* Ergo datur gratia verè & propriè sufficiens, quæ nunquam obtinet effectum.

Respondent nonnulli è Modernis donum perseverantiæ æquè respectu adultorum ac parvulorum, in eo solùm esse, ut infallibiliter & insuperabiliter conjungatur mors cum statu gratiæ, adè ut justis minimè sit necessarium ad piè, rectèque vivendum, sed solùm ad feliciter moriendum: atque ita absque difficultate conciliare se existimant laudatum canonem 18. cum canone 22. priori enim canone, inquiunt, agitur dumtaxat de gra-

tia, qua Deus justos omnes etiam non prædestinatos adjuvat; illisqueabilia reddit man data: in posteriori verò sermo est solummodò de speciali Dei protectione, sine qua justus (nisi prædestinatus fuerit) diem extremum cum gratia sanctificante claudere nequaquam potest; quod enim homo seriùs aut ocyus moriatur, non pendet ex ejus libero arbitrio, sed ex mera Dei voluntate & potestate: idèò autem justus, qui non est prædestinatus, obire non potest in statu gratiæ sanctificantis, quia ea est conditio in statu naturæ corruptæ à Deo posita, ut nullus hinc exeat cum gratia sanctificante absque speciali perseverantiæ dono. Suam autem interpretationem confirmare nituntur tum ex cap. 4. lib. Sap. ubi de justo dicitur, *raptus est, ne malitia mutaret intellectum ejus*, in quem locum sic scribit Sanctus Augustinus lib. de præd. Sanctor. c. 14. *dictum est secundum pericula vitæ hujus, non secundum præscientiam Dei, qui hoc præscivit quod futurum erat, non quod futurum non erat, id est, quod ei mortem immaturam fuerat largiturus, ut tentationem subtraheretur incerto: tum ex lib. de perseverantiæ dono c. 6. ubi habet S. Doctor, Multi eam (perseverantiam) possunt habere, nullus amittere . . . hoc ergo Dei donum suppliciter emereri potest: sed, cum datum fuerit, amitti contumaciter non potest.* Atqui Concilium Tridentinum sess. 6. can. 23. definiit gratiam ad bene operandum concessam quantumcunque sit efficax, amitti posse; quia homo per liberum arbitrium dissentire potest. Ergo cum donum perseverantiæ contumaciter amitti non possit, necessariò sequitur illud præcisè consistere in conjunctione gratiæ sanctificantis cum morte, quam prædestinatus impedire nequit, cum non pendeat ab ejus voluntate.

Con-

Contra si donum perseverantiæ nihil confert ad rectè vivendum, sed solum ad beatè moriendum: Ergo justus non prædestinatus, proindeque speciali illo dono destitutus, benè operari, & bonis operibus in gratia crescere potest: salvari autem, & mercedem bonorum operum accipere non potest, cum tamen gratia ad id detur, & bona justorum opera eò tendant: Ergo donum perseverantiæ non est auxilium, quo infirmi adversus tentationes dimicent, sed conditio justis non prædestinatis onerosa & exitialis, cum ea sublata, plures ex iis sicut ex Angelis salvarentur; fingi enim alia ratio non potest, cur illi omnes sine gratia hinc exeant, etiamsi diu in gratia vixerint, quàm illa fatalis conditio, quæ deest ex parte Dei. Ergo Deus non secùs ac Principes terræ impios à malo cohibere non potest, nisi mortem ipsis inferat. *Quis porro tam pie desipiat*, inquit S. Augustinus, Enchir. c. 98. *ut dicat Deum malas hominum voluntates, quas voluerit, quando voluerit, ubi voluerit in bonum non posse convertere?* Impiam hujusmodi cogitationem longè à mente fidelium esse debere jam scripserat c. 95. in quo sic habet, *hoc nisi credamus* (in manu Dei omnium esse voluntates) *periclitatur ipsum nostræ confessionis initium, qua nos in Deum Patrem Omnipotentem credere confitemur; neque enim ob aliud veraciter vocatur omnipotens, nisi quoniam quidquid vult potest, nec voluntate cujuspiam creaturæ, voluntatis Omnipotentis impeditur effectus.* Et c. 14. de præd. Sanctior. de justo qui raptus est, ne malitia mutaret intellectum ejus, sic ait: *Qui vitæ brevitate rapuit justum, ne malitia mutaret intellectum ejus, ipse in quantacumque vitæ longitudine custodit justum, ne malitia mutet intellectum ejus.* Tot absurda, quæ sunt consectaria novæ

opinionis, quam refellimus, detestantur genuini Molinæ defensores, *sur l' article de l' efficacite de la grace*, inquit P. Daniel Tract. de efficacia gratiæ pag. 160 *il y a deux veritez de foi, desquelles on ne peut s' ecarter sans heresie. La premiere, que Dieu est le maitre absolu de nos cœurs, qu' il n' y en a point de si endurcis qui lui resistent, quand sa misericorde veut les amolir L' autre verité de foy est, que quelqu' efficace, quelque forte que soit une grace, elle ne detruit pas la liberté de l' hommes; elle ne lui impose point une necessité inevitable de lui obeir, & qu' il peut toujours y resister.* Enimverò Apostoli, quia accepto Spiritu sancto, efficaciter in gratia confirmati fuerunt, liberum retinuerunt arbitrium, alioquin absque merito adversus tentationes dimicassent: beata quoque Virgo cum speciali suo privilegio, quo immunis fuit ab omni peccato etiam levissimo, physicè poterat peccare, inquebat suprà M. Grandin; sed quia potentia illa physica conjuncta erat cum impotentia morali, nunquam exiit in actum; quæ enim sic moraliter impossibilia sunt, nunquam existunt. Consule pag. 514. & seq.

Donum ergo perseverantiæ in adultis aliquo sensu amitti non potest, & alio amitti potest; in eo quippè duo includuntur, scilicet conjunctio gratiæ sanctificantis cum morte, & series gratiarum efficacium, quibus adultus prædestinatus præparatur, & infallibiliter perducitur ad beatum illum finem. Porro si spectetur donum perseverantiæ ut id quo actu conjungitur mors cum gratia, certum est illud contumaciter amitti non posse, quia justus per mortem constituitur in termino, in quo nec proficere, nec deficere potest, juxta illud Eccl. 21. v. 3. *Si ceciderit lignum ad Austrum, aut*
ad

ad Aqualonem, in quocumque loco ceciderit, ibi erit, id est, quo in statu mors hominem deprehenderit, in eo æternum erit. Si autem spectetur donum perseverantiæ in gratiis præviis, quibus peccator efficaciter adducitur ad pœnitentiam, & à peccato jam liberatus, in bono usque in finem infallibiliter custoditur, ne malitia mutet intellectum ejus, de fide speciale illud donum posse amitti; ipse enim Apostolus, licet in gratia confirmatus, sibi sicut cæteris dictum credens, apprehendite disciplinam, ne quando irascatur Dominus, & pereatis de via justa, ait, I. Cor. 9. v. 27. Castigo corpus meum & in servitutem redigo, ne fortè, cum aliis prædicaverim, ipse reprobus efficiar. Ergo gratis & absque Scripturarum & Sanctorum Patrum testimonio hodie nobis obtruditur speciale donum perseverantiæ in adultis id unum efficere, ut ex hac vita cum gratia demigrent, quasi timendum non sit malè vivere, modò feliciter mori contingat, & hæc sit tota illa perseverantia, quam speramus, & instanter à Deo petimus. Sed parum est ostendisse hujusmodi opinionem nulla ratione, nullave auctoritate esse suffultam; cum enim perniciosa videatur, operæpretium est insuper demonstrare eam pugnare adversus Scripturam, traditionem & communem Catholicorum sensum.

Ac primo quidem adversus Scripturam pugnat; namque Matth. 24. v. 24. fieri non potest, ut electi in errorem inducantur, *surgent pseudo-Christi, & pseudo-Propbetæ, ait Christus, & dabunt signa magna & prodigia, ita ut in errorem inducantur, si fieri potest, etiam electi.* Hic magnificè commendatur doni perseverantiæ efficacia, non eo solum, quod electi infallibiliter cum gratia sanctificante decedant, sed
quod

quòd adversùs gravissimas tentationes immobiliter ac insuperabiliter stent inconcussi in iisdem temporis circumstantiis, in quibus non prædestinati seducuntur & corruunt. Matth. 6. Christus hanc nobis orationis formulam dictavit; *Et ne nos inducas in tentationem, sed libera nos à malo*: Atqui ex sancto Augustino lib. de dono perseverant. cap. 5. 6. & 7. Sancti nihil aliud, quàm ut in sanctitate perseverent, & nullis tentationibus succumbant, precantur; Ergo perseverantiæ donum habent electi, ut non solum insuperabiliter cum gratia hinc exeant, sed etiam ut tentationibus invictè resistent.

Secundò hujusmodi opinio adversatur Conciliorum definitionibus contrà Pelagianos & Semi-pelagianos, in quibus necessitas doni perseverantiæ repetitur ex continua necessitate divini auxilii ad vincendas tentationes, & insistendum bonis operibus: *ex istorum sacrilega disputatione*, inquit Concilium Carthaginense Epistola ad Innocentium I. *necessariò sequitur, ut nec orare debeamus, ne deficiat fides nostra, quod pro Apostolo Petro se rogasse ipse Christus testatus est*. Et Concilium Arausicanum II. can. 1. *Adjutorium Dei*, inquit, *in renatis ac sanctis semper est implorandum, ut ad finem bonum pervenire, vel in bono possint opere perdurare*. Hic non dicitur semper orandum præcisè, ut bene moriamur, sed ut in bonis operibus perseveremus usque in finem, neve aliquando deficiat fides nostra.

Tertio. S. Augustinus passim, maximè verò lib. de correptione & gratia refert ad speciale donum perseverantiæ non solum quòd electi cum gratia moriantur, sed etiam cum gratia invincibiliter operentur; namque cap. 12. n. 38. de electis in statu naturæ corruptæ sic habet: *Tantum Spiritu sancto*

sancto accenditur voluntas eorum, ut ideo possint, quia sic volunt: ideo sic velint, quia Deus operatur ut velint; nam si in tanta infirmitate vitæ hujus (in qua tamen infirmitate, propter elationem reprimendam perfici virtutem oportebat) ipsis relinqueretur voluntas sua, ut in adiutorio Dei, sine quo perseverare non possent, manerent si vellent, nec Deus in eis operaretur, ut vellent; inter tot & tantas tentationes infirmitate sua voluntas ipsa succumberet, & ided perseverare non possent, quia deficientes infirmitate nec vellent, aut non ita vellent infirmitate voluntatis, ut possent. Subventum est igitur infirmitati voluntatis humanæ, ut divina gratia indeclinabiliter & insuperabiliter ageretur, & ided, quamvis infirma, non tamen deficeret, neque adversitate aliqua vinceretur. Istam efficacem gratiam, quæ conceditur homini lapsio, opponit S. Doctor gratiæ Adamo innocenti concessæ, de quo sic præmisit c. III. n. 32. ut in bono permaneret, egebat adiutorio gratiæ, sive quo id omnino non posset & acceperat posse si vellet, sed non habuit velle quod posset; nam si habuisset, perseverasset: quod ut nollet, de libero descendit arbitrio, quod tum ita liberum erat, ut & bene velle posset & male: atqui luce clarius est S. Augustinum non loqui de gratia, quæ Adami peregrinationem terminaret (cùm certum sit ac indubitatum apud Catholicos Adamum post lapsum pœnitentem, extremum diem clausisse cum gratia sanctificante,) sed de gratia, in qua non perseveravit, & per quam bene operari, & à malo abstinere posset, si vellet: nunc autem datur potentior, quamvis minus lætior, qua regenerati in Christo non solum velle & operari possunt, sicut Adamus, sed etiam invinctissimè volunt & operantur: Ergo efficacia posterioris hujusce gratiæ non solum mortem cum gratia conjungit, sed etiam voluntatem
firmat

firmat in bonis operibus, & invictam servat in periculis & tantationibus.

Edò spectare donum perseverantiæ docet etiam S. Thom. 1. 2. q. 109. art. 10. his verbis: *Homo in gratia constitutus non quidem indiget alia aliqua habituali gratia, sed divino auxilio ipsum dirigente & protegente contra tentationum impulsus: & idè postquam aliquis est iustificatus per gratiam, necesse habet à Deo petere prædictum perseverantiæ donum; ut scilicet custodiat in malo usque ad finem vitæ; multis enim datur gratia, quibus non datur perseverare in gratia.* Ergo donum perseverantiæ in mente S. Thomæ non in eo præcisè consistit, ut quis in extremis positus gratiam sanctificantem accipiat, & cum ea decedat; sed datur ut semel iustificatus, in bono opere sit constans, & adversus tentationes usque in finem dimicans victor existat.

Quartò, denique præjudicata est omnium opinio, eum, qui vitam in peccatis usque ad ultimam ægritudinem protrahit, in peccatis decessurum, solamque viam tutò ad optatum finem perducere, quam Scripturæ demonstrant, Matth. 26. v. 41. *Vigilate & orate, ut non intretis in tentationem.* Luc. 21. v. 36. *Vigilate itaque omni tempore orantes, ut digni habeamini . . . stare ante Filium hominis.* 2. Petr. c. 1. v. 10. *Magis satagite, ut per bona opera certam vestram vocationem faciatis; hæc enim facientes non peccabitis aliquando.* Et ratio est, quia, ut docet S. Thom. 1. 2. q. 113. art. 10. gratia non secus ac natura secundum consuetum operandi modum ab imperfectis ad perfectiora progreditur, adeo ut sicut paulatim ad sanitatem venit corporis curatio, alioquin subitanea pro miraculo haberetur, ut in socru Petri Matth. 8. ita sit *iste communis & consuetus*

tus cursus justificationis, inquit Angelicus Doctor, ut Deo movente interiùs animam, homo convertatur ad Deum primò quidem conversione imperfecta & postmodum ad perfectum deveniat . . . quandoque verò tam vehementer Deus animam movet, ut statim quandam perfectionem justitiæ assequatur, sicut fuit in conversione Pauli . . . & ideo conversio Pauli tanquam miraculosa in Ecclesia commemoratur celebriter. Unde, cum miracula à Deo expectare non debeat, qui à constituto ordine gratiæ recedit, S. August. serm. 363. aliàs hom. 41. ex l. hom. 50. sic habet; agens pœnitentiam ad ultimum, & reconciliatus (per Sacerdotis ministerium) si securus hinc exit, ego non sum securus . . . pœnitentiam dare possum, securitatem dare non possum. Loquitur ibi S. Doctor de peccatore, qui in infirmitate Sacerdotem accersit, pœnitentiam petit, Sacramentis munitur; dubitat tamen S. August. an cum dono perseverantiæ ad Dominum proficiscatur. Quare? propter malè actam vitam & defectum perseverantiæ in bonis operibus; de eo enim, qui post pœnitentiam bene vixit, certò pronuntiat non quidem certitudine absoluta & physica, sed morali; quandocunque defunctus fuerit ad Deum vadit, ad requiem vadit, regno Dei non privabitur. Ergo donum perseverantiæ non in eo solum est, ut adulti infallibiliter decedant in statu gratiæ, sed etiam ut invictissimè adversus tentationes dimicent, & in bonis operibus ad mortem usque perseverent. Ista paulò lautius tractari debuerunt, ne quis inani opinione deceptus, pœnitentiam ad ultimam ægritudinem differat, & perseverantiæ donum post dissolutam ac depravatam vitam sibi in morte non defuturum confidat, quemadmodum nec defuit latroni juxta Christum in cruce pendenti & aliis quibusdam; ejusmodi quippe repentina mutatio

tatio miraculi speciem præsefert, inquit S. Thomas, quæ ita à desperatione revocat, ut spem complere non possit, dicente Domino Prov. 1. *Quia vocavi, & remissis.... Ego quoque in interitu vestro ridebo & subsannabo.* Consule quæ in hanc rem dicta sunt pag. 411. & seq.

Porro ex hujusmodi dissertatione certò colligitur iustos non prædestinatos, licèt habeant gratiam verè sufficientem ad vincendas tentationes & perseverandum usque in finem, ut constat tum ex Concil. Trident. supra laudato, tum ex Bullis Summorum Pontificum Innocentii X. & Alexandrii VII. in gratia tamen non fore perseveraturos: Ergo in statu naturæ corruptæ datur gratia verè ac propriè sufficiens, quæ nunquam obtinet effectum, ad quem datur.

Probatur 2. ex constanti doctrina omnium Theologorum, qui efficaciam gratiæ non repetunt ex consensu voluntatis; nam & ipsi Congruistæ, si unum aut alterum exceperis, constanter docent gratiam sufficientem in hoc statu nunquam habere effectum sine efficaci.

Chorum ducet Sancti Thomæ Schola. Cùm autem laudo celebrem illam Scholam, innumeros in testimonium appello Theologos, quot enim Religiosi Ordines, quot Academiæ propugnant ejus dogmata? Porro ex innumeris illis Theologis vel unus proferatur, qui non concinat cum P. P. Mafsouliero & Gonéro. Illos præ cæteris appello, utpotè celeberrimos, cùm eorum scripta omnium manibus terantur, & publicè docuerint, & quidem cum plausu; illæ Romæ, ubi in magna existimatione fuit apud tres Summos Pontifices ob insignem eruditionem cum singulari pietate conjunctam; iste

iste in Galliis, testimonium consecutus ab Illustrissimo Carnotensium Episcopo in Mandato anni 1708. doctrinam de gratia tradidisse orthodoxam.

P. autem Massoulierus in opere, cui titulus est, *S. Thom. sui interpres*, sic scribit, *nihil vetat, dici voluntatem sine efficaci auxilio posse & non posse actum producere. Potest sine auxilio efficaci potentia veluti solitaria: non potest autem potentia cum actu conjuncta. Quin imò ita videtur necessario affirmandum; cum expressè à Concilio Tridentino utrumque eodem loco (ubi de implendis præceptis agitur) conjunctum fuerit & posse & non posse, sess. 6. c. 11.* Patris autem Massoulieri meminit cum laude Episcopus Carnotensis in suo Mandato pag. 46. his verbis, *Il s'est expliqué sur la grace suffisante nettement, suivant les principes que saint Thomas l' Ange de l' Ecole en a posé* CONFORMEMENT A LA TRADITION.

P. Gonetus disputatione 1. de necessitate gratiæ a. 6. §. 2. *Minima gratia, inquit, sufficit, (ad resistendum cuilibet motui concupiscentiæ) quantum est de se, & ex natura sua, non verò quatenus est in tali subjecto, cum pugna appetitus, & cum debilitate rationis propter ignorantiam.* Hunc autem Scriptorem laudatus Episcopus Carnotensis pag. 34. vocat Theologum commendabilem propter ejus zelum adversus Jansenii Defensores.

Et hæc de Schola S. Thomæ sufficiant. De aliis verò Scholis sic testatur Eminentissimus Cardinalis de Bissy, Episcopus Meldensis in Institutione ad suum Clerum pag. 175. *Il y a d'autres Theologiens Catholiques que les Thomistes, inquit, qui croient que la grace efficace determine par elle-même la volonté au bien, mais ils font consister son efficacité dans un plaisir victorieux de la cupidité.*

Selon ces memes Theologiens les graces des deux états sont différentes; celles de l'état d'innocence ne donnoient

que le pouvoir de faire le bien ; au lieu que dans l'état présent il y a deux sortes de graces interieures : les unes donnent le pouvoir de faire de bonnes œuvres ; & les autres les font pratiquer. Les memes Theologiens ajoutent que sans ces dernieres graces ON NE LES FERA JAMAIS ; mais ils declarent en meme temps , que le besoin qu' a la volonté d' estre determinée par une grace au bien , pour qu' elle le fasse , ne vient que de la difficulté à le vouloir , ou elle se trouve depuis le pechë par le penchant qui la porte au mal : Car ils assurent que l' homme pecheur a conservé sa liberté naturelle pour le bien & pour le mal , c' est-à-adire qu' il a le POUVOIR PHYSIQUE entier & parfait de se determiner à faire le bien , ou à ne le pas faire avec la grace qui n' est que suffisante.

Luculentum est istud testimonium, utpote Episcopi Doctoris Sorbonici, quem norunt omnes Jansenianis quàm maximè adversarium, quique loquitur, non ut Doctor particularis, sed ut Ecclesiæ Pastor: non ex privata, sed ex communi Theologorum Catholicorum sententia, ut ipse asserit.

Cardinalis Bellarminus è Societate Jesu l. 2. de gr. & lib. arb. c. 8. supra laudato, ad illud Joan. 6. *Nemo potest ad me venire, nisi Pater, qui misit me, traxerit eum*, sic scribit: *Potest tamen alia responsio adhiberi, quæ, ut verum fatear, magis congruere videtur Evangelicæ sententiæ, si dicamus Dominum loqui de gratia efficaci, quæ ita suadet, ut persuadeat. Dicitur autem non posse venire, qui non trahitur per efficacem gratiam, non quòd absolute non possit, sed quia INFALLIBILITER non veniet, sicut etiam contra qui trahitur, potest absolute non venire, tamen INFALLIBILITER venit.* Similia habet Suarez lib. 3. de Auxiliis c. 10.

Cardinalis Laurea ex Ordine Minorum opusc. 3. de gr. act. c. 13. n. 503. *Apostolus, inquit, confitetur*

tetur se imparem ac impotentem ad resistendum legi membrorum, id est concupiscentiis, à quibus agebatur . . . confitetur ergo quod bonum legis cognoscebat & volebat facere. Hæc est gratia præveniens, quæ illuminat ad cognoscendum bonum, & inspirat ad volendum. At dicit quod perficere non habebat propter repugnantiam legis membrorum, id est, concupiscentiæ. At non dicit sese liberare ab hac difficultate per suam voluntatem utentem illis auxiliis illuminationis & inspirationis, sed à gratia fidei per Christum, id est, à gratia efficaci superante difficultatem, & operante in voluntate, & cooperante cum illa ut bonum faceret. Hanc doctrinam pluribus laudibus effert Cardinalis Noris ex Ordine Augustinienſium dissertatione 5. operis cui titulus est, *Calumnia Jansenismi sublata*, cap. 1. & in vindiciis Augustinianis c. 6.

Isambertus in Scholis Sorbonicis Professor Regius q. 3. disp. 8. art. 5. Respondetur, inquit, gratiam purè sufficientem dari creatæ voluntati ad operandum, & licet nunquam de facto sortiatur effectum, prout est purè sufficiens, non propterea tamen illam dari frustra. Ergo ab annis centum & amplius, hoc est, ante natam Jansenii hæresim, publicè docetur in Academia Parisiensi, gratiam sufficientem sine efficaci nunquam obtinere suum effectum. Obiit quippe Isambertus anno ab Incarnatione 1642. ætatis verò suæ 77.

Alphonſus le Moine Isambertijam senis collega temperavit communem sententiam, excogitando duplicis generis gratiam sufficientem, aliam ad operandum, aliam ad orandum, docuitque priorem semper carere effectum, & in eo consentit cum aliis Theologis: posteriorem verò esse per nutum voluntatis versatilem, & quandoque habere effectum. Hujusmodi temperamentum admisisse dicitur

tur quidam Professor Navarricus; sed communiter rejectum est, utpotè in Academia novum. Unde,

Casto Chamillart Alphonssi le Moine successor, sic docet q. 1. de necess. gratiæ art. 10. sec. 2. *Per auxilia tantum ordinaria potest quis operari bonum, sed non operatur, ut enim de facto bonum operetur, requiritur auxilium speciale, gratia scilicet victrix indeclinabiliter operans* Et q. 3. art. 9. sec. 1. rejicit opinionem eorum, qui docent gratiam sufficientem orationis aliquando habere effectum.

Martinus Grandin, qui per quinquaginta annos & amplius docuit in Scholis Sorbonicis, sic loquitur de gratia sufficiente qu. 3. de divis. gratiæ, sect. 3. pag. 240. *In omni sententia (nota) quæ non ponit efficaciam gratiæ in solo consensu, gratia sufficiens, prout ab efficaci distinguitur, effectum suum non obtinet.* Et pag. 238. *Si cujus gratiæ efficacia à consensu repetenda esset, maxime gratiæ orationis; sed hoc dici non potest, quippe sicut agendi gratia est efficax à Deo, ita & orandi gratia.*

Guillelmus de Lestoc, qui in locum D. de Saintebeuve successus est, & per quadraginta novem annos Theologiam professus est in Scholis nostris qu. 4. de divis. grat. art. 2. hæc habet, *Gratia sufficiens tribuit homini posse operari: sed ita ut potentia illa dicat dependentiam ab auxilio efficaci tanquam à principio, sine quo non est possibile reduci ad actum.*

Edmundus Piro, prius Sorbonæ Professor Regius, deinde per plures annos Sacræ Facultatis Syndicus, ac tandem Ecclesiæ Metropolitanæ Parisiensis & Academiæ Cancellarius, articulo 4. de divis. grat. communem doctrinam de gratia sufficiente verbis quàm clarissimis exponit, statuitque imprimis

mis eam in Adamo effectum non obtinuisse ad perseverandum, *ex ipsa tantummodo voluntatis nequitia, nullatenus ex impotentia status.* Deinde sic pergit; *at eadem jam non est conditio in statu hominis lapsi, in quo gratia hæc solam nobis potentiam confert, nec unquam deveniet ad actum, & in quo privatio actus non modo petitur ex vitio voluntatis, verum etiam ex status infirmitate.* Et infra. *Respondeo hominem gratia qualibet, quantumvis exigua excitatum, posse à concupiscentia etiam asperri- ma liberari, non potentia quidem expetita, scilicet ob status infirmitatem.*

Frustra & contumeliosè apud indoctos musti- tant nonnulli Almam Academiam excidisse ab illa integritate, qua etiam apud exteras gentes tam celebre nomen non solum sibi, sed & regno acqui- sivit. Esto aliquando peccatum sit ab aliquibus, sed nullus ordo, nullave societas à sua integritate eò ipso deflexisse dici debet, quod in ea aliquid mali contingat, ut sapientissimè advertit Rodriquez in aureo opere de christiana perfectione, cum in ipsa Ecclesia alioquin sancta & nunquam deficiente, identidem nascantur hæreses & sacrilegia; sed tum demum societas corrupta censenda est, cum errores & mala impunè in ea grassantur, approban- tur, defenduntur; & si quis adversus ea insurre- xerit, inimicus ab ipsa existimatur. Quàm autem aliena sit sacra Facultas ab ejusmodi depravatione, probavit imprimis Seculum proximè elapsum, quo castum ejus studium tuendæ veritatis adversus serpentes multas novitates in fide & moribus maxi- mè exarsit. Nonne ipsa classicum cecinit contra profana morum dogmata & famosum Jansenii li- brum? An non detexit latens in eo virus, colle- gitque in quinque propositiones, quarum damna-

nem incredibili ardore profecuta est, Deputatis ex suis Theologis ad Sedem Apostolicam? quàm gratulabunda excepit omnia decreta quæ inde emanarunt? qua animi fortitudine executioni ea mandavit; ejectis è suo sinu pervicacibus, omni personarum delectu & discrimine remoto? Memor verborum Domini eruit, qui præ singulari eruditione videbantur ejus oculi, absceidit & projecit abs se, qui, ut gratia scribendi pollebant, manus ejus meritò dixisses. Quid addam de indefessa ejus vigilantia, ne malum in sacrum ordinem latenter obrepat? si quem è suis vel erroneum, vel ambiguum quid proferre contingat, illud pro officio statim aut revocari, aut explicari exegit, cogente nemine, sed uno veritatis amore incitata. Hanc olim Summus Pontifex Gregorius IX. appellare non dubitavit fodinam Ecclesiæ, ex qua purissimum doctrinæ aurum eruitur, ejus *Academiæ*, inquit Melchior Canus l. 12. de locis Theol. *de fide & Religione fixa constantiaque decreta semper Christi Ecclesia suspexit. Quia verò contempserunt, inaniaque & levia, ac pro nibilo existimaverunt, omnes ad unum periclitati sunt.*

Ergo ejus doctrinam ita expurgatam, ubique probatam, ET IN REGNO VELUTI VERNACULAM instituendis Ecclesiæ Gallicanæ Clericis præ quacunque alia tradere consentaneum fuit.

Solvuntur objectiones.

Antequam discutiamus quæ hic opponi solent, duo sunt observanda.

Primum, rem nobis esse cum Jansenii & Molinæ sectatoribus, sed ratione planè diversa; Jansenii Defensores quippe pugnant adversus doctrinam hic traditam, ut gratiam sufficientem è medio tollant tanquam portento similem: Molinistæ verò,

rd,

rò, ut suadeant gratiam sufficientem, quam cum omnibus Catholicis in hoc statu admittunt, pro innata voluntatis libertate modò habere effectum, modò non habere.

Secundum: tela, quæ hîc utrique intorquent, sed fine planè diverso, esse deprompta ex ratione humana secundum Philosophiam, in *argumentis operariam contentionem*, inquit Tertull. c. 8. de præscript. *Quid autem Athenis & Ierosolymis? Quid Academia & Ecclesiæ? Quid Hæreticis & Christianis?* Enimverò quis nesciat hæreticos argumentis Philosophicis semper oppugnasse Christianæ Religionis mysteria, Sacro-sanctam Trinitatem ut secum pugnantem, Incarnationem ut absurda involventem, prædestinationem, & quæ ex ea sequuntur Dei beneficia, quasi liberum arbitrium perimant, & virtutis studium comprimant? Miratus sum quòd libelli, qui incerto authore nunc circumferuntur de gratia, nonnisi ratiunculas inferant, quas olim Sanctus Augustinus in Pelaginanis & Semipelagianis diluit lib. præsertim de corr. & gr. de prædest. SS. & de dono persever. his præmissis,

Obijciunt 1. Jansenius & ejus Defensores: portento similis videtur illa gratia, quæ nunquam habuit, nec habitura est effectum: Ergo.

Vel ex ista objectione intelliget lector, qua fide à quibusdam asseratur doctrinam, in quam adeò impotenter debacchantur Jansenius & ejus sectatores, esse Jansenianam, novam, & ante ipsos in Scholis Catholicis inauditam. Sed ad objectionem

Respondeo negando antec. Jam enim ostendimus ex S. August. l. 1. de pec. mer. c. ult. l. 2. c. 3. & l. de spir. & lit. c. 1. multa esse exempla eorum, quæ nec extiterunt, nec extitura sunt, quamvis sint pos-

sibilia. Homo, v. g. ope divina potest esse sine peccato etiam veniali; nullus tamen fuit, excepta beata Virgine, aut futurus est sine peccato: potest dissentire gratiæ efficaci, nunquam tamen ei dissensit, nec dissentiet. Quid ergo mirum quod possit consentire gratiæ sufficienti, nec unquam ei consensurus sit sine gratia efficaci?

Objiciunt 2. Illa gratia non est admittenda, quæ prorsus inutilis est, quam dæmon vellet concedi, utpotè quæ hominem non reddat meliorem, sed solum inexcusabilem, pro qua deinde Ecclesia non orat. Atqui gratia sufficiens est ejusmodi: Ergo.

Nego minorem quoad singulas ejus partes.

1. Gratia sufficiens dici non potest inutilis, cum an. 1690. Decreto Inquisitionis damnata sit hæc propositio, *Gratia sufficiens statui nostro non tam utilis quam perniciosa est, sic ut meritò possimus petere: à gratia sufficiente libera nos Domine.*

Quærenti autem quæ sit utilitas gratiæ sufficientis, respondeo cum S. August. l. 5. contra Julianum c. 3. multa in hac vita sine salutis labe nesciri; quis enim cognovit sensum Domini, aut quis consiliarius ejus fuit, ut rationem reddat, cur aliquos non eo modo vocet, quem novit congruere, ut vocationi respondeant? Nosse nobis sufficiat Deum justum & bonum, nullum innocentem punire, quia justus est, & neminem velle perire, sed omnes ad pœnitentiam adducere, quia bonus est. Theologi tamen plura gratiæ sufficientis commoda numerant, inter quæ duo præcipua nobis videntur.

Primum; quod cupiditatem minuat, & ardorem concupiscentiæ temperet, ut voluntas resistere possit: quod autem consentiat, ex ejus pravitate est, non ex vitio aut imbecillitate gratiæ.

Nec

Nec dicas imperiti aut imprudentis esse Medici, adhibere remedia non profutura, cum suppetant efficacia. Quia si remedia illa infirmum disponunt ad efficacia, quæ Medicus paratus est subministrare, non solum culpandus non est, sed laudandus. Porro gratiæ sufficientes disponunt ad efficaces, quas Deus non denegabit, si voluntas prioribus utatur, ut potest & debet.

Secundum ex gratia sufficiente commodum reportat sive iustus sive peccator; 1. quod per eam uterque monetur & excitatur ad faciendum quod potest, & petendum quod non potest; gratia enim sufficiens ex sæpè dictis est supernaturalis illustratio mentis & pia motio voluntatis, 2. Quod ubi gratiæ sufficienti ambo non obtemperarint iustus venialiter peccando, peccator lethaliter, minus prætexant propriam infirmitatem, ut culpam excusent, sed magis seipfos & dejiciant & ad pœnitentiam excitent, quod Deum misericorditer sibi opitulantem contempserint. Sed hæc jam fusiùs exposuimus.

2. Impiè dicitur gratiam sufficientem eam esse, quam Dæmon expetere possit. Quis enim sine offensione audiat ad vota Dæmonis Deum verbis Moysis Pharaonem monuisse, portentis & flagellis teruisse; Christum in civitatibus Corozain & Bethsaida prædicasse, & virtutes multas fuisse operatum; Justis, qui perseveraturi non sunt, gratias efficaces aliquando conferre?

3. Ecclesia eo ipso, quo orat pro omnium salute, iis omnem benedictionem à Deo per Jesum Christum Dominum nostrum postulat. Nec mirum quod determinatè non petat gratiam, cui homines resistent; cum nequidem sic petat gratias efficaces temporaneas. Unde ex Jansenianorum ratiocinio

sequitur nullam gratiam in hoc statu agnoscendam, præter donum perseverantiæ; quia Ecclesia determinatè non orat pro gratiis, quas amissuri sunt reprobi.

Confirmatur responsio. Ecclesia orat, ut ad nullum declinemus peccatum, sive mortale, sive veniale; atqui datur solum gratia sufficiens ad vitanda omnia peccata venialia: Ergo Ecclesia indeterminatè orat pro omni gratia.

Objicies pro Molinæ dogmate. Nostra doctrina pugnat contra receptum Philosophorum effectum, quod in materia contingenti propositio universaliter negans aut affirmans, quales sunt istæ; *nullus homo currit: Omnis homo currit: semper est falsa*: atqui hæc propositio, *nullus homo gratia sufficiente adjutus, id operatur, ad quod datur*, est in materia contingenti: Ergo est falsa.

Distinguo majorem: Propositio universalis in materia contingenti est semper falsa, si absolutè enuncietur, ut in exemplis allatis, Concedo: si in aliqua hypothese, Nego majorem. Nam si supponantur ea impedimenta in omnibus & singulis hominibus, quæ moralem impotentiam inducant, veræ erunt ejusmodi propositiones. Nullus mendicus respuet pinguem eleemosynam. Nulla mulier nobilis & molliter enutrita longum iter pedibus conficiendum sponte suscipiet, quàmvis physicè possint, ille respuere pinguem eleemosynam, ista longum iter conficere, cum vires sufficientes illis non desint, sed sola voluntas.

Distinguo similiter minorem. Hæc propositio, *gratia sufficiens nunquam sortitur effectum*, est in materia contingenti, & enuntiatur hypotheticè, scilicet in statu naturæ lapsæ, in quo homo, gratia dumtaxat

taxat sufficiente adjutus, non habet potentiam expeditam, sed implicatam difficultatibus, ad quas superandas vires sufficientes & proportionatas habet, Concedo : & enuntiatur absolute pro quocunque statu etiam naturæ integræ, in quo nulla erat difficultas : Nego minorem.

Distinguo similiter consequens. Ergo hæc universalis propositio est falsa absolute, & respectu cujuscunque status, Concedo : Adamus enim, quamdiu stetit innocens, consensit gratiæ sufficienti, sicut & Angeli qui perseveraverunt. Est falsa hypotheticè, & respectu hujus status, Nego consequ. quia ex S. Augustino lib. 3. de pecc. mer. c. 3. *ad nonnulla superanda, quæ vel male cupiuntur, vel quæ male metuuntur, magnis aliquando & totis viribus opus est voluntatis, quas non perfecte in omnibus adhibitus prævidit, qui per Prophetam veridicè dici voluit ; non justificabitur in conspectu tuo omnis vivens ; quòd enim vires, quas ad agendum habet pares, non adhibeat, negligentia ejus tribuitur, ac propterea excusari omninò non potest.*

Instabis : atqui gratia sufficiens in hoc statu non est semper conjuncta cum hujusmodi difficultatibus quæ eam semper privent effectu : Ergo gratia sufficiens in hoc statu aliquando habet effectum.

Probatur antecedens : 1. quia ex dictis non omnia opera infidelium, etiam eorum qui nihil audierunt de Evangelio, sunt peccata, sed nonnulla faciunt, quæ non solum vituperare non possumus, verum etiam meritò rectèque laudamus, ut demonstravimus c. 5. §. 2. Ergo à fortiori fideles, qui verum Deum colunt & mandata ejus noverunt. 2. quia ex tentationibus, quæ difficultatem creant, aliæ sunt leves, aliæ graves : atqui homo naturæ
viri-

viribus potest etiam potentia morali superare leves tentationes, si non omnes collectivè, saltem aliquas ex dictis cap. 5. §. 1. 3. quia frequenter concurrunt circumstantiæ, quæ suaviter inducunt ad nonnulla exequenda, quæ sunt legis naturalis: mater v. g. delectabiliter opitulatur filio, uxor conjugii, filii parentibus, amici suis familiarissimis, multi cum delectatione multa præstant, quæ sunt sui officii, utpotè qui vel naturaliter, vel ex usu in illa propendeant. Ergo, si absque gratia aliquando ista præstant, à fortiori si gratia sufficiente adjuventur.

Nego subsumptum.

Ad Confirmationem concessio antecedente, distinguo consequ. ista præstant naturaliter, & ex motivo naturali, Concedo, supernaturaliter, & ex motivo supernaturali, Nego consequ. Enimverò anima corruptibili corpore aggravata, nisi potenter & efficaciter supra se elevetur, &, quod est difficillimum, amorem sui, superbiam, & omnem naturalem affectum comprimat, determineturque supernaturali delectatione, ex motivo naturaliter delectabili operabitur: adeò ut quemadmodum delectatio appetitus sensitivi impedit, ne voluntas sequatur judicium rationis; ita honestas humana, ardor naturalis, v. g. subveniendi patri charissimo, vel absolvendi operis necessarii & per jucundi, omnem mentis attentionem ad se trahant, sterilisque remaneat divina inspiratio, veluti extraneus furculus arbori insertus, qui arescit, nisi amputentur connaturales rami, in quo truncus succum propensius transmittit.

Confirmatur solutio. Justi ex dictis certò scire nequeunt, num ex gratia, quam ipsis non deesse
 mox

mox dicturi sumus, aut ex naturali inclinatione & humano affectu opera sua bona procedant, & eò magis timere debent, ne natura totum opus sibi vindicet, quò præcipites se in illud ferri sentiunt, utpote temporaliter utile, honorificum, & consuetis moribus delectabile; quæ enim juvant operationem naturalem, ea ipsa plerumque impediunt supernaturalem. Et quamvis justus gratiæ sufficientis auxilio illum affectum tam naturalem, tam vehementem possit transcendere, & supernaturalia consecrari supra se assurgens; nunquam tamen vires satis exeret, nisi præveniatur potentiori Dei auxilio, quo non solum possit, sed etiam velit & perficiat.

Ex iis, quæ hæcenus disputata sunt de actuali gratia tum efficaci, tum sufficiente, patet nulla argumenta ex lumine naturali deducta opponi, quæ facilè solvi non possint, mysteriumque gratiæ ita esse suprà rationem, ut tamen adversus eam non pugnet. Verùm novam hic movere quis posset controversiam atque in crimen vertere, quòd in objectionum explanatione vocaverim in prima hujus operis editione *moralem impotentiam, moralem necessitatem*, difficultates, quas semper patitur homo in statu naturæ lapsæ sola gratia sufficiente adjutus; ad eò ut satis mihi non fuerit exposuisse causas, cur gratia sufficiens in hoc statu nunquam absque efficaci fortiatur effectum, nisi demonstrassem insuper ejusmodi causas ex communi Theologorum usu: vocari *moralem impotentiam, moralem necessitatem*. Quod eò accuratius præstandum fuit, quòd non desint, qui novum ac singulare existiment, quod vulgare est apud probatissimos Theologos, quo-

quorum scripta non consuluerunt. Ut autem evanescant ejusmodi umbræ

Observabit lector controversiam hic esse dumtaxat de nomine, propter quod præcisè, quantumcunque supponatur novum, nemo habendus est ut hæreticus & Jansenianus, quando in re nomine significata idem prorsus sentit cum Catholicis. Etenim præterquam quod hæresis non consistat in vocibus; sed in ipsa doctrina pertinaciter propugnata adversus definita Ecclesiæ dogmata, laudandus est Theologus ex Vincentio Lyrinensi Com. c. 27. qui pretiosas divini dogmatis gemmas scitè exculpit, adornat sapienter, dicit novè, modò nova non dicat. Et cap. 3. *Fas est, inquit, ut prisca illa cælestis Philosophiæ dogmata processu temporis limentur, poliantur, sed nefas est ut commudentur, nefas ut detruncantur, ut mutilentur. Accipiant licet evidentiam, lucem, distinctionem sed retineant necesse est plenitudinem, integritatem, proprietatem.* Atqui pati moralem necessitatem, & pati difficultates, quæ vinci possunt, quamvis ex negligentia non vincantur, sunt termini synonymi, qui idem planè significant, dogma non mutant nec mutilant, sed ejus plenitudinem, integritatem ac proprietatem servant: Ergo Jansenianus, aut Hæreticus dici non debet, qui antiquam & Catholicam doctrinam exprimit vocibus licèt novis.

Scio suspectum de hæresi fore, qui in materia fidei voces ambiguas & inusitatas usurparet, quamvis in sensu Catholico: sed voces illæ, *moralis impotentia, moralis necessitas*, ambiguæ non sunt, nec inusitatæ apud Theologos tum veteres, tum recentiores.

1. Ambiguæ non sunt, imò chariùs & distinctiùs exprimunt quæ sit illa difficultas dissentienti gratiæ efficaci, & assentiendi gratiæ sufficienti, efficaciùsque solvunt supra laudatos textus tum Scripturæ & Conciliorum, tum Theologorum, qui à 400. annis & ampliùs pronuntiant neminem etiam justum solo gratiæ sufficientis auxilio posse elicere actum veræ virtutis, gravi tentationi resistere, & in gratia accepta perseverare.

Quid enim responderetur Novatoribus, qui adversus Catholicos urgent hujusmodi textus ut gratiam sufficientem ab hoc statu excludant & fatalem necessitatem obtrudant sub motione sive cælesti sive terrena? Si responsum fuerit his & similibus elocutionibus significari dumtaxat gravem difficultatem, exclamabunt continuò Novatores hujusmodi effugio detorqueri, ac perverti divina eloquia Sanctorumque Patrum scripta; cùm *impossibile & difficile* non sint termini Synonimi, sed planè diversi ac plerumque oppositi: ignavo quippe prætendenti iniunctum opus esse impossibile, reponi solet esse quidem difficile, sed non impossibile. At elingues redduntur, cùm audiunt in sermone vulgari impossibilia dici nom solum ea quæ excedunt vires, sed etiam quæ ita sunt difficilia ut ad ea voluntas nolit se movere, *Ille potestatis defectus*, inquit Petavius l. 5. Theol. dogm. cap. 10. num. 11. *non est absolute præcisèque capiendus, veriam ut jam dixi, moraliter, ut non posse agere id sit; nunquam velle movere se ad agendum; quamvis absolute queat.* Et Bellarminus lib. 5. de lib. arb. c. 8. *Necessitari moraliter, id est infallibiliter moveri.* Hoc sensu accipimus vulgares has loquendi formulas, *Non possum hanc præstare gratiam, tantam injuriam condonare,*
necef-

neceſſe eſt ut rus petam, adſim loco & hora condiſtis. Cum autem Deus in ſacris Scripturis ſermonem dirigat ad homines, mirum non eſt, ſi more humano difficile vocet impoſſibile.

D. Grandin tract. de gratia pag. 80. ſic quidem ſcribit, *non eſt impotentia moralis ſuppoſita gratia.* At verò de qua gratia loquitur D. Grandin, propoſitio enim ejus eſt univerſalis & indefinita; quis autem negaverit gratiam generatim ſumptam excludere impotentiam moralem?

Quæſtio igitur dumtaxat eſſe poteſt de gratia ſufficiente, an ſcilicet excludat impotentiam moralem, & hoc diſertè negat ille Theologus Tract. de Angelis q. 64. art. 2. ubi de Angelis prævaricatoribus ſic habet, *Angeli illa duratione, qua fuerunt in via, pœnitere potuerunt; tunc enim erant liberi, & ex parte Dei NON DEERAT GRATIA SUFFICIENTES quæ duo ſufficiunt . . . ubi Patres dicunt impoſſibile Dæmones pœnitere, intellige de dæmonibus damnatis, vel IMPOSSIBILE idem eſt ac difficile, vel id INTELLIGE IMPOSSIBILE, QUIA GRATIAM EFFICACEM NON HABUERUNT.* Quid clariùs eum qui juvatur ſola gratia ſufficiente, in mente D. Grandin pati quandam impotentiam, non quidem phyſicam, ſed moralem? *Nam ibi eſt moralis impotentia, inquit, Tract. de gratia pag. 91. ubi voluntas ſufficientes habet vires, tamen eas adhibitura non eſt ex quadam imbecillitate, ignavia, mobilitate.*

Traditur etiam nunc Pariſiis iſta ejus Theologi noſtri doctrina in Seminariis ſancti Lazari & ſancti Sulpitii, excerptaque videtur ex Suarezio l. 8. de Angelis c. 1. num. 25. ubi de Angelis poſt lapſum ſic habet, *quamvis abſolutè non caruerint auxilio ſufficiente, nec libertate ceſſandi à peccato, caruerunt*
tamen

tamen peculiari auxilio moraliter necessario contra obdurationem . . . quod potest declarari exemplo hominis obdurati & excæcati, qui cum solo auxilio gratiæ generali & communi relinquitur, nam moraliter nunquam convertetur, si amplius non juvetur; & aliquando hæc impotentia moralis talis est, ut infallibiliter nunquam habeat effectum, ut ex materia de gratia supponimus. Eundem loquendi morem tenuit Franciscus Macedo ex Minorum Ordine, impensè laudatus à Cardinali Noris, & percelebris sæculo proximè elapso, quia Theologiam publicè cum plausu docuit tum Patavii, tum Romæ, ubi munere Consultoris & Censoris in Congregatione sancti Officii functus est, cum gratia inefficaci & morali quadam difficultate (inquit Thesi 54. in Cortina) stat impotentia moralis ad operandum. Unde dicitur voluntas non posse operari ex August. l. de Fide & Symb. c. 10. l. 2. de pec. mer. c. 17. l. de cor. & gr. c. 5. 7. 9. 11. & 12. l. de bono persever. c. 9. & 14.

Appellavimus jam superiùs institutionem Eminentissimi Card. de Bissy ad suum Clerum, in qua meminit duplicis impotentiae seu necessitatis, nimirum physicae & moralis, monetque pag. 176. Thomistas & alios Theologos docere gratiam sufficientem semper carere suo effectû, ita tamen, ut tribuat veram agendi potentiam, an moralem aut physicam ipse exponit, *Ils assurent, inquit, que l'homme pecheur a le pouvoir PHYSIQUE entier & parfait de se determiner à faire le bien; ou à ne le pas faire avec la grace qui n'est suffisante.* pag. 288. Docet justos non posse moraliter, sed physicè tantum observare perseverandi præceptum sine speciali dono, & ita intelligendum Concilium Tridentinum. Cette explication, pergit auctor, doit vous faire comprendre,

mes freres, qu' on peut tres bien concilier les Canons & les Chapitres du Concile sur la possibilité des commandemens en suivant les regles ordinaires du langage, quo scilicet vocamus impossibile quod est valde difficile. Pag. 27. & 28. expendens effatum S. Augustini, quod amplius delectat, secundum id operemur necesse est, probat sanctum Doctorem non loqui de necessitate physica & simpliciter dicta, sed de morali aut consequente. Il est certain que S. Augustin n' a voulu parler que d' une necessité morale, ou que d' une necessité consequente, quand il a dit, qu' il est necessaire que nous agissions conformement à ce qui nous plait davantage. La premiere laisse le pouvoir entier de s' abstenir de ce qu' elle fait faire. Et la seconde vient de la determination libre de la volonté.

Inst. Dæmonum obstinatio non est aliud quàm moralis peccandi necessitas, & moralis bene agendi impotentia. Dæmones & animæ damnatæ, inquit D. Grandin tract. de grat. pag. 69. vires quidem physicas habent ad bonum opus (cùm sit inter illud & eorum voluntates proportio) non morales propter obstinationem: Ergo si homo sive peccator, sive justus cum sola gratia sufficiente aliquando patitur moralem necessitatem, in eadem cum Dæmonibus versatur peccandi necessitate! quis autem istud non exhorreat?

R. 1. Isthæc objectio laudatos Theologos impetit, me verò nullatenus tangit, utpotè qui eorum voces abjecerim.

R. 2. negando consequentiam longè absurdissimam, quam nullus ante Delatorem excogitavit. Etenim cùm difficultas possit in infinitum augeri;

geri; ita & quæ ex ea oriuntur moralis impotentia, & moralis necessitas. Sicut ergo ridiculus foret qui æquaret æstivum calorem calori fornacis propter commune nomen & eandem nominis significationem; sicque concluderet tantam esse aliquando in homine viatore difficultatem & impotentiam moralem benè agendi, quanta creditur in dæmonibus, ex eo quod idem sit utriusque nomen, cum tamen impotentia moralis Dæmonum longè magis distet ab impotentia morali quam nunquam patiuntur viatores, quam calor fornacis à calore æstivo. Consule quæ in hanc rem latius dicta sunt Tomo I. tract. de Angelis, ubi de obstinatione dæmonum.

Inst. iterum; cum piarum aurium offensione auditur justum aliquando esse in morali necessitate peccandi etiam lethaliter, pati moralem impotentiam resistendi gravi tentationi, *Rien de plus odieux*, inquit, & *de plus insoutenable*, de homine enim per gratiam sanctificantem reparato, sic scribit S. Thom. I. 2. q. 104. art. 8. *in quo quidem statu potest homo abstinere ab omni peccato mortali, quod in ratione consistit (utpotè quæ per gratiam sanctificantem sit sanata) non autem potest homo abstinere ab omni peccato veniali propter corruptionem inferioris appetitus sensualitatis.* Atqui admissa communi doctrina gratiam sufficientem nunquam sortiri effectum ad quem datur, utpotè quæ conjuncta sit semper cum difficultatibus seu cum morali impotentia, ut vocant, justus aliquando existit in morali necessitate peccandi lethaliter, & succumbendi gravi tentationi: Ergo.

R. I. Si quid proposita objectio difficultatis habet, solvere tenentur Theologi gratiæ congruæ Defensores, qui gratiam sufficientem incongruam

proinde coguntur appellare. An non æquè pietatem lædit, si Deus justis & amicis suis, qui labuntur, incongrua tantum auxilia suppetat? Quid Thomistæ respondebunt, qui & impotentiam moralem admittunt, imò & physicam difficillimè à se propellunt? Quid respondebimus omnes Conc. Trid. definienti necessitatem specialis privilegii ad vitanda omnia venialia, quæ Deus tam severè punit, item specialis doni ad perseverandum, quod primum soli Beatæ Virgini concessum est, secundum solis electis? Propositæ igitur objectioni non ego solus, sed omnes mecum Theologi solutionem parare debent, cui ego

R. 2. Distinguendo majorem: si moralis ea necessitas & impotentia moralis dicantur oriri ex defectu aut tenuitate divini auxilii, Concedo: si ex ignavia & negligentia solius voluntatis humanæ repetantur, Nego maj.

Distinguo pariter minorem, si illa necessitas moralis, item impotentia moralis diserte à citatis Theologis repetuntur ex ignavia & negligentia solius voluntatis humanæ, quæ vires, quas per gratiam habet, non exerit adversus difficultatem, quam patitur, nec Dei auxilium efflagitat, Concedo: si ex defectu seu ex tenuitate divini auxilii à laudatis Theologis & à nobis repetitur moralis necessitas, seu impotentia, nego minorem & consequentiam. Citati enim omnes Theologi, & nos cum ipsis necessitatem peccandi, & impotentiam vincendæ tentationis unanimi consensu ex culpa & negligentia hominis repetimus. Scimus quippe ex Scriptura, *mandata Dei non esse gravia, jugum Christi suave esse, neminem tentari supra id quod potest.* Scimus ex Conc. Arausicano II. Can. 25. omnes baptizatos, Christo
auxi-

auxiliante & cooperante, quæ ad salutem pertinent, posse & debere, si fideliter laborare velint, adimplere: ex Concilio Trident. sess. 6. cap. 13. in Dei auxilio firmissimam spem collocare & reponere omnes debere, quia Deus, nisi ipsi illius gratiæ defuerint, sicut cæpit opus bonum, ita perficiet operans velle & perficere; quæ præcipuè de justis omnes intelligunt, & nos supra tradidimus, iisdemque alia sancti Augustini testimonia, tum ex enarratione in Psalm. 91. tum ex lib. de nat. & grat. c. 64. adjunximus. Quoties verò jam diximus, ex pravitate voluntatis esse, non ex defectu gratiæ quòd homo concupiscentiæ consentiat; gratiam sufficientem privari suo effectu voluntatis humanæ negligentia; vel minimam gratiam sufficientem posse obistere tentationi & concupiscentiæ, quocunque in gradu supponantur? Nonne præterea tradidi gratias sufficientes disponere ad efficaces, quas Deus non denegabit ad vitanda omnia peccata, si non venialia, saltem lethalia, si voluntas prioribus utatur, utpotè eo modo quem supra exposui?

Constat ergo nihil nos docuisse, quod tyronibus Theologis, quibus scripsimus, offensionem animi creare possit, aut pias eorum aures offendere; ubi voces impotentiae & necessitatis moralis, etiam cum de justis agitur, post Theologos plurimos usurpamus; cum certè S. Anselmus & Concilium Trid. pietatem non offendant, sed sustentent & nutriant: quando ille difficultatem retinendæ justitiæ impotentiam dixit: quando Synodus sess. 6. Can. 22. definiit justificatum sine speciali auxilio Dei in accepta justitia perseverare non posse. An pias aures offenderunt Cardinalis Laurea, & Guillelmus de l'Estocq, ubi ille

nos impares vincendæ tentationi sine gratia efficaci etſi juſtos pronuntiat: & iſte ubi aſſerit ſine auxilio efficaci gratiam ſufficientem non poſſe reduci ad actum? Nonne mollius ne dicam ſecuriùs, ego locutus ſum, quando eandem impotentiam tantum moralem vocavi? Neque verò iis vocibus novitas ſua exprobranda eſt à Molinæ deſenſoribus, qui eas maximè Bellarmini, Suarezii ac cæterorum Molinæ Deſenſorum auctoritate obtinuiſſe in Scholis vel inviti jam fatentur. An non ipſe olim Vincentius Lirinensis graviffimè monuit Doctore Catholico licere non nova, ſed novè dicere, quod SS. Patres, imò & Concilia Oecumenica exemplo ſuo comprobant, ut ſupra expoſuimus?

Quamobrem iterum moneo, cum in iſtis vocabulis minimè ſitus ſit controverſiæ locus, quæ nobiſcum eſt cum Molinæ diſcipulis de efficacia gratiæ, ea nobis impoſterum omittenda, & ipſis relinquenda videri, ne contra Apoſtoli monitum videamur verbis contendere, quod *ad nihil utile eſt niſi ad ſubverſionem audientium*. 2. Tim. eorumque vocabulorum loco, difficultatis vocem ubique ſubrogandam eſſe in Scriptis noſtris declaramus; quam ſententiæ noſtræ expoſitionem optamus paci & veritati eò utiliorem quòd ſincero pacis ſtudio, ſimulque cautioris locutionis amore eam ſimus amplexi.

Instabis: de fide eſt orationem noſtram non eſſe Deo gratam & acceptam, niſi procedat à Spiritu ſancto, *attendant* (Semipelagiani) *quomodo ſalluntur, qui putant eſſe à nobis, non dari nobis, ut petamus, quaramus, pulſemus*, inquit S. Auguſtinus lib. de dono perfever. c. 23. *nec volunt intelligere etiam hoc divini muneris eſſe, ut oremus . . . quod vidit beatus Ambroſius; ait en. m. & orare Deum, gratiæ ſpiritalis eſt: atqui*
niſi

nisi supponatur gratiam omnibus præsto esse ad opera supernaturalia, sicut generalem Dei concursus ad naturalia, non possumus confidere orationes nostras procedere à Spiritu sancto: Ergo.

Concessa majore, R. 1. ad minorem, in ea falso supponi, quòd amissa gratia versatili instar generalis concursus, certi essemus orationes nostras, & alia pietatis opera procedere ex Spiritus sancti gratia; quamlibet enim amplectatur quis Catholicarum Scholarum opinionem, stabit isthæ Concilii Tridentini doctrina sess. 6. cap. 9. *Sicut nemo pius de Dei misericordia, de Christi merito, deque Sacramentorum virtute & efficacia dubitare debet: sic quilibet, dum seipsum suamque propriam infirmitatem, & indispositionem respicit, de sua gratia formidare & timere potest.* Sive ergo Augustinianus, sive Thomista, sive Molinista, omnes incerti sunt quo spiritu ducantur, an supernaturali motione, an naturali & humano affectu orent, operenturque. Ipsemet Apostolus cui Deus occulta sapientiæ suæ manifestaverat, de seipso ait, 1. Cor. 4. *neque meipsum judico, nihil enim mihi conscius sum, sed non in hoc justificatus sum, qui autem judicat me, Dominus est: qui & illuminabit abscondita tenebrarum, & manifestabit consilia cordium.* Unde in forma

R. 2. Distinguendo minorem, non possumus confidere orationes nostras procedere à Spiritu Sancto, si spectemus propriam infirmitatem & indispositionem, Conc. si spectemus Dei promissionem, Nego minorem. Sed quid inde, propterea non orabit homo, ad Missæ sacrificium non accedet, nec ad injuncta opera manus admovebit: quia spectata propria infirmitate, & pravitate cordis humani, formidat, ne sicut oportet, non oret aut operetur; Imò ista sui diffidentia

R. Justis non denegatur gratia sufficiens, cum instat præceptum, aut urget tentatio.

Probatur 1. ex Scriptura, 1. Cor. 10. *Fidelis Deus, qui non patietur vos tentari supra id quod potestis; sed faciet etiam cum tentatione proventum.*

Nec dicas hanc promissionem solos electos spectare; nam licet S. August. lib. de dono persever. c. 9. & nonnulli alii verba illa indefinite prolata electis adaptent; cum promissa novi testamenti ad illos maximè pertineant; Concilium tamen Trident. sess. 24. Can. 9. idem S. Augustinus in Psal. 120. & S. Thom. in hunc locum ad alios extendunt, probatque Angelicus Doctor, ex ipso Apostoli contextu, locum illum de justis debere intelligi, ait quippe Apostolus: *Qui se existimat stare, videat ne cadat.* Tum immediatè docet, quomodo lapsus caveri possit, nempe *tentatio vos non apprehendat nisi humana*; hoc est, tentationem quantum fieri potest, vitare; sed in Domino confidite quoad humanas, id est, quæ ab humana conditione separari nequeunt; quia *Deus fidelis est, qui non patietur vos tentari supra id quod potestis.* Ostendens, inquit S. Doctor, *paratum adjutorium in tentatione, nempe si ab ea declinare non possumus.* Vere fidelis Deus, qui dat potentiam ne vincamur, gratiam ut mereamur, constantiam ut vincamus.

Probatur 2. ex Conciliis & summis Pontificibus.

Concilium Milevitanum c. 3. sic statuit: *Placuit ut quicumque dixerit gratiam Dei, in qua justificamur per Jesum Christum Dominum nostrum, ad solam remissionem peccatorum valere, quæ jam commissa sunt, non etiam ad adjutorium, ut non committantur; anathema sit.* Eadem iisdemque verbis repetit Cælestinus ad Episcopos Galliæ.

Concilium Tridentinum eandem doctrinam confirmat sess. 6. c. 11. his verbis. *Nemo temeraria illa, & à Patribus sub anathemate prohibita voce uti (debet) Dei præcepta homini justificato ad observandum esse impossibilia: nam Deus impossibilia non jubet, sed jubendo monet & facere quod possis, & petere quod non possis, & adjuvat ut possis, cujus mandata gravia non sunt, cujus onus suave est: Deus namque sua gratia semel justificatos non deserit, nisi ab iis prius deferatur.* Quæ verba de prompta sunt ex S. Augustino lib. de nat. & grat. cap. 43. Tum Can. 18. anathemate percutit, qui dixerit homini justificato mandata esse impossibilia. Et sess. 24. Can. 9. damnat eos, qui dixerint matrimonium posse licitè contrahi ab iis qui non sentiunt se accepisse donum castitatis quam voverant: *Cum, inquit, Deus id rectè petentibus non deneget, nec patiatur nos supra id quod possumus tentari.*

Opponunt Jansenii Defensores: Concilium laudata sessione 9. damnat duntaxat errorem, quo Lutherus & Calvinus asserunt, idè mandata Dei esse impossibilia homini justo; quia concupiscentia inquinat omnia ejus opera, ita ut vera peccata sint, quantumcumque bona videantur.

Contra, 1. Concilium damnat errorem jam à Patribus proscriptum: Atqui Patres non proscripserunt hunc Lutheri & Calvinii errorem, cum fuerit eis incognitus, nec à quoquam ante illos hæreticos excogitatus: Ergo revera damnat sententiam, quam propugnant Jansenii Defensores, post Lutherum & Calvinum, homini justificato aliquando deesse gratiam, qua mandata Dei possibilia fiant.

2. Concilium non condit plures Canones ad damnandum unum & eundem errorem: sed tot distinctos errores proscribit, quot Canones edit:

Atqui

Atqui sess. 5. damnavit errorem, quo Novatores illi asserunt concupiscentiam in renatis esse peccatum formale. Et Can. 25. sess. 6. dicit anathema docentibus omnia justorum opera esse peccata. Restat ergo ut laudato Canone 18. damnet errorem, quo asseritur justis deesse gratiam, qua mandata Deiabilia fiant, & hoc manifestè declarat rationes, quibus Concilium c. 11. confirmat doctrinam Catholicam. 1. *Quia, inquit, Deus jubendo monet facere quod possis, & petere quod non possis, & adjuvat ut possis.* 2. *Quia mandata ejus gravia non sunt.* 3. *Quia sua gratia semel justificatos non deserit.* Porro hujusmodi rationes non militant, nisi contra errorem, de quo hic agitur; nam Lutherani & Calvinistæ docent gratiam efficacem (quam solam agnoscunt) non deesse prædestinatis, & nihilominus concupiscentiam & bona eorum opera esse vera peccata, quamvis ipsis non imputentur.

Opponunt 2. Concilium intelligendum de gratia habituali, qua Deus non privat justum, nisi ipse prius per peccatum mortale eam deseruerit.

Contra. Hæc interpretatio est in derisum & in contumeliam sanctæ Synodi, illam quippe inducit quasi diceret in periculo mortis trepidanti: Confide non morieris quamdiu vixeris, licet interim subtrahantur ea, sine quibus vita conservari nequit. Nisi enim Deus adjuvet, justus tentationibus succumbit, labiturque in peccatum, quod est mors animæ quatenus eam privat gratia habituali. Concilium autem hac certa spe fulcit justum conscium propriæ infirmitatis, quod Deus eum non deseret ea gratia qua possit peccatum vitare, præceptum implere, & in bono usque in finem perseverare, ut loquitur cap. 13.

At,

At, inquiunt Jansenii Defensores, gratia habitualis ex S. Thoma se habet in homine justo, sicut se habet forma in causis naturalibus: Atqui forma dat subiecto cui inest, posse operari, *quantum ad sufficientiam operativæ virtutis*. Ergo Concilium rectè intelligi potest de gratia habituali, quæ nunquam deest justo, ut mandata fiant ipsi possibilia, nisi ipse eam per peccatum deseruerit.

Contra: ipsemet Angelicus Doctor totus est art. 9. q. 109. ut ostendat justum non posse benè agere, nisi prætergratiam habitualement moveatur actuali Dei auxilio. *Primò, inquit, ratione generali propter hoc quòd nulla res creata potest in quemcumque actum prodire, nisi virtute motionis divinæ. Secundò, ratione speciali, propter conditionem status naturæ humanæ; quæ quidem licet per gratiam sanetur quantum ad mentem, remanet tamen in ea corruptio & infectio quantum ad carnem . . . & ideo necesse est nobis, ut à Deo dirigamur & protegamur.* Mens itaque, juxta S. Doctorem, sanatur per gratiam habitualement, constituiturque in esse potentia operativæ, quemadmodum oculus perfectè sanatus: sed sicut impossibile est oculum quantumcumque sanum percipere colores, nisi luce corporali excitetur: ita & mentem gratia habituali informatam supernaturaliter operari, nisi divinitùs adjuvetur. Hoc autem adjutorium justis non deesse docent Patres Tridentini.

Probatur 3. ex S. Augustino, qui lib. de nat. & grat. c. 26 sic scribit: *Deus, cum per mediatorem Dei & hominum Jesum Christum spiritualiter sanat ægrum, vel vivificat mortuum; id est justificat impium, & eum ad perfectam sanitatem, hoc est, ad perfectam vitam justitiamque duxerit, non deserit, nisi deseratur, ut piè & justè vivatur.* Sicut enim oculus corporis etiam plenissimè sanus, nisi candore
lucis

lucis, adjutus, cernere non potest; sic homo etiam perfectissime justificatus, nisi æterna luce divinitus adjuvetur, recte non potest vivere. Sanat ergo Deus non solum ut deleat quod peccavimus, sed ut præstet, etiam ne peccemus. Mirum quod qui se profitentur Augustini discipulos, ad tam claram lucem cæcutiant.

Idem sanctus Doctor non minus clarè mentem suam explicat enar. in Psalm. 7. ubi expendens illa verba, *justum adjutorium meum à Domino*, tribuit justitiæ Dei, cùm justum, misericordiæ verò, cùm peccatorem adjuvat, *Itaque, inquit, ibi misericors auxilium est, quia nullum habet meritum peccator, qui adhuc justificari desiderat, credens in eum, qui justificat impium: hic autem jam justum auxilium est, quod jam justo tribuitur. Dicat ergo peccator, qui dixit, infirmus sum, salvam me fac Domine propter misericordiam tuam: & dicat hic justus, qui dixit, si reddidi retribuētibus mihi mala, justum auxilium meum à Domino, qui salvos facit rectos corde. S. autem Augustinus nomine justitiæ intelligit fidelitatem; nam ex Tract. de attributis, justitia propriè dicta non cadit in Deum; cum nulla creatura jus in ipsum possit acquirere, alioquin dominium ejus minueretur. Unde idem sanctus Doctor Deum sic alloquitur lib. 1. Confess. *Reddis debita, nulli debens. Debita, inquam ego, ex fidelitate. Et S. Th. lect. 1. in c. 1. 1. epist. ad Corinth. Debemus sperare, inquit, quia Deus fidelis est; non autem videretur esse fidelis, si nos vocaret in societatem filii, & nobis negaret, quantum in ipso est, ea per quæ ad ipsum pervenire possumus. Unde Josue 1. non dicit, Non te deferam neque derelinquam.**

Ex his sequitur, primam Jansenii propositionem, aliqua Dei præcepta hominibus justis volentibus & conantibus, secundum præsentēs quas habent vires sunt impossibilia, deest quoque illis gratia, qua possibilia fiant, Constitu-

stitutionibus Summorum Pontificum Innoc. X. & Alex. VII. ubique receptis meritò damnatam, 1. ut temerariam; quia est contraria communi Catholicorum sententiæ. 2. ut blasphemam, quia derogat Dei justitiæ, seu fidelitati in promissis. 3. ut hæreticam, quia pugnat contra verbum Dei & definitionem Ecclesiæ.

Dices: justus erat Petrus quando negavit Christum, & negando mortaliter peccavit: Atqui ideo negavit, quia gratia ipsi defuit: Ergo justis gratia aliquando deest ad peccatum lethale vitandum.

Minor probatur 1. ex S. Chrysost. hom. 72. in Joan. *Casus Petri non frigiditate, sed superni auxilii derelictu contigit*, hom. 31. in ep. ad Heb. *Illam negatio non tam erat socordiae & negligentiae, quam ex eo quod Deus eum deseruerat*. Eadem repetit hom. 85. in Matth. 2. ex S. August. lib. de corr. & gr. c. 9. *Avertit ab illo faciem Dominus, & factus est conturbatus*. Et serm. 124. de tempore, nunc 79. in appendice: *Quid est homo sine gratia Dei, nisi quod fuit Petrus, dum Christum negaret?*

Respondeo 1. ad maj. Petro non fuit præceptum mori tunc pro Christo; hoc *pro servo Dominus passurus erat, non servus pro Domino*, inquit S. Augustinus serm. 296. alias 106. de diversis. Deinde S. Chrysost. in cap. 26. Matth. negat Petrum tunc fuisse justum; in eo quippe multiplex crimen enumerat: primum quod Prophetæ dicenti, & Christo confirmanti, *dispergentur oves*, non crediderit. Secundum, quod de se præsumpserit. Tertium, quod Christo repugnaverit. Quartum, quod aliis se prætulerit. S. etiam Hilarius in Matth. & S. Ambrosius lib. 10. in Lucam, contra communem SS. Patrum sententiam, à peccato lethali excusant S. Petri negationem, de qua S. August. tract. 113. in Joan. *Utique si Petrus*

Petrus negato Christo hinc iret, id est moreretur, quid aliud quàm periret? Sed admissa majore,

Respondeo 2. distinguendo minorem. Defuit gratia efficax & proxima sufficiens, Concedo: defuit gratia sufficiens saltem remota: Nego minorem; potuit enim & debuit occasionem fugere. debuit etiam orare, ut notat S. Chrysostom. Fervor ejus fuit ex præsumptione: *Mortuus est, quia superbè præsumpsit*, inquit S. Augustinus Tract. 106. in Joan.

§. IV.

Utrum detur Gratia sufficiens omnibus omnino hominibus, sive prædestinatis, sive reprobis?

Universitas hominum complectitur infantes & adultos: & hi sunt vel infideles, vel fideles. Infideles duplicis sunt generis: alii enim dicuntur negativi, qui Evangelium audire non potuerunt: alii positivi, qui Evangelii prædicationem non crediderunt. De fidelibus justis jam diximus: peccatores verò sunt vel obdurati, vel nondum obdurati. Quæstio hinc movetur, num omnibus illis nondum justificatis detur gratia sufficiens.

Gratia autem dupliciter spectari potest, 1. in præparatione, 2. in executione & applicatione.

Certum est nullam gratiam applicari infantibus, qui ante ætatem adultam decedunt nondum regenerati; quia in illo statu salvari non possunt, nisi sacro regenerationis lavacro, quod supponitur ipsis non impertiri. Dubium ergo solummodo esse potest, num Deus hoc salutis remedium ipsis sufficienter quantum est ex se præparaverit, & quidem ea intentione & voluntate perducendi eos ad vitam æternam?

Hujus-

Hujusce quæstionis solutio repeti debet ex voluntate, quæ in Deo est salvandi homines, & ex oblatione sanguinis Christi pro eorum salute; modò enim constet Deum velle salvare omnes & singulos homines, Christumque pro eorundem salute sanguinem fudisse; nullus remanebit dubitandi locus; quin Deus singulis ea præparaverit media sine quibus salvari nequeunt.

Atqui Apostolus utrumque definiit. 1. Tim. c. 2. his verbis; *Obsecro igitur primum omnium fieri obsecrationes, orationes . . . pro omnibus hominibus . . . hoc enim bonum non est & acceptum coram Salvatore nostro Deo, qui omnes homines vult salvos fieri, & ad agnitionem veritatis venire. Unus enim Deus, unus & mediator Dei & hominum homo Christus Jesus, qui dedit redemptionem semetipsum pro omnibus.*

Verùm quia locum illum non solum hæretici, sed etiam Catholici variè interpretantur; operæ pretium erit 1. referre diversas Apostolici testimonii expositiones; deinde statuere quæ sit præferenda & retinenda.

§. V.

De variis interpretationibus verborum Apostoli.

1. Timoth. 2.

Cum variæ illæ interpretationes eruantur ex multiplici divinæ voluntatis acceptione, pauca de ejus divisione ex tractatu de Attributis huc revocare necesse est. Itaque

Voluntas beneplaciti est ipsamet Dei volitio, decernens aliquid tanquam sibi gratum.

Dicitur 1. *Ipsamet Dei volitio*, ut significetur illam voluntatem esse verè & propriè in Deo.

Dicitur

Dicitur 2. *decernens aliquid*, quæ voces denotant voluntatem beneplaciti non esse necessariam Dei complacentiam in bono cognito, sed actum liberum seu decretum alicujus effectus producendi. Unde illa voluntas non est circa salutem possibilem dæmonum, propter quam Deus nullam decernit gratiam.

Voluntas signi est signum externum, quo Deus significat se aliquid velle, quo sensu præcepta Dei dicuntur voluntas Dei, juxta illud Ps. 142. *Doc me facere voluntatem tuam*. Ergo voluntas signi proprie non est in Deo, nec nisi metaphoricè dicitur voluntas.

Subdividitur voluntas beneplaciti in antecedentem & consequentem.

Antecedens est voluntas beneplaciti, qua Deus ex bonitate sua vult fieri aliquid secundum se præcisè spectatum, & nostro concipiendi modo ante circumstantias particulares, secundum quas illud ipsum non vult. Sic Judex, inquit S. Thomas 1. p. q. 19. art. 6. ad primum, antecedenter vult omnes cives vivere, & ad id invigilat, removens quantum est ex se, quæ civitati noxia esse possunt. Sed civem homicidam & pestiferum vult in his circumstantiis è medio tolli. Similiter mercator antecedenter vult conservare suas merces, orta tamen tempestate, in qua sine vitæ periculo eas conservare nequit, in illarum jacturam consentit. Hac antecedente voluntate Deus etiam in hoc statu vult omnes homines salvos fieri; voluit mundare Jerusalem, Ezech. 24. quam tamen non mundavit, propter obstinatum ejus animum, quo gratiæ ejus restitit. *Væ civitati sanguinum . . immunditia tua execrabilis; quid mundare te volui, & non es mundata à sordibus tuis.*

Dixi in definitione voluntatis antecedentis, *ante circumstantias particulares*, ut innuerem voluntatem antecedentem non abstrahere à circumstantiis toti generi humano communibus, ut vult Janfenius, sed à singularibus quibusdam, quemadmodum enim Judex vult omnes vivere, non solum quia homines sunt, sed etiam determinatè quia cives & partes civitatis, cui præest, ita Deus voluntate antecedente vult omnes homines salvos fieri, non solum spectatos præcisè ut creaturas intellectuales; hoc enim sensu salvos vult dæmones, ut agnoscit ipse Janfenius, utpotè qui sint creaturæ intellectuales; sed vult illos salvos fieri etiam quatenus constitutos in hoc statu naturæ lapsæ, atque adeo ut natura filios iræ: non vult autem in hypothesi quòd in peccato decedant: hæc est singularis circumstantia, à qua abstrahit voluntatem antecedens.

Voluntas consequens est voluntas beneplaciti, qua Deus vult aliquid simpliciter & absolutè spectatis omnibus circumstantiis, talis est voluntas salvandi prædestinatos; quia includit decretum dandi perseverantiam, in quo prævidentur in gratia decessuri: talis quoque voluntas damnandi quos præscit Deus in peccato morituros.

Dices: nulla est voluntas in Deo nisi consequens; Ergo voluntas antecedens non est beneplaciti, sed signi duntaxat, ac proinde illegitima est divisio voluntatis beneplaciti in antecedentem & consequentem.

Probatur antec. auctoritate Sancti Thomæ, qui laudato art. 6. voluntatem antecedentem vocat velleitatem, & voluntatem secundum quid, hoc est, voluntatem imperfectam, otiosam, & inefficacem: atqui nihil absurdius, quàm ponere in Deo ejusmodi

modi voluntatem. Præterea velleitas admixtum habet aliquid involuntarii, ut videre est in allato exemplo mercatoris, qui ex eo quòd antecederet vult conservare merces suas in periculo naufragii involuntariè eas projicit. Absit autem ut dicamus Deum involuntariè damnare impium, quemadmodum probus Judex civem pestiferum invitus morti addicit: Ergo firmum manere debet, voluntatem antecedentem non dici de Deo nisi metaphoricè & eo sensu, quo in Scriptura dicitur irasci, ipsum pœnitere, dolere, &c.

Nego anteced.

Ad confirmationem, Respondeo S. Thomam qu. 22. de veritate art. 2. docere voluntatem antecedentem esse beneplaciti, & cit. art. 6. ad primum, expressè illam distinguere à voluntate metaphorica & signi; ibi quippe scribit Deum antecederet velle salvare reprobos, quemadmodum justus Judex antecederet vult vivere homicidam. Et lect. 1. in cap. 2. 1. ad Tim. in eandem rem adducit exemplum mercatoris, qui antecederet vult conservare merces suas: Atqui nullus negaverit Judicem & mercatorem antecederet velle actu interno, & voluntate propriè dicta, illum, ut homicida vivat; istum, ut merces salvæ sibi sint.

Ideo autem Sanctus Doctor voluntatem antecedentem vocat velleitatem, & voluntatem secundum quid, quia hujusmodi voluntas non tendit in objectum sub ea omni ratione, qua spectari potest, hoc est, omnibus suis circumstantiis vestitum, v. g. hominem ut civem noxium, ut in peccato morientem, sed fertur duntaxat in objectum; puta hominem sub aliqua ratione generali & indeterminata ad particulares circumstantias, v. g. ut civis est, ut

ex Adamo procreatus. Porro quæ hoc posteriori modo volumus, non absolutè & simpliciter volumus, sed secundùm quid, id est, voluntate incompleta, quæ vulgò dicitur velleitas.

Porro hæc velleitas plerumque in hominibus est imperfecta, otiosa, & impotentiam arguit, sed non semper. Est imperfecta & otiosa in peccatore, qui amat virtutem, quatenus honesta est: sed eam odit quatenus sensibus injucunda, & cupiditati contraria; in mercatore verò omnem diligentiam operatur, ne merces cogatur ejicere; sed in eo arguit impotentiam, cùm imminens naufragii periculum ad eas eliciendas adigit, quod non præstat, nisi invitus & secundùm quid involuntarius.

In Deo autem nunquam est otiosa; quia Deus ex antecedente voluntate salvandi homines etiam reprobos, pro sua infinita sapientia & bonitate suppetitat, vel saltem præparat media, per quæ salutem consequi possint. Neque etiam arguit impotentiam; neque causat involuntarium secundùm quid; quia ita apposuit nobis vitam & mortem, nostramque infirmitatem sic adjuvat ad eligendum prius, & fugiendum posterius, ut ad quodcumque apposuerimus manum, voluntas ejus semper vincat, quod sanctus Augustinus lib. de spiritu & lit. cap. 33. illustrat hoc familiari exemplo, *Qui enim dicit, verbi gratia volo, ut hi omnes servi mei operentur in vinea, & post laborem requiescentes epulentur, ita ut quisque eorum hoc noluerit, in pistrino semper molat: videtur quidem quicumque contempserit, contra voluntatem domini sui facere; sed tunc eam vincet, & pistrinum contemnens effugerit, quod nullo modo fieri potest sub Dei potestate.* Sicque voluntas Dei semper invicta est, & omnis involuntarii expers.

Confir-

Confirmatur responsio. In omni sententia antecedens Dei voluntas salvandi omnes Angelos fuit beneplaciti; non fuerunt enim adjuti auxilio quo & efficaci, sed auxilio *sine quo* in gratia, in qua conditi sunt, perseverare non potuissent, quemadmodum docet sanctus Augustinus sæpius laudato cap. 12. de cor. & gratia: Atqui antecedens illa voluntas beneplaciti nihil involvit imperfectionis: Ergo nec antecedens voluntas salvandi omnes filios Adæ, ac proinde non versamur hic in quæstione juris, sed facti, id est, non quæritur utrum antecedens voluntas beneplaciti salvandi singulos homines in hoc statu sit possibilis; sed utrum actu & de facto detur.

Negat Jansenius, atque ex dictis c. 3. part. 7. contendit eos in errorem Semipelagianorum incurrere, qui verba Apostoli, *vult omnes homines salvos fieri*, ad singulos extendunt.

Hic præmissis, nunc variæ hujusce textus interpretationes exponendæ sunt; priusquam definiamus, quis sit genuinus illius sensus.

Prima est Semipelagianorum, qui, ut referunt S. Prosper in sua epist. ad S. Augustinum, & S. Fulgentius lib. de Incarnatione cap. 3. verba Apostoli intelligebant de antecedente Dei voluntate, quæ non præveniat, sed ita expectet hominum voluntates; ut, quemadmodum penes eos est oculos ad lucem diei naturaliter aperire, sic & corda ad lumen veritatis, quod per Evangelii prædicationem ubique diffunditur, actum demum jam volentes Deus adjuvet, deprecantes exaudiat, & conantes suffulciat. Si ergo, inquit S. Fulgentius, *ad salvandos homines, sicut illi volunt, expectat hominum voluntates, quomodo infantibus, qui baptizantur, & in*

eadem infantia moriuntur, donat æternam salutem, quorum bonam nec expectat, nec invenit voluntatem? S. Augustinus totis viribus insurgit contra hanc interpretationem, utpotè quæ sit prorsus aliena à mente Apostoli; funditusque evertat mysterium prædestinati, quomodo Apostolus potuit dicere, Deum velle omnes homines salvos fieri?

Secunda interpretatio est S. Augustini, docentis locum Apostoli in sensu figurato esse accipiendum, eoque triplici.

Primò, lib. de corr. & grat. c. 15. Deus vult omnes homines salvos fieri causaliter, non quòd ipse velit, sed quia facit nos velle & orare ut omnes salvi fiant, quemadmodum Rom. c. 8. dicitur Spiritus sanctus postulare pro nobis, quia nos postulare facit, quamvis ipse non postulet.

Secundò, lib. Enchir. cap. 13. & lib. 4. contra Julian. cap. 8. Deus vult omnes homines salvos fieri per distributionem accommodatam, non quòd nullus sit hominum, quem non salvum velit; sed quòd nullus salvus fiat, nisi velit. Hoc sensu dicitur Magister docere omnes pueros civitatis, non quòd singuli scholam ejus frequentent, sed quòd nullus in civitate, nisi per ipsum doceri possit.

Tertiò, eodem lib. Enchir. cap. 10. & lib. de cor. & grat. cap. 14. Deus vult omnes homines salvos fieri, ita ut intelligatur particula *omnes*, non pro singulis generum, sed pro generibus singulorum; quia nullum genus hominum excipit à salute, sive sint Judæi, sive Gentiles, sive reges & principes, sive ignobiles & plebei, *omnes homines*, inquit citato cap. 14. *vult salvos fieri; ut intelligantur omnes prædestinati, quia omne genus hominum in eis est, sicut dictum est Phariseis, decimatis omne olus.* Hanc explanationem

tionem esse magis ad mentem Apostoli, quàm duas priores docet S. Th. lect. 3. in c. 2. 1. Tim.

Tertiam interpretationem proponit idem S. Doctor lib. de Spiritu & lit. cap. 33. & 34, nempe Deum voluntate antecedente (quæ præveniat, non verò quæ expectet hominum voluntates, ut fingeant Semipelagiani,) velle salvos fieri etiam reprobos, sic enim scribit c. 33. *Vult autem Deus omnes homines salvos fieri & in agnitionem veritatis venire; non sic tamen ut eis adimat liberum arbitrium, quo vel bene vel male utentes iustissime judicentur. Quod cùm sit, infideles quidem contra voluntatem Dei faciunt, cùm ejus Evangelio non credunt: nec ideo tamen eam vincunt, verum se ipsos fraudant magno & summo bono, malisque pœnalibus implicant experturi in suppliciis potestatem ejus, cujus in donis misericordiam contempserunt. Ita voluntas Dei semper invicta est; vinceretur autem, si non inveniret, quid de contemptoribus faceret.*

Quòd autem voluntas illa non sit otiosa, nec expectet hominum voluntates, sed præveniat, Sanctus Doctor cap. sequenti declarat his verbis: *Videat non ideo tantum istam voluntatem (credendi) divino muneri tribuendam, quia ex libero arbitrio est quod nobis naturaliter concreatum est, verum etiam quòd visorum suasionibus agit Deus ut velimus, & ut credamus, sive extrinsecus per Evangelicas exhortationes, ubi & mandata legis aliquid agunt; si ad hoc admonent hominem infirmitatis suæ, ut ad gratiam justificantem credendo confugiat, sive intrinsecus, ubi nemo habet in potestate quid ei veniat in mentem; sed consentire vel dissentire propriæ voluntatis est.*

Dices cum Jansenii Defensoribus: S. Augustinus hic non loquitur in propria, sed in Pelagianorum sententia. i. quia nomine gratiæ prævenientis intelligit duntaxat doctrinam sive intrinsecus,

sive extrinsecus sonantem, quam Pelagiani non negabant ad credendum necessariam; 2. quia cum versaretur in illa quæstione, num voluntas credendi sit Dei donum, respondissetque reverà esse Dei donum, quia non potest ex libero arbitrio surgere, nisi Deo providente veritas innotescat, subdit: *hæc disputatio, si quæstioni illi solvendæ sufficit, sufficiat.* Quibus verbis non obscure significat, se non adhærere huic responsioni à se allatæ. Ergo S. Augustinus nullam admisit in Deo voluntatem beneplaciti circa salutem reproborum sed signi duntaxat & metaphoricam.

Nego anteced. quia si S. Augustinus allatis verbis sententiam Pelagianorum exprimeret, procul dubio illam refelleret: attamen nedum refellit, quin illam permittit, *si sufficit*, inquit, *sufficiat.* Absit autem, ut vel dubitanter dixerit Sanctus Doctor, ad fidem sufficere doctrinam adhibitam sive extrinsecus per prædicationem, sive intrinsecus per interioris mentis illustrationem absque divina voluntatis motione, quippe qui nefandam hanc hæresim per totum librum ex professo confutet: Ergo non in Pelagianorum, sed in Catholicorum sensu scripsit, *si sufficit, sufficiat.*

Non insistit quidem S. Augustinus huic interpretationi; quia certamen ipsi erat cum Pelagianis negantibus mysterium prædestinationis gratuitæ, & donum perseverantiæ, ad quod stabilendum non conferebat illi interpretatio. Cum autem Pelagiani opponerent locum Apostoli tanquam validissimum arietem, & ex eo concluderent Deum æqualiter velle omnes homines salvos fieri; S. Doctor totus intentus ad vindicandam immutabilem electorum prædestinationem, frequentius verba Apostoli

stoli explicat de voluntate signi & metaphorica respectu reproborum. Sed ne infideles & reprobis se excusent, quòd non acceperint, unde credant aut perseverent, excusationem eorum prævenit cit. cap. 33. & 34 nimirum Deum sic intus agere, ut liberum arbitrium non adimat, sed consentire vel dissentire propriæ esse voluntatis, quod sufficit ad elevandas eorum querelas, non verò ad rationem reddendam cur eo congruentiori modo non vocentur ex decreto prædestinante, quo ipsi electi credunt & perseverant. Unde S. Augustinus sic pergit: *Fam si ad illam profunditatem scrutandam quisquam nos coarctet cur illi ita suadeatur, ut persuadeatur, illi autem non ita, duo sola occurrunt interim, quæ mihi respondere placeat. O altitudo divitiarum! Et, numquid est iniquitas apud Deum? Cui responsio ista displicet, quærat doctiores; sed caveat, ne inveniat præsumptores.*

Ex his patet S. Augustinum locis in objectione laudatis, non in argumentum, sed in defensionem suæ sententiæ adversus Pelagianos meminisse textus Apostoli. Quis verò nesciat mentem scriptoris minùs esse eruendam ex iis, quæ respondet ad declinanda adversariorum tela, quàm ex iis, quæ sponte eligit ad illos expugnandos? Ergo vel ex hoc uno capite tertia interpretatio, quam S. Doctor adhibet ad obstruendum os obloquentium contra Dei justitiam, videtur præferenda secundæ, qua se tuetur adversus Pelagianorum tela. Sit itaque

§. VI.

Deus ex Apostolo 1. Tim. 2. vult antecedente voluntate beneplaciti omnes & singulos homines salvos fieri.

Probatur, quia Scriptura Sacra explicari debet tum secundum litteram, quando nihil sonat contra-

trarium bonis moribus, & aliis Scripturæ textibus, ex S. Augustino de doctrina Christiana passim, ac præsertim lib. 3. c. 15. & 16. tum juxta sensum, quem tenuit & tenet sancta mater Ecclesia ex Concilio Tridentino sess. 4. Atqui sensus à nobis expressus est litteralis, non repugnat bonis moribus aut aliis Scripturæ textibus; eumque tenuit ac tenet sancta mater Ecclesia. Ergo. Major est certa apud omnes Catholicos. Minor probatur quoad quatuor ejus partes.

Primò, sensus ille est obvius & litteralis; namque Apostolus ibi hortatur, ut fideles pro omnibus & singulis hominibus orent, fatente ipsomet Augustino lib. de cor. & grat. cap. 15. atque ad illud charitatis officium hac ratione eos incitat, quòd sit pulchrum & acceptum coram Deo qui est omnium Deus, omnibus providens, quique vult omnes salvos fieri. Atqui hæc ratio non valet, nisi vox *omnes* in utraque propositione universaliter & absque exceptione accipiatur; quia ex propositione particulari non potest erui conclusio universalis, qualis enim esset ista argumentatio, Deus vult aliquos ex omnibus hominum generibus salvos fieri: Ergo non solum pro aliquibus, sed etiam pro singulis omnium generum est orandum?

Nec dicant Adversarii eum esse sensum verborum Apostoli, fideles debent pro singulis orare, & eorum expetere salutem; quia Deus vult ut fiant ejusmodi orationes; nam Apostolus rationem affert, cur orationes illæ sint Deo acceptæ, nimirum quia vult eosdem homines, pro quibus orant, salvos fieri. Si autem in mente Apostoli, Deum velle omnes homines salvos fieri, idem sit ac Deum velle orationes fieri pro omnium hominum salute

salute, Apostolus probaret idem per idem, quod sine ejus injuria dici nequit.

Secundò, sensus ille non repugnat bonis moribus, imò æque commendat Dei misericordiam, & bonitatem in homines reprobos, ac in Angelos qui ceciderunt, quos Deus voluit antecedente voluntate salvos fieri ex ipsismet adversariis: spem fulcit contra desperationem, quam injicit humana infirmitas, & impœnitentibus omnem excusationem adimit.

Tertiò, hæc interpretatio nedum pugnat contra alios Scripturæ textus, quin confirmat quod legitur Ezech. 18. & 33. *Nolo mortem impii, sed ut convertatur. Quare moriemini domus Israel, quia nolo mortem morientis?* 2. Petr. cap. 3. *Patienter agit Deus propter vos, nolens aliquos perire; sed omnes ad pœnitentiam venire. Quid clarius?*

Quartò, hunc sensum tenuit & tenet sancta mater Ecclesia, ut constat tum ex Conciliis, tum ex Sanctis Patribus.

Ex Conciliis quidem; nam Arelatense tertium, Moguntinum, duo Carisiaca, Tullense, addo Valentinum & Lingonense, quæ licet Carisiacis in specie contradixerint, non rejecerunt tamen tertium Capitulum, in quo sic habetur, *Deus omnipotens omnes sine exceptione vult salvos fieri, licet non omnes salventur.*

Ex sanctis etiam Patribus.

S. Chrysostomus hom. 1. in epist. ad Eph. ait: *Prima voluntas est, ut peccatores non pereant; voluntas secunda est, ut qui male affecti sunt, pereant.* Et in c. 2. 1. ad Tim. *Imitare, inquit, Deum tuum; si omnes ille vult salvos fieri, meritò pro omnibus oportet orare Volentiam quippe est orare.* Chrys. sequuntur Oecumenius & Theoph.

S. Hiero-

S. Hieronymus in eundem Apostoli textum scribit: *vult omnes (salvos fieri,) si ipsi Deo vocanti consentire voluerint.*

S. Augustini egregium testimonium protulimus paragrafo præcedenti.

S. Prosper responsione 2. ad objectiones Vincentianas sic habet: *Sincerissimè credendum atque profitendum est Deum velle ut omnes homines salvi fiant; si quidem Apostolus, cujus ista est vox, sollicitissimè præcipit, quòd in omnibus Ecclesiis piissimè custoditur, ut Deo pro omnibus supplicetur: ex quibus quòd multi pereunt, pereuntium est meritum.* Similia habet Auctor de vocatione Gentium lib. 2. c. 19. & seq.

S. Joannes Damascenus lib. 2. de fide orth. c. 29. *Oportet, inquit, nosse Deum antecederet velle omnes homines salvari. Quid sit autem voluntas antecedens, sic explicat in Dialogo contra Manichæos: Præcedens voluntas est, quando aliquis ex seipso vult aliquid: consequens, quando ex eorum quæ sunt, causa atque voluntate quidem præcedente. Ex se ipso Deus vult omnes homines salvos fieri: si verò peccemus, vult nos, quantum conducit, castigari. - Præcedens quidem voluntas bonitatis est, consequens autem justitiæ ipsius.*

S. Thomas eodem sensu accipit verba Apostoli, tum lect. 1. in c. 2. 1. ad Tim. ubi vult locum Apostoli posse exponi quatuor modis de voluntate beneplaciti. *Uno modo, ut sit distributio, inquit, pro generibus singulorum, non pro singulis generum. . . & hoc magis facit ad intentionem Apostoli. Alio modo secundum Dam. ut intelligatur de voluntate antecedente, non consequente.* Tum lib. 3. contra Gentes cap. 159. ubi sic loquitur: *Deus quantum in se est, paratus est omnibus gratiam dare; vult enim omnes homines salvos fieri.*

S. Bonaventura in primum dist. 46. q. 1. in eadem est sententia. *Deus, inquit, voluntate beneplaciti vult omnes homines salvos fieri, voluntate antecedente vult omnium salutem.*

Scotus in primum dist. 46. q. unica. *Dictum Apostoli, inquit, multò melius exponi posset de voluntate antecedente, si vult omnes homines salvare, quantum scilicet ex parte sui & voluntate sua antecedente, pro quanto dedit eis adjutoria sufficientia ad salutem.* Mitto alios Theologos; quia satis intelligitur eos non recedere ab illorum sententia, quos Scholæ suæ principes agnoscunt.

Communis ergo est Catholicorum sententia, Deum velle voluntate antecedente, eaque beneplaciti, omnes & singulos homines salvos fieri, non quomodo Semipelagiani falsò fingeant, quasi expectet eorum voluntates, sed quatenus illis præparat, vel etiam suppeditat auxilia, sine quibus salvari nequeunt.

Ergo Christus pro singulis mortuus est; nam Pater neminem vult salvare, nisi per ejus merita. Sed de morte Christi pro omnium salute fusè egimus, tract. de Incarn. pag. 209. & sequentibus.

Ergo gratia saltem sufficiens omnibus conceditur, vel in præparatione, vel in executione. Namque ex dictis Deus iis media ad salutem concedit, quos vult salvos fieri: Atqui ex dictis Deus vult omnes & singulos homines salvos fieri: Ergo.

Dixi, *vel in præparatione*; nam parvulis, qui sine baptismo decedunt, nulla gratia actu conferatur, sufficienter tamen Deus, qui vult illos salvos fieri, eam præparavit, aliàs voluntas ejus non esset sincera, ut diximus.

Dices: parvuli, qui in utero materno moriuntur,

Instabis : Rex non crederetur sincerè velle liberare captivos, qui pecuniam sufficientem quidem daret ad illos perferendam ; sed interim ordinaret viros, qui obsiderent vias, impedirentque quo minus pecunia ad illos deferretur. Porro non casu, sed Dei ordinatione causæ secundæ concurrunt, ne baptismus illi parvulo, de quo agimus, applicetur, ut docet S. August. lib. de dono persever. c. 12. his verbis ; *Neque enim res humanas in parvulis non divina providentia, sed fortuitis agi casibus opinamur aut parentum negligentiae sictribuendum est, quodd parvuli sine baptismo moriuntur tanquam ipsi parentes sibi negligentes voluntate propria, de quibus nascerentur, elegerint. Quid dicam, quodd parvulus aliquando antequam illi per ministerium baptizantis succurri possit, expirat? Plerumque enim festinantibus parentibus, & paratis ministris, ut baptismus parvulo detur, Deo tamen nolente non datur, qui eum paululum in hac vita non tenuit, ut daretur. Ergo.*

Nego antec. & paritatem. Aptior esset comparatio, si supponeretur Rex misisse illam pecuniam ad redimendos captivos in illis regionibus detentos, circa quas negotia regni cogerent eum habere milites, qui vias quasdam custodirent, non ad spoliandum pecuniæ delatorem : sed ad arrendos hostes. Hoc ferè modo sub Dei providentia contingit causas secundas ita concurrere, ut sine parentum culpa parvuli in utero materno intereant, non casu, sed Deo ordinante, non tamen tanquam causa particulari, nec eo fine, ut parvulus absque baptismo decedat, sed tanquam causa generali, exequente in tempore, quod ab æterno decrevit, nimirum in pœnam peccati originis, dimittere causas secundas naturæ suæ defectu tibi ;
nec

nec impedire incommoda, quæ inde sequantur, puta morbos, immaturam mortem, & alias miseras, quæ ubi contingunt, agnoscenda sunt Dei iudicia, ut monet S. Augustinus, & eatenus verum est, quod scribit, idè parvulum sine baptismo hinc abire; quia Deus non vult ut detur, voluntate, scilicet consequente & in concursu causarum secundarum, in quo mors parvuli naturaliter, & sine miraculo vitari non posset.

Supereſt ſpecialis difficultas circa nonnullos obduratos expendenda §. ſeq. Itaque ſit

§. VII.

Utrum Deus ex antecedente voluntate ſalvandi omnes homines, non ſolum præparaverit, ſed etiam actu conferat gratiam ſufficientem infidelibus negativis, & fidelibus induratis.

R. **H**æc quæſtio magna contentione agitur in Scholis, Theologosque in varias & oppoſitas ſententias diſtrahit, ut ſolet, quando Scriptura clara non eſt, nec Traditio manifeſta, nec ſuccurrit Eccleſiæ definitio, quemadmodum accidit in hac controverſia. Quod ſpectat infideles negativos, celebres Theologi docent præparata quidem iis auxilia ſufficientia ad ſalutem, ſed actu non conferri, probantque 1. ex Scriptura, Act. 14. v. 15. *in præteritis generationibus dimiſit omnes ingredi vias ſuas.* Ephes. cap. 2. v. 12. *Eratis . . . ſine Chriſto . . . promiſſionis ſpem non habentes, & ſine Deo in hoc mundo.*

1. Quia fides eſt prima gratia, ex ſancto Auguſtino lib. 1. ad Simplicianum q. 1. *Incipit homo percipere gratiam, ex quo incipit credere Deo.* Ex Concilio

cilio quoque Tridentino sess. 6. c. 8. *Fides est humane salutis initium*: Atqui infideles negativi nec habent, nec possunt habere fidem, nec ad eam disponi per gratiam orationis; *Quomodo enim invocabunt*, inquit Apostolus Rom. 10. *in quem non crediderunt? Aut quomodo credent ei, quem non audierunt? Quomodo autem audient sine prædicante? Quomodo verò prædicabunt, nisi mittantur?* Ubi Apostolus eo modo discurret de adultis infidelibus in ordine ad fidem, quo ratiocinamur de parvulis respectu Baptismi, quomodo baptizabuntur, nisi sit, qui Sacramentum istud administret? Quomodo verò administrabit quis, nisi mittatur? Ergo sicut gratia Baptismi infantibus, ita & gratia fidei eorum parentibus est solummodo præparata.

3. Quia ex S. Augustino serm. nunc 26. *communis est omnibus natura, non gratia.*

4. Quia gratia, quæ data est Angelis, & Adamo innocenti, nunc aliquibus deest, ex S. August. l. de corrept. & gr. c. 11: Atqui ista gratia erat tantum sufficiens: Ergo nunc aliquibus deest gratia sufficiens. Quibus autem magis deesse potest, quam infidelibus negativis, & fidelibus induratis?

5. Quia si infideles negativi haberent gratiam sufficientem; infidelitas & ignorantia, quæ in eis est, mysteriorum nostrorum, non esset solum pœna peccati; sed & peccatum formaliter, quod in Bago damnatum fuit; namque infidelitas & vincibilis ignorantia eorum, quæ quis scire tenetur, est peccatum formaliter, utpotè quæ sit voluntaria & libera, saltem indirectè: Atqui infidelitas & ignorantia, ad quam vitandam datur gratia sufficiens, est vincibilis: Ergo.

Verum illa momenta evincere non videntur.

D. Habert Theolog. Tom. II.

Y y

Non

Non primum; quia Deus dicitur dimisisse gentes ingredi vias suas, quatenus gratia efficaci illas non continuit in vero sui cultu, quemadmodum Israelitas identidem, exigentibus eorum peccatis, repulit & dimisit servire Diis alienis; sed inde non sequitur subtractam, fuisse illis omnem gratiam sufficientem. *Nec prateritis sæculis, inquit Auctor libri secundi de vocatione Gentium cap. 4. gratia defuit mundo; quamvis enim speciali cura Dei populum Israeliticum constet electum, omnes aliæ nationes suas vias ingredi permisæ sint; non ita se tamen æterna Creatoris bonitas ab illis hominibus avertit, ut eos ad cognoscendum se, atque metuendum, nullis significationibus admoneret.*

Non secundum; fides enim alia est perfecta, alia inchoata. Fides perfecta dicitur ea, quæ distinctè & explicitè creduntur Religionis Christianæ mysteria: inchoata est sancta cogitatio divinitus immissa, & pia voluntatis motio, quæ disponit ad fidem perfectam. Prima ordinariè non habetur, nisi ex auditu: secunda verò plerumque à Deo immediatè inspiratur. Sic Cornelius, quamvis de Christo nihil audisset, non tamen sine aliqua fide Deum orabat, & eleemosynas faciebat: Hæc fides est initium salutis, & prima gratia, quam S. August. l. 1. ad Simplic. q. 2. dicit se habere ad fidem perfectam, sicut conceptio ad partum. *Fiunt, inquit, inchoationes quædam fidei, conceptionibus similes; non enim tantum concipi, sed etiam nasci opus est, ut ad vitam perveniatur æternam.*

Non tertium; quia legenti laudatum S. August. sermonem, perspicuum fiet S. Doctorem loqui de gratia habituali, seu sanctificante; eo enim loci differit de gratia, qua homo fit bonus & justus: Atqui homo non fit bonus & justus per gratiam
suffi-

sufficientem, cui semper resistitur; sed per gratiam sanctificantem; quam semper in adultis præcedit gratia efficax, & fides in Christum Mediatorem. Certum est autem apud omnes ejusmodi gratias non esse communes, sicut naturam.

Non quartum; nam gratia sufficiens sumitur vel generatim, vel specificè & determinatè pro gratia propria status innocentiae, per quam Adamus & Angeli viatores non solum poterant, sed etiam actu bona operabantur. Hanc autem gratiam aliquibus nunc deesse asserit S. August. quia ex dictis homo in hoc statu cum gratia sufficiente nunquam bene operatur, licet possit.

Non quintum, quia ex dictis duplex est gratia sufficiens, alia proxima, alia remota. Qui ita resistit gratiae proximè sufficienti, ut prævideat, aut prævidere possit peccata inde secutura, eorum se constituit reum: sic qui contra divinam inspirationem cauponam ingreditur, ubi pro more voluntariè se inebriat, reus est peccatorum, quæ in ebrietate committit. Secus dicendum est de eo, qui gratiae remotè tantum sufficienti dissentiens non prævidet, nec prævidere potest inde secuturam impossibilitatem implendi præcepti. Quis enim dixerit, Beneficiarium moraliter peccasse ex eo, quod cum posset, & deberet officium matutinum manè persolvere, ex negligentia distulerit ad decimam horam, qua gravi & improvise morbo correptus, non potuit illa die præcepto satisfacere? Porro infideles negativi, dum resistunt gratiae remotè sufficienti, nec prævident, nec prævidere possunt se propterea privandos noticia & fide mysteriorum nostrorum. His ita discussis,

Alii magno numero Theologi contendunt, gra-

tiam sufficientem saltem remotam infidelibus negativis aliquando conferri, probantque

1. Quia ex sæpius laudato Apostoli textu, *Deus vult omnes homines salvos fieri, & ad agnitionem veritatis venire.* Atqui voluntas illa Dei antecedens non est in Deo otiosa complacentia, fatentibus Patronis prioris sententiæ, sed est decretum dandi singulis auxilia sufficientia, si nullus sit ex parte causarum secundarum defectus, & naturale impedimentum. Porro nullus potest esse defectus, nullumve naturale impedimentum ex parte causarum secundarum, quominus infidelibus adultis actu conferantur remotiora auxilia, putà sancta cogitatio, pia voluntatis motio; hæc quippe non pendent à ministerio hominum, ut baptismus, doctrina mysteriorum fidei; sed illa Deus per se immediatè operatur, & independenter à concursu causarum secundarum, ac salvo naturali ordine universi. Ergo si Deus illa infidelibus non conferat, non videtur sincerè, & quantum est ex se, velle illorum salutem; per illum enim solum stat, quominus conferatur.

Hæc ratio, fateor, me movet, propensio-remque reddit in illam sententiam, quæ nova non est, nec Molinam habet Auctorem, quicquid dicant Patroni prioris sententiæ, ut patebit ex mox dicendis.

2. Itaque probatur Veterum auctoritate. S. August. concione 1. in Ps. 18. *Non est, inquit, qui se abscondat à calore ejus; cum enim Verbum caro factum est, & habitavit in nobis, mortalitatem nostram suscipiens, non permisit ullum mortalium excusare se de umbra mortis, & ipsam enim penetravit Dei calor.* Auctor. l. 2. de vocatione Gentium, sive sit S. Prosper, sive S. Leo, sic scribit c. 15. *Adhibita est semper universis hominibus quædam*

quædam supernæ mensuræ doctrinæ, quæ etsi parcioris, occultiorisque gratiæ fuit, tamen sufficit, sicut Deus judicavit, quibusdam ad remedium, omnibus ad testimonium. S. Thom. qu. 14. de veritate art. 11. sic respondet ad primum. Si aliquis nutritus in silvis, vel inter bruta animalia, ductum naturalis rationis sequeretur . . . certissimè tenendum, quòd ei Deus vel per internam inspirationem ea quæ sunt ad credendum necessaria, vel aliquem fidei prædicatorem ad eum dirigeret, sicut misit Petrum ad Cornelium. Id ipsum S. Doctor confirmat lect. 3. in c. 10. epist. ad Romanos ubi addit: Hoc ipsum, quòd aliqui faciunt quòd in se est, ex Deo est movente corda ipsorum. Magistri sententiam sequuntur celeberrimi ejus discipuli, ut Alvarèz, Bannez, Joannes à S. Thoma, & alii, quemadmodum contra Gonetum demonstrat Massoulieus, ex eodem Prædicatorum Ordine.

Verùm quia rarò infideles negativi Deo sic obtemperant, S. August. 1. de dono perseverantiæ c. 19. observat, quòd paucissimis donatum sit, ut nullo sibi homine prædicante, per ipsam Dominum, vel per Angelos cælorum, doctrinam salutis accipiant.

§. VIII.

De Induratis.

Circa Induratos duo debent esse extra controversiam.

Primum. De nullo indurato, quamdiu vivit, desperandum est: quia Deus aliquando induratos efficacia suæ gratiæ emollit, quæ ideo occultè humanis cordibus tribuitur, ut cordis duritia primitus auferatur, ex S. August. 1. de correp. & gr. c. 8. Quòd autem hæc gratia aliquando (rarò quidem) induratis conferatur, agnoscit S. Bernardus 1. 1. de consider. c. 2. ubi sic habet: *Nemo duri cordis salutem un-*

quam adeptus est, nisi quem fortè miserans Deus, abstulit ab eo (juxta Prophetam) cor lapideum, & dedit cor carneum.

Si quem ergo Pastor ex grege deprehendat laborare tam horribili malò, ut loquitur idem S. Bernardus, curam illius non deferat; sed ut illam utiliter impendat, ante omnia indurationis causam, scilicet frigus cupiditatis, quo tanquam gelu constringuntur corda mortalium, remove studeat necesse est. Hac quippe ratione Deus Oseæ 2. aversum Israellem typo sponsæ adulteræ ad se revocare proponit; *Sepiam, inquit, viam tuam spinis. . . semitas suas non inveniet. Et sequetur amatores suos, & non apprehendet. . . & dicet, vadam, & revertar ad virum meum priorem, quia bene mihi erat tunc magis, quàm nunc.* Enimverò sicut adultera, quamdiu amoribus illicitis illaqueata, & præoccupata fuerit, legitimum conjugem contemnit, & ita averfatur, ut eum amare sibi videatur impossibile; soluta autem ab illis laqueis, pristinum amorem castum facilè concipit: sic induratus ideo nauseat ad cœlestia, legem divinam rejicit, quia res creatæ rapuerunt cor ejus: iis ergo paulatim se subtrahat, & fascinationem agnoscat, incipietque gustare, quoniam suavis est Dominus.

Secundum. Dantur circumstantiæ in quibus Deus obduratis in pœnam præcedentium peccatorum denegat omnem omnino gratiam, qua salvi esse possint. Illud constat experientia hujusmodi hominum, qui decedunt, vel repentina morte, vel morbo, qui judicium rationis subvertit.

Controversia itaque esse potest duntaxat de obduratis, qui pollent rationis usu, utrùm scilicet aliqui ex iis existant qui careant omni gratia, sive proxima, sive remota.

Affir.

Affirmant Theologi benemulti, qui nituntur his momentis.

Primò auctoritate Scripturæ, Eccles. c. 7. *Considera opera Dei, quòd nemo possit corrigere, quem ille despexerit; in quem locum sic scribit S. Gregorius lib. 11. Moral. c. 5. Mutum est os omne quod loquitur, si ille intrinsecus non clamet, qui aspirat verba, quæ audiuntur. Hinc est enim quòd Cain ex divina voluntate adnotari potuit; quia exigente culpa malitiæ, iam intus Deus cor reliquerat, cui foris ad testimonium verba faciebat. Joan. 12. de Judæis excæcatis habetur: Propterea non poterant credere, quia iterum dixit Isaias, excæcavit oculos eorum, & induravit cor eorum, ut non videant oculis, & non intelligant corde, & convertantur. Prov. 1. Tunc invocabunt me, & non exaudiam. 2. Mach. 9. de Antiocho legitur, Orabat hic scelestus Dominum, à quo non esset misericordiam consecuturus. Et Amos 1. Super tribus sceleribus Damasci . . . non convertam eum.*

Secundò, auctoritate SS. Patrum. S. Joannes Damascenus l. 2. de fide orthod. c. 29. *Duplex est, inquit, derelictio; est enim derelictio dispensativa quidem, & eruditiva, & alia finalis & desperativa. Dispensativa quidem & eruditiva ad correctionem, salutem, & gloriam: finalis verò derelictio est, ubi Deus omnia ad salutem necessaria fecit, inemendabilis, immedicabilis, magisque insanabilis ex proprio proposito homo permanet; tunc enim traditur in finalem perditionem, ut Judas. S. August. l. de perfectione justitiæ c. 19. excæcatum vocat, desertum omni lumine veritatis. Lib. 1. operis imperfecti ait: Quis porro volens cæcus est corde, cum nemo velit cæcus esse vel corpore? Quibus verbis Sanctus Doctor probat cæcitatem, & indurationem non esse voluntarias. Et L. expositionum quarundam quæstionum in Epistolam ad Romanos, propositione 6. de Pharaone*

jam obdurato, sic scribit: *Non hoc illi imputatur, quòd tunc non obtemperaverit; quandoquidem obdurato corde obtemperare non poterat: sed quia dignum se præbuit, cui cor obduraretur priori infidelitate.* Denique l. de natura & gratia c. 22. *Nec cogitat, prævaricatorem legis quàm dignè deferat lux veritatis, qua desertus utique fit cæcus, & plus necesse est offendat, & calendo vexetur, & vexatus non surgat.*

Tertio, ratione; quia obduratio fit per subtractionem gratiæ, ex S. August. l. 1. ad Simplicianum q. 2. *Obduratio Dei, inquit, est nolle misereri, non ut ab illo irrogetur aliquid, quo homo sit deterior; sed tantum, quo sit melior, non irrogetur.* Atqui non quævis subtractio gratiæ est induratio; nullus quippe peccat sive leviter, sive graviter, nisi per aliquam gratiæ saltem efficacis subtractionem: Ergo induratio est subtractio omnis gratiæ.

Alii distinguunt inter gratias; quædam, inquiunt, dantur, ut peccator impleat præcepta: aliæ, ut justificetur, & remissionem peccatorum obtineat: prioribus secundum ipsos nunquam induratus totaliter deferitur, nonnumquam verò posterioribus. Ita olim docuit in Scholis Sorbonicis noster Gasto Chamillart, doctrinæ Catholicæ contra Jansenianos defensor acerrimus, cujus est hæc propositio q. 3. art. 6. sect. 7. *Dico 2. probabile videri, quòd aliqui ita deferantur & excæcentur, ut per reliquum vitæ spatium careant gratia qualibet etiam sufficiente, qua possint converti & salutem consequi.*

Sed contradictorium videtur, induratum habere gratiam ad servanda mandata, & non habere ad remissionem peccatorum obtinendam. Namque, ut de cæteris Dei mandatis taceam, præcipitur omnibus peccatoribus baptizatis diligere Deum super omnia,

omnia, & Sacramentum pœnitentiæ suscipere: At-
qui contradictorium est indurato conferri gratiam
ad præcepta illa implenda, non verò ad remissio-
nem peccatorum obtinendam; Deus enim diligit
quem movet ad diligendum se, juxta illud Joan. 14.
Qui diligit me, diligetur à Patre meo, & ad justificatio-
nem parare vult, cui auxilium sufficiens concedit,
quo ritè possit suscipere Sacramentum pœnitentiæ.
Ergo alterutrum dicatur necesse est, vel Deum in
quibusdam circumstantiis denegare gratiam suffi-
cientem, qua induratus præcepta implere, & con-
sequenter à peccato resurgere possit, ut accidit
peccatori, qui deliquium mentis usque ad mortem
patitur: vel neminem privare gratia, saltem re-
mota, sive ad præcepta implenda, sive ad remis-
sionem peccatorum obtinendam.

Alii ergo Theologi negant ullum induratum
destitui omni auxilio etiam remotiore, quo man-
data implere, & salutem æternam consequi possit.
Cui sententiæ potius subscribendum videtur.

Probatur 1. ex Scriptura. Ezech. 18. & 33. de
omni peccatore absolutè, & absque ulla exceptio-
ne legitur: *Nolo mortem impii; sed ut convertatur* 2.
Petr. c. 3. *Patienter agit (Deus) propter vos, nolens*
aliquos perire; sed omnes ad pœnitentiam reverti. Rom.
2. *Ignoras quoniam benignitas Dei ad pœnitentiam te ad-*
ducit? Secundum autem duritiam tuam, & impœnitens
cor thesaurizas tibi iram.

Probatur 2. ex Patribus. Sanctus Augustinus
in Psal. 6. sic scribit: *Dedit eos in reprobum sensum;*
nam ea est cœcitas mentis; in eam quisquis datus fuerit, ab
interiori luce secluditur, sed nondum penitus cum in hac vita
est. Auctor de vocatione Gentium lib. 2. cap. 28.
de obduratis sic loquitur: *Quæ beneficia, licet obdu-*

ratis nihil remedii attulerint, probant aversionem illorum non divinæ fuisse constitutionis; sed propriæ fuisse voluntatis. Et lib. 1. cap. 21. Credimus nullis hominibus opem gratiæ in totum fuisse subtractam. Sanctus Prosper responsione 15. ab objectiones Vincentianas, ait: *Nemini Deus correctionis adimit viam, nec quemquam boni possibilitate dispoliat.* S. Thom. q. 27. de veritate art. 11. in corpore docet, obduratum non posse facile cooperari ad hoc, ut exeat de peccato, & hæc est, inquit, obstinatio imperfecta, qua quis potest esse obstinatus in statu viæ, dum scilicet habet ita firmatam voluntatem in peccato, quod non surgunt motus nisi debiles. Quibus verbis S. Doctor clarè & distinctè declarat suam sententiam non esse (ut nonnulli contendunt) obduratos carere omni gratiæ auxilio: Ergo hæc posterior opinio longè est Molina antiquior.

Probatur 3. ratione; quia obdurati sunt adhuc in statu viæ, nec ad terminum pervenere; Ergo progredi possunt, quod supponit aliquod gratiæ auxilium.

Nec movent momenta allata pro priori sententia.

Non textus Scripturæ. Namque 1. quod dicitur Eccles. 7. *Nemo potest corrigere, quem Deus despexerit,* probat duntaxat inutilem fore correctionem respectu non solum indurati; sed cujusvis etiam peccatoris, nisi Deus interiùs aspiret; quod verissimum est. 2. Judæi excæcati non poterant credere (Joan. 12.) eo sensu, quo Christus quibusdam invidis jam dixerat c. 5. *Quomodo vos potestis credere, qui gloriam ab invicem accipitis?* Nimirum nec isti, nec illi proximè, & cum ejusmodi impedimento, credere poterant; sed cum penes illos esset tale impedimentum remove, remotè poterant credere. 3. Quod afferitur de Antiocho ex lib. 2. Mach. c. 9. de Damasco c. 1.

Amos,

Amos, & de aliis Prov. 1. intelligitur de pœnis temporalibus, à quibus improbi frustra petunt liberari. Deinde etiam si ad dona gratiæ extenderentur illi textus, in promptu esset responsio, improbos ideo non exaudiri; quia malè petunt. Nullus autem orat sicut oportet, nec sincerè ad Deum convertitur sine gratia efficaci, quam excæcatis & induratis aliquando denegari fatemur. Unde sicut S. August. 1. de dono perseverantiæ c. 12. docet parvulum sine baptismo aliquando decedere, Deo nolendo ipsum baptizari, hoc est, nolente concedere donum perseverantiæ, sine quo nullus salvatur; sic Antiochus, & alii, de quibus fit mentio in laudatis textibus, pereunt, quia Deus voluntate consequente & absoluta non vult eos salvari, sed conditionata tantum.

Non textus SS. Patrum, 1. Verba S. Joannis Damasceni nullam pariunt difficultatem. Certum quippe est, aliam esse derelictionem eruditivam & medicinalem, per quam etiam iusti aliquando de se præsumentes, veniunt in cognitionem propriæ infirmitatis; talis fuit derelictio à gratia efficaci in sancto Petro, quando negavit: aliam esse desperativam, quæ infallibiliter deducit ad impœnitentiam finalem; sed S. Joannes Damascenus quæstionem nec solvit, nec attingit, utrùm hæc derelictio excludat omnem omnino gratiam. 2. Si adversarii legerent, & bona fide proponerent quæ S. August. scripsit laudato ab ipsis c. 19. de perfectione justitiæ, nihil ex eo concluderent contra nostram sententiam; ibi quippe S. Doctor Cælestium docentem bonum opus esse à Deo, bonam verò voluntatem à nobis, hinc refellit, quòd si quis rectè voluisset, nec perficere potuisset, gratias Deo agere deberet,

beret, quòd voluisset, cùm desertus omni luce veritatis, nequidem velle potuisset. Verba ejus sunt: *quasi non debeat gratias agere, qui praecepta voluit; qui desertus omni lumine veritatis, hæc velle non posset*: quibus S. Doctor ita probat nos sine gratia, nec velle, nec operari posse, ut non neget eam de facto conferri.

3. Ut solvatur quod idem sanctus Doctor scribit lib. 1. operis imperfecti, *quis volens cæcus est corde*, duo in peccato spectanda esse docet sanctus Thomas in caput primum epist. ad Rom. Primum est ipsemet actus malus, v. g. fornicatio, ad quam directè se determinat peccator. Secundum est pœna, quæ sequitur actum malum, scilicet privatio gratiæ sanctificantis, cæcitas mentis, induratio, ac tandem æterna damnatio. Illud autem non vult peccator (nisi indirectè & quatenus vult causam) quia est pœna gravissima, ac proinde repugnans inclinationi patientis, alioquin non esset pœna. Ergo nullus directè vult esse cæcus corde, sed indirectè tantum, quod non impedit, quin ipsa cæcitas sit absolutè voluntaria & peccatum, ut expressè docet S. Doctor citato l. 1. operis imperfecti, his verbis: *Si peccatum non esset, injustè coargueretur (cæcus) arguitur autem justè: ubi dicitur, Phariseæ cæce, &c.*

4. Verba S. August: laudata ex expositione in epist. ad Rom. *Pharaoni indurato peccatum non imputabatur, quia obdurato corde obtemperare non poterat*, si secundum sensum obvium accipiantur, nimis probant; videntur enim significare induratum non amplius peccare, quod falsum asserunt, tum Patroni oppositæ sententiæ, tum ipsemet S. Augustinus, qui tract. 53. in Joan. monet non esse excusanda peccata Judæorum excæcatorum, Christo dicente eis: *Si non venissem, & locutus fuissem eis, peccatum non haberent; nunc autem excusa-*

excusationem non habent de peccato suo. Quærendum est itaque adversariis sicut & nobis, quo sensu hæc scripserit S. August. Nimirum ista scripsit S. Augustinus ex errore Semipelagianorum, quò tunc occupatus erat, ut ipsemet agnoscit lib. de prædestinatione Sanctorum c. 3. Error autem ille in eo positus erat, quòd initium fidei seu pia credulitatis affectio sit à nobis, ac ita necessariò præire debeat gratiæ divinæ, ut nisi præcesserit, nulla prorsus sequatur gratia: non præcessit autem in Pharaone: Ergo Pharao induratus caruit omni gratiæ auxilio, sed in mente Semipelagianorum, à qua S. August. recessit melius consultus: ergo Pharao sic à Deo desertus, non potuit credere, nec obtemperare Moyfi gravia minitanti, ad credendum enim necessaria est gratia: Ergo Pharaonis peccata imputanda sunt primæ ejus infidelitati, ex qua juxta errorem Semipelagianorum necessariò sequuntur posteriora peccata, quem errorem S. Augustinus, orta Pelagianorum hæresi, detestatus est, ut patet tum ex citato lib. de Prædestin. Sanctorum, tum ex lib. 1. Retract. cap. 23. at proinde genuina S. Doctoris sententia eruenda non est ex ejus expositione in Epistolam ad Romanos, sed ex posterioribus ejus libris, v. g. ex supra laudato libro in Psalmos.

At, inquires, ex lib. de cor. & gr. c. 12. Adam sine Dei auxilio accepta justitia perseverare non potuisset, & sine sua culpa cecidisset. Distinguo, sine sua culpa cecidisset à fide, ad quam sicut ad cætera præcepta supernaturalia absolutè necessaria est gratia, sicut oculo perfectè sano necessaria est lux corporalis ad videndum, inquebat supra S. Doctor. Conc. Sine culpa sua cecidisset, si sermo sit de sola lege naturali, Nego; Nam ad
peccan-

cibus, minis non cedit, flagellis duratur, ingratum ad beneficia est; ad consilia infidum, inverecundum ad turpia, impavidum ad pericula, inhumanum ad humana, temerarium ad divina . . . & ut brevi cuncta horribilis mali mala complectar, ipsum est, quod nec Deum timet, nec hominem reveretur: En quò trahere te habent hæ maledictæ occupationes, si tamen pergis ut cœpisti. Ergo, inquiet Pastor, qui contremiscit ad hos sermones, nondum est obduratus, utpote qui Deum timeat, paveat ad pericula; nec verisimile est Deum velle eum perdere, quem interius movet ad pœnitentiam, & misericorditer initiat ad sapientiam; nam initium sapientiæ timor Domini, Eccli. 1. nisi fortè jam voce Domini excitatus iterum in peccatis obdormiscat.

§. IX.

Utrum indurati in hypotesi primæ sententiæ quòd careant omni gratiæ auxilio, præcepta liberè violent, novumque reatum culpæ & pœnæ contrahant.

R. Indurati & alii peccatores, etiamsi supponantur sine gratia, legem liberè violant, novumque reatum culpæ ac pœnæ contrahunt.

Probatur I. ex Conciliis.

Arausicanum II. c. 13. & Trident. sess. 6. c. 1. declarant liberum arbitrium per peccatum originale fuisse quidem *attenuatum & inclinatum, sed non extinctum*; Atqui extinctum foret, si homo absque gratia necessariò peccaret: Ergo.

Concil. Carisiacum 9. sæculo celebratum Præfide Hincmaro Rhemenfi sic decernit c. 2. *Habemus liberum arbitrium ad malum desertum à gratia.*

Ecclesia Lugdunensis licet Patribus Carissimis parum æqua, in hoc tamen dogmate cum iis convenit lib. adversus Scotum Erigenam cap. 4. *Natura post illam miserabilem ruinam non potuit esse libera nisi ad malum.*

Clerus Gallicanus in generalibus Comitibus proscriptit sequ. propositiones ad se delatas.

1. *Si peccatores consummata malitia, cum blasphemant & flagitiis se immergunt, non habent conscientia stimulos, nec mali quod agunt notitiam, cum omnibus Theologis propugno eos hisce actionibus non peccare.*

2. *Philosophicum (peccatum) quantumvis grave in eo qui Deum vel ignorat, vel de Deo actu non cogitat, est grave peccatum, sed non est offensa Dei, neque peccatum mortale dissolvens amicitiam Dei, neque æterna pœna dignum.*

De prima propositione sic censuerunt Patres: *Hæc propositio falsa est, temeraria, perniciofa, bonos mores corrumpit, blasphemias, aliaque peccata excusat, & ut talis à Clero Gallicano jam damnata est: de secunda vero: Hæc propositio scandalosa est, temeraria, piarum aurium offensiva. Præverat Alexander VIII. in suo Decreto 14. Augusti ann. 1690.*

Probatur 2. ex Patribus.

S. Augustinus lib. 2. contra 2. epistol. Pelag. cap. 5. *Peccato Adæ, inquit, liberum arbitrium de hominum natura periisse non dicimus; sed ad peccandum valere in hominibus subditis Diabolo, lib. de grat. & lib. arb. cap. 15. Semper est in nobis voluntas libera, sed non semper est bona, libro de Cantico novo, liberum arbitrium ad malum sufficit sibi. Idem repetit lib. de cor. & grat. cap. 11. num. 31. & lib. 3. operis imperfecti cap. 120. Ad malum liber est qui voluntate agit mala, aut opere, aut sermone, aut sola cogitatione.*

Hoc

Hoc autem grandioris ætatis quis hominum non potest?

S. Bernardus serm. 81. in Cantica: *Interveniente peccato, inquit, patitur (homo) quandam vim & ipse, sed à voluntate, non à natura, ut ne sic quidem ingenua libertate privetur . . . ita nescio quo pravo & miro modo ipsa sibi voluntas, peccato quidem in deterius mutata necessitas, cum voluntaria sit, excusare valet voluntatem; nec voluntas, cum sit illicita excludere necessitatem . . . voluntas enim est, quæ se, cum esset libera, servam fecit peccati peccato assentiendo: voluntas nihilominus est, quæ se sub peccato tenet voluntariè serviendo.* Quibus verbis sanctus Doctor planissimè docet necessitatem quam patitur peccator, non esse absolutam, nec excludere libertatem, ac proinde quæ malè operatur. non ita esse refundenda in præcedens peccatum, quemadmodum peccata ebrii in ebrietatem quæ præcessit, sed ipsa esse formaliter peccata utpote voluntaria & libera? *Voluntas nihilominus est, quæ se sub peccato tenet voluntariè serviendo.*

Probatur 3. Ex confessione omnium Theologorum, quibus adversarius confidenter asserit doctrinam, quam propugnamus, esse incognitam.

Magister sentent. lib. 2. distinct. 24. sic scribit: *Liberum arbitrium, quod est ad bonum, nisi gratia adjutum, non eligit: malum verò per se eligit . . . gratia adjuvat voluntatem, ut efficaciter velit bonum; per se autem potest vel le malum efficaciter.* Ita S. Bonaventura in hac distinct.

S. Thomas in quæstionibus disputatis quæst. 24. de lib. arbit. art. 12. ad duodecesimum: *Dicendum, inquit, quod cupiditas non potest intelligi esse cogens absolute liberum arbitrium, quod semper est liberum à coactione; sed dicitur cogens propter vehementiam inclinationis, cui tamen potest resisti, licet cum difficultate.* Sed quæstionem co-

piofissimè tractat. 1. 2. quæst. 77. *Passio*, inquit, art. 7. *quandoque quidem est tanta, quod totaliter aufert usum rationis, sicut patet in iis qui propter amorem aut iram insaniant, & tum si talis passio à principio fuerit voluntaria, imputatur actus ad peccatum, quia est voluntarius in sua causa, sicut etiam de ebrietate dictum est.* Superest quæstio utrum idem sentiendum sit de peccatis obduratorum: *Quandoque verò, inquit Angelicus Doctor, passio non est tanta, quod totaliter intercipiat usum rationis, & tunc ratio potest passionem excludere . . . Unde talis passio non totaliter excusat à peccato; quis audeat Angelicum Doctorem notare hæresi Calviniana, aut Janseniana? anxius fortassis es num peccatum illud sit mortale, mereaturque pœnam æternam? dubium solvit S. Thomas artic. 8. in quo sic habet: Ratio deliberans potest hic occurrere; potest enim excludere vel saltem impedire passionem, unde si non occurrat, est peccatum mortale.* Hæc doctrina adeo constans est in Ecclesia, ut Molina in Congregationibus de auxiliis insimulatus fuerit quasi ab ea recessisset, sed patroni ejus, Theologi scilicet, Societatis Jesu, criminationem diluerunt, quemadmodum ipsi referunt in historia, quam ediderunt sub nomine Theodori Eleutheri; sic enim scribunt, lib. 4. c. 14. *Nullum est momentum per se, ac seorsim consideratum, in quo non sit homo naturaliter seu physicè liber ad non assentiendum tentationi, vitandumque peccatum, neque per ullum objectum vel per ullam peccandi illecebram, aut passionem quantumvis vehementem compelli potest liberum arbitrium, & ad consentiendum adigi, dum non absorbetur judicium rationis, ut est commune axioma Theologorum, docetque expressè S. Thomas 1. 2. q. 10. art. 2. tametsi, ut dixi, moraliter necesse sit, aliquo tentationis notabiliter durantis momento tentatum labi, nisi gratiæ succurrat auxilium, ut docet Molina.*

Petavius inter Theologos ejusdem Societatis celeberrimus lib. 5. Theol. dogm. cap. 10. n. 11. eandem propugnat sententiam adversus Calvinum & Jansenium his verbis: *Plerique longa vitiorum consuetudine sic obdurati sunt & occalluerunt, ut occasione data, prope pecudum more, & quadam insuperabili necessitate rapiantur quocumque eos impetus ac libido tulerit. Nec tamen excussa illis est penitus arbitrii libertas, cui licet absolute reluctari possint & in contrarium niti, si velint, non tamen hoc facturi sient. Quod in demonibus, ac damnatis multò evenit magis, qui & liberè peccant, ut quæ faciunt, possint non facere; nec tamen facturi sunt, nec usuri liberæ potestatis arbitrio . . . Ille potestatis defectus non est absolute præcisèque capiendus, verum, ut jam dixi, moraliter, ut non posse agere id sit, nunquam velle movere se ad agendum, quamvis absolute queat; eadem docent Bellarminus, Suarez, Martinon, & Perrin supra laudati, c. 5. §. 1.*

CAPUT VIII.

De Effectibus gratiæ.

Q. 1. *Quotuplex est effectus gratiæ?*

R. Duplex, scilicet justificatio, & meritum.

Q. 2. *Quid est justificatio?*

R. Definitur à Concilio Trident. sess. 6. cap. 4. Translatio à statu peccati ad statum gratiæ & adoptionis filiorum Dei.

Ergo justificatio impii non est motus à privatione ad formam, sicut illuminatio aeris à privatione luminis ad lumen; sed est motus à contrario ad contrarium, scil. à peccato ad justitiam, quemadmodum calefactio est transitus à frigore ad calorem; ac proinde in justificatione impii sunt duæ mutationes partiales, juxta commune Philosopho-

rum effatum, generatio unius est corruptio alterius. Prima mutatio, est destructio seu expulsio peccati. Secunda, introductio seu productio gratiæ sanctificantis.

Q. 3. *Quid in justificatione est præcipuum, an remissio peccati, an gratiæ infusio?*

Resp. S. Thomas qu. 113. art. 1. infusionem gratiæ esse quid præcipuum; quia in omni motu magis intenditur terminus ad quem, quàm terminus à quo receditur: Atqui infusio gratiæ est terminus ad quem justificationis, remissio verò peccatorum est terminus à quo: Ergo.

Q. 4. *Forma justificans estne unus simplex habitus, vel collectio plurium?*

R. justificatio spectari potest vel essentialiter, vel integraliter: si spectetur essentialiter, una & simplex est ejus forma, nempe gratia sanctificans: si verò spectetur integraliter, forma ejus est collectio plurium habituum, scil. gratiæ sanctificantis, virtutum infusarum, & donorum Spiritus sancti.

Q: 5. *Justificatio impii estne maximum Dei opus?*

R. 1. Est opus Incarnatione minus; quia per Incarnationem homo fit substantialiter Deus: per justificationem verò fit divinum quid, scilicet. per participationem accidentalem. 2. Majus est creatione etiam Angelorum, saltem ratione termini, quia justificatio *Terminatur*, inquit S. Thomas, qu. 113. art. 9. *ad bonum æternum divinæ participationis, creatio verò ad bonum naturæ mutabilis.* Unde Sanctus Augustinus tract. 62. in Joan. ait: *Prorsus majus hoc esse dixerim (nempe impium justificare) quàm est cælum & terra, & quæcunque cernuntur in cælo & in terra.* 3. Justificatio cum glorificatione comparata, est quid majus sub uno respectu, & minus sub alio.

Respe-

Respectu subjecti est quid majus, quia major est distantia inter peccatum & gratiam sanctificantem, quàm inter gratiam & gloriam: *Judicet qui potest*, inquit S. Augustinus cit. tract. 72. *utrum majus sit justos creare, quàm impios justificare. Certe enim, si æqualis est utrumque potentia, hoc majoris est misericordiæ.* Respectu verò status, Beatorum status sine dubio præcellit statum justorum peregrinantium, cum habeat rationem termini & ultimæ perfectionis. Sed si gratia justificans, quæ permanet in Beatis, conferatur cum lumine gloriæ, nonnulli Theologi censent esse præstantius donum; quia se habet tum ad lumen fidei, tum ad lumen gloriæ, veluti natura ad suas facultates, quarum est radicale principium.

Q. 6. *Justificatio impii estne miraculum?*

R. Si fiat supra consuetum gratiæ operandi modum & præscriptum ordinem, v. g. si adultus sine præviis dispositionibus subito justificetur, ut S. Paulus, est verum miraculum; secus, si fiat secundum consuetum gratiæ operandi modum, quæ, sicut natura ab imperfectioribus incipiens paulatim ad perfectiora progreditur; nam ex S. Augustino tract. 5. in 1. Joan. *Charitas inchoata meretur augeri, ut aucta mereatur perfici.* Ita S. Thomas q. 113. art. 10. Et ratio est, quia ad verum miraculum duo requiruntur. Primum, ut opus excedat omnem virtutem creatam; Secundum, ut sit rarum & supra ordinem à Deo præscriptum. Hinc resurrectio est miraculosa, non verò hominis generatio; quia licet solius omnipotentia sit unire animam rationalem corpori, in posteriori tamen exemplo anima unitur præviis dispositionibus, & juxta consuetum naturæ ordinem: in priori verò extraordinariè & præter ordinem. Atqui subitanea impii justificatio extraordinaria est, & præter

consuetum gratiæ operandi modum : quæ verò paulatim perficitur, ordinaria est, & juxta communem ordinem à Deo præscriptum. Ergo prior est verum miraculum, posterior verò minimè. Ac proinde qui in cœno peccatorum volutatur hac spe, quòd in exitu perfectè ad Deum convertetur quorundam exemplo, puta latronis juxta Christum in Cruce pendentis, non minùs videtur tentare Deum, quàm qui lethalia vulnera sibi infligeret, confidens se à Deo mirabiliter sanandum; uterque enim temerè expectat miracula.

Cætera quæ pertinent ad justificationis essentiam, proprietates, & dispositiones, latè exposuimus Capite IV. ubi de Gratia habituali. De solo igitur Merito, quod est alter gratiæ effectus, nobis dicendum superest. Sed quia Meritum ex actibus bonis efflorescit, priùs tractandum videtur de Actibus humanis, & quærendum in quo consistat eorum bonitas, tum ex ordine deveniemus ad eorum species, quarum præcipua sunt actus meritorii.

M O N I T U M.

Quæ jam vidimus scripta in Jansenii gratiam ac defensionem, & quæ deinceps vulganda jactantur, ad id nos adducunt, ut moneamus eos qui nostrum de Gratia Tractatum lecturi sunt, nihil aliud voluisse nos in compendiosa illa Jansenistarum historia, nisi ut adolescentibus, qui instituuntur in Seminariis, breviter & pressè exponeremus quæ ab Ecclesia in ejusmodi controversiis judicata decisaque sunt. Cum enim fieri nequeat, ut sparsos de Jansenismo rumores auribus non excipiant adolescentes, operæ pretium facturos esse nos judicavimus, si,
ne pro

ne pro vero falsum arriperent, paucis eos doceremus quid Ecclesia tum de jure tum de facto judicasset.

Si minus fideliter Ecclesiæ decreta ac judicia retulimus, si præter mentem, aut addendo quid, aut detrahendo, aut in alium ab ejus consilio sensum detorquendo, corrupimus, id vitio nobis tribuendum erit, atque in hac parte accusantibus per nos erit faciendum satis.

Verum si rationes iterum ingerantur, quibus probetur nec de jure, nec de facto ritè judicatum, & Jansenismum nihil aliud esse quàm evanidam umbram, ac figmentum, contra quod Apostolica Sedes & Ecclesia Gallicana per annos quinquaginta temerè decertarunt, atque ita velint explodere, & in contemptum risumque adducere nostram expositionem, nec nos, nec illi, quibus hic noster Tractatus inserviet; quidquam habemus respondendum; quandoquidem tela illa non in nos, sed in Ecclesiam intorquentur, quæ pro sua auctoritate satis ipsa per se adversus rebellantium temeritatem decreta sua propugnabit.

Et certè ubi semel factum legitima auctoritate senatusconsultum est, taceat omnis oportet controversia; frustra jactabit causæ æquitatem suæ, qui causa cecidit; qui vero vicit, illi nihil incumbit dicendum, nisi litem esse judicatam; aliàs illa Tribunalia, quæ fovendæ tranquillitati publicæ Deus instituit, vana prorsus essent & irrita, Atque ut quisque suæ opinionis ac sententiæ tenacissimus est, regnarent æternum tum in Ecclesia, cum in omni Republica perpetuæ lites & jurgia; proculque exularet illa pax, quam suis Christus reliquit pretiosissimam hæreditatem.

Si loca quædam in Jansenio confusa nimis, & ambigua

bigua in dubium quosdam injecerunt, illi tam solemnibus Ecclesiæ judiciis devicti, omnem dubitandi rationem abjicere debuerunt, nulla Ecclesia privata illis non adhæsit judiciis, nullus in Gallia universa Præsul, qui cum Apostolica Sede Jansenii librum non damnavit. Itaque veræ Christi oves Pastori suo addictæ *non audiant vocem alienorum.*

Jam verò si quis dicat Ecclesiam non accepisse à Christo potestatem prohibendi libros, quorum lectio perniciosa sit Fidelibus, ille sanè incidet in errorem non mediocriter puniendum. Dicit quis Jansenii librum non prævio examine damnatum, non auditos ejus defensores, censuram per vim acceptam; quid aliud est, nisi dicere Ecclesiam contra bonos mores posse peccare? sic Calvinistæ loquuntur, qui queruntur assiduè se non auditos, & Episcopos in Concilio Tridentino summi Pontificis auctoritatem reveritos non liberè dixisse quæ sentirent.

Igitur nisi planè exhibeatur nobis Ecclesiæ decretum non esse ejusmodi ac retulimus; eandemque Ecclesiam non judicasse de jure & de facto ea quæ diximus; notum facimus nos nihil omnino responsuros ad ea, quæ in Jansenii gratiam proferentur, Deum silentes enixè rogabimus; det rebellibus docilitatem, ut omnes voci Pastorum obtemperent. Obtestamur porrò eos, qui hoc labore nostro uti voluerint, ut ea de re disputationes non conferant, quibuscum (his præsertim temporibus) consistere pax nullo modo potest: sed tranquilli quietique maneant in gremio Matris Ecclesiæ, quæ pro illis fortiter pugnat contra circumlatrantes rebelles: *Illa quippe rectissima disciplina est, in arcem fidei quam maximè recipi infirmos, ut pro eis jam tutissimè positos fortissimè pugnetur.* S. Augustinus epistola 118. aliàs 56.

F I N I S.



7008350

